


مختارات من مؤلفات

# سيرة أولاد عكاشة

<http://arabicivilization2.blogspot.com>

Amly



مسر حيات

♦ الناس الى في التالت  
دراما للمسرح في ندوة فصول

♦ أولاد اللذين  
سرحية في فصلين

♦ ليلة ٤١

♦ في عز الظهر



عكاشة، أسامة أنور.

الناس اللي في الثالث: دراما للمسرح في ثلاثة

فصول/ أسامة أنور عكاشة.. القاهرة : الهيئة

المصرية العامة للكتاب، ٢٠٠٩

٢٨٨ ص ٢٤ سم.

تدمك ٤ ٠٠٤ ٤٢١ ٩٧٧ ٩٧٨

١ - المسرحيات العربية.

١ - العنوان.

رقم الإيداع بدار الكتب ١٦١٣٣ / ٢٠٠٩

I.S.B.N- 978 - 977 - 421 - 004 - 4

ديوى ٨١٢



# مختارات من مؤلفات السَّامِرِ الْفَوَّارِ عَمَّكَ شَيْتْ

## مسرقيات

• الناس اللى فى التالت  
دراما للمسرح فى ثلاثة فصول

• أولاد اللذين  
سرمية فى فصلين

• ليلة ١٤  
• فى عذ الظهر



■ الكتاب : مختارات من مؤلفات

(الناس اللى فى الثالث - أولاد اللذين

- ليلة ١٤- فى عز الظهر) (مسرحيات)

■ المؤلف : أسامة أنور عكاشة

■ الطبعة الأولى : ٢٠٠٩

■ طبع فى مطابع الهيئة المصرية العامة للكتاب

■ الإخراج الفنى والغلاف : صبرى عبد الواحد

■ خطوط : أوس السندس



**الناس اللي فى التالت**  
**دراما للمسرح فى ثلاث فصول**

علي جبرام



فواصل في بحر الكتب



## هذه المسرحية.. بين الثابت والمتغير

لهذه المسرحية - عزيزى القارئ - قصة !... ولا أرى بأسا فى أن أقصها عليك قبل أن تقرأ ..

فى سبتمبر من العام الماضى ١٩٩٢ إنتهيت من كتابتها... وسلمتها وفقا لاتفاق مسبق - للفنان محمود الحدينى مدير المسرح القومى.. وكان مشكورا قد ألح على أكثر من مرة فى كتابة عمل درامى يقدم على خشبة أعرق مسرح فى مصر.. وأخيراً فعلت !..

ولم يضيع الأستاذ الحدينى وقتا فقد أسرع بتقديم المسرحية إلى رقابة المصنفات ليحصل على موافقتها لإدراج المسرحية فى خطة المسرح والشروع فى تنفيذها!

والمسألة لا تستغرق فى العادة ما بين أسبوعين إلى أربعة لكى تتم كل الإجراءات الروتينية ويصدر تصريح الرقابة..

وقد مر شهر.. ثم شهران.. ثم ثلاثة...

وسألت: ماذا حدث؟...

وأجابنى الحدينى: الرقابة طلبت تأجيل المسرحية.... لعدم ملاءمتها للأوضاع الحالية...

هل رفضتها ؟..

- لا !.....

- إذا فقدوافقت عليها؟... - لا !...-

لم ترفض الرقابة ولم توافق... ولكنها تركت الموضوع معلقا متذرعه بأنه فى ظروف تواجه فيها أجهزة الأمن عصابات الإرهاب التى تعيث فى أرض الوطن فسادا لا يصح ولا يجوز أن تقدم مسرحية يهاجم موضوعها .

.... حكم العسكر فى بلاد العالم الثالث»

وهكذا تخلط رقابة المصنفات خلطا لا يصح ولا يجوز فى جهاز يتعامل مع الإبداع الفكرى والفنى !.... ولم تميز بين الثابت والمتغير... ولا بين الجوهر الدائم والسطحى العارض....

وينطلق منطق الرقيب هنا من مغالطة منطقية فى الأساس إذ يضع قوة الحفاظ على الأمن الداخلى فى أى بلد.. ممثلة فى أجهزة الشرطة فى كفة واحدة مع نظام الحكم الذى يستمد شرعيته من المؤسسة العسكرية وحدها بوصفها «العضلات» الوحيدة فى جسد أى بلد من بلدان العالم الثالث !...-

فهذه المسرحية الناس اللى فى التالت تتحدث بوضوح ودون أى لجوء للرمز أو الإسقاط عن الحفاظة.. وانتهاك الحياة الخاصة للإنسان... واستلاب حريته.. والاعتداء على «حرماته» فى أى بلد يحكمها العسكر....

والعسكر ليسوا بالطبع أفراد الأجهزة الشرطية التى تطارد اللصوص والمجرمين والتى وجدت أصلا لحماية حقوق المواطنين وتأمينها...

إن العسكر.. لفظ صار اصطلاحا دالا على «نظام» وعقلية وأسلوب نستطيع أن نتبين ملامحه إذا نظرنا إلى أنظمة الحكم فى أمريكا اللاتينية.. وأفريقيا وأسيا....

إن أسماء مثل «كارلوس كاستيلو أرماز» و«جاكوبو أربنز»

«وأوجستو بينوشيه» «وفارجاس» «وروميلو بتيانكور» «وباتسيتا» و«تروخيللو»

فى جمهوريات الموز والبن والأناناس بأمريكا اللاتينية....



«وموبوتوسي سيكو» «وجان بيدل بوكاسا» «وصامويل دو» و«سياد برى»  
«وعبود» و«نميرى» «والبشير» «وعيدى أمين» فى أفريقيا.

«وسوهارتو» «ونى وين» «وكاى شيك» «وأيوب خان» «ويحى خان» «وضياء  
الحق» «ومحمد ارشاد» فى آسيا.

هذه الأسماء من أصحاب الرتب والبريهات وحذاء «البيادة» والجنرالات  
والكولونيلات والجواشييه ورثة الفاشيون العظام أمثال الجنيرال «فرانكو» وزميله  
«سالازار» ترسم لنا خريطة القهر واغتصاب الحرية فى عالم القرن العشرين..  
وهى نفس خريطة الفقر والتخلف التى أفرزت «نوريجا» فى بنما وبارونات البودرة  
فى كولومبيا والمجاعة فى أفريقيا...

حتى أصبح حكم العسكر هو لعنة العالم الثالث.. فحيثما يحكم العسكر تغيب  
الحرية.. وتصبح الديمقراطية نكته وتداس حقوق البشر بالأقدام.. تلك هى  
قضية الثابت حيث لا يختلف حولها رأيان... والثابت هنا...

هو إدانة الفاشيه العسكرية (... أمس.. واليوم... وغدا... )

أما المتغير.. فهو مشكلة إرهاب.. حيث يمكن أن يتم حسمها والتغلب عليها  
بعد حين.. يوم تجتث أسبابها ويتغير المناخ الذى يتيح لها الازدهار والنمو... وإذا  
كنا جميعا. كتابا وسياسيين ومواطنين. نقف فى صف واحد مع أجهزة الأمن ضد  
الإرهاب والقتل والعبث بمقدرات الوطن الاقتصادية ووحدته الوطنية.. فليس هذا  
ولن يكون.. مبررا للدوران حول الجوهر الثابت أو تمييعه أو تبريره...

إن الإرهاب نفسه جزء من أعراض المشكلة والمعادلة البسيطة المنطقية تقول  
إن القهر ينجب الإرهاب والقهر ليس فقط الحكم العرفى أو العسكرى...

وليس فقط نزول المصفحات إلى الشوارع.. ولا هو أيضا مجرد فتح المعتقلات  
والسجون.. فهناك ما هو أخطر... هناك القهر المعنوى !..

فالحرية المنقوصة التى يضيق هامشها أو يتسع وفقا لمزاج "الحاكم" ودرجة  
تسامحه.. نوع من القهر.. ووضع عقول الناس تحت الوصايه.. واعتبار

ال جماهير قاصره عن تحمل جرعة "الديمقراطية الكاملة نوع من القهر والاستمرار فى تألية الحاكم باعتباره الأوحد حكيمًا ومعلمًا وقائدًا... ولا بديل له نوع من القهر....

وابتزاز الناس بتخويفهم من المشاكل العارضة كالأزمات الاقتصادية والمشاكل الاجتماعية للمصادرة على حقهم فى الاختيار الحر.. نوع من القهر...

وحين يصبح القهر المعنوى من المسلمات التى يتقبلها المواطن وكأنها من طبائع الأمور.. ينهزم المواطن فى أعماقه.. ويصبح فى بيته ووسط أسرته.. مجرد كيان هش.... لا يصمد أمام أى محك! تلك هى القضية فى هذه المسرحية!

.. وإذ جمدها الرقابة بسبب عدم الملاءمة للظرف الحالى

فقد رأيت أن أعرضها فى كتاب للقراء

هذه هى قصة الناس اللى فى التالت

رأيت أن أسردها مدخلا لقراءة النص.. وأرجوا ألا أكون قد تجاوزت

أسامة أنور عكاشة

## الشخصيات :

### ١. الأم " وداد هانم " :-

سيده فى العقد السادس - ربة الأسرة بعد وفاة الأب..... شخصية تجمع بين حنان الأم المصرية العادية فى الطبقة الوسطى وحزم من تحمل مسئولية الأسرة مبكرا ولقى الكثير من العناء وما زال ليحول بين القارب وبين الفرق.

### ٢. سعيد " الأخ الكبير " :-

٤٠ سنة - ليسانس حقوق - مدير إدارة شئون قانونية بإحدى المؤسسات - تحمل مسئولية الأسرة معاونا لأمه بعد تخرجه.. كاد أن يفوته قطار الزواج ولكنه لحق بفرصة أخيرة يبدو رزينا ولكن رزانتة تخفى حالة إحباط - نموذج لجيله.. ربما كان له نشاط سياسى فى فتره سابقة.. ولكنه أفلح وانزوى.

### ٣. رباب " الأخت " :-

٢٢ سنة - عانس لسبب غير معروف (بمقياس السن فى الأسر

المصرية) فهي ليست دميمة وإن لم تكن أيضا ملفتة  
الجمال تعلمت حتى حصلت على شهادة متوسطة تعمل  
بها في مكتب بريد - يجنح سلوكها في الغالب نحو  
مبالغة ربما تدارى بها كثيرا من الشجون في أعماقها.

#### ٤. وحيد "الأخ الاوسط" :-

٢٠ سنة - حصل على شهادته الجامعية وتعطل حتى لاحت له فرصة  
للعمل بالخارج فسافر ولكنه يعود بعد شهور قليلة -  
شخصيه تميل إلى الأنانية والديماجوجيه.

#### ٥. هانى "الأخ الأصغر" :-

٢٥ سنة - مقعد نتيجة لحادث في طفولته سبب له شللا نصفيا -  
يتحرك على كرسى طبي بعجلات - رغم إصابته يتمتع بروح  
مرحه وطبع دمث - يميل للخيال وينظم الشعر..

#### ٦. وفيه "خادمة الأسرة" :-

فتاه ثلاثينية - تمت بصله قرابة بعيدة للأب الراحل - أحضرها  
لتعيش معهم منذ طفولتها - اعتبرت الأسرة أسرتها  
ولم تبعد عنها إلا لفترة زواج فاشل عادت منها لتلوذ  
بكنف الأسرة تهتم اهتماما خاصا بهانى وتكاد تكون  
متفرغه لرعايته.

#### ٧. منال "العروس" :-

٢٧ سنة - موظفة فى الإدارة التى يرأسها سعيد - خطبها بعد فسخ  
خطوبتها من شاب كانت ترتبط بعلاقة حب معه - جميلة  
ويبدو أنها وافقت على الزواج من سعيد كرد فعل لقصة  
الحب الفاشلة...

#### ٨. الرائد "رجل أمن" :-

مسئول التحقيق النفسى والفكرى.

٩ . النقيب "رجل أمن" .:

مسئول البحث القانوني والسياسي.

١٠ . الصول "رجل أمن" .:

مسئول المعلومات.

١١ . الجاويش "رجل أمن" .:

مسئول الاستتطاق البدني.

١٢ . مهيب "الجار" .:

٦٥ سنة تقريبا - كان صديقا للأب وبعد وفاته استأجر (كنوع من

تقديم المساعدة) غرفة الصالون ذات البابين:

باب على السلم وباب على صالة الشقة

(كالنظام السائد في الشقق التي بنيت في

الثلاثينيات) وأقام فيها.. ولعب دور الجار الراعي

للأسرة رغم ضعف إمكانياته المادية.. شخصية نموذج

للأعزب الذي لا يرتبط بهدف ولا يوجد لديه ما

يحرص عليه إلا عاداته الشخصية .

الزمن :-

الوقت الحاضر - من العاشرة مساءً إلى التاسعة صباح اليوم التالي.

المكان :-

شقه بعمارة من العمارات القديمة المطلة على ناصية بشارع رمسيس - فى الجزء الواقع ما بين ميدان رمسيس باب الحديد\* وميدان العباسية.

المنظر :-

هو منظر واحد للفصول الثلاثة . صالة شقة الأسرة:

فى المقدمة جزء من الشرفة المطلة على الشارع الرئيسى والتي تتصل بصالة الشقة عبر باب.. وبحجرة النوم الرئيسيه عبر باب آخر.. على الصالة أيضا تفتح ثلاث أبواب غير باب الشقة الرئيسى - باب حجرة النوم الرئيسيه وباب حجرة أخرى وباب حجرة الصالون المؤجرة والذي نرى عليه مزلاج "ترياس" لا يفتح إلا من الصالة.. الصالة تحتوى على أثاث كلاسيكى قديم.. سفرة.. وطاقم انتريه من القطيفه المشجرة ومشجب زان على كونسول عند المدخل - بجوار المدخل ممر يودى إلى ما يفترض إنه الحمام والمطبخ - الأبواب هنا وفق الطراز السائد فى مثل هذه المباني من الخشب والزجاج الانجليزى "ربما ملون" - الجدران مغطاة بورق حائط قديم باهت النقوش وتتحلى بباנוهات عليها صور فى أطر قديمة للأب والجد وأفراد الأسرة..



## الفصل الأول



هانى: .. تلاقيه برضه عسكرى.. ومعظم الدول اللى استقلت قريب حاكمينها  
عساكر.. أى كولونيل أو ميجور أو حتى شاويش يصحى بدرى يعمل انقلاب وينط  
على الكرسي ومش بس فى أفريقيا.. فى كل دول العالم الثالث.



## الفصل الأول

(مع البلاك أوت تنبعث موسيقى الاوفرتيره التى يجب أن تتضمن تنوعا على لحن زفة العروس الشائع مع تمهيد يوحى بالترقب والتوتر).  
(مع رفع الستار وإضاءة المسرح تصمت الموسيقى.. وتنبعث أصوات أغاني أفراح على مسجل كاسيت موضوع على رف البوفيه.. من ممر المطبخ تدخل وفيه حامله صينية فرن تتجه بها نحو السفرة وهى تترنم مغنية فى مصاحبة للشريط الدائر..)

**وفيه:** قيدو الشموع واتهنوا الليلة.. عقبالهم كل حبايب العيله (من الممر تدخل رباب بدورها وهى تحمل طبق عليه زوج من الدجاج المحمر).  
واحنا اللية دى.. كدنا الأعادى..

**رباب:** خلاص يا وفيه.. كده يبقى كله تمام.. ياللابقى غطى الأطباق بالمفرش.. لغاية ماما ما ترجع ونسألها نخلى الأكل عالسفرة ولا ندخله أودة العرايس!...

**وفيه:** (وهى تشرع فى فرد المفرش على الأطباق) حاضر.. ولو إنى متأكدہ إن الست الكبيرة حاتقول دخلوه جوه.. اصل دى لقمة الاتفاق.. لازم تبقى فى الأودة ساعة العريس والعروسة أما يدخلوا عشان يتعشوا لوحديهم.. (تضحك) عقبال ما تجربى ليلة فرحك يارب..

**رباب:** (بمراره عابره) ليلة فرحى... هى فى دى؟ والله باين عليها وقعت من حسبة الزمن يا وفيه!..

وفـيـه: (بجزع) لا ياختى.. بعد الشر.. هو إنت فيه زيك يارباب غيرش بس  
ربنا محوشلك ابن الحلال اللى يستاهلك..

ريـاب: (تقاطعها بعصبية) خلاص يا وفيه.. غيرى الموضوع.. أنت مش  
كنت بتغنى؟..

وفـيـه: ايوه.. بس اغير الشريط.. نخط الشريط بتاع مصطفى قمر.. ولا  
إيهاب توفيق..

ريـاب: (ساهمه) اى حاجة.. اى حد.. أى دوشه والسلام!. (وفيه تسرع إلى  
الكاسيت وتغير الشريط)

وفـيـه: (وهى تصفق مع ايقاع الأغنية) يا غزال يابو قصه وشال.. حبك  
فى القلب اتشال...

(صوت صراخ هانى من الخارج)

هـانى: (من الخارج) لأ.. دا كثير.. كثير...

ريـاب: ايه ده؟ هو هانى بينده يا وفيه؟... (من باب حجرة الأسرة المفتوح..  
يندفع هانى داخلا بكرسيه الطبي)..

هـانى: هانى مش بينده.. هانى بيصرخ.. بيستغيث.. بيقول زى بيرم  
التونسى ما قال زمان.. يا هل المغنى دماغنا وجعنا دقيقة سكوت  
لله..

ريـاب: ليه؟ الكاسيت عالى؟... وطيه شويه يا وفيه...

وفـيـه: دى ليلة فرح يا هانى.. ولازم نسمع الجيران....

هـانى: والجيران ذنبهم ايه بس؟.. وبعدين فيه أغانى رقيقة وحلوه وتنفع  
للفرح برضه..

(وهو يخرج شريط كاسيت من جيبه) خدى.... شغلى ده....

وفـيـه: (وهى تتناول الشريط وتتحرك به نحو المسجل).. وده بتاع؟ يوه..  
دى فيروز..

ريـاب: فيروز؟ يا خبر يا هانى؟.. بقى فيروز برضه فى ليلة زى دى؟..

هـانى: ليه لأ؟ لما صوت ملائكى زى ده يغنى فى ليله زى دى... يبقى شىء



متحضر.. ولا الفرح لازم يكون خبط ورزق ودوشه؟.. اعملى بلاى يا  
وفيه وسمعنيا..

**وفيه:** (وهى تضغط زر التشغيل) طيب !!

(ينبعث صوت فيروز فى اغنيه "اطلعى يا عروسه عاكرمنا فيه عنب)

**هانى:** آهى بتغن للعروسه اهه (.. مالها بقى؟..

(صوت دقات على الباب المشترك..)

**رياب:** الحقوا عم مهيب بيخبط ..!

**وفيه:** (تقترب من الباب المشترك) ايوه ياأستاذ مهيب؟..

**مهيب:** (من الخارج) علوا الكاسيت عشان نسمع...

**هانى:** (مصفقا فى طرب) شفتوا؟.. على الكاسيت يا وفيه. (صائحا) لأ..

سميع صحيح يا عم مهيب...

**مهيب:** (من الخارج) شكرا.. هم العرايس لسه ماجوش؟..

**هانى:** لسه...

**مهيب:** انا مستتيك بعد ما ييجوا....

**رياب:** انت لسه مصمم تقعد معاها فى اودته يا هانى؟..

**وفيه:** الحكاية دى مزعله الست الكبيرة قوى...

**هانى:** طيب قولوا لى نعمل ايه؟ مافضلش فى الشقة غير اودة واحدة بعد

الاوده الكبيره ماخدها آبيه سعيد هو وعروسه.. أنا وماما وانت يا

رياب ووفيه أربعة.. حاشام ازاي فى اودة واحدة؟..

**وفيه:** انا وضبت لى نومه خلاص فى الصندره.. نضفتها وفرشتها وهياتها.

**رياب:** وانا وماما عالسرير الكبير.. وانت على سريرك.

**هانى:** السريرين زحموا الاوده يا رياب.. مابقاش فيه مكان للكرسى بتاعى

يتحرك.. يعنى لازم حد يشيلنى من عند باب الاوده للسرير.. وم

السرير للباب...

(يصمت الثلاثة.. يظل صوت الكاسيت وحده.. هانى يطرق واحما..

ورباب تشيح بوجهها.. بينما تتقدم وفيه فى تأثر)

وفيه: خلاص.. على راحتك ياخويا.. وماله لما تقعد مع الاستاذ مهيب  
انتوا الاثنين منسجمين سوا.. وهو بيحبك زى ابنه بالظبط..

هانى: (دون أن يتخلص من وجومه) اطفى الكاسيت يا وفيه...

(يتحرك بكرسيه نحو الشرفه)

(تتقدم رباب خلفه بينما تغلق وفيسه الكاسيت)

رباب: طالع الفرانده ليه يا هانى.. الجو برد....

هانى: ابدأ.. عايز ابص عالشارع شويه....

(وهو يتطلع من خلال سور الشرفه فى الافانسين) ايه ده؟ دول

بيعلقوا زينات.. تعالى اتفرجى يا رباب.. وبيعملوا أقواس نصر كمان..

رباب: (وهى تطل من فوق كتفه متابعه ما يشير نحوه).. ايوه صحيح

(مازحا) الحكومة بتحتفل معانا بزفاف أبيه سعيد..

رباب: سمعتهم فى نشرة التلفزيون بيقولوا إن فيه رئيس دولة أفريقيه

جاي بكرة.. تلاقيه هو والرئيس بتاعنا حايفوتوا من هنا...

هانى: الله.. حاتبقى فرجه... يا ترى مين الضيف ده؟.. (وهو يدير كرسيه

ليعود إلى الصاله) تلاقيه برضه عسكري.. معظم الدول اللى

استقلت قريب حاكمينها عساكر.. اى كولونيل أو ميجور أو حتى

شاويش يصحى بدرى يعمل انقلاب وينط على الكرسي ومش بس

فى أفريقيا.. فى كل دول العالم الثالث..

رباب: (تتركه مبتعدة) حايتدى كلام فى السياسه وسبحان من يسكته

حتى شريط أفراح يا وفيه.. لا ماما تيجى تلاقى البيت ساكت

نتهمنا إننا مش فرحانين..

وفيه: (تضحك وهى تغير الشريط وتدير الكاسيت) على رأيك..

هانى: مفيش فايدة.. ارجع الفرانده تانى أحسن.. (يلف بكرسيه نحو الشرفه)

(مع انبعاث صوت الاغنيه، يفتح الباب الرئيسى.. وتظهر وداد هانم)

وداد: وفيه..)

(وداد ترتدى فستان أسود محلى بالترتر.. رخيص ولكنه يصلح

لمناسبه.. خلفها يبدو البواب حاملا علبتى حلوى ملفوفتان).

**وقـيه:** ايوه ياست هانم..

**وداد:** خدى علتين الكحك من شمندى وحطيهم فى البوفيه..

**وقـيه:** (وهى تسرع لتناول العلب من البواب) هات يا عم شمندى متشكرين.. وعقبال ولادك...

**البواب:** (خارجا) متشكرين.. ربنا يتمم بخير...

**وداد:** (تتقدم) خلصتوا الطيبخ يا ولاد؟...

**ريـاب:** ومحطوط عالسفرة متغطى يا ماما.. تحبى ندخله أودة العرايس؟

**وداد:** (وهى تسرع إلى السفرة وتكشف الغطاء) امال يارياب المفروض

يلاقوه جاهز فى اودتهم.. تعالى يا وفيه.... خدى الصينيه بالأطباق

والمفرش ودخليها الاوده.. حطيهما عالطقطوقه الكبيره اللى جنب

الدولاب..

**وقـيه:** (تنفذ تعليماتها) حاضر...

**ريـاب:** آمال العريس والعروسة فين؟

**وداد:** معزومين على المسرحية بتاعة عادل إمام.. بعد أصحابهم وزمايلهم ما

هيصوا لهم شوية فى النادى اللى أجروه.. خدوهم يسهرهم فى

المسرح.. كانوا عايزينى معاهم.. ومسكوا فى .. بس أنا قلت لهم

ماليش تقل على المسرحيات.. وكان لازم ارجع اتطمئن على كل حاجه.

**ريـاب:** (شارده) والحفله كانت حلوه...

**وداد:** قوى يا رباب.. اسكتى.. أخوكى كان زى القمر الليلة.. ولا عروسته

تقوليش ملكة جمال...

**ريـاب:** كان فيه معازيم كثير؟..

**وداد:** كل زمايلهم وأصحابهم و... و.... (تصمت فجأة.. بعد لحظات

تتأمل ابنتها فيها) .. كان لازم تحضرى يا رباب...

**ريـاب:** (بمراره) ليه؟.. كان فيه عرسان كثير؟..

**وداد:** امال البنات يتجوزوا إزاي يا بنتى لو ماكانوش يستنهزوا فرصة

مناسبات زى دى؟

ريـاب: والنبي تسكتي يا ماما .. بلا جواز بلا غيره !

وداد: (بعصبية) انت دايما كده منشفه ريقى وواجعه قلبى ..

ريـاب: كنت عايزانى اروح الفرح بأيه يا ماما؟ .. بجيبة وبلوزة؟ ولا بفستان

موضته بطلت بقى لها سنين؟ ولا اعمل زيك واشحت فستان سواريه؟

وداد: خلاص ! حقك على... ماتسمعنيش الموشح اللى حفضته وزهقت

منه .. آه يا قلبى...

ريـاب: (تسرع نحوها) .. مالك؟ ..

وداد: (وهل تتلمس مكان كرسي الانتريه لتجلس) مفيش .. رجلى وجعتنى

م الوقفة فى الحفله وطلوع الاربع تدوار هنا .. (وهى تجلس) اربع

تدوار بس .. لكن الدور باثنين .. وأسا نسير عطلان بقاله تمن

سنين .. والصحه بتخسح سنه ورا سنه .. والخلق بيضيق ..

ريـاب: (معلقة) والشقه بتضيق معاه .. الاول الاوده اللى عالسلم ياخذها

عم مهيب وبعدين اودة النوم الكبيرة ياخذها آبيه سعيد .

هانى: (من مكانه فى الشرفه) وحظر التجول بيزيد ..

وداد: (تكتشف وجوده فى الشرفه) يوه ! .. أنت عندك بتعمل إيه؟ ..

هانى: مستنى الموكب .. (يستدير بكرسيه فى مدخل باب الشرفه)

وداد: (تنهض متحامله على نفسها) موكب ايه يابنى؟ ..

ريـاب: الروياسا اللى حايعدوا .. بس ده لسه بكره ! ..

هانى: عليكى واحد .. أنا مستنى موكب العروسين السعيدين .. مش

حايجوا برضه فى عربيه متزوقه وراهم عربيات بتزمر ؟

وداد: منين يا حسره؟ .. دى حته عربيه واحده بتاعة محمود زميله وعطلت

بيهم وهو جايب العروسه من عند الكوافير ..

(صوت ارتطام أخشاب وسقوط أشياء ثقيه)

هانى: هوبا .. البيت بيقع !

ريـاب: ايه ده ياماما؟ .. الصوت جاى من اوده العرايس ...

(تدخل وفيه مذعوره من باب الحجرة)

وفيه: (مولوله) الحقيني يا ست هانم...

وداد: فية ايه يا وفيه؟

وفيه: وقع !

ريباب: هو ايه اللي وقع؟

وفيه: السرير الجديد.. سرير العرايس !

هانى: (يضحك مقهقها) ارمى؟

وفيه: والنبى يا ست هانم ماجيت ناحيته ولا لمستته.. دانا يادوب حطيت اطباق الأكل.. ووسطنت الطقطوقه بين السرير والدولاب وحطيت حواليتها كرسى التسريحه وكرسى الماركيز للى دخلناه النهارده الصبح.. عشان يقعدوا ياكلوا.. وجيت خارجه.

وفيه: لقيت السرير بيقع !

هانى: (وهو يتقدم بكرسيه) طيب عيني فى عينك كده !

وفيه: (بشئ من الارتباك) هانى.. بلاش هزار فى الحاجات دى.

هانى: بقى انت مازاغش السرير فى عينك.. وقتلى اجره؟

وفيه: كده؟ والله ازعل منك وماكلمكش ابدًا...

وداد: خلاص.. احنا حانقعد نرغى والسرير واقع جوه؟... ياللا يا وفيه تعالى معانا يارباب ننصب السرير تانى قبل اخوكى وعروسته ما يرجعوا...

(الثلاثة يخرجن إلى غرفة النوم المفتوحة.. ويتقدم هانى بكرسيه

إلى منتصف الصاله)

هانى: شئ منطقى جدا.. فراش وثير وعليه مفرش ناعم بيلمع.. شئ مغرى جدا لأى حد يتمرغ عليه لحظة ومفیش حد شايفه..

(دقات على الباب المشترك)

هانى: ايوه يا عم مهيب.. (يتحرك نحو الباب المشترك وفى طريقه يمد يده ليغلق الكاسيت)

مهيب: (من الخارج) ايه اللى حصل يا هانى؟ سمعت صوت دربكة جامده..

هـانى: (وهو يزيح الترياس) تعالى يا عم مهيب.. افتح بقى من عندك..  
(صوت فتح اكره.. ثم يفتح الباب ويدخل مهيب.. يرتدى حلة سهره  
سموكنج قديمه وقد ضاقت عليه وبدا محشورا فيها وياقة القميص  
بدون كرافات أوبايون).

مهيب: طمنى يابنى.. فيه ايه؟..

هـانى: ابدأ.. وفيه كانت بتودى صينية العشا اودة العريس.. منظر سرير  
العرايس الجديد اغراها.. حبت تسطح عليه من نفسها والظاهر  
لقت المرتبه طريه انتططت عليها.. السرير ماستحملش وقع.

مهيب: (وهو ينظر فى اتجاه حجرة النوم) وهم دلوقت بينصبوه؟..

هـانى: طبعا.. امال حايسيبوا فراش الزفاف على الأرض؟..

مهيب: طيب الحمد لله أنه وقع دلوقت.. لو كان وقع والعريس والعروسه  
جوه كان بقى موقف محرج.. (يضحك) تخيل.. كلنا الصوت يفرعنا  
ونجرى عالوده.. وهم جوه.. والمسائل.. مش ممكن..

هـانى: (عابثا) هو إيه اللى مش ممكن يا عمى؟.. هه؟.. نفسك انت تشوف  
منظر زى ده...

مهيب: بطل شقاوه ياولد....

هـانى: وايه اللى لابسه ده؟.. رايع حفله تنكريه ولا كرنفال؟..

مهيب: (باعتزاز) دى بدلة فرحى!.. مالبيستهاش من خمسة واربعين سنه...

هـانى: بس دى ضاقت عليك قوى.. دخلت فيها ازاي؟..

مهيب: (وكأنه لم يسمعه).. أنا والمرحوم باباك فصلنا البدلتين عند نفسى

الترزى وفى نفس الوقت.. كان فرحى وفرحه فى نفس الشهر حددنا

نفس الميعاد.. بس عشان كل واحد مننا يحضر فرح التانى اتفقنا

بيدأ هو فى الخميس الاولانى.. وأنا الخميس اللى بعده..

هـانى: (مغيرا الموضوع ليبيعه عن الذكرى) بس انت لابسه الليلة ليه؟

مهيب: مش ليلة فرح سعيد ابن صديق عمى وحبيبي؟.. (بشئ من

المراره).. صحيح هو ماعزمنيش والست وداد هانم قالت لى خليك



مستريح يا مهيب.. لكن ده ما يمنعش اعمل الواجب.. لبست  
ومستنى لحظة وصول سعيد وعروسته عشان استقبلهم على  
السلم.. واهنيهم واديهم هديتى.. بس...

هانى: بس ايه يا عمى؟..

مهيب: قلبت الاوده عالبابيون يا هانى مش لاقيه.. مش عارف راح فين مع  
انى شايه مع المنديل والكوفيه وزراير القميص.. اختفى..

هانى: ضرورى يعنى البابيون؟..

مهيب: طبعا وإلا البدله كلها ماتمنعش.. تبقى نكتة..

هانى: طيب ايه رأيك فى اللى يجيب لك بابيون؟..

مهيب: صحيح.. ولا حاتعمل فى حركة من بتوعك؟..

هانى: انا ابتكلم جد.. ماما شايه حاجات المرحوم بابا فى ضرفه من دولابها..  
ولحت فيهم مره بابيونات وكرافتات.. عايز بابيون لونه ايه؟..

مهيب: لا.. يا هانى.. ماقدرش.. الهانم والدتك بتعتبر مخلفات المرحوم  
مقدسة.. دى.. دى كانت تطين عيشتى..

هانى: حاجة غريبه قوى.. انت بتخاف من ماما كده ليه يا عمى؟..

مهيب: أنا؟.. ابدأ.. دا مش خوف.. دا احترام.....

(صوت وداد من الخارج)..

وداد: (من الخارج) بس كده خلاص.. بقى جامد زى الحديد

(ينتفض مهيب فى ارتباك ويجرى نحو الباب المشترك)

مهيب: أنا.. أنا فى اودتى.. مستنيك زى ماتفقنا.. (يخرج الى غرفته  
ويغلق الباب المشترك)

(تدخل وداد وخلفها رباب ووفيه)

وداد: ياساتر.. دى هدة حيل.. (تجلس لاهته وهى تجفف عرقها)

وفيه: ما قلت لك يا ست هانم سيبينى أنا ورباب واستريحى  
انت..

(تواصل خروجها إلى ممر المطبخ)

وداد: وأنتوا بتعرفوا تعملوا حاجة من غيرى؟ بلاهم.. (تتلقت حولها) كده  
كويس.. الشقه نضيفه ولا زهرية فيها ورد ولا.. ايه ده؟.. رباب

رباب: نعم يا ماما؟..

وداد: انت حاتقابلى عروسة أخوكى بهدم البيت؟..

رباب: دى مش هدم بيت يا ماما.. دا فستان خروج...  
وداد: قديم وبهتان وبقي شكل قمصان النوم.. روحى البسى الفستان  
الأزرق أبو فيونكه على الكتف..

رباب: (محتجة) الفستان اللى حيلتى باخرج بيه خروجه نضيفه.. البسه  
فى البيت ليه؟

وداد: مش كفايه ماحضرتيش الفرحة؟.. عايزه العروسة تقول إيه.

رباب: تقول اللى تقوله بقى.. هو مين يعنى من أهلها اللى حضر؟ مش بتقولى  
إن مامتها وباباها فى الخليج وما حضرش غير أخوها ومراته؟

وداد: ظروفهم كده...!

رباب: واحنا ظروفنا كده ونص...!

هانى: اختصرى الطريق يا رباب وادخلى البس الفستان.. حاتلبسيه  
حاتلبسيه.. والنقاش مش حايجيب نتيجة.. الأوامر صدرت !

رباب: (تتحرك خارجة فى غضب) مش لابسه حاجه.. هه..!

وداد: (مستديرة نحو هانى).. أدى اللى بناخده منك !.. لسان وبس !..

هانى: (بوجوم مفاجئ).. أنا عندي إيه اديهولكم غيره يا ماما؟..

(وداد تتصلب مكانها.. ثم تنهض فى بطء.. وتتحجج إلى كرسى  
ابنها.. تلمس كتفه.. ينكس رأسه.. تركع فجأة بجوار الكرسى وهى  
تمسك بيده...)

وداد: سامحنى يا هانى.. مش قصدى يا حبيبى.. (تجهش بالبكاء وهى  
تقبل يده)...

هانى: (يمد يده الأخرى ليريت على رأسها.. محاولا سحب يده التى  
تمسكها).. ماما.. اعملى معروف ماتعيطيش.. عشان خاطرى..

**وجداد:** سيبني اعيط يا هانى.. من طلعة النهار وانا مخنوقة.. مش طايقه نفسى...

**هانى:** معقولة يا ماما.. المفروض الدنيا النهارده ماتساعكيش م الفرحة !.

**وجداد:** (وهى تنفصل عنه برفق وتنهض وهى تجفف دموعها) أدبك قلتها

المفروض ب.. بس مش دايمًا المفروض بيحصل.. لا الفرحة فرحة

بصحيح.. ولا الجوازه جوازه بجد.. لو تشوفها شامخه على اخوك

ازاى وكأنها بتعطف عليه ولا متجوزاه غصب.. وهو يا عبنى عامل انه

فرحان.. بيتظاهر! لكن جوه عينه الفرحة مطفيه. مفيش حاجة

بتلمع.. ووسط الحفله.. والناس حوالينا.. أخوها بيقول لها حانشوفك

بكره بقى يا منال ونيجى نصبح عليكى.. بصت لـ اخوك وقالت.. استتوا

أما نشوف الأول فيه مكان تقعدوا فيه لما تيجوا تزورونا..

**هانى:** اخويا ماغصبهاش وماخباش عليها حاجه.. ومتجوزاه وهى عارفه

انها حاتقعد مع مامته واخواته..

**وجداد:** واحده قرشانه من قرايبها قامت تسأله.. امال فين اخواتك يا

أستاذ سعيد؟.. ماردش يا عين أمه...

**هانى:** (مستفزا) وماردتيش انت ليه؟..

**وجداد:** (بلهجة زجر حاده)

أرد اقول ايه يا بنى؟ انشر همومى على حبل غسيل قدام الناس

واقول لهم اخته العانس معقده من الناس ومارضيتش تحضر الفرح

عشان ماعندهاش فستان سهره؟.. وأخوه التانى مسافر يشتغل بره

بقاله تسع شهور مابعتناش جواب.. والثالث مربوط فى كرسى؟..

(تتسمر مكانها.. وهانى ينكس رأسه مره أخرى.. تسود لحظة

صمت.. ثم تستدير نحوه..)

**وجداد:** هانى....

**هانى:** ماتقوليش حاجة يا ماما..

**وجداد:** (تسرع نحوه) رب اقطعنى.. انا مالى النهارده....

**هانى:** (يرسم بسمه مقتضبه).. انت اتعرضتى لضغط مش هين النهارده.

وداد:

(وهي تحتضنه من الخلف وتمسح على شعره) .. قوى يا حبيبي .. !  
ولسه بكره كمان .. الصباحيه والناس اللي حاييجوا يصبحوا عليها  
والكلام اللي حايلقحوه ..

وداد:

هانى: (يربت على ذراعها مهدئا) ما حدش منهم له حق ينطق كلمه .. !  
معهلش .. الغلطه غلطه أبيه سعيد .. وأنا اقترحت عليه يحجز ليلتين  
فى أى لوكانده معقوله .. وبعدها يجيب عروسته وييجى ماردش على  
ولا عبرنى ..

وداد:

(وهي تتركه) حايرد يقول ايه يا هانى! هو معاه؟ .. دى مصاريف  
الفرح عامل بيها سلفه تنقسط على ماهيته .. واخوك وحيد اللي قال  
له وهو مسافر شهرين بس يا سعيد وحابعت لك الفين دولار تكمل  
بيهم جوازتك .. وبدل الشهرين فاتوا تسعه مابعتش الفين ملیم .. !  
هانى: (بمراره) زى ما قاللى حابعت لك مصاريف رحلة فرنسا عشان تعمل  
العمليه ..

وداد:

مين عارف ظروفه ايه يابنى! .. بس على الأقل كان يطمئنا عليه ..  
يقول لنا أخباره ..

وداد:

(ينبعث صوت سياره منغم من الشارع)  
هانى: وصلوا .. دا صوت كلاكس عربيه محمود .. أنا حابص عليهم من البلكونه  
(يسرع مديرا كرسيه إلى الشرفه .. بينما تنتقض وداد استعداد)  
وفيه .. رباب .. ياللابسرعه .. العريس والعروسه وصلوا ..  
هانى: (من الشرفه) هم يا ماما .. هم ..  
(تدخل وفيه مسرعه .. ثم رباب)  
رباب .. حظى شريط الزفه فى الريكورد .. وأنت يا وفيه .. افتحى  
باب الشقه وزغرتى ..

(رباب تسرع إلى المسجل وتضع به شريط)  
وفيه: (وهي تفتح باب الشقه) .. وأنا حاستنى اما يطلعوا؟ .. انا حانزل  
اقابلهم .. (تخرج وهي تطلق زغروده .. بينما ينبعث صوت اغنيه زفه

من الريكوردر.. أمام باب الشقه المفتوح؟ يظهر مهيب.. الذى يطل  
بحذر من باب الشقه.

مهيب: مساء الخير يا وداد هانم..

وداد: مساء الخير يا مهيب...

مهيب: ألف مبروك وعقبال ما تفرحى بولاده..

وداد: ان شالله يخليك..

مهيب: بعد اذنك.. انا حاستنى العريس وعروسته هنا عالبسطه عشان اباركلهم.

وداد: وماله ياخويا.. ما تتفضل جوه.. هو انت غريب..

مهيب: (متشجعا وهو يخطوه بحذر داخل الصاله) متشكر...

وداد: (وقد لاحظت ان مزلاج الباب المشترك مرفوع) .. ايه ده؟ مين اللى

فتح الترياس ده؟ .. انت كنت هنا يا ميهب؟...

مهيب: (وقد ارتج عليه) انا .. انا .. عدم المؤاخذه يا هانم.. اصلى (هانى) يتقدم

بكرسیه من الشرفه الى الصاله.. بينما نسمع زغاريد على السلم)

هانى: أنا اللى فتحت الترياس يا ماما.. كان عمى مهيب سمع صوت السرير

لما وقع حب يتظمن.. وطمنته ورجع أودته.. وأنا نسيت ارجع الترياس

وداد: (بعصبية غير مبرره) كده؟ طيب.. عموما مش وقته.. (تتقدم الى

باب الشقه)

مهيب: (لهانى) اللى أنا عامل حسابه حصل!..

هانى: (هامسا) حانتسى!..

(تقترب أصوات الزغاريد.. ثم يظهر العروسان على البسطه

وخلفهما وفيه مستمره فى إطلاق الزغاريد..)

وداد: أهلا بالعرايس.. نورتوا بيتكم...

(يدخل سعيد متأبطا ذراع منال.. هو يرتدى حله كحلية وكرافات

أحمر.. بينما ترتدى هى فستان زفاف متوسط القيمة)

سعيد: مساء الخير.. متشكرين يا وفيه.. كفايه زغاريد.. تعالى يارباب قريى...

رياب: (وهى تقترب من العروس) ألف مبروك...

منال: (وهي تعطيها خدها لتقبلها) مرسى... عقبالك..

ريباب: (وهي تعانق سعيد) مبروك يا آبيه..

سعيد: الله يبارك فيكى...

(يسحب منال من يدها نحو هانى.. هانى اخويا يامنال..)

هانى: (وهو يمد يده لها) الله.. زى القمر يا آبيه.. مبروك..

منال: (تصافحه) مرسى خالص..

(يتقدم مهيب نحوهم وهو يبحث فى جيبه عن شئ)

مهيب: بعد اذنك يا وداد هانم.. مبروك يا سعيد يا حبيبى.. مبروك يا

منال يا بنتى...

سعيد: الله يبارك فيك يا عمى.. دا الاستاذ مهيب يا منال.. كان صديق

المرحوم بابا الروح بالروح.. و.. وجارنا..

منال: أهلا..

مهيب: (يخرج من جيبه علبة قطيفه صغيره.. يقدمها لسعيد) خد يا سعيد

هديه متواضعه على قد راجل عجوز.. زراير ذهب للقميص.. ذهب

بندى عيار اربعه عشرين.. كانت هدية عروستى لى من خمسه

واربعين سنه.. لما الزفاف ماتمش.. حلفت يفضلوا عشان اقدمهم

هدية زفاف لابنى لو ربنا رزقنى.. وأنت ابنى يا سعيد..

منال: ايه الفال الوحش ده؟..... زفاف ماتمش... وزراير قميص..

معقوله يا سعيد؟..

وداد: خد زرايرك وارجع اودتك يا مهيب..

مهيب: (كاسف البال.. مطرقا) انا آسف.. حاضر.. (يرفع وجهه لسعيد)

معلش يا بنى.. الظاهر الواحد كبر ومابقاش عارف إيه اللى بيقوله..

سعيد: ماحصلش حاجة يا عمى..

مهيب: يعنى مش حاتاخد الزراير؟..

وداد: قلت لك خد زرايرك وارجع اودتك يا مهيب..

سعيد: (مبادرا) حاخد الزراير.. هديتك الجميله مقبوله يا عم مهيب

ومتشكر قوى..

(بيد مرتجفه تأثرا.. يقدم مهيب العلبه سعيد الذى

يتناولها)

**مهيب:** (يعانق سعيد.. بصوت باكى متهدج) انا الى متشكر يا سعيد  
متشكر قوى يا بنى..

**وداد:** العريس والعروسه عايزين يرتاحوا..

**مهيب:** ايوه طبعا.. ربنا يهديكم ويسعدكم.. تصبحوا على خير.....

(يتحرك بتناقل إلى الخارج)

**هانى:** افتح لى الاكره من عندك يا عمى عشان ادخل انام انا كمان...

**مهيب:** حالا... مسافه مالف وادخل.. (يخرج)

(تنظر منال بدهشه واستفسار لهانى الذى يتحوك نحو الباب المشترك)

**هانى:** (يتوقف فى طريقه عندها) اصل الاوده دى كانت تبعنا.. وبعدين أجربناها

للأستاذ مهيب.. وماما اصرت يبقى فيه احتياط مزدوج.. تریاس على

الباب من هنا.. والاكره تفتح من هناك.. لو فتح هو الاكره مايقدرش ندخل

يدخل الا إذا فتحنا التریاس.. ولو فتحنا احنا التریاس مانقدرش ندخل

عنده إلا إذا فتح هو الأكره.. يعنى لازم الاتنين مع بعض.

**وداد:** (بعصبية وغيظ) مادمت مصمم تبات عنده ياللا وبلاش رغبى فى

الفاضى (الباب المشترك يفتح..)

**مهيب:** (من الخارج) فتحت الباب يا هانى.. تعالى.

**هانى:** (يتقدم بكرسيه الى الباب ويلتفت لهم برأسه ويلوح بيده) تصبحوا

على خير.. ليلة زفاف موفقه وسعيدة إن شاء الله..

(يخرج والباب يغلق.. تسرع وداد لتغلق المزلج)

**وداد:** (ترتد للداخل) ماتاخديش فى بالك يا منال يا بنتى.. الولد ده

دايما يهرج عالفاضيه والمليانه..

**منال:** وماله ياطانط.. مسكين.. دا صعبان على قوى..

**وداد:** (بتحفظ) ما يصعبش عليكى غالى يا حبيبتى.. نصيبه كده بقى...

**رياب:** (منبريه) هانى حاسا فر فرنسا ويعمل عمليه ترجعه عادى خالص..!

سعيد: آه طبعاً.. إن شاء الله.. متشكرين يا ماما.. متشكرين يا رباب على  
تعبكم معنا!.. وانت يا وفيه.. تصبحوا على خير جميعاً..  
(ملتفتاً لمنال) ندخل اودتنا بقى يا حبيبتي؟..

منال: (ملتفتة للجميع) تصبحوا على خير..  
وداد: وانت من أهله يا عروستنا.. ياللا احنا كمان (هى تغلق الكاسيت)  
معايا يا رباب.. وانت يا وفيه على مطرحك.. (تنسحب وفيه إلى  
كوريدور المطبخ.. وتنسحب وداد ومعها رباب إلى حجرتهما.. يتباطأ  
سعيد ومنال فى سيرهما نحو الغرفة الكبيرة.. ثم تتوقف)

سعيد: ايه يا حبيبتي؟.. وقفتى ليه؟..

منال: مش مفروض تشيلنى؟..

سعيد: اشيلك؟.. آه.. وماله.. اشيلك..

(يضع يده خلف ظهرها فتترك نفسها ليحملها.. يبدو وهو يبذل

جهداً لحملها.. ويفلح أخيراً يمضى بها فى تناقل حتى باب الحجرة)

سعيد: (وهو يلهث) اخ بس الباب مقفل.. كان لازم نفتحه الأول.

منال: انا حامد ايدى وافتحه..

(تنحنى على اكره الباب وتديرها..)

سعيد: ايه؟.. ما فتحتش؟..

منال: معصلجه قوى.. يا ساتر..

(تديرها بقوة فينفتح الباب.. ويندفع بها سعيد بالقصور الذاتى

لحظة ثم ينبعث صوت ارتطام وسقوط أخشاب.. لحظة صمت تام

من ممر المطبخ تندفع وفيه.. ومن حجرتهما تندفع وداد ورباب)..

وفى: السرير!

وداد: السرير!

رباب: السرير!

وداد: هم لحقوا؟..

(من باب الغرفة.. يطل سعيد برأسه)



**سعيد:** ما حصلش حاجة .. ماتخفوش .. كله حايتصلح ويبقى تمام!..  
(يفلق الباب خلفه .. وداد ورياب ووفيه يتبادلان النظرات .. ثم ينسحبين  
فى هدوء .. بعد مرور لحظات ينبعث أصوات من جهة باب الشقه ..)  
**وحيد:** (من خارج الشقه) حظ الشنطة يا شمندى لغايه ما لاقى المفتاح..  
ماعاكش بطاريه؟..

**شمندى:** من خارج الشقه لا والله يا وحيد بيه .. اولعك كبريت؟..  
**وحيد:** (من خارج الشقه) لا .. خلاص .. أدى المفتاح (صوت محاوله لفتح  
القفل) .. ايه الحكايه؟.. المفتاح ما ييفتحش ..  
**شمندى:** (خارج الشقه) .. أبأى عليك يا شمندى .. افكرت يا بيه .. الهانم  
غيرت الكالون الشهر اللى فات .. ماتضرب الجرس ..  
**وحيد:** مانت قلت لى إن دى ليلة دخلة سعيد اخويا ومش عايز اقلقهم..  
لكن ما باليد حيله ..

(صوت جرس الباب .. لحظة ويتكرر)..  
(وفيه تظهر .. وفى نفس الوقت يفتح باب حجرة وداد .. وتتقدم  
ومعها رباب)

**وداد:** وده مين اللى جاى الساعه دى .. افتحى يا وفيه ..  
**وفيه:** اللهم اجعله خير .. (تفتح .. مين؟ وحيد؟..  
يدخل وحيد .. بنطلون جينز وسويتر خفيف)  
**وحيد:** مفاجأه .. مش كده؟.. انا بتاع المفاجآت ..  
**وداد:** (تهرع فاتحه ذراعيها) وحيد حبيبى .. (يتعانقان)....  
**وحيد:** ازيك ياست الكل .. واحشانى ..  
**وداد:** انت أكثر يا وحيد .. ولو انى زعلانه منك .. الشهور دى كلها ما  
تفتكرش ماما بجواب ولا تليفون ..

**وحيد:** معلش .. حاقعد على رواقه واحكى لك .. (ينفصل عنها) ربوبه ..  
**رباب:** (تسرع إليه يعانقها بدورها) ازيك يا وحيد .. حمد لله عالسلامه..  
**وحيد:** الله يسلمك .. وحشتونى كلكم يا اولاد الايه ...

شمندی: (يدخل الحقيبه) تمام يا وحيد بيه؟  
وحيد: خطها واخلع وبكره حاحينك...  
شمندی: رجوعك بالسلامه هو حلاوتنا يا باشا.. تصبحوا على خير  
(يخرج شمندی.. وتغلق وفيه الباب.. وهى تنظر لوحيد باضطراب)  
وحيد: ازيك يا وفيه..  
وفييه: حمد لله على سلامتكم.. اوضب لك العشا؟  
وحيد: متعشى فى الطياره.. بس ممكن تعملى لى شأى..  
وفييه: (خارجة) من عينيه..  
وحيد: وفين باقى القبيله؟ العريس طبعا مع العروسه.. ببقى فاضل  
هانى.  
وداد: هانى مع عمك مهيب.. بأيت معاه...  
وحيد: (متصلبا فجاء) ليه؟  
وداد: اللى حصل بقى.. قال إيه بعد سعيد ماخذ الاوده الكبيره هو  
وعروسه.. الاوده الثانيه ماتساعناش كلنا...  
ريـاب: كمان مافيش فيها فراغ يتحرك فيه بالكرسى.. يعنى لازم حد يشيله  
من باب الاوده للسريـر وم السريـر للباب.  
وحيد: آه والله معاه حق.. وانا كمان جيت.. الوضع مش حايبقى طبيعى ولا  
مريح..  
وداد: (بدهشه) هو انت مش جاى اجازة وراجع؟  
وحيد: لا.. لا.. اجازة ايه؟ دى بلاد كئيبه ومش ممكن أخطيها تانى.  
ريـاب: هى الشهوردى كلها ومالقيتش شغل؟  
وحيد: مالقيتش ازاي؟ دول ثلاث جيهات هناك كانوا بيتنافسوا على  
ورفعوا الراتب بتاعى لمبلغ مايباخدوش مصرى هناك.. (يجلس).  
وداد: طيب الحمد لله.. ببقى ايه اللى مخليك مش عايز ترجع؟  
وحيد: الجو.. والناس.. وطريقة التعامل.. يحسسوكى إنك ارزقيه رايحه  
ومستعده تذلى نفسك عشان فلوسهم.. تكبر.. وعجرفه ومركبات

نقص.. طبعاً جواهرنا متحضرين أكثر وفاهمين أكثر وأذكيا أكثر  
 فيحاولوا يعوضوا ده بأنهم يضغطوا بفلوسهم.. وفيه ناس كثير  
 بيستحملوا ويمشوا حالهم.. أنا لأ.. ماقدرتش.. حاولت بس الكيل  
 طلفح. ولما قررت اتلككت لهم.. من يومين فنشوا كبير المهندسين بتاع  
 المشروع اللى باشتغل فيه.. كان راجل سورى.. فاهم ومعقول  
 ومافيهوش عيب.. عينوا بداله واحد وطنى.. منهم يعنى.. لسه  
 متخرج جديد من أمريكا.. والله اعلم اشترى الشهاده ولا خدها  
 بجد.. المهم.. اول يوم يستلم فيه نقانى انا بالذات.. وجه قدام باقى  
 المهندسين وقاللى انت المصرى؟ قلت له ايوه انا المصرى....  
 (تدخل وفيه وتضع صينييه الشاى قدامه..)

**وفيه:** الشاى.. معلقه سكر واحده زى ما بتجبه...

**وحيد:** مرسى يا وفيه.. روحى كملى نومك..

**وفيه:** تصبحوا على خير.. (تخرج)

**وحيد:** (بعد أن جلست وجلست معها رباب) وبعد ما قلت له أنا المصرى!

**وحيد:** قاللى والله يا أختى كليات الهندسه بمصر ما عادت بتخرج

مهندسين زين.. عموماً حاشوف شغلك وننظر فى أمرك...

**رباب:** معقوله؟.... دا بيستقزك!..

**وحيد:** مانا فهمتها وجبت م الآخر.. (مردداً بانفعال) كانت فى ايدى

بلانات المرحله الجديده فى المشروع اللى سهرت عليها اسبوع بحاله

لغايه ماخلصتها.. رحت مقطعها وراميتها فى وشه (وصوته يعلو)

وقلت له انابقى اللى مش عاجبنى شغلك ونظرت فى أمرك لقيتك

ولا حاجه ورحت رامى لهم استقالتى وواحد باسبورى وعلى مكتب

الطيران وحجزت..

**وحيد:** طب مش كنت بدرت شويه ولحقت فرح أخوك؟..

(يفتح باب حجرة النوم الكبرى ويظهر سعيد.. بالقميص

والبنطلون فقط) خمسة وراجع لك يا حبيبتي.. (يفلق الباب)

وحيد ايه المفاجأه دى؟

وحيد: (ينهض ويسرع نحو سعيد) أبو السعد .. بالحضن يا عريس  
 (ينفصلان .. ويتأمل كلا منهما الآخر)  
 سعيد: ما كنتش مصدق ودانى وأنا سامع صوتك .. بعد شويه فسرت  
 الكلام لما زعقت ...  
 وحيد: سوري .. كنت باحكي لماما ورياب حدوته كده .. انفعلت وصوتى  
 على .. بس ما قصدتش ازعجكم .. ياللا ادخل استأنف ... الله دانت  
 لسه بهدومك؟  
 سعيد: كنا لسه بنتعشى! ..  
 وحيد: لقمة الاتفاق؟ هه ياللا ياعم .. اتعشى وانبسط .. ويعدين حللى  
 (يخبطه على كتفه مازحا وهو يضحك ...)  
 سعيد: بكره حانشوفك .. ونقعد نتكلم .. تصبح على خير ... (يخرج إلى  
 الحجرة) ..  
 وحيد: (يتابعه بنظره) اخيرا سعيد اتجوز!  
 وداد: عقباللك انت وأختك ....  
 وحيد: ايه ياربويه؟ ... لسه السنارة ما غمزتش؟ ..  
 رباب: سنارة ايه؟ ..  
 وحيد: الواد اللى معاكى فى البوسته .. أبو خليل ..  
 رباب: (ترقبك بشدة وهى تنظر له محذره) .. انت بتتكلم عن ايه؟ ...  
 وداد: مين اللى معاها فى البوسته ده؟ ... ويطلع مين أبو خليل!  
 (تجربى رباب وتخرج)  
 وحيد: خلاص .. مادام ما قالتلكيش يبقى ما حصلش .. المهم دلوقت عايز  
 انام .. حانام فين؟  
 وداد: معانا فى الاوده .. وكويس ان هانى راح مع مهيب! ..  
 وحيد: آه .. بس ما ينفعش .. هو العريس ناوى يعيش هنا مع عروسته ..  
 وداد: امال حايروح فين يابنى؟  
 وحيد: ماشافش شقه ليه؟ ..

**وداد:** وحاجيب فلوس للشقه منين يا وحيد؟ دا صرف على فرحه بسلفه!

**وحيد:** دا معناه بقى إن أنا آجى اتجوز آخذ الاوده الثانيه؟

**وداد:** (مردده فى استياء) ولما تاخذ الاوده الثانيه أنا وأختك وأخوك نروح فين؟..

**وحيد:** بالضبط.. أديكى قولتيها.. بالإضافة طبعا إن الشقه ماهيش معسكر للاخوة المتزوجين.. ومش حاجيبى وضع لايق ولا طبيعى.. وحتى وأنا لسه بطولى وماتجوزتش.. أدينى طبيت فجأة.. من المنطقى طبعا أنى آجى على بيتى.. طيب حانام فين؟.. حضرتك بتقولى معاكم فى الاوده اللى فاضله.. جميل.. نشوف الاوده....  
(يتحرك نحو الحجرة الثانية... يفتح الباب.. ويطل منه)

**وحيد:** سورى يا ربوبه.. خليكى زى مانت.. (ملتفتا نحو الام) السريرين لازقين فى بعض.. والاوده بقت زى مخزن العفش.. (يعتدل وهو يخلق الباب ويتحرك نحو الأم) وأنا طبعى زى مانت عارفه ماباحبش حد ينام جنبى.. وكنا دايمًا.. أنا لوحدى على سرير.... وسعيد وهانى على سرير.. وغير كده انت ورباب لازم تبقوا فى اوده لوحديكم وتاخذوا راحتكم.. ممكن طبعا أقول حانام عالكنبه دى فى الصاله.. ديتهأ مخده ولحاف وأنا مش بادقق.. وكانت بتحصل لما خالى اسماعيل يطب من البلد واضطر اسيب له سريرى.. بس دلوقت الوضع مختلف.. سعيد وعروسته فى اودتهم.. قريبين قوى.. ومايصحش يعنى أنام فى الصاله.. وبينى وبينهم مترين.. حد فيهم يضطر يقوم بالليل يروح الحمام مثلا.. مش ظريفه برضه...

**وداد:** انا مش فاهمه لغاية دلوقت انت عايز توصل لأيه؟

**وحيد:** (متجاهلاً سؤالها) بس فيه حل للموقف المعقد ده.. حل مؤقت صحيح.. بس يبقى مرحلة لغاية مانشوف حل جذرى دائم....  
(يتجه نحو الباب المشترك).. والأوده دى.. ليه تفضل متأجره..

عارف... حاتقولولى عم مهيب عمل موقف شهامه زمان واجرها عشان  
يساعد أسرة صريق عمره اللى مات وساب مراته وولاده ماحيلتهمش  
غير قرشين المعاش.. أوكى.. شكراً.. الأسره دى ماعادتش زى الاول..  
والخمسین جنیه اللى يندفعوا للاوده ماعادلهمش قيمة.. والاوولاد  
كبروا.. وفيهم واحد اتجوز.. ويقوا محتاجين الاوده...

وداد: (محتدة) يعنى ايه؟.. نقول للراجل امشى بعد ما ضاعت منه شقته  
القديمة وماعدلوش مطرح غير الاوده دى؟...

وحید: مشكلته هو...

وداد: (باستنكار) بس مشكلته دى اتخلقت بسببنا علشان...

وحید: (مقاطعا فى حده مفاجئه) عشان ايه؟.. احنا ماطلبناش منه  
مساعده.. ولا طلبنا منه يسبب شقته وييجى يأجر مننا أوده.. هو  
اللى كان عايز كده لاسباب مالهش دعوه بالمروءه ولا الشهامه...

وداد: (وقد جمدت مكانها.. بصوت مرتجف) أسباب ايه يا وحید؟

وحید: (هاربا من الاجابه) أيا كانت الأسباب.. المهم دلوقت إننا محتاجين الاوده..  
(دقات على الباب المشترك)

هانى: (من الخارج) أنا هانى.. افتحولى..

وداد: (هامسة بغضب وهى تتجه نحو الباب) على الله الراجل مايكونش  
سمع....

وحید: ياريتة يكون سمعنى.. تبقى فرصه ونحسم الموقف..

(تفتح وداد مزلاج الباب المشترك.. هانى يفتح الأكره من الجهة  
الأخرى يفتح الباب ويدلف منه دافعا عجالات كرسية وداد تقوم  
بإعادة غلق الباب بالمزلاج...)

هانى: انا قعدت مدة طويلة أقول دا صوت وحید.. واكذب ودانى.. لغايه  
ماتأكدت....

وحید: (يسرع نحوه.. وهو يصافحه ويميل ليقبله فى جبينه) هنون أخويا  
وصديقى...

**هـانى:** (بوجه مشرق) واحشنى قوى ياوحيد .. مفاجأه حلوه صحيح ..  
**وحيد:** اعمل ايه بقى؟ .. لقيتنى لو فضلت هناك حاطرشقى .. قلت آجى  
واطرشق وسطكم احسن ..

**وداد:** (معلقه) والله باينك جاى تطرشقنا احنا ..

**وحيد:** سامع؟ .. لسه ماکملتش ساعه وست الحبايب بدأت تشد السلخ على ...  
**وداد:** ماتقول له كل اللى قلته من شويه .. سمعه وشوف رأيه ....

**هـانى:** مفيش داعى .. أنا سمعت كل اللى قاله ...

**وداد:** (تدق على صدرها فى جزع) يا خبر .. الصوت كان واصل لكم؟ ..

**هـانى:** مانت عارفه صوت وحيد طول عمره عالى ...

**وحيد:** (مازحاً) صوت الحق دايماً عالى ولا يعلى عليه ...

**وداد:** على كده عمك مهيب سمع؟ ..

**هـانى:** لحسن الحظ ماسمعش .. كان نام .. اول ما دخلنا وحط دماغه  
عالمخده ..

**وداد:** الحمد لله .. ربنا ستر ....

**وحيد:** (مستفزاً) ليه .. هى فضيحة وطالبين فيها السترة؟ .. الكلام ده  
حاقولوه له بنفسى بكره .. وعشان ماتزعلوش أنا حاساعده وادور له  
على اوده فى بانسيون .. ولا مكان فى دار للمسنين ....

**وداد:** (منفجرة) لا .. دانت زودتها . اسمع ياولد .. لازم تعرف إن الشقه دى  
بتاعتى انا ... وانا وحدى اللى اتصرف فيها .. أأجر أوده منها ..  
أأجرها كلها .. ابيعها .. اففلها فاضيه .. أنا حره ...

**وحيد:** (بنفس الحده) يا سلام؟ .. كل ده عشان العجوز المخرف اللى لازق  
لنا زى القتب بقاله عشرين سنه؟ ..

**وداد:** (بانفعال وإحساس خفى بالإهانة) اتأدب يا ولد ..

**هـانى:** (مهلاً بفزع) ماما .. وحيد .. بلاش خناق اعملوا معروف ..

(سعيد يدخل من باب الغرفة الأولى ما زال بالقميص  
والبنطلون ..)

سعيد: ..وليه؟ سيهم يكملوا خناق يا هانى ويطولوا رقبتى قدام عروستى  
فى ليلة زفافى...

وحيد: (محولاً الموقف الى فرحة) الله.. العريس؟.. هو انت لسه بتتعى..  
عموما مش احنا اللى حانطول رقبتك.. المفروض إنك انت اللى  
حانطول رقبة روحك ولا تقصرها...

سعيد: مافيش فايده.. مش حاتغير.. بعد ما تولع الحريقه.. تقلبها نكته...  
وحيد: ولا تزعل يابو السعد.. أنا آسف.. وانت عارف الليفل بتاع صوتى..  
خلقة رينا ومش ممكن اغيرها.. وبينى وبينك إنت اللى اخترت الوضع  
الشائك ده.. حد يتجوز برضه وسط عيله فى شقه ضيقه و...

سعيد: (مقاطعاً) أنا عارف اللى أنت عايز تتكلم فيه.. مش وقته.. (للأم)  
لو سمحتى يا ماما تورى منال طريق الحمام عشان تغسل ايديها...  
(مرتداً نحو الحجرة) تعالى يا منال...

(من الحجرة تدخل منال.. بنفس ملابس الزفاف ما عدا الطرحه)  
منال: مساء الخير...

وحيد: أهلاً.. مبروك يا عروسة...

منال: مرسيه..

سعيد: وحيد.. أخويا اللى كان بره.. رجع الليلة فى اجازة...

وحيد: (يشير بأبهامه لسعيد علامة الاستحسان) فوره يابو السعد..  
عرفت تنقى صحيح.. بس أنا يا عروسة مش جاى فى اجازة.. أنا..

سعيد: (مقاطعاً وهو يلمس منال بيده موجهها نحو الأم) مع ماما يا منال.  
وداد: تعالى معايا يا حبيبتي.. الحمام من هنا...

(تتقدم وداد ومنال إلى ممر الحمام وتخرجان)

سعيد: (يتحول لمواجهة وحيد) عرفنا انك مش جاى فى اجازة وجاى تقعد  
فشلت زى عادتك وراجع عشان تفك عقد فشلك علينا.. ومن أول  
لحظة فاتح النار على وعلى الأستاذ مهيب.. انت عايز ايه بالضبط؟..

وحيد: مابلاش يا عريس.. كمل ليلتك ونبقى نتناقش بعدين...



**سعيد:** مافيهاش نقاش.. الموضوع محسوم.. وحالخص لك النتيجة عشان ماتتعبش دماغك ودماغنا.. أنا متفق مع ماما.. الوضع ده مؤقت لغاية خالك إسماعيل ما يوضب شقة جدك فى سمنود.. ماما حاتأخذ هانى ويقعدوا هناك.. ورباب حاتفضل معايا هنا عشان شغلها.. ولما ربنا يريد لها تتجوز المفروض عريسها حايدبر لها الشقة.. جهازها انا اللى حاتكفل بيه قصاص انفرادى بالشقة دى..

**وحيد:** الله.. جميل.. وأنا؟..

**سعيد:** انت ياخويا العزيز خدت نصيبك من خمس سنين وضيعته.. الميتين متر اللى سابهم المرحوم بابا فى الوراق وقلت حاعمل عليهم مشروع.. مشروع الورشه.. فأكره؟..

**وحيد:** (مرتبكا فى غيظ) كان حظى وحش...

**سعيد:** كان فشل فاضح.. ومالوش دعوه بالحظ.. كان اندفاع.. وطمع ورغبة بتحرقك من صفرك عشان تأخذ اللى ماتملكوش..

**وحيد:** (منفعلا فى شبه هياج) مش صحيح.. أنا كنت ضحيه.. ائلموا على شويه نصابين وسرقونى..

**سعيد:** (يواجهه بقوة) ضاع المشروع وضاعوا الميتين متر اللى كنا شايلينهم ليوم تتجوز فيه اختك أوجد فينا يحتاج شقه.. أو أمك تحتاج علاج.

**وحيد:** المشروع ماكانش لى لوحدى.. كان لنا كلنا.. لو كان نجح كنتوا كلكم حاتستفيدوا منه.. وإذا كان فشل فانتوا شركا معايا فى الفشل.. لانكم وافقتم..

**سعيد:** انت كذاب.. ماحدث فينا وافق.. انت ابتزيت عواطف ماما واحتلت عليها من ورايا أنا واخواتك..

**وحيد:** انت اللى واخدها حجه عشان تحرمنى من حقوقى فى الشقه.. لكن لأ مش حاسم لك تاخدها وتطردنا بره.. احنا لنا فيها قد اللى لك.. وأنا محتاجها أكثر منك.. وإذا كانت ماما حاتأخذ هانى وتروح سمنود فأنا حافضل فى الشقة هنا.. ورباب حاتفضل معايا.

سعيد: أنا اتجوزت هنا خلاص.. ورياب حاتفضل معايا أنا...

(تندفع رياب من حجرتها)

رياب: انتوا بتتخانوا على ايه؟... أنا مش حاتفضل معاك ولا معاه.. أنا حاتفضل مع ماما وهانى هنا.. فى شقتنا.. وانتوا الاتنين اللى بتطلعوا بره..

سعيد: رياب.. انت بتقولى ايه؟...

وحيد: ماتسيبها تتكلم.. حقها...

هانى: (صارخا) اعملوا معروف ماتتخانقوش.. إحنا طول عمرنا ملمومين مع بعض.. بنحب بعض ونخاف على بعض.. وانت يا آبيه سعيد بالذات.. ضحيت عشلنا بحاجات كثير.. كلنا عارفينها وحاسينها.. (مستديرا بكرسيه لوحيد) وانت يا وحيد كنت دايما الضحكة اللى بتجلجل وسطينا وتهون علينا كل المشاكل وتحسسنا بأن الدنيا مهما اتغيرت لسه حلوه.. ونقدر نعيشها (يمد يده ليمسك بيد رياب) مش كده يا رياب؟.. قولى لهم.. احكى لهم ازاي كنت أنا وانت نسهر بالليل مع بعض نتكلم عن أخواتنا الاتنين.. نضحك.. ودموعنا تنزل.. (تدخل منال مسرعه فى خطوات غاضبه وخلفها وداد)

منال: أنا ماحبش حد يشخط فى ويزعق لى..

سعيد: ايه؟... فى ايه يا منال؟....

منال: (متباكية) مش معقول ياسعيد.. لسه مابتش أول ليلة.. وطانط بتزعق لى...

وداد: يابنتى أنا مازعقتش.. دانا بافهمك.. (متحولة للجميع).. بتسألنى لما سمعنا صريخكم قلت لها دول اخوات فى بعض مالناش دعوه بيهن.. قالت لى (تقلدها).. ياي.. دانتوا الظاهر عيشتكم حاتبقى متعبه قوى.. أنا ماحبش كده.. قلت لها بكرة يا حبيبتي تتعودى على طباعنا.. قالت لى (تقلدها) نو.. دى طباع ناس متخلفين.. (وكأنها تعرض الأمر عليهم).. بتشتمنى.. أنا وانتوا متخلفين...

**منال:** تصور يا سعيد .. مالتيش فوطه أنشف إيديه ١٩

**وداد:** يابنتى مافيش أكثر من الفوط فى البيت .. هى بس وفيه نسييت  
تحط فوط نضيفه عالفوطه...

(تدخل وفيه مسرعه وييدها فوطه .. وقطعة صابون)

**وفيه:** الفوطه اهى يا عروسه .. وحطيت غيرها كمان عالفوطه ..  
والصابون كمان....

**منال:** مين دى اللى بتكلمنى زى ما تكون اختى ولا صاحبتى؟..

**وفيه:** معلوم مانا زى أختك .. ويكره جانبى صحاب .. وانت حاتحبينى قوى..

**منال:** ايه ده؟ .. وساكت لها ياسعيد .. ماعدش إلا الشغاله كمان ..  
(تتجمد وفيه مكانها مصدومه)

**وحيد:** شغاله ايه يا اختى؟ وفيه دى واحده مننا ..

**وداد:** وكلنا بنعاملها زى ما بنعامل بعض .. وفيه تبقى بنت ابن عمه باباهم

**ورباب:** معلش ياوفيه .. اصلها جديده وماتعرفش ...

**هانى:** صالحيها بقى يا ابله منال .. وخلصونا كده ننام واحنا كلنا سعدا .

**منال:** سعيد ....

**سعيد:** انتوا مالكم كلكم طلعتوا فيها زى فرقة الكورس .. هى دى الطريقه  
اللى بترحبوا بيها بعروستى ليله زفافنا؟

**وحيد:** (مازحا) آه والله .. دى لسه ليله مع وقف التنفيذ .. معلش يا

عريس .. استأنف .. وإحنا ياخواننا .. كل المشاكل مجمده مؤقتا لغايه  
الزفاف السعيد ما يتم .. ياللا ندبر نومتنا ..

**سعيد:** ياللا يا حبيبتي....

(الجميع يتحركون .. سعيد ومنال نحو الحجرة الأولى .. هانى نحو

الباب المشترك .. وفيه نحو الحمام والمطبخ .. وداد ورباب نحو

الحجرة الثانيه .. وحيد نحو حقيبه سفره يحملها ويبدأ الحركة

نحو الحجرة الثانيه .. قبل وصول الجميع الى الأبواب .. تنفجر

أصوات دقات عنيفه على باب الشقه مع جرس باب ملح ومستمر ..

يتجمدون جميعا فى أماكنهم مبغوتين.. مع استمرار الرنين والدقات.. تكون وفيه أول من يتخلص من المفاجأة وتتحرك نحو الباب وتفتحه.. يندفع داخلا كل من الرائد.. وخلفه النقيب.. ثم الصول فالجاويش وكلهم ممسكين بطبنجات

الرائد: شقه حرم المرحوم يوسف زغلول؟..

وداد: (لا تكاد تقوى على النطق) ايوه.. فيه ايه؟...

الرائد: كلكم مكانكم لو سمحتم.. ماحدش يتحرك.. الصول عباس والشاويش جميعه فتشوا الشقة.. حضرة النقيب.. معايا لو سمحت..

(يجرى كلا من الصول والجاويش كل إلى حجرة.. بينما يسرع النقيب للوقوف بجوار الرائد مصطفى بحركة عسكريه.. الجميع يرتدون ثياب ملكيه)

سعيد: لو سمحتم يا حضرات.. ايه الحكاية؟...

الرائد: (بلهجة عسكريه آليه محفوظه) مهمة تأمين موكب الزعما والتفتيش عن إرهابى خطير دلت التحريات أنه متواجد فى البيت ده والشقه دى.. (ملتفتا لهم) فى هنا مؤامرة بتدبر.. وحاكشفها...

ستار

## الفصل الثانى



**وحيد... إخرس.. ولا كلمة ثانية.. انتم مش آدميين.. إنتم ضباع بتفتش فى  
الجبانة.. خنازير دافسه دايمًا بوزها فى الزبالة**





## الفصل الثانى

(ترفع الستار عن المسرح فى نفس وضعه عند نهاية الفصل الأول..  
الشخصيات جميعها فى حركة تثبيت "فكس" والإضاءة من الخلفيه ليصبحوا  
جميعا "سيلويت" .. مع قرب انتهاء آخر مقدمة الفصل الموسيقيه تزداد الإضاءة  
تدرجيا.. ويمجرد وصولها إلى المدى المطلوب ينتهى الفكس باستكمال حركة  
"الرائد" لمقدمة المسرح)

الرائد: صول عباس.. شاويش جعيصه !..  
(يندفع الاثنان داخلين.. عباس من الحجرة الثانية.. وجعيصه من  
ممر المطبخ.. الأول يحمل بعض ملابس رباب وأمها.. والثانى  
ينتفخ فمه بالأكل)

الاثنان معا: (وهما يؤديان التحية) سعادتك يافندم !  
الرائد: لقيتوا حاجة؟..

عباس: الاوده اللى فتشتها يافندم نضيفه....  
جعيصه: والمطبخ والحمام خاليين من الأهداف المطلوب ضبطها !  
وداد: (لعباس) واخذ الهدوم دى ليه يا راجل انت (تحاول خطفها منه بعصبية)..  
عباس: (يبعدھا بخشونه) سيبينا نشوف شغلنا يا حاجة !  
الرائد: ارجوكى يا هانم تتعاونى معنا...  
وداد: اتعاون معاكم يعنى ايه؟.. انا مش فاهمه حاجه... بتفتشوا على ايه

واحنا عندنا ايه يخليكم تهجموا علينا بالشكل ده.. وتدهسوا بيتنا  
من غير احم ولا دستور..

الرائد: (متجاهلا وهو يواجه رجاله)..كملوا عملية التفتيش (يبدأ جعيصه  
فى البحث داخل الصالة نفسها.. بينما يتجه عباس إلى الحجرة  
الأولى يعترض سعيد طريقه..)

سعيد: عندك رايح فين؟.. (موجهها كلامه للرائد) معاك إذن م النيابة  
بالتفتيش يا حضرة الطابط؟..

الرائد: لأ....

سعيد: يبقوا تفضلوا من غير مطرود... والصبح حاتقدم بشكوى ضدكم  
للنيابة لانتهاكم حرمة مسكن بدون إذن تفتيش قانونى.. وبدون  
سبب.. وفى وقت متأخر زى ده..

الرائد: ابقى اتقدم بكل الشكاوى اللى انت عايزها بس دلوقت ما  
تعطلناش.. شوف شغلك يا عباس...

سعيد: مش حايقتقدم خطوة.. دى اودة نومي.. والليلة ليلة زفافي...

الرائد: والله؟.. (ناظرا لمنال) واظن دى العروسة؟.. حلوة.. مبروك يا أنسة  
منال.. ولا أقول يا مدام منال؟..

منال: آنسة.. لسه آنسة.. (لسعيد) دا عارف اسمى.

مبروك يا أستاذ سعيد.. وأسفين جدا للوقت غير المناسب.. بس  
احنا مضطرين الموقف حساس وخرج والموكب حايعدى الساعة  
عشرة صباحا وضرورات التأمين تحتم اللى احنا بنعمله..

سعيد: (متشجع) اللى انتوا بتعملوه ده اعتداء على حريات وخصوصيات بيتنا

الرائد: ضروريات امن يا سيد سعيد... بيتكم فى موقع حساس امنيا.. على  
ناصية مهمة بتتحكم فى أخطر كيرف فى طريق الموكب... وشقتكم  
دى بالذات على ارتفاع مثالى بالنسبة لأى محاولة ارهابية.. اشرح  
له يا حضرة النقيب..

النقيب: (وهو يتجه إلى الشرفة) الدور الثالث هنا.. والناصية دى بالذات

ومن البلكونة دى على وجه التحديد .. وزاوية التحكم... وخصوصا عند الكيرف اللى بتبطئ فيه سيارات الموكب بالضرورة.. تخلى عيله صغيره بنبله قادر على إصابة أى هدف..

**وحيد:** (من مكانه فى الصالة) لحسن الحظ ماعندناش عيال صغيرين.. ولوقلبتوا البيت مش حاتلاقوا أى نبلة..

**الرائد:** (بينما يظل النقيب فى البلكونة وهو يتحدث فى جهاز لاسلكى لا نسمعه.. حمد لله على السلامة يا باشمهندس وحيد.. رجعت بدرى ليه؟ الحال هناك ماعجبكش ولا ايه؟..

**وباب:** ماما.. الحقى.. دول عارفين أسامينا كلنا..

**وحيد:** اسامينا بس؟.. دول يعرفوا ألوان ملابسنا الداخلية كمان !

**الرائد:** (بلهجة من يحسم الأمر) شغلنا ! وارجوكم بقى ما تعطلوناش ياللا يا عباس..

**عباس:** الطريق يا سيد وما تخلنيش ازقك !..

**معيد:** (بإصرار) ماحدش حايدخل اودة نومي إلا على جثتى.. (يرفع كلتا ذراعيه)

**الرائد:** وبعدين بقى؟.. ماتخلونا نخلص المهمة دى عشان نسيبكم تكملوا ليلتكم؟  
**وجداد:** سيبهم يابنى وأمرنا لله.. أهم خمس دقائق ويحلوا عننا..

**جعيسه:** (الذى كان يفتش بوفيه السفارة.. ينتفض هاتفها) سلاح يافندم !  
(يستدير الرائد بحده.. ويتجمد الآخرون مكانهم.. ويقبل النقيب من الشرفه مسرعا بينما يقف جعيسه وفى يده مسدس فى جرابه)  
**الرائد:** مسدس؟.. هاته يا جاويش...

**جعيسه:** (يتقدم ويسلم المسدس) لقيته سعادتك مدفوس فى ارضية البوفيه ومتدارى ورا عليه فضيه ومتغطى بمشمع سفره للتمويه !..

**الرائد:** (يرفع المسدس فى يده ويدور به على الآخرين) مسدس ! براوننج عيار ٧ مللى.. (امام وداد)... بتاع مين ده يا هانم؟...

**وجداد:** بتاع المرحوم جوزى...

الرائد: المرحوم يوسف زغلول؟ ليه؟..

وداد: ليه ايه يا حضرة الظابط؟

الرائد: المرحوم كان مهندس رى.. يعنى عمله مالوش صلة بالسلاح؟..

وحيد: (يتقدم نحوه) طبيعة عمله كانت أحياناً بتبعده لأماكن خطره..

واعتقد أنه اقتنى المسدس ده أيام ما كان بيخدم فى خزان سنار ولا

جبل الاوليا فى السودان..

النقيب: (متبرياً) فيه رخصه؟.. (مكرراً بعد لحظة صمت) رخصة السلاح

ده فين؟.. (يتلفت الجميع لبعضهم فى حيره)

سعيد: الحقيقة مصادفناها... (للأم) ماهيش موجوده فى أوراق المرحوم

بابا؟..

وداد: والله يا بنى ماعرف رخصة السلاح دى شكلها ايه؟..

عباس: (وهو يخرج من جيبه مجموعة أوراق) دى أوراق المرحوم يوسف

زغلول اللى لقيتها فى دولاب الملابس اللى تم تفتيشه سعادتك..

مافيهاش رخصة سلاح!..

وداد: (تندفع نحوه غاضبه) مش ممكن.. ازاي تتجرأ وتأخذ الأوراق دى

من الدولاب؟.. هات الأوراق دى؟..

النقيب: عندك يا هانم! الأوراق دى حايتم فحصها فى الإدارة!..

وداد: فحص إيه وإدارة إيه يا ناس؟ دى أوراق خصوصية.. أسرار بيوت

الرائد: هاتها يا عباس (يناولها له عباس.. أثناء وضعه لها فى جيبه)

ماتخافيش يا هانم.. فى الحفظ والصون.. بعد ما يتم فحصها

حاترجع لك زى ما هى!..

وداد: (وقد تصاعد غضبها) مش من حقكم تلمسوها ولا تشوفوا أى سطر

فيها.

هانى: (يدفع كرسيه نحوه) دى مهزله! أنا مش مصدق اللى باشوفه..

من ساعة مادخلتم وأنا متصور انى فى كابوس وكل شويه أقول

الكابوس حاينتهى وحاكتشف إنى كنت باحلم!.. تقتحموا على الناس

بيوتهم فى عز الليل.. وتفتشوا.. تبهدلوا هدمونا.. وتأخذوا  
أوراقنا.. إيه اللي بيحصل ده؟..

**الرائد:** (يرمقه ساخرا) انت هانى طبعاً.. اركن شويه يا هانى !..

**هانى:** اركن شويه يعنى ايه؟

**الرائد:** (بلهجه خشنه آمره) يعنى تخرس خالص !.. (تفاجئ اللهجه  
الجميع.. فيصمتوا وكان على رؤوسهم الطير)

**عباس:** (يخرج من جيبه الآخر مجموعه أخرى من الأوراق).. وده.. عايزه  
سعادتك برضه؟..

**الرائد:** دا ورق مين؟.. وريني كده.. (عباس يناوله الأوراق).. آه دى حاجات  
خاصه بالآنسه رباب.. (يلتفت لها بابتسامه).. فى الحفظ والصون  
برضه..

**رباب:** (التي امتنعت واضطريت بعنف).. ادينى الحاجات دى لو سمحت  
**الرائد:** (مشيحا عنهما) بعدين يا ماما.. بعدين!.. (لعباس) فتش اودة  
العروسين يا عباس.. وبالأراحه عالغفش الجديد والفرش اللي لسه  
بشوكة.. عرايسنا لسه قدامهم دخله.. (يضحك بغلظه.. يشاركه  
النقيب الضحك بآليه مهنيه)

**عباس:** (وهو يدفع سعيد عن طريقه) تمام سعادتك! (يكمل طريقه  
مقتحماً الحجرة الأولى)..

**الرائد:** ودلوقت يا حلوين.. المسدس ده مالوش رخصه.. عارفين دا معناه إيه؟  
**سعيد:** (يتقدم نحوه) المسدس ده مسروق يا حضرة الظابط!..

**النقيب:** (هاتفا باهتمام وخطوره) بيقول مسروق! اعتراف صريح!

**الرائد:** استنى يا حضرة النقيب ! (لسعيد).. ايوه يا أستاذ سعيد.. بتقول  
المسدس ده مسروق؟.. ومين اللي سرقه؟..

**سعيد:** المرحوم بابا !

**وحيد:** بتقول ايه يا سعيد؟.. ايه الكلام الفارغ ده؟..

**وداد:** انت اتجننت يا سعيد؟ تتهم باباك بالسرقة عشان تبعد التهمة عنك؟

**ريـاب:** حرام عليك يا آبيه... بابا ماكنش حرامى!

**هانى:** سيبوا آبيه سعيد يكمل كلامه.. أنا عارف قصده..!

**سعيد:** بابا سرق المسدس ده من كامب انجليزى فى الاسماعيلية سنة واحد وخمسين (يتبادل الرائد نظره عابسه مع النقيب)

(افيه إضاءة.. تخفت الأضواء.. وتركز بقعه على صورة الأب المعلقة)

**سعيد:** (مستطردا)... والدى... المرحوم يوسف زغلول اشترك فى حرب القنال.. وكان قائد فصيله فدائيين... (بينما تنسحب وداد إلى الحجرة الثانية وتدخلها) واتجرح فى عملية ضد معسكر انجليزى فى موقع جينيفه! استأصوا له كليه والطحال وجزء من الكبد. وأول ماسترد جزء من صحته.. رجع القنال تانى.. واشترك فى عملية تانية مسكوه فيها الانجليز ورموه فى السجن.. ماطلعش منه إلا أربعة وخمسين لما وقعت اتفاقية الجلاء.. كان مفصول من وظيفته.. حكومة الثورة رجعتة ومنحته ترقية..

**وداد:** (تدخل ممسكه بعليه "شكمجيه أرابيسك") وجمال عبد الناصر سلم عليه فى عيد النصر فى بورسعيد واداله النيشان ده

(تخرج من العلية أحد الأوسمه وترفعه فى يدها أمامهم)

**هانى:** (يتقدم بكورسيه) ده يوسف زغلول اللى بتقتحموا بيته الليلة وبتدوسوا على حرمة أسرته!..

(الرائد والنقيب يتبادلان النظر.. ثم يتقدم الرائد)

**الرائد:** سووى!.. بس الراجل اللى ادى النيشان لوالدكم هو اللى أسس الجهاز اللى بنشتغل فيه!.. هو اللى علمنا إن تأمين الحاكم المحبوب هو الضمان لتأمين شعبه.. دا التراث العظيم اللى سابهلنا...

**النقيب:** (يتقدم بدوره) الزعيم هو الشعب.. (يتجمد الاثنان فى موقعهما كتمثالين)

**منال:** سعيد! الراجل غاب جوه.. بيعمل ايه دا كله؟..

(يتحرك أفراد الأسرة فى قلق حول الضابطین وقد تسمر مثلهما جعيصه)

**سعيد:** وأنا حاعمل إيه بس يا منال..

**وحيد:** (ساخرا) الراجل بيشفوف شغلّه! بيأمن المطرح...  
**وداد:** حايهدل الاوده اللى لسه أخوكى وعروسته ماتمتعوش بيهة  
**وياب:** العروسة خايغه لا يلاقى حاجه فى هدومها..  
**هانى:** (يدفع كرسيه حتى مقدمة المسرح بجوار الضابطين) فى الليل..  
 يصحوا اليوم لينعق فوق التل.. تطير الخفافيش فى ظل الخرائب..  
 ينداح الظل.. يخنق كل ضياء.. يطفئ حتى الحلم..  
**وحيد:** هو ده وقت الشعر ياسى هانى؟..  
**وقيه:** (تقترب كالحاله) سيبه يقول يا وحيد..  
**وحيد:** يا بنتى هو أنا فاهم اللى بيقوله عشان تفهميه انت..؟  
**وقيه:** مابقهموش.. بس لما بسمعه باقى عايزة أعيط..  
**وحيد:** لازم بتفتكرى طليقتك.. ما هو كان شبه البومه فعلا...  
 (من الحجرة الأولى.. يندفع عباس)  
**عباس:** (مؤديا التحية وقد أمسك بمظروف) أوراق تانيه سعادتك..  
 (يتحرك الرائد كمن أفاق من نومه ويتبعه النقيب)  
**الرائد:** هاتها.. (يتناول منه المظروف.. يفتحه ويتفحص ما فيه.. ثم  
 يقترب من منال وهو يبتسم ابتسامه ثعلبيه).... آه.... دى حاجات  
 تخص العروسة...  
**منال:** (وهى ترتجف اضطرابا) أنا ما عنديش أوراق.. دى مش بتاعتى  
**معيد:** من فضلك ادينى الأوراق دى  
**الرائد:** (يميد الأوراق الى المظروف ثم يدسه فى جيبه) ماتقلقش.. فى  
 الحفظ والصون...  
**معيد:** انتوا مالمقيتوش حاجه فى الشقه كلها... ممكن بقى تتفضلوا...  
**الرائد:** والمسدس!..  
**معيد:** مانا شرحت لك حكايته!..  
**الرائد:** بس الحكايه دى ماتنفيش اننا لقينا السلاح.. والسلاح ده صالح  
 للاستعمال وممكن استخدامه فى تنفيذ المؤامره!..

سعيد: مؤامرة ايه؟.. إنتوا قلتوا انكم بتفتشوا عشان تأمنوا الموكب... وأديكو ففتشتوا.

الرائد: تفتيش غير روتينى يا سيد سعيد.. لأن له سبب. وسبب خطير قول له يا حضرة النقيب..

النقيب: (ينفخ صدره.. بصوت من يتلو قرار اتهام) وردت لجهات الأمن المعنيه معلومات مؤكده بأن هناك عمليه إرهابيه تستهدف ضيف مصر الكبير الرئيس الجنرال دومينجو ماهرشنا ابوكو.. أثناء مرور موكبه المتجه إلى زيارة المتحف المصرى ومنطقة الأهرام.. بهدف إخراج موقف مصر السياسى والدولى والاقتصادى والسياحى أيضا.. وبعد مزيد من التحريات الدقيقه المكثفه ثبت لجهات الأمن المعنيه أن الموقع المثالى لهذه المحاوله لابد أن يكون فى المنزل رقم ٣٢٣.... البيت ده.. ومن الشقه دى بالذات...

الرائد: ولقينا السلاح اللى ممكن يستخدم فى العمليه!.. وبناء عليه ماتبقاش عمليه تفتيش روتينيه.. لأن التفتيش لوحده مش كفايه سعيد: آمال عايزين إيه تانى؟..

الرائد: حاتعرف حالا... (بحركه سريعه) الهانم والآنسه رباب والبنت وفيه الشغاله.. يتفضلوا فى الاوده دى (مشيرا إلى الغرفة الثانيه).. الباشمهندس وحيد والأخ هانى يتفضلوا فى الاوده دى مشيرا إلى الغرفة الأولى).. عباس مع المجموعه الأولى.. جعيصه مع المجموعه الثانيه.. أما الأستاذ سعيد وعروسته فيتفضلوا معنا هنا..

سعيد: ليه دا كله؟..

الرائد: المرحله الثانيه فى مهمه تأمين الموكب!.. التحقيق والاستجواب سعيد: تحقيق فى إيه واستجواب عن إيه بالظبط؟.. انتوا عارفين عننا كل حاجه.. ملفاتكم مليانه ومانتوش محتاجين لمعلومات جديده.. وانتوا عارفين عننا أكثر م اللى نعرفه إحنا..



**الرائد:** من فضلك.. المناقشة حاضيع وقت ومش حاتجيب نتيجه.. تسيبونا نشوف شغلنا وتتعاونوا ولا ناخذكم ونستجويكم فى مقر الإدارة؟..

**سعيد:** لأ.. حانتعاون.. بس اتفضلوا اخلصوا بسرعه.. إحنا بقينا الفجر تقريبا.. ولسه عندى دخله..

**الرائد:** أوعدك أنك حاتدخل فى الوقت المناسب.. ياللا.. لو سمحتم كله ينفذ زى ما قلت...

.. (ببطء تتحرك المجموعات.. عباس يقود وداد ورياب ووفيه إلى حجرة.. وجعيصه يقود وحيد وهانى إلى الغرفة الأخرى يبقى فى الصالة الرائد والنقيب مع سعيد ومنال)..

**سعيد:** طيب حاتستجويونى أنا.. ماشى لكن منال.... دخلها إيه؟.. دى أول ليله تدخل فيها الشقه دى..

**الرائد:** (دون أن يرد.. يفرد ذراعه مشيرا للنقيب ليتولى مهمته.. وينسحب هو إلى الشرفة)

**النقيب:** (يتقدم) كل الموجودين فى الشقه دى ساعة دخولنا لازم يتم استجوابهم بغض النظر عن كونهم مقيمين أصليين أو وافدين جدد أو ضيوف عابرين..

**منال:** بس أنا ماعرفش حاجه.. وماليش دعوه بالسياسه.. دانا حتى ما بقراش الصفحة الأولى من الجورنال... يادوب صفحة الحوادث وأخبار الفن... حاتستجويونى فى إيه؟..

**النقيب:** (ببرود) دلوقت تعرفى.. ومن فضلك ماتسألش.. إنت تجاوبى وبس..

**سعيد:** خلصنا يا حضرة النقيب.. ياللا.. سين سؤال...

**النقيب:** دا مش محضر يا سيد.. مفيش سين ولا جيم.. وبعدين أنا ماحبش حد يستعجلنى.. دماغى مترتبه ومش عايز حد يلعب فيها ويلخطها!

**سعيد:** حاضر.. على مهلك...

**النقيب:** (بعصبية) ولادى كمان... ممنوع إبداء أى ملاحظات !..

**سعيد:** ماشى.. ماتزعلش نفسك !..

النقيب: (صارخا) ماتدينيش أوامرا..

سعيد: آسف.. ما قصدش.. (متحولا لمنال) .. تعال يا حبيبتي.. ارتاحي

هنا.. (يقودها لكنبة الانتريه فتتهالك جالسه ويجلس بجوارها)

معلش.. ماكنش يخطر على بالي أبدا أن كل ده يحصل ليلة زفافنا..

منال: مش معقول يا سعيد.. مش ممكن.. أنا أعصابي خلاص قريت تنهار..

دا كابوس زى ما قال أخوك ده اسم إيه.. اللي قاعد عالكرسى...

سعيد: (يمسك بيها ويرفعها ليلثمها) هانى.. اسمه هانى يا حبيبتي..

حاتبيله قوى.. إنسان رقيق وحساس.. وشاعر كمان (بينما يسرع

النقيب ليقف خلف الكنبة التى جلسا عليها متحنيا ينصت بغيظ)

منال: ايوه.. سمعته وهو بيقول شعر من شويه.. ولو أنى ما فهمتش! بس

أخوك التانى.. آه.. وحيد.. باين عليه شقى شويه!

سعيد: طول عمره.. بابا الله يرحمه كان مدلعه قوى.. كان بيعبه أكثر من

أى حد فينا.. بتحصل.. ولما..

النقيب: (منفجرا) شئ جميل خالص! قاعدين تدردشوا مع بعض وسايبنى

أنا أرن..

سعيد: أبدا.. إحنا بنشغل وقتنا لغاية حضرتك ماتبدأ الاستجواب...

النقيب: حالا (يلف لأمام الكنبة) قوم اقف يا أستاذ.. تقدر تقوللى ليه

والدك بعد ما خلصت حرب الفدائيين ماسلمش السلاح بتاعه؟

المسدس ده..

سعيد: بابا كان معاه سلاح تانى سلمه فعلا.. مدفع برن ومدفع كارل

جوستاف واحتفظ بالمسدس كتذكار مش أكثر...

النقيب: ماراحش ليه عمل بيه مذكروه فى القسم وعمل له رخصة؟ وافرض

هو نسى.. ليه انتوا ماعملتوش ده بعد ما مات؟..

سعيد: ماجاش فى بالنا إطلاقا..

النقيب: يا سلام يا أخى! إطلاقا؟.. دا سلاح يا أستاذ مش لعبة أطفال

سلاح بم بم.. بيموت...

**معيد:** والله اللي افهمه أن المواطن بيرخص السلاح لما يكون ناوى  
يستخدمه لحمايته والدفاع عن نفسه.. إنما إحنا ماكناش فى خطر  
ولا خافين من أى اعتداء.. وبالتالي ما فكرناش نرخصه!.. ونسيناه  
خالص بدليل أنه مرمى فى البوفيه مع الفضيه..

**النقيب:** مرمى ولا متخبي؟..

**معيد:** حانخيه ليه؟.. ومن مين؟..

**النقيب:** شئ منطقى أن اللي بيفكر فى ارتكاب جريمه لازم يخبي أدواتها!

**معيد:** وإحنا ما فكرناش فى ارتكاب أى جريمه. إرحنا مواطنين عاديين...

ومسالمين.... مالناش عداوات مع حد..

**النقيب:** لكن لكم آراء سياسيه.. أنت بالتحديد..

**معيد:** أى مواطن لازم يكون له رأى سياسى...

**النقيب:** عظيم.. بدايه طيبه.. ورأيك السياسى ده نابع من انتماء فكرى  
وعقائدى

**معيد:** عقائدى؟.. يعنى إيه؟..

**النقيب:** يعنى أيديولوجى.. ببساطه كده.. شيوعى!..

**معيد:** (بلهجة استنكار) أنا؟..

**النقيب:** ماتنكرش لأن الإنكار مامنوش فايده.. ملفك عندنا فى إدارة  
النشاط المعادى..

**معيد:** ملف إيه يا حضرة النقيب؟.. أنا عمرى ما كنت شيوعى..

**النقيب:** تتكر إنك فى فبراير تمانيه وستين كنت من زعماء مظاهرات الطلبة

اللى حاصرت مجلس الشعب احتجاج على أحكام الطيران؟..

وتنكر سنة اثنين وسبعين إنك اشتركت فى مظاهرات ميدان

التحرير وقعدت مع زمايك تكتبوا منشورات على قهوة

ايزافيتش؟

**معيد:** مانكرش.. بس المظاهرات دى ماكانتش للشيوعيين بس.. الطلبة من

كل الاتجاهات اشتركوا فيها..

**النقيب:** طيب وانتفاضة الحراميه بتاعة تمتناشر وتسعتاشر يناير سنة سبعة وسبعين مش اشتركت فيها واتقبض عليك؟..

**سعيد:** ومحكمة أمن الدولة برأتني وقالت في حيثيات الحكم إنها ماكانتش انتفاضة حراميه.. كانت انتفاضة شعبيه !..

**النقيب:** آه! كلام الشيوعيين!.. ماجبتش أنا حاجه من عندي؟..

**منال:** (تقف بلهجة استهوال) .. يا خبر يا سعيد؟.. أنت كنت شيوعي صحيح

**سعيد:** شيوعي إيه بس يا منال إنت كمان؟.. هو عاد فيه شيوعيه ولا شيوعيين؟..

الله يرحمهم.. دا الاتحاد السوفيتي نفسه اتفك بعشر جمهوريات رأسماليه.. دول أوروبا الشرقيه.. بح خلاص..

**النقيب:** لسه فيه كوبا والصين وكوريا الشماليه وفيتنام! كفايه فيدل كاسترو والرفيق كيم ايل سونج

**سعيد:** وانا مالي؟ هو أنا مسئول عن بقائهم؟..

**منال:** يعني مانتش شيوعي يا حبيبي؟.. الحمد لله!.. دانا كنت أخاف منك قوي! **النقيب:** حنفترض أنه ماكنش شيوعي.. لكن برضه ماكنش مؤيد.. كان معارض.

**سعيد:** يا حضرة النقيب أنا عمري ما كان لي نشاط سياسي من بعد سنة سبعة وسبعين.. بالظبط بعد والدي ماتوفي ولقيت نفسي مسئول

عن والدتي واخواني... كرسيت جهدي كله لشغلي وحل مشاكل البيت المادية ونسيت السياسه بالمره.. ماعدتش باهتم بأى شئ فيها

بصراحه لقيت مفيش فايده!..

**النقيب:** لقيت مفيش فايده في إيه بالظبط؟..

**سعيد:** في أى حاجه.. اللي بيحصل.. وماحدث حايقدر يعمل حاجه

**منال:** مضبوط.. هو كان دايمًا يقوللى كده يا كابتن..

**النقيب:** طبعًا مانتوا حاتعملوا كورس.. تغفوا وتردوا على بعض.. أنت كمان يا عروسه..

**منال:** (مخضوضه وهى تتراجع) أنا كمان إيه؟.. لأ.. دانا حتى نصحته لما قدم مذكره لمجلس الإدارة من سنتين وقال فيها على الانحرافات اللي بتحصل.. وخليته يسحبها..

**معيد:** أنا ما سحبتهاش.. رئيس مجلس الإدارة هو اللي اشر عليها بالحفظ واستدعانى لمكتبه وهددنى.. ورفضت تهديده... وخيرنى يا اسكت يا اقدم استقالتى..

**النقيب:** يعنى مشاغب! وجواك مشاعر عدوانيه تجاه رؤساءك.. وعندك استعداد نفسى للتمرد على السلطه !..

(يدخل الرائد من الشرفه بحركه سريعه)

**الرائد:** نخش فى الموضوع!...

(يتقدم مع انسحاب النقيب الى الشرفه)

**معيد:** وهو اللي فات دا كان بره الموضوع؟..

**الرائد:** تقدر تقول أنه كان مجرد تمهيد.. ومع ذلك.. أنا مش مرتاح لأسلوب زميلى.. واخذها شكلية قوى واتهامات ولهجة تحقيق مش هى.. والمسأله مش كده خالص.. إحنا بندردش مع بعض.. نتبادل وجهات النظر.. وهدفنا الوحيد نوصل للحقيقه مع بعض.. شيوعيه إيه ونشاط معادى إيه؟.. دى حاجات عفى عليها الزمن..

**معيد:** آه.. وسيادتك بقى عندك الحاجات الجديده.. الأب توديت؟

**الرائد:** (ضاحكا) الالترامودرن وحياتك.. (يخرج علبة السجائر..) سيجاره؟..

**معيد:** دى بالذات قديمه قوى...

**الرائد:** (يعيد العلبة إلى جيبيه) معاك حق.. سيبكم من دا كله.. مانتكلم فى أمورنا العاديه.. تسديد خانه يعنى وبعدها نقول لكم تصبحوا على خير ونحل عنكم !..

**معيد:** ياريت...

**الرائد:** يعنى مثلا.. المناسبه اللي احنا فيها دى.. ليلة زفافكم..

سعيد: (متحفظاً) مالها؟...

الرائد: اجلتوها ليه .. ثلاث مرات ... مش كان المفروض تدخلوا من ثلاث أسابيع؟..

سعيد: (وهو يتبادل نظرة دهشه وحييره مع منال) .. يعنى .. مجرد ظروف الرائد: ظروف خاصه بالعروسه .. مش كده؟..

الرائد: (وقد ارتبكت تماماً) .. انتوا .. انتوا بتراقبونا من امتى؟

منال: مراقبة إيه لاسمح الله .. دى أخبار عاديه بتجيلنا لحدنا ....

سعيد: طيب أنا أفهم أن ممكن يكون لكم ناس عندنا فى الشغل .. لكن هنا .. فى البيت؟ .. إزاي؟..

الرائد: يا سيدى لا لنا ناس هنا ولا فى الشغل .. بس دى آله دايره بالقصور الذاتى .. لوحدها بتدور وتجيّب أخبار .. عموماً دا مش مهم .. وأنا آسف يا منال هانم إذا كنت لمحت لحاجه ضايقتك .. وما قصدتش أقولها قدام عريسك ..

منال: (تبتلع ريقها بصعوبه) .. هى إيه دى؟ .. أنا مش فاهمه حاجه ..

سعيد: (متوتراً) حاجة إيه اللى إنت لمحت لها؟ .. أنا ماشعرتش أن فيه أى تلميح .. ويعدين المسأله ماهيش سر .. منال هى اللى طلبت التأجيل لغاية فستان زفافها ما يجهز ..

الرائد: بجد؟ .. تصورا أكيد معلوماتى غلط .. شوف يا أخى .. الناس ما بتسيبش حد فى حاله .. حتى الزملا .. ما بيستنكفوش يرددوا الإشاعات ويودودوا بيها فى ودان بعض .. تعرف زمايلكم فى المؤسسه يقولوا إيه؟..

سعيد: (بتصلب مفاجئ) ماعرفش ومش عايز أعرف ..

الرائد: (مواصلاً وكأنه لم يسمعه) قال إيه .. الأستاذ عادل نائب رئيس مجلس الإدارة .. كان بيضغط على منال عشان ترجع له لما عرف أنها حاتتجوزك ..

(يتجمد كلا من سعيد ومنال فى مكانيهما)

**الرائد:** (مستطردا) كلام فاضى طبعا ومش منطقى.. طيب ما هى كانتر قدامه وقعدت ثلاث سنين منتظراه يتجوزها.. إيه اللى حاشه؟.. ولا يعنى اللى فى الايد تزهد النفس؟ والحاجه تحلى لما تتخطف من أيدى؟ دا حتى ما يبقاش إنسان طبيعى.. يبقى معقد.. وأحسن حاجه عملتها يا منال إنك رميتى طوبته..

**منال:** (وقد اختل إيقاعها) أنا.. أنا ما قعدتش ثلاث سنين انتظره ولا كلام من ده.. إحنا كنا مخطوبين.. خطوبه عاديه.. ولما لقيته بيماطلنى.. فسخت الخطوبه..

**الرائد:** (مقتريا منها) يعنى ما كنتوش بتحبوا بعض؟..

**منال:** (بعضبيه) قلت لك كانت خطوبه عاديه !

**معيد:** (متدخلا) واجب أقول لك يا سيادة الرائد إن أنا كنت عارف كل التفاصيل!..

**الرائد:** كل التفاصيل؟ ياه.. اسمح لى اهنيك على أفقك الواسع وروحك الرياضيه يا أستاذ سعيد..

**معيد:** على إيه دا كله؟.. فيها إيه لما اعرف تفاصيل الخطوبه السابقه للإنسانه اللى حاتجوزها؟..

**الرائد:** مافياش حاجه طبعا.. خصوصا إن منال كانت بتشتغل فى مكتب الأستاذ عادل وقريبه منه باستمرار.. عادى أن يشوفها ويعجب بيها ويخطبها ولما تفشل الخطوبه.. عادى برضه إنك بصفتك الخطيب الجديد تسأل خطيبتك عن علاقتها بخطيبها السابق وتقول لك !.. (ملتفتا لمنال) قلتي له طبعا يا منال؟..

**منال:** آه.. طبعا..

**الرائد:** على كل التفاصيل؟..

**معيد:** (منفعلا) أنا مش عارف أنت بتسأل الأسئلة دى كلها ليه؟.. وإيه يهمك فى موضوع خاص زى ده؟ وإيه علاقتك بالمهمه اللى أنت جاي عشانها هنا؟..

**الرائد:** (بخشونه مفاجئه) العلاقة دى أنا اللى أعرفها يا سيد سعيد...  
ومن مصلحتك انت وعروستك أنى اتأكد من أن مفيش علاقة...  
يعنى ببساطه كده إثبات حقيقة العلاقة بين الثالث بتاعكم انت  
ومنال وعادل... هو اللى حاينفى أى علاقة بينك وبين المؤامرة  
الإرهابيه اللى بنحقق فيها..

**سعيد:** ازاي؟ مش فاهم !..  
**الرائد:** افهمك ! فيه احتمال قوى انك حددت الليله دى بالذات لزفافك  
عشان تبقى غطا للمحاوله الإرهابيه.. وإن الجواز ده مجرد  
كاموفلاج ماهوش جواز حقيقى خصوصا لما يكون مثقف معتز  
بكرامته زيك عارف حقيقة العلاقة اللى بين خطيبته وبين نائب  
رئيس مجلس الإدارة..

**سعيد:** علاقه ايه؟ مجرد خطوبه واتفسخت..  
**منال:** وكل يوم بتفسخ ميت خطوبه !..

**الرائد:** صحيح.. بس مش كل يوم العلاقة با البنث وخطيبها بتكون تعدت  
حدود الخطوبه ووصلت لمنطقة الورطه.. ويكون الخطيب الجديد  
عارف حدود الورطه دى !

(تنخفض الإضاءة وتركز فقط على الثلاثه.. يتجمد كل من سعيد  
ومنال فى مكانيهما ويواجهها الرائد نافخا صدره متجهما كمن  
يمتلك ناصية الموقف)

**سعيد:** (بعد لحظة.. بصوت مرتجف) أنا ماسمحلو كوشى تتدخلوا  
بالفضاظة دى فى حياتنا وعلاقتنا... ومش حارد على أى سؤال  
تانى!

**الرائد:** دا بياكد إنك عارف.. وإن كلامى مافاجأكش !  
**سعيد:** انت بتخرف (بحركة هروب) بتحاول تضغط على أعصابى عشان  
أقول اللى أنت عايز تسمعه ولو بالكذب.. بس المحاوله دى  
حاتفشل.. أيوه مش حاتقدر تستفزنى..



**منال:** (تقترب من سعيد وتلمس ذراعه فى رفق) ماتسمعوش يا سعيد .. ما تخليش كلمه واحده من كلامه تدخل جواك ..

**الرائد:** ايوه بالطبط! عشان ليلة الزفاف ماتخسرش!... طبعا.. أى راجل فى موقف ممكن يحس الحقيقه جواه.. ضل شك.. لكن مايحبش يواجهها بتتقال فى وشه وعلى لسان غيره.. ويفضل أنه يضحك على نفسه للآخر.. ويفضل يكذب على روحه لغاية ما يقنع نفسه بأن الحقيقه مش حقيقه.. مش بس علشان يقدر يعيش مع مراته ولا عشان الهدف اللى كان سبب جوازه منها يتحقق... بس يا خساره يا أستاذ سعيد.. يا حضرة المناضل القديم.. الهدف ضئيل قوى مجرد ترقيه لمنصب أعلا...

(يخرج من جيبه ورقه.. يقدمها لسعيد..) اقرأ الورقه دى يا سيد سعيد.. فيها عنوان ورقم تليفون.. مرتبطين ببعض قوى عنوان شقه مفروشه فى المهندسين مأجرها الأستاذ عادل نائب المدير العام.. وتليفون طبيب أمراض نساء له سمعه معينه فى إجراء عمليات خاصه.. والهانم عروستك ترددت على عيادته من ثلاث أسابيع!

(مؤثر موسيقى.. سعيد لا يمد يده لتناول الورقه.. الرائد يتركها لتسقط على الأرض ثم ينسحب.. مثال تنهار على الكنبه... سعيد جامد كالتمثال)..

**سعيد:** مش ممكن تكون الحكايه بالبشاعه دى!.. أنا صحيح كنت عارف إنك بتحبيه.. لكن صدقتك لما حلفتى لى أنه عمره ما طال منك غير لمسه ايد

**سعيد:** بكثيره قوى يبوسك... وقتلتلى إنك كرهتیه وماعدتیش متصوراه صدقتك... كنت عايز اصدقك..

**منال:** (تندفع نحوه) ولازم تصدقنى دلوقتى يا سعيد.. الراجل ده عايز يوقعنا فى بعض عايز يفسد أحلى ليلة فى عمرنا..

**سعيد:** (يدفعها بخشونه) مالوش مصلحه...

**منال:** (تركع متشبثة بيده) اعمل معروف.. ماتهدش بيتنا قبل ما نحط أول طوبه فيه...

سعيد: (وكانه لا يسمعها) المشكله فى اللى قاله.. الحقيقه اللى مش عايز  
أواجهها على لسان غيرى.. بس أنا مش كده.. مش ممكن أكون  
كده.. جايز طمعت فى ترقيه.. وممكن أكون ضعفت تحت ظروفى  
إخواتى اللى باربيهم.. واللى لسه فيهم واحده عايزه تتجوز وواحد  
مسكين عايز يتعالج بمبالغ فلقيه.. ولحظة الضعف دى كانت أنسب  
لحظه يهاجمنى فيها عادل الشرشابي ويحط الطوق فى رقبتى..  
الترقيه مش مجرد ترقيه.. دى فيها حوافز وبدل تمثيل وسكه  
مفتوحه على التعاقدات والمشتريات ولجان الفحص ولجان البت..  
نقله ضخمة تحل كل المشاكل لآخر العمر.. صفقه ماقدرتش  
أرفضها.. والمقابل ايه؟. اخلصه من بنت بتحبه وبقت عبء عليه..  
لكن حدود الحب دى إيه.. والعبء وزنه كام؟.. ماحبتش أفكر..  
هربت.. نطيت فوق كل الشكوك والإشاعات والفيران اللى عامله  
ملاعب فى عبي.. لغاية ما نطت قدامى وفوق كتافى الليله.. ومش  
عارف أهرب منها فين ولا إزاي.. (يركع بجوار منال) قوليلى انت..  
اعمل ايه؟.. (يمسك بكتفياها بينما تبكى فى حرقه) بدل ما تبكى  
جاوبينى.. قوللى لى إزاي أنا وابت الليله ننام فى حضن بعض  
والفيران حوالينا... إزاي؟ إزاي (تطفأ بقعته الإضاءة عليهما...  
وتسقط إضاءة أخرى على مقدمة المسرح عند الشرفه حيث وقف  
كلا من الرائد والنقيب.. يدخان فى هدوء)

النقيب: الدور على مين؟..

الرائد: حافكر لحظة وأقول لك....

النقيب: بالمناسبه.. احنا ناسين اوده وشخص..

الرائد: مانسيتش... اوده السلم المشتركة... والراجل العجوز بعدين

النقيب: على رأيك مالهش أهميه...

الرائد: مافيش حاجه ولا حد مالوش أهميه الليله

النقيب: (وهو يلقي بعقب السيجاره بطرفى أصبعه فى الشارع) تمام...

**الرائد:** يا جدد بترمى العقب فى الشارع... افرض نزل على يافطه ولا  
قوص نصر حرقهم...

**النقيب:** (ضاحكا) يافندم رجالتنا تحت.. حايحقوا اى حريقه....

**الرائد:** (ناظرا فى ساعته) الوقت بيجرى وعايزين نخلص... ياللا.. وحيد  
ورباب...

(تطفأ المقدمة.. تضاء الصاله حيث ترى وحيد.. ورباب واقفين..

والنقيب يدخل لهما قادما من الشرفه)

**النقيب:** يا مرحب...

**وحيد:** شوف يا حضرة النقيب.. اختصارا للموقف وحفاظا على وقتكم  
التمين.. أنا كنت بره ولسه راجع من ساعتين.. (يخرج من جيبه  
باسبور وتذكرة طيران) وأدى الباسبور والتذكرة.. الباسبور عليه  
ختم الوصول.. يعنى اى خطط ارهابيه بفرض إنها حقيقه... فأنا  
ماليش اى صله بيها...

(يضع الباسبور بالتذكرة فى يد النقيب)

**النقيب:** (يصفق فى تحيه ساخرة) هایل.. برم وفتك صحيح.. لميت انت كده  
الموضوع ولميتى معاه وحطينا فى جيبك... لا.. برافو

**وحيد:** العفو يا حضرة النقيب.. أنا بس باحاول اساعدك.. ومع ذلك.. أنا  
تحت أمرك...

**النقيب:** انت جاي منين ياله؟..

**وحيد:** وله؟.. آه.. ليلتنا أنس.. ماشى.. البلد اللى انا جاي منها عندك فى  
الباسبور....

**النقيب:** (يفر الباسبور) آه... دا انت جاي من وكر اللبش والمشاكل

**وحيد:** وحياتك مالى دعوه بالسياسه.. لاهنا.. ولا هناك.. أنا أصلا باكره  
السياسه... ما بحبش اتعطاها... وباكره الإرهاب والإرهابيين...  
وباتمنى ربنا يقدركم عليهم علشان تخلصونا منهم

**النقيب:** (يلقى إليه الباسبور والتذكرة فيتلقفهم) ايه اللى رجعت

بسرعه؟.. دانت مكملتش تسع شهور.. وعلى حد علمى مافيش  
اجازات بيدوها قبل سنه على الأقل...

وحيد: ماهو أنا مش راجع اجازة... أنا راجع نهائى...

النقيب: طبعاً.. بعد ما كملت تدريبك وبقيت جاهز...

وحيد: تدريب على إيه... وحابى جاهز لإيه يا حضرة النقيب؟..

النقيب: مابلاش لف ودوران وندخل لبعض صراحه ونوفر الوقت على بعض

وحيد: صدقنى انا مش فاهم..

النقيب: (مناديا) شاويش جعيصه..

(يدخل جعيصه)

الشاويش: (محييا) افندم...

النقيب: خد الأستاذ الحمام وادى له دش ينعش ذاكرته...

(يتقدم جعيصه من وحيد الذى يتراجع أمامه فى قلق)

وحيد: عندك ياسيادة اللوا... أنا مش محتاج لا دشاش... (للنقيب)..

حضرة النقيب يقوللى عايزنى أقول إيه وأنا جاهز...

النقيب: اعتراف صريح ومباشر بالحقيقه.. بمعسكر الإرهاب اللى بتحتضنه

بلد بتنتهج سياسة معادية وتدريب فيه أفراد مضللين وترجعهم

مصر عشان ينفذوا عمليات ارهابيه.. المعسكر ده أنت قعدت فيه

ست شهور.. بعد ما فشلت فى العثور على عمل هناك لمدة ثلاث

شهور.

وحيد: (مبغوتا) مش صحيح.... دا كذب...

جعيصه: (يلكمه فى ظهره) اخرس.. اتكلم مع الباشا بأدب...

النقيب: سبيه يا جعيصه وهات شنطته.. افتحها وفتشها...

وحيد: (يجرى يقف أمام حقيبة السفر) ماحدث من حقه يفتح شنطتى...

الشنطة اتفتحت فى المطار واتفتشت... وكل اللى فيها هدومى

وحاجاتى الشخصيه...

جعيصه: (يشمر اكمامه) الظاهر عليك عايز تخش الحمام...

**رياب:** (بانزعاج).. اعمل معروف يا حضرة الظابط... وحيد أخويا مالوش

دعوه بالحاجات دى... تدريب إيه وارهاب إيه؟.. دا بعد ما قبلوه فى

الكيله الحريه وقعد فيها ثلاث شهور... سايبا وجرى عالهندسه

**النقيب:** (وكأنه تصيد خطأ) ليه؟..

**وحيد:** مابحش العسكريه... ومدة تجنيدى كلها خدتها جزاءات وتكدير

**النقيب:** اعتراف معقول برضه... سيبه يا جعيصه وارجع كما كنت

(ينسحب جعيصه بعد تأدية التحية.. ويتقدم النقيب من وحيد)

**النقيب:** كرهك للعسكريه له دلالة نفسيه خطيره...

(يندفع الرائد داخلا)

**الرائد:** نخش فى الموضوع.. (النقيب يحيى بالإشارة.. يرد عليه الرائد.. يخرج

النقيب) (ملتفتا لوحيد) مش عايز تفتح شنطتك ليه يا وحيد؟.

**وحيد:** لأنها شنطتى.. واللى فيها مايخصش حد غيرى...

**الرائد:** ولا حتى حبى.. يعنى تفرجنا عالحاجات الجميلة اللى جبتها معاك

أكيد جايب هدايا لماما واخواتك.. وأصحابك...

**وحيد:** يعنى.. الهدايا برضه أشياء خاصه..

**الرائد:** (يضحك) إحنا عارفين اللى فى شنطتك كله يا وحيد.. ومفيش

داعى تتعب نفسك وتفتحها.. إلا إذا كنت عايز تطلع هدية رباب

وتقدمها لها... (لرباب) على فكرة.. وحيد جايب لك حته فماش

جميله قوى تتفع فستان زفاف...

**وحيد:** ماتستعرضش عضلاتك على يا سيادة الرائد.. ماهيش تكنولوجيا

ولا معجزه... شنطتى اتفتحت فى المطار وسهل قوى إنكم تعرفوا

محتوياتها...

**الرائد:** وسهل قوى نعرف كل حاجه عايزينها يابشمهندس...

**وحيد:** وقلتها لكم بلسانى أول ما طبيتوا والغريب انكم برضه مصرين

تفتشوا وتستجوبوا وتعملوا الشوية بتوعكم..

**الرائد:** جميل.. انت اشجع من أخوك الكبير.. ماتلامضش علينا كده

وحيد: سعيد فقد شجاعته من زمان.. من يوم مامسكتوه فى أحداث يناير  
سبعة وسبعين واستضيفتوه فى القلعة...

الرائد: لكن انت لسه شجاع.. وارجو إنك تفضل محتفظ بشجاعتك...

وحيد: مفيش داعى للأسلوب ده يا حضرة الرائد.. لو عندك اتهام محدد  
وجھولى...

الرائد: احنا ماعندناش اتهامات محدده يا سيد وحيد.. احنا بنحاول نعرف  
وحيد: وايه اللى عايزين تعرفوه منى سعادتك؟..

الرائد: بتكرهنا ليه؟..

وحيد: انتم مين سعادتك؟..

الرائد: انت من ساعتها بتنادينى بضمير المخاطب الجمع.. يعنى انت اللى  
تجاوب عالسؤال..

وحيد: سؤال ايه سعادتك؟..

الرائد: بتكرهنا ليه؟.. وايه حكاية سعادتك دى؟.. مش نوع من التريقه؟

وحيد: انا لاقدر اتريق عليكم.. ولا باكرهكم.. بس ماباحكمش..

رياب: وحيد.. بلاش الكلام ده اعمل معروف.. ماتستفزه مش...

الرائد: شفت اختك قلبها واكلها وخايفه عليك ازاي؟.. بتحبك..

وحيد: ربوبه؟.. طبعا.. مش أختى؟..

الرائد: بس انت مابتحبهاش...

وحيد: (هازئاً) قديمه...

الرائد: فعلا قديمه.. من زمان.. عمرك ما حبيت حد يا وحيد... باباك

بس يمكن؟.. وحتى باباك كان حبك له نوع من الأنانيه عشان كان

بيفضلك على اخواتك...

وحيد: (غاضباً) بابا وماما واخواتى مالمش صله بأى شىء عايز تعرفه

الرائد: بالعكس.. الصله قويه جدا وواضحه.. الأنانيه والعجز عن الحب..

صفات لابد من توفرها فى الارهابى المثالى...

وحيد: طب ايه رأيك بقى أن ماحدش بيعجب اخواته وأسرته قدى؟..

**جواب:** (تتحرك لتلتصق بأخيها وتتأبط ذراعه) وحيد يبحبنا واحنا بنحبه  
**الرائد:** تفكرى؟ طيب اسألينه كده عمل ايه مع إبراهيم عبد الفتاح شريف  
من تسع شهور قبل ما يسافر مباشرة!...

(مؤثر موسيقى.. وحيد يجمد مكانه... رباب تنظر له باستطلاع  
تفلت ذراعها من ذراعه تبتعد عنه خطوه)..

**جواب:** (مردده فى اضطراب).. إبراهيم؟..

**الرائد:** ايوه.. زميلك فى مكتب البوسته.. اللى بيحبك وبتحبيه من سبع  
سنين.. ومش قادر يتقدم لك لأن ماعاهوش فلوس.. وكان الوحيد  
اللى يعرف حكايتكم.. اخوكى الحنون.. وحيد.

**جواب:** (تستدير كاملا نحو وحيد) بيقول ايه الظابط ده يا وحيد.. ايه  
الحكاية؟..

**وحيد:** ماقلش حاجه مانعرفهاش يا رباب.. بس اسمعى.. اوعى تصدقنى  
اى حاجة يقولها..

**الرائد:** تقدرى تحلفى ابراهيم عشان يصارك بالحقيقه يا آنسه رباب !

**جواب:** حقيقه ايه؟ اتكلم اعمل معروف...

**وحيد:** ماتسمعيهوش يا رباب!..

**جواب:** لأ حاسمه يا وحيد.. لازم اسمعه.. من يوم ما سافرت وانا حاسه  
إن إبراهيم متغير معايا وكل ماسأله يهرب منى.. ودايما يسألنى  
وحيد مابعتش جوابات.. وحيد ماتكلمش فى التليفون (مستديره  
للرائد)

ايه الحكايه يا حضرة الظابط؟..

**الرائد:** اقول لها ولا تقول لها انت ياباشمهندس؟..

**وحيد:** انتوا عايزين مننا ايه؟ بتحشروا صوابكم فى بطوننا ليه؟ احنا بيت  
عادى.. وأسرة عاديه زى عشره مليون اسره فى مصر..  
ماعملناالكش حاجه.. ما وقفناش فى سكتكم.. بتحكمونا وقاعدین  
متربعين على كل سنتى فى البلد.. مقلناالكمش قوموا.. يبقى ايه

لسه فى ايدينا وطمعانيين فيه؟ خايفين مننا؟ تبقى نكته لانكم انتوا  
الى علمتونا الخوف..

**الرائد:** (بصرامه) الجمععه والهتاف مش حايفيروا الحقيقه.. مش  
حايزوقوا الأنانيه والطمع ويخلوهم حب وشهامه وجدعنه.. ولو  
باقى عندك ذرة من رجوله.. واجه اختك.. ايه قدامك.. قول لها  
**وحيد:** (بحركة هروب مبتعدا) مش حاقول لها حاجه قدامكم.. مش  
حاديكم اى حق فى اقتحام نفوسنا ومشاعرنا وأسرارنا بعد  
ماقتحمتوا جدران بيوتنا..

**الرائد:** يبقى أقولها أنا... (يتقدم نحو رباب) أخوكى المحب العطوف يا آنسه.  
(تجربى رباب منه إلى وحيد)

**رباب:** لأ.. قوللى انت يا وحيد.. اسمعها منك انت.. مهما كانت...  
**وحيد:** مش قدامه يا رباب.. اقسم لك انى حاقول لك كل حاجه بينى  
وبينك.. أو بيننا احنا الثلاثه.. أنا وانت وابراهيم.. أو حتى قدام ماما  
وأخواتك لكن قدام دول لأ... ماتدهمش فرصه يذلونا اكثر من كده...  
**الرائد:** (يتقدم بينهما بفضاضه) المسأله مافيهاش اختيار لك... يا تقول  
لها دلوقت حالا يا اما أقولها أنا..

(تستدير رباب ببطء لتواجه الرائد)

**رباب:** مش عايزه اسمع! مش عايزه اعرف حاجه!..  
**الرائد:** (بلهجة أمره سلطويه) حاتسمعى غضب عنك  
**رباب:** (بحركة سريعه تضع اصبعى يديها فى أذنيها) قول الى انت عايزه  
**الرائد:** (بخشونه) شيللى صوابك من ودانك...  
(تقف رباب جامده بتعبير من لا يسمع.. يسرع إليها وينزع يديها  
بالقوه) قلت حاتسمعى يعنى حاتسمعى  
**رباب:** أخ.. ايديه حاتتكسر..

(يسرع وحيد ليمسك بيدي الرائد محاولا تخليص رباب)..



**وحيد:** ابعد ايديك عنها .. أى قانون ده .. اى عرف يسمح لك تجبر اى انسان يسمع غصب عنه؟..

**الرائد:** (وقد استشاط غضبا) انت بتتجرأ وتلمسنى؟..

**وحيد:** زى ما تجرأت ولمستها....

**الرائد:** كده؟.. انا المخطئ اللى اتعاملت معاكم بالذوق والإنسانيه

(صارخا ينادى) عباس .. جعيصه .. اجمع هنا فورا ...

(من كلا الحجرتين .. يندفع عباس وجعيصه وهما يؤديان التحية فى حركة عسكريه صارمه)

**الكتنان معا:** تمام سعادتك يا فتندم!

**الرائد:** عباس يمسك الولد ده ويكتفه ... وجعيصه بكتف البنت دى ...

(يسرع عباس بتقييد حركة وحيد .. وجعيصه يلوى ذراعى رباب خلف ظهرها)

**وحيد:** مش من حق اى حد فيكم يلمسنا .. احنا مواطنين ولنا حقوقنا ولنا كرامتنا ...

**وساب:** (متأله تصرخ) آى ... ذراعاتى .. اعملوا معروف .. الحقنى يا ماما الحقنى يا آبيه ....

(يندفع الى المسرح كلا من وداد تتبعها وفيه .. ثم هانى على كرسيه المتحرك .. وأخيرا من اتجاهين مختلفين يدخل سعيد ومنال)

**وهاد:** (تهرع نحو رباب) مالك يا رباب؟.. فى ايه يا بنتى؟..

**وفييه:** دول مكتفينهم ياست هانم .. حاتعملوا فيهم ايه حرام عليكم ...

**هانى:** ايه اللى بيحصل فى البيت الليله؟.. مالكم ومالنا؟..

**سعيد:** (يتجه مباشرة نحو الرائد) لسه ماخلصتوش مهمتكم المقدسه فى بيتنا؟..

**الرائد:** (مبتعدا) طول ما فيه مقاومه للتحقيق ورفض للتعاون .. المهمة مستمرة ... ودلوقت ... حاتعرفوا السبب ...

(دقات عنيفه على الباب المشترك)

ص. مهيب: (من الخارج) افتحوا يا ولاد.. افتحى يا وداد هانم.. إيه الهيصه  
اللى عندكم دى.. طمنونى اعملوا معروف..

الرائد: شدى الترياس وافتحى له يابت.. خليه يشرف هو كمان.. (تقف  
وفيه متردده)

وفيه: افتح له ياست هانم؟..

الرائد: (غاضبا بلهجة أمرة) انا اللى باصدر الأوامر هنا.. قلت لك افتحى تفتحى...  
وداد: افتحى يا وفيه...

(تسرع وفيه وتزيح المزلاج.. تدور الاكره.. ويدخل مهيب مندفعاً)  
مهيب: فى ايه يا جماعه كفا الله الشر... (يدير بصره.. يفاجأ.. يستمر  
مكانه) الله؟.. مين دول؟.. (يتقدم فى خطوات متئده ليتفحص  
المكان) ضيوف؟.. لأ.. ضيوف ايه؟.. دا واحد مكثف رباب.. والثانى..  
و.. يا خبر؟.. حراميه؟..

هانى: ياريت.. دول مباحث يا عمى.. بوليس...

الرائد: (يتقدم من مهيب) اهلا بالزعيم...

مهيب: (يتطلع إليه متفحصاً) زعيم؟.. زعيم ايه؟.. انت حضرتك رتبك ايه؟  
الرائد: رائد....

مهيب: صاغ يعنى؟.. ومش لابس اليونيفورم ليه يا حضرة الصاغ؟..

هانى: عشان مباحث يا عمى...

مهيب: آه.. مباحث.. والمباحث هنا ليه يا ولاد؟..

الرائد: عشان خاطرک انت بالذات يا سيد مهيب...

مهيب: الله.. داننوا عارفين اسمى..

(من الشرفه يتقدم متكلماً كأنه يؤدى قطعة محفوظات)

النقيب: مهيب عثمان سيف اليزل.. خمسة وستين سنه.. بالمعاش.. اعزب

وليس له أولاد.. عضو قديم فى جمعية اليد السوداء الإرهابيه فى

الاربعينيات.. وعضو مؤسس فى حركة "حادشدهش".. الحركة

الديمقراطيه الشعبيه الدوليه الشيوعيه..

**مهييب:** (بابتهاج من يستجع ذكريات عزيزه) ياه.. انتوا لسه فاكرين؟.. الايد السوده وحادشدش؟.. كانت ايام.. ياما اصطدنا عساكر انجليز فى الايد السوده.. وياما هربنا م البوليس والقلم السياسى.. فاكتر مرة استخبينا عند عزيز فهمى الله يرحمه.. وخذنا فى السر قابلنا الدكتور ماهر.. والدكتور النقراشى.. وقعدنا معاهم سبع ساعات.. وفجأه طب علينا الباشا... (يضحك بسرور) آى والله.. بس أنا ندمت قوى اللى ماسمعتش كلام عزيز فهمى والدكتور مندور.. كانوا عايزينى ابقى معاهم فى الطليعه الوفديه.. أيامها كانوا الجماعه بتوع حادشدش بيزنوا على دماغى.. رحت معاهم.. وياريتنى مارحت.. مافاتش اسبوع.. (متجها للنقيب) إنت اللى مسكتنى فى عزبة النخل

**النقيب:** (ناظرا للرائد الذى يبتسم) انا؟.. دانا عمرى يادوب خمسة وعشرين سنه..

**الرائد:** (يغمز للنقيب) لأ مطبوط انت.. انت يا أخى..

**النقيب:** آه.. أنا.. معلهش.. ذاكرتى بقت ضعيفه..

**مهييب:** (يوافجهما) وديتوني الواحات.. وهناك اتخانقت مع بتوع حادشدش.. وقدمت استقالتى وأنا فى ماقوسه.. وخرجت عشان ادور عالجماعه بتوع الطليعه وادخل حزب الوفد.. مالمقتش.. كتمم انتم جيتم..

**الرائد:** احنا؟.. جينا منين؟..

**مهييب:** من هناك.. من البتاعه دى.. بتقولوا عليها ايه؟.. ايه يا مهييب؟ ايه يا مهييب.. آه.. المعسكرات.. مش طلعتوا منها وحاطوا قصر عابدين ومشيتوا الملك؟.. هو كان فى عابدين ولا المنتزه؟..

**مانى:** دول مش جيش يا عمى.. دول بوليس..

**مهييب:** كلهم عساكر.. كلهم حاطين نسور ودباير..

**حميد:** اول مره يقول حاجه صح.. خف ذراعك يا حضرة الصول.. أنا مش حاطير..

مهيب: ماتسيبه يابنى.. وانت يا فعل ياللى هناك.. البنت زى العصفوره

الى بتفرفر فى ايدك.. خلى عندك نخوه ومروه وابعد عنها.. (يدور

ليواجه الرائد) ماتقول لهم يا حضرة الصاغ...

الرائد: حلو أسلوب الاستهبال ده يا راجل يا عجوز.. بس معلش.. دورك

جاي (يتحرك للوسط) حاتتكلم يا وحيد.. ولا اتكلم أنا؟

وحيد: (منفجرا) حاتكلم.. بس سييوها..

رياب: ماتقولش حاجة يا وحيد..

الرائد: سكتها يا جعيصه.. (جعيصه يضغط على ذراعى رياب فتطلق

صرخه مدويه)

وحيد: (ينتزع نفسه من عباس) سيبنى.. حاقول كل اللى الوحوش دول

عايزين يسمعوه.. (يحاول عباس الامساك به)...

الرائد: سيبه يا عباس.. (يسرع وحيد ليقف أمام رياب)...

وحيد: سامحيني يا رياب.. انا استندلت معاكى ومع ابراهيم.. خدت منه

الفلوس اللى محوشها عشان تتجوزوا.. كان متجمع معاه ثلاث تلاف

جنيه.. بعد ما باع نص البيت اللى سابتهوله أمه فى الحسينيه.. نصبت

عليه.. ايوه.. نصبت.. قلت له انى حابعت له عربيه يشغلها تاكسى

ويزود دخله أو يبيعها بمبلغ كويس ممكن يجوزكم ويستركم.. كنت

محتاج اقطع التذكرة عشان اسافر وادفع لسمسار العقود اللى جاب لى

عقد العمل والتأشيرة.. لفيت على كل الأبواب.. وعملت كل المحاولات..

وأخيرا مالقيتش غير فلوس إبراهيم.. ادانى.. ووصيته مايقولكيش..

ونفذ الاتفاق رغم غيابى عليه ورغم انى ما طمنتوش بجواب فيه كلمه

واحد... إبراهيم راجل يا رياب يستاهل... جوهره زيك..

رياب: (ودموعها تنهمر).. اخص عليك يا وحيد.. داحنا بقى لنا سنين

بنحط القرش على القرش.. هو من ناحيه وأنا من ناحيه.. كان

بيستخسر فى نفسه جزمه جديده.. وكنت باقلب فساتينى.. كنا

بنوفر ثمن الفسحه ومانقابلش بعض عشان مانصرفش...

**الرائد:** (يشير بجعبته فيتركها) .. (تتحسس ذراعيها وهي تبكي) ... نداله ..  
**وحيد:** ماتعيطيش يارباب .. أنا حاصلح غلطتى .. أنا جايب معايا فلوس ..  
أنا مارجمتش فاشل خايب زى سعيد مابيقول .. أهه .. (يجرى الى  
حقيبته سفره ويبدأ فى فتحها) .. أنا جايب لك فلوس .. وجايب  
للبيت كله هدايا .. (يفتح الحقيبة .. يخرج منها قطع قماش  
وهدايا مختلفه) ده فستان لاما ومعا توربون لاميه .. ودى نضاره  
بيرسول اخر موديل لك يا سعيد .. وده الدانتيل جيبير بتاعك يا  
رباب عشان فستان زفافك ودول لك يا هانى .. كاسيت صغير م اللى  
كنت عايزه ومجموعه كامله لشرايط فيروز .. ودول بلوزتين لك يا  
وفيه ..

**هنقيب:** (الذى انحنى وأخرج من الحقيبة مدفع رشاش "لعبه") وده لمن يا  
استاذ وحيد؟ ..

**وحيد:** دا .. دا لعبه .. بتتور وتطلع صوت رصاص ويس .. عجبنى اشتريته ..  
اصل طول عمرى باحب لعب الأطفال ..  
**مهييب:** وانا يا وحيد؟ ..

**وحيد:** انت؟ .. انت ايه يا أستاذ مهييب؟ ..

**مهييب:** مافتكرتش الدوا اللى وصيتك عليه؟ ..

**وحيد:** (مشيحا عنه) آسف .. نسيت .. حابقى ادور لك عليه هنا ..

(بينما يستمر مهييب كاسف البال) وفلوسك يا رباب هنا فى  
جيبى .. بس معلش حاديهالك بترافل شيك .. (يخرج من جيبه  
مجموعه شيكات سياحيه) ..

(يتقدم بها إلى رباب) .. خدى .. شيكين كل واحد بخمسميت  
دولار .. حايطلعوا أكثر من ثلاث تلاف جنيه ..

**رباب:** (مشيحه عنه) .. انت ماخذتهمش منى .. رجعم لابراهيم ...

**وحيد:** اوكى .. مفيش مشكله (يعيد الشيكات لجيبه فى اللحظة التى  
يسرع فيها الرائد بامساك يده بقوة) ..

الرائد: منين دا كله يا وحيد..  
وحيد: منين إيه؟.. من شغلى طبعاً.. أنا مهندس وكنت باشتغل فى أكبر شركة مقاولات هناك..  
الرائد: لمدة تسع شهور بس.. (ينتزع الشيكات من يده) والشيكات السياحية دى قيمتها أكثر من أربعين ألف جنيه..  
سعيد: أربعين ألف جنيه؟.. وجاى عايز تطلعنا م الشقة؟.. وعايز تطرد عمك مهيب من اودته؟.. لأ.. ويتضحك علينا بقصاقيص ونضارات.. وشرايط كاسيت.. انت ايه يا أخى؟  
وداد: مش وقته يا سعيد.. بعدين نبقى نتكلم فى اللى يخلصنا وننشر غسلينا فى وسطينا..  
وحيد: هو لسه فاضل حاجه ماتششرش يا أمى؟..  
وداد: انت كمان تسكت خالص وكفايه اللى سمعناه منك؟..  
الرائد: (متدخلا) لأ.. مش كفايه يا هانم.. لازم نعرف أصل الفلوس اللى راجع بيها وحيد باشا.. (لوحيد) منين الفلوس دى كلها يا سيد وحيد؟..  
وحيد: من شغلى.. ومالكش عندى كلمة واحدة تانيه.. ومستعد اروح معاك الاداره.. وتعلقنى وتضربنى وتطفى سجايك فى جسمى.. لكن مش حاتلاقى غير الكلمة دى..  
النقيب: بأقول جعيصه ياخده يدى له دش فى الحمام.. (يلقى بلعبة المدفع على الأرض)..  
وحيد: ماعنديش مانع.. (يتحرك نحو جعيصه) تعالى يا سيد جعيصه..  
أنا جاى معاك..  
(جعيصه يتأبط ذراعه ويبدأ فى جره للحمام)  
الرائد: عندك انت وهو..  
(يتركه جعيصه ويستدير وحيد للرائد)  
وحيد: ايه يا سيادة الرائد؟.. مش عايز تكمل التحقيق؟..  
الرائد: ماتستعجلش على رزقك يا رامبو.. إحنا مش عايزين نعرف الفلوس

دى منين .. لأننا عارفين .. (ملوحا بالشيكات السياحيه) معلوماتنا بتأكد أن الفلوس دى مدينها لك الجماعه بتوع المنظمه الارهابيه عشان تصرف منها على بقية أفراد الشيكه هنا .. لكن اللى حانعرفه منك وحنأخذك الإدارة عشان نسألك فيه .. الأسماء والعناوين .. بره .. وهنا ..

**وحيد:** (يرمقه بتحدى) انت مصدق اللى بتقوله بدمتك؟

**منال:** أنا هلكت يا سعيد .. عايزه انا ..

**سعيد:** (بحفاء) روحى نامى فى اى حته تعجبك ..

**منال:** وانت .. مش جاي معايا؟

**سعيد:** بعدين .. أما ضيقونا يعفوا عنا ويسيبونا ..

**الرائد:** (ينظر فى ساعة يده) خلاص .. قرينا .. دلوقت انا مش لازمى الا وداد

هانم والأخ هانى والراجل العجوز والانسه وفيه .. الباقي كله يتفضل ..

.. ياللا يا عباس .. ياللا يا جعيصه .. وصلوهم

(يتحرك سعيد ورباب ووحيد ومنال وخلفهم عباس وجعيصه

ويخرجون جميعا)

**النعيب:** (يتقدم بسرعه نحو وداد) انت اتجوزتى سنة كام يا مدام

**الرائد:** (مقاطعا) معلش يا أيمن .. المجموعه دى مش محتاجاك ..

**النعيب:** امر سعادتك .. (يتحرك خارجا الى الشرفه) ..

**وداد:** (تتقدم نحو الرائد) عايز منى ايه يا بنى؟

**الرائد:** الحقيقه يا أمى ..

**وداد:** اى حقيقه؟

**الرائد:** (مشيرا لمهيب) حقيقه الشبكه اللى بيديرها الراجل ده واللى جندوا

اولادك كلهم فيها ..

**وداد:** (لمهيب) انت كنت عامل شبكه ارايبه ورطت ولادى فيها يا مهيب؟

**مهيب:** زمان .. أيام جمعيه الإيد السودا كان عبد الفتاح عنايت واخوه ..

**الرائد:** (مقاطعا فى غضب) سيبك م الاسطوانه دى بقى ..

وداد: اسطوانه ايه يابنى؟.. انت تعرف الراجل ده كويس؟..

الرائد: قلنا تاريخه قدامك وهو اعترف...

وداد: تبقى ماتعرفهوش.. الورق اللى عندكم مابيعرفكش البنى آدمين...

عشان تعرف بنى آدم لازم تعاشره.. لازم تعيش معاه سنين وسنين وأنا اعرف مهيب.. اعرفه كويس.. مهيب طلق السياسة من سنة اتنين وخمسين.. قبلها كان هو والمرحوم جوزى يوسف زغلول بيشتغلوا سياسة.. وبيحاربوا الانجليز.... وبيخشوا السجن... لكن بعدها اتغيروا.. مابقوش هم بتوع زمان..

مهيب: (فى صحوة كاملة يتجه الى الرائد).. سبناهالكم يا حضرة الصاغ.. فضينالكم أرض الملعب.. وقعدنا فى مدرجات الدرجة الثالثة.. وقلنا كفايه علينا الفرجه وأدى احنا نشجع.. نهتف ونسقف ونغنى.. هتفنالكم وغنينا لما حسنا اتبجح.. وسقفنا لما كضوفنا ورمت.. لكن يا خساره.. الماتش كان وحش.. ماسخ.. مالوش طعم.. والنتيجه كانت خيبه من وسع..

الرائد: شفتى يا هانم؟.. مشاعر معاديه صريحه..

وداد: له حق ياخويا.. هو انتوا عملتوا فيه شويه؟..

هانى: (يسرع بكرسيه) انتوا دمرتوا حياته وحولتوه لحطام بنى آدم...

الرائد: (لأول مرة فى موقف دفاع) احنا؟.. ازاي؟.. دى أول مره اشوفه

هانى: احكى له يا عمى...

وداد: ماتقلبش عالرجال مواجهه يا هانى... دول لا حايفهموا ولا يحسوا..

مهيب: كان يوم فرحى يا حضرة الصاغ.. فاكرك؟.. كنت برضه ايامها صاغ.. ودخلت علينا.. وانا وبهيه قاعدين فى الكوشه..

(تطفأ جميع الأنوار ماعدا بقعه على مهيب وتتابع حركته على المسرح)

كان معاك عساكر كثير.. أول ماشفتكم فهمت.. ضحكت.. قلت لك.. اشرب الشربات انت وزمايلك يا حضرة الصاغ.. آنسونا وشرفونا



لغاية ما تنتهي الزفه وانا بالراحه حاجى معاكم.. يادوب بس اقعد  
خمس دقائق مع بهبه وافهمها.. شديتى من ياقة الجاكته وقومتى  
م الكوشه وحذفتنى على عساكرى يجرجرونى.. بهيه اتنفضت.  
صرخت.. مسكت فيك وهى بتترجاك وتعيط.. اعملوا معروف  
سيبوا مهيب.. زقيتها وقعتها.. زحفت وراك واتشعبطت فى رجلك.  
ابوس رجلك سيبولى عريسى.. ضربتها ببوز جزمته الميرى فى  
صدرها.. جت فى قلبها...

(يصمت مهيب.. تعود الإضاءة كما كانت.. وداد ووفيه وهانى ييكون  
بلاصوت)

الرائد: ماكنتش أنا..

مهيب: (يقترّب منه) كان مين؟ زميلك؟ رئيسك.. أى واحد منكم؟ الاسم  
مش حايفير حاجه..

الرائد: (متحولاً للهجوم) دا معناه إن لك تار عندنا؟.. يعنى حقدك علينا  
متأصل جواك.. مفيش مبرر أقوى من كده عشان تتأمر ضدنا.  
(متجه لمهيب) شفت يا مهيب أهو استغل كلامك ضدك... عشان  
كده ماكنتش عايزاك تقول حاجه..

مهيب: (يريت على يدها) ماتقلقيش على وداد هانم...

وداد: (تبادلته الترييت على يده) امال اقلق على مين يا مهيب؟..

مهيب: انا فداكى وفدا اولاد يوسف كلهم.. وياريت اخوانا البعدا يوافقوا  
ياخدونى ويحلوا عنكم.. انا مستعد اعترف لهم بانى زعيم الشبكة..  
وشيخ المنسر وكل اللى عايزينه بس يمشوا ويسيبوكم...

وداد: لا يا مهيب.. كفاهه اللى عملته عشاننا طول السنين اللى فانت..  
كفاهه عمرك اللى وقفته علينا... واحلى سنينك اللى ضيعتها قاعد  
جنب بابنا تراعيننا وتونسنا وتقف معنا فى كل أزمه

الرائد: يا حبابي.. مشهد عاطفى مؤثر.. يا ترى وحيد لو شافه حايقول  
لكم إيه؟..

وداد: واشمعنى وحيد؟.. ما هو ابنى هانى معانا.. وانت.. ووفيه.. ثم احنا بنعمل ايه؟..

مهيب: اللى بيننا شىء أطهر وأعظم من إنكم تفهموه يا حضرة الصاغ..

الرائد: ويا ترى وحيد بالذات يقدر يفهمه؟..

هانى: (مستفزا يكاد يبكى) انت إيه؟.. من أى صنف م البشر؟.. عايز توصل لإيه وتوصلنا إحنا لإيه؟..

الرائد: (مناديا) جعيصه.. إبعث وحيد..

وداد: مش ممكن يكون غرضكم زى ماقلتم.. وأكيد مانتوش بوليس ولا مباحث واللى يدور يلاقىكم عصابة متشردين م اللى بياخدوا المخدرات والبودره.. والهباب الأزرق اللى بنسمع عنه..

الرائد: بطلى هلفظه يا ست انتى.. الأمن مش سين وجيم ولا تفتيش بيوت.. الأمن الحقيقى تفتيش النفوس والضمائر والمشاعر اللى تحت الجلد.. هو ده الضمان الوحيد.. (يدخل وحيد.. ينظر لهم باستطلاع) تعالى يا أستاذ.. سؤال واحد تجاوبنا عليه وتفضل ترجع زى ما كنت..

وحيد: اسأل..

الرائد: انت بتكره عمك مهيب ليه؟..

وحيد: (وقد فوجئ بالسؤال) أ.. أنا؟.. مين اللى قال إنى باكرهه؟..

الرائد: ايوه بتكرهه.. وتتصور العمى الحيثى ولا تتصوروش؟..

وحيد: (يحاول التماسك) والله دا رأيك.. بس أنا فعلا ما بكرهوش..

الرائد: اتخانقت كام مرة مع والدتك بسبب تدخله فى شئونكم؟..

وحيد: ما.. ماتخانقتش..

الرائد: لأ.. اتخانقت أكثر من سبع مرات وسبت البيت ورحت تمام فى بيت أصحابك بسبب الختاقت دى...

وحيد: (مضطربا) الخلافات العائليه شىء وارد فى كل البيوت... وال

الرائد: (مقاطعا بلهجة تحقيق هجوميه) واخر مرة اتخانقتوا بسببه.. من عشر

سنين وانت فى الثانويه العامه لما عرفت إنه اتقدم لها وعازب يتجوزها ..

(بينما يستمر وحيد مكانه .. يتحول الرائد إلى وداد)

كانت المره رقم كام يا هانم اللى طلب فيها مهيب يتجوزك؟

**مهيب:** ماترديش عال كلام ده يا وداد هانم...

**وداد:** (بهذوء) ليه يا مهيب؟ مفيش حاجه نخاف منها ونخبئها...

(للرائد) اتقدم لى الأستاذ مهيب اربع مرات يا بنى... (تتقدم

ناظرة لوحيد ثم لهانى.. ثم توفيه).. كان رأيه دايما إن وجوده

وسطنا بشكل شرعى حايعميننا اكتر.. ويدى له فرصه يساعدا

اكتر.. خصوصا لما لاحظ إن وحيد اللى كان مرتبط بباباه قوى..

متضايق من دخوله وخروجه....

**وحيد:** (بانفجاره مكبوتة) كان مزودها..

**هانى:** (محذرا) كفايه يا وحيد.. خدى بالك يا ماما.. دول بيستدرجوننا

**وفيه:** إحنا مانردش عليهم خالص.. ادخلى نامى ياسست هانم.. وانت يا

عم مهيب ارجع اودتك.. والباقيين مش حايقولوا حاجه.. مش

حايتكلموا

**الرائد:** وفيه.. نطقنى اخيرا وف وقتك بالثانيه.. مانت الكارت الكسبان

اللى فتح بيه الأستاذ مهيب قلب الأرملة الحزينه..

**وفيه:** هو ايه دا أصله.. كارت ايه وارملة ايه؟

**وداد:** (بإحساس عازم بالخطر) انا بامنحك تتكلم كلمة زياده...

**الرائد:** تمنعيني ازاي يا هانم؟... ماتندهى لعباس وجعيصه يكتفونى؟

**وحيد:** التلميحات دى كلها على إيه يا حضرة الرائد؟

**الرائد:** حاعمل معاك صفقه.. تقوللى.. وأقول لك..

**وحيد:** أقول لك إيه؟

**الرائد:** تقوللى عالى شفته بين الهانم والدتك والأستاذ مهيب.. وخلاك

تاخذ موقف منه؟

**وحيد:** (منتفضا فى توتر) انت وغد..

الرائد: ماشى.. وغد.. ووضيع كمان... أنا عاجزك.. (يخرج من جيبه  
مظروف بريدى عادى) أى شاب لسه فى سن المراهق يشوف أمه  
فى أحضان راجل غير أبوه...

وحيد: (فى هستريا) اخرس.. (يمسك به) ولا كلمه تانيه.. انتم مش  
آدميين.. انتوا ضباع بتفتيش فى الجبانات.. خنازير دافسه دياما  
بوزها فى الزباله....

الرائد: (دون ان يشغل نفسه بالتخلص منه) جواب بخط ايدك لوالدتك  
كتبتهولها لما سبت البيت غضبان ورحت سمنود.. بتحكى لها فيه  
عاللى شفته.. وبتقول لها باللفظ.. ازاي تسمحن للحيوان ده يلمسك  
(ينهار وحيد على ركبتيه)

وحيد: (مغطيا وجهه بكفيه) اسكت.. اسكت..

الرائد: (ملوحا بالمظروف لوداد التى تسمرت مبهوته) ما وصلكيش الجواب  
ده يا هانم.. لأنه مابعتهوش.. لقيناه فى شنطته النهارده وهو  
بيفتش فى المطار..

(تتقدم وداد من ابنها الراكع.. تطفأ الإضاءة وتظل عليهما فقط)

وداد: انت فاهم غلط يا وحيد..

وحيد: ماتتكلميش.. ماتقوليش حاجه.. ماتكدببش.. خلى شوية الاحترام  
الى فاضلين لك جوايا زى ماهم..

وداد: (ترقع بجواره) أنا مش حاكذب يابنى.. أنا حافهمك.. اليوم ده أنا  
فاكراه كويس.. كانت ساعة عصريه.. وكنت باروق الدولاب فى ضرفة  
باباك شفت أوراق وصور مافهمتهاش.. قلت يمكن مهيب يعرف عنها  
حاجه.. ناديت له.. وريتهاله.. فاجأني مفاجأه زلزلت كياني كله..  
مادريتش بنفسى.. سقطت من طولى.. اتلقاني بين ذراعاته.

(يدخل لها الرائد)

الرائد: المفاجأه كانت اكتشاف.. السيد الوالد المرحوم يوسف زغلول كان  
متجوز ست تانيه ومخلف منها بنت...

(يضاء المسرح) الأم ماتت بعد خمس سنين.. جابها لمراته الأولانية.. وقال لها دى بنت ابن عمى.. البنت دى كانت وفيه (يتحرك إلى حيث وقفت وفيه ذاهلة) أبوكى وافق تعيشى شغاله.. لولاده ومراته.. ومات وسره فى صدره ومايعرفهوش غير صديق عمره.. الأستاذ مهيب.. اللى استخدمه كارت يكره بيه الست وداد فى المرحوم ويخليها تتخلى عن تعبيدها فى محراب ذاكره.. وفى الوقت المناسب طلع الكارت.. عرفت وداد هانم الحقيقه.. ومع ذلك سابتك على عماكى.. تفضلى شغاله تخدميه وتخدمى أولاده.. وعشان تنفس عن غيرتها وحقدتها عليكى قبلت الواد الخضرى اللى اتقدم لك وجوزتهولك وهى عارفه انه منحرف وبيتاجر فى المخدرات.. ولما دخل السجن واتطلقتى منه كانت عايزه تكررها وتجوزك للقهوجى...

**وفىيه:** (تتقدم كالمنوومه.. نحو وداد التى انهارت بجوار وحيد).. اللى بيقوله الراجل ده صح يا ست هانم؟..

**وداد:** (منفجرة فى هستريا وهى تبكى) ايوه صح.. حايفير إيه؟..

**وفىيه:** يعنى أنا.. بنتكم؟..

**هانى:** (الذى يسرع بكرسيه نحوها والدموع تسيل من عينيه وصوته يرتجف) انت بنتنا واختنا يا وفيه.. زى ما كنتى.. وزى ما حاتفضلى.. قومى ياماما.. ماتخلوش لعبتهم تنجح.. إحنا زى ما إحنا.. ماجرلناش حاجه.. (يحرك كرسيه إلى الرائد).. وانتوا خطتكم فشلت.. مش حاتضربونا ببعض وتذلونا وتتفرجوا علينا.. إحنا أقوى منكم.. سامعين؟.. إحنا أقوى..

(يدخل النقيب.. الرائد يضحك ساخرا)

**الرائد:** سامع يا أيمن؟.. الكسيح ده أقوى منا..

**النقيب:** ومين قال إن الارهابى اللى حايتهاجم الموكب بكره متنكر فى شخصية شاب مشلول بيتحرك على كرسى طبيى..)

(الجميع يعتدلون في حركة قلق)

مهيب: (محذرا بصوت عال) خدوا بالكم يا ولاد.. الخيه بتتحضر!  
وفيه: (وهي تلتصق بكرسى هانى وتحيطه بذراعها).. ماتخافش يا حبيبى  
وداد: اوعوا حد فيكم يقرب له.. (تجرى لتمسك بالكرسى من الجهة  
الأخرى ليصبح بينها وبينه وفيه)

هسانى: ايه يا ماما؟.. ايه يا وفيه؟ مخضوضين كده ليه؟.. ماحدش حايعمل  
لى حاجه.. لأن الكلام ده غلط.. معلومه متلفقه.. وحالتى أكبر دليل..

النقيب: (يتقدم بلهجه أمره) قوم من عالكبرى..  
الرائد: (يشعل سيجاره) بالراحه وبدون مقاومه حاتقوم وتمشى على رجلك  
هسانى: (بابتسامه مرتجفه..) ياريت.. نفسى!..

النقيب: مش عايزين استهبال.. قوم فز!...  
وداد: حرام عليك!

وفيه: دا بقاله كده عشرين سنه...  
النقيب: بس حايقوم..

(يستدير الرائد نحوهم.. يشير فيتنحى النقيب..)

الرائد: بالراحه.. قوم يا حبيبى.. قوم يا شاطر.. ابعدى يا هانم.. سيبه يا  
وفيه انتوا مش عايزين تشوفوه واقف على رجله؟.. هى دى المفاجأه  
اللى محضرها لكم..

(بينما تبعد كلا من ووداد ووفيه) مش كده يا هانى؟..

هسانى: انت.. انت بتقول ايه..

الرائد: باقول حاتقوم على رجلك!

هسانى: ما.. ماقدرش.. ماعرفش!

الرائد: كفايه تمثيل بقى.. (يفاجئ هانى بإمساكه من خناقه ويرفعه من  
على الكرسى بقوة.. هانى تتخاذل ارجله.. ولكن الرائدة يسنده)

(بلهجه أمره).. امشى...

هسانى: مش قادر....

الرائد: (يرفس الكرسي برجليه يبعده.. ويخرج الطبنجه) حاسيبك.. تقف  
على رجلك وتمشى.. لكن ورحمة أمى.. لو وقعت نفسك وفضلت  
تمثل عليا لأكون ضاربك بالطبنجه..  
(الرائد يترك هانى.. الذى يتأرجح.. ثم يحاول نقل خطواته...  
قدمه تزحف لمسافة قصيره ولكنه يسقط)  
هـانى: (وهو يغص بالبكاء) وحوش.. سفله..  
مهيب: (مهيب يخرج من جيب الثوب مسدسا ويشهره) أنا.. أنا الارهابى  
اللى بتدوروا عليه.. أنا اللى دبرت المؤامرة.. أنا اللى حانقذ  
الخطه.. واولها اللحظه دى..  
(يطلق رصاصه.. الجميع يتجمدون فى أماكنهم)..  
ستار





## الفصل الثالث



هنى: ما أقدرش أسكت.. سكت كثير طول السنين اللى فاتت.. رغم كل اللى  
شغته واكتشفته عايز البيت يفضل زى ما هو.. لكن خلاص.. من دلوقت مفيش  
حاجة غلط حاشوفها وأسكت..



## الفصل الثالث

(قبل رفع الستار: مع البلاك أوت تسمع اوفرتيرة الفصل.. دقائق موقعة بمصاحبة تيمة بيانو.. يعطيان مزيدا من الحزن والتوتر..)  
ترفع الستار عن نفس المنظر: إضاءة الشروق من خلال الشرفة.. عند المقدمة يقف مهيب مكبل اليدين بالقيد الحديدي (الكلايشات).. هانى على بعد خطوات على كرسيه المتحرك وقد مال رأسه على كتفه.. فى الخلفية تشكيل حركى للباقيين.. الأم تجلس منكسة الرأس.. وفيه واقفة بجوارها وقد أعطتها ظهرها.. رباب مكومة على الأريكة وقد دفنت وجهها بين ركبتيها.. سعيد خلف كرسي الأم مستندا بكفيه على مسند الكرسي... فى الطرف الآخر وحيد مرتكز بمرفقه على البوفيه... عند الباب يقف كل من عباس وجعيسة ويبد كلا منهما طبنجة مسددة إلى أفراد الأسرة... فى الشرفة يقف الرائد والنقيب.. وكلا منهما يتحدث فى التوكى الخاص به.. أصوات نداءات متقاطعة فى اللاسلكى

**النقيب:** تمت السيطرة على الموقف... حول....  
**صوت:** مطلوب تقرير كل نص ساعة حتى يصل الموكب... انتهى..  
**الرائد:** صقر ينادى مركز العمليات... هل تسمعنى.. حول....  
**صوت آخر:** مركز العمليات ينادى صقر... نسمعك.. حول....  
**الرائد:** اطلب تقرير عن خط سير الحملة.. حول....  
**الصوت:** عملية التمشيط مستمرة وسنوافيك بالنتيجة فى حينه.. انتهى  
(يغلق كل منهما جهازه)

النقييب: تفكر الرجل العجوز كناية؟  
الرائد: حاشوف.. ممكن ناخذ وحيد معاه لو احتاجناه...  
(تطفأ الشرفة.. وتضاء المقدمة)

هانى: تحتجب الشمس وراء التل....  
تخرج من قلب الليل عليه...  
تسقط فى ادغال الظل...  
لا شمس هناك. لا يوجد شىء خلف التل  
لم أعرف غير طريق الأمس...  
لم أشهد يوما لون نهار...  
لم يدفىء حجرى نور الشمس  
مهيب: قول يا هانى... ماتبطلش قواله... ماتسكتش.. طول ما الشعر  
بيطلع على لسانك حايفضل فيه أمل  
هانى: أمل فى ايه يا عمى؟... الحديد فى ايديك.... والحجر على لساننا...  
مهيب: الا اللسان يا بنى اللسان عمر ما حد يقدر يحبسه ولا يقيده  
بكلايش.. ولا يربطه بحجر... عشان كده باقول لك ماتسكتش....  
قول.. غنى... اشعر  
هانى: ودول لسه فوق روسنا؟

(مشيرا برأسه فى اتجاه الشرفة) ..

مهيب: دول؟ دول مش بالقوة اللى احنا متخيلناها يا هانى.. دول خيالات  
مآته عملناها بإدينا عشان نخوف الطيور اللى بتخطف رزقنا....  
بعدنا الطيور ووقعنا احنا فى أسر خوفنا.. خوفنا كبر الأشباح...  
خللاها اصنام محطوطه جوانا ومالكانا... (يستدير لىواجه  
الباقيين) تعرفوا؟.. انا اما ضغطت على زناد المسدس ماكتش باوجا  
الرصاص لحد فيهم.. كنت بانشن على خوفى منهم.. ووظبطت  
النشان كويس.... وقتلته....

**وحيد:** تخاريف عجز... رصاصتك ماغيرتش حاجة... بالعكس... عقدت الموقف أكثر... أكدت شبهاتهم واداتهم فرصة يعملوا قضية.

**سعيد:** الحقيقة انت اتسرعت عى....

**وداد:** ابدا... ( تنهض منتصبه) مهيب ما تسرعش.. مهيب ماطاقش يشوفهم بيدلوا هانى ويجرجروه بالأرض... ودى لحظة ما بتتحسبش بالمسطرة... لحظة بيطلع فيها اللى جوه البنى آدم.....

**وحيد:** (بانفعال عصبى) ماتدافيش عنه...

**وداد:** (تتقدم نحوه لتواجهه) أكبر بقى.. حاتفضل لامتى العيل الصغير اللى مش عايز حد يشاركه فى لعبة.. ايوه.... انا وباباك واخواتك كنا بالنسبة لك لعب تلعب بيها لوحذك وتغضب لو حد قرب منها....

**وحيد:** كلام.... مجرد كلام بتبررى بيه الحقيقة اللى اكتشفناها كلنا الليلة  
**وداد:** اتكلم عن نفسك بس.... ماحدش مصدق أوهامك غيرك.. حتى انت فى قرارة نفسك مش مصدقها بس واخدها حجة تضغط بيها على مشاعر أمك...

عايز تخلق جواها عقدة ذنب عشان تفضل ضعيفة قدامك.. لكن لأ مش حاديك فرصة تلعب اللعبة دى معايا ولا مع اخواتك.. أنت راجع بفلوس كتير... الله أعلم منين..... من الناس بتوع الارهاب زى ماقالوا.... ولا من الجن الأحمر.... مش حاسألك ولا عايزة اعرف..... المهم إن الفلوس دى ممكن تجيب لك شقة تقعد فيها....

**وحيد:** (يحملق فيها مصدوما).... ب..... بتطردينى يا ماما؟.....

**وداد:** (مشيحة عنه) الشقة ماعادتش فيها مكان.....

**مهيب:** ادى له الاوده ياوداد هانم..... ما عادتتش لازمانى.....

(يرفع يديه بالقيد) انا رايح معاهم... ومافتكرش خارج تانى....

**سعيد:** (يتقدم) لا يا عمى مهيب.... اودتك حاتفضل اودتك... غبت عنها بدل اليوم سنة... حاتفضل مقفولة على عفشك وكتبك وهدموك... وما حدش حايبقى له حق يدخلها إلا هانى بس....

وحيد: (بلهجة ساخرة غاضبة) فرصة يا كبيرنا تدينى شلوت وتقلشنى....

سعيد: اظن مالکش عين تقول كلمة واحدة بعد اللى عملته مع اختك...

وحيد: وانت اللى عينك جامدة ومش مكسورة.. وحاتكمل جوازك وتستأنف ليلة زفافك عادى كأن اللى حصل الليلة ماحصلش... وكأن منال هانم.....

سعيد: (غاضبا) اخرس.... لو لسانك زلف بكلمة واحدة زيادة أنا مش حاعمل اعتبار لأى علاقة أسرية وحاشيلك وارميك من الفراندة دى

وداد: بس يا سعيد... المناقشة دى مالهاش لزوم... انتهينا خلاص... وحيد حاشوف له مطرح تانى.. وهانى حايقعد فى اودة مهيب.... وأنا ورباب فى اودتنا.. لغاية انت كمان ماربنا يسهلها لك وتشوف لك انت ومراتك

سعيد: (ذاهلا) واتفاقنا يا ماما؟... وموضوع سمندو؟...

وداد: كان يا حبيبى.. قبل ما نعرف الخير اللى حاتغرق فيه بعد جوازتك الترقية... والمنصب الجديد بتاع الحوافز والبدلات ولجان ايه وايه

وحيد: (مهلا فى تشفى) هایل... كده قسمة الحق.... وتفضل الشقة لربوبة تتجوز أبو خليل وتقعّد مع ماما وهانى...

(تنهض رباب من جلستها المكومة على الكنية)..

وتتحرك حتى تقف بجوار هانى...)

رباب طلعونى أنا م القسمة.... ماتعملوش حسابى....

هسانى: بتقولى ايه يارباب؟...

ريساب: (تضع يدهل على كتفه) حاخرج م البيت ده يا هانى... مش حاقدر خلاص أفضل فيه بعد اللى حصل الليلة.. (تستدير للآخرين)....

إبراهيم بيلح على من زمان نتجوز فى شقته على عفش مامته القديم... كنت باتخانق معاه واصده... لانى كنت متشعلقة بحلم هاي ف مايسواش... شقة بابا.. وحضن ماما... والدفا.. والأمان...

الليلة مالقيتهمش.. ضاعوا.. وحاروح ادور عليهم مع إبراهيم فى شقة فى بيت قديم فى حارة فى الحسنية (تتحرك ببطء خارجه الى الحجرة الثانية.. والآخرين يتابعونها واجمين)



وحيد: (يتحرك.. بعد لحظة).. الحسبة كده اختلفت...

سعيد: (منبريا فى ضيق) ما اختلفتش بالنسبة لك....

وداد: (تتقدم بينهما) ولا بالنسبة لك.... انتوا الاتنين وضعكم هنا مؤقت الشقة دى شقتى وشقة هانى...

(تتحرك وفيه للمقدمة...)

وفييه: وانا يامرات ابويا؟...

(يفاجأ الجميع... يحملقون فيها مشدوهين)

وداد: (بغضب تحاول كبته)..... مرات أبوك ده اه يا بنت؟..

وفييه: امال تحبى أناديكى بيايه.. خالتى؟ عمتى؟..... ابلتى؟....

وداد: زى ما طول عمرك بتناديلى.. ست هانم....

وفييه: (تستدير لها) حتى بعد اللي حصل الليلة؟...

وداد: اللي حصل.. مهما كان... مش هيغير شعره فى وضعك هنا فى البيت ده

وفييه: حافظل وفيه الشغالة.... مش كده؟....

هانى: ماحدش ابدًا عاملك على إنك وفيه الشغالة....

وفييه: انت بس يا هانى يا حبيبى اللي كنت بتعاملنى على إنى واحدة منكم.. وكنت بابص فى عينك الاقى الحنية اللي ما تبقاش إلا بين الأخ واخته... لكن الباقيين؟... ابدًا... صحيح ماحدش ضربنى ولا شتمنى... ولا حد عمره قاللى يابت يا وفيه... وكانوا بيقلوا بلسانهم.. وفيه دى مننا وعلينا... لكن الأوامر... والمشاور... والمطبخ والسوق... وجرايد الصبح.. والخناق مع المكوجى والبواب... والنومة على السرير السفرى والبطانية القديمة... حتى لما جه فرح سعيد... ورتبوا المطارح كان نصيبى السندرة مع الابراض والصراصير....

وداد: كل ده محوشاه جواكى ومعاشرنا على غش؟..

وفييه: أنا؟.. والختمة الشريفة ما كان على بالى... بس لما تبقى مش عارفة

بتقبلي الوضع اللي انتى فيه مهما كان وتبقى راضية... لكن لما  
تعرفى... كل حاجة بتتغير....

وداد: (تواجهها فى صرامة) مفيش حاجة حاتتغير.. كل شىء حايفضل  
زى ما هو... وإذا كان عاجبك....

وفـيـه: (بهدوء) وإذا كان مش عاجبنى يا... ست هانم؟...

وداد: (تدير لها ظهرها) بنتى حاتتخرج.. وولادى الرجالة الأثنين  
حايفخرجوا وانت مش أعز منهم...

سعيد: (متدخلا) لحظة يا ماما.. المسألة ماتوصلش للدرجة دى... وفيه  
دلوقت لها نفس الحقوق اللي لينا... ولازم نكون حقانيين.....

وداد: حقوق ايه اللي بتتكلم عليها؟... لو كان حد غيرى له حقوق فى  
الشقة دى يبقى لها هى كمان....

وحيد: على رأيك.... كله خد بمب

وفـيـه: إلا انا....

(تتقدم وفيه خطوة الى المقدمة حيث تقف بجوار مهيب.. تخرج

من جيب قميصها ورقة مطوية تفردھا)

وفـيـه: أنا صاحبة الشقة دى.... أدى العقد.... كتبھولى ابويا.. يوسف

زغلول.. وسجله.... وسابه أمانه عند الاستاذ مهيب.. (الجميع

يتجمدون فى أماكنهم.. تنبعث موسيقى مؤثر لحنى... يكون وحيد أول

من يفیق من المفاجآت.. ينفجر ضاحكا وهو يتهالك على الكرسي)

وحيد: الله.. كملت ليلة المفاجآت.. الله يرحمك يا بابا وبشيش الطوبة اللي

تحت راسك (ناظرا لسعيد) اتضح إن أبوك دا كان راجل برم ودقرم

صحيح

سعيد: ماظنش دى ظروف تمارس فيها خفة دمك واستظرافك...

وداد: (تتقدم نحو مهيب ووفية) الكلام اللي بتقوله البنت دى صحيح يا

مهيب؟..

مهيب: أنا آسف يا وداد هانم.. حافظت عالسر أطول وقت ممكن.. لكن

بعد ما ضربت الرصاصه وخطوا الكلبش فى اديه... دخلوا فتشوا  
اودتى... عتروا فى العقد وادوه لوفيه... سألتنى.. قلت لها.... ودى  
امانة مأمنى عليها المرحوم يوسف..

وفيه: (بلهجة هجومية) الأمانة اللى ماكنتش ناوى تديها لصاحبته لولا  
اللى دخلوا وفتشوا... حتى انت يا أستاذ مهيب....

مهيب: سامحينى يا وفيه.... كنت شايفك سعيدة.. وكنت فاكر البيت كله  
سعيد..... وجامد وصالب جدرانه.. قلت إن العقد ده مش حايقدم  
ولا يأخر.. بالعكس.. يمكن يخلق مشاكل مالهاش لزوم... لكن  
باعتراف إنى غلطت... مش فى دى بس يابنتى.... فى حاجات تانيه  
كثير.. أدبنى حادفح التمن....

(ينبعث فجأة صوت سارينة بوليس.. يسود الصمت.. من الشرفة  
تقدم الرائد و خلفه النقيب.... بخطوات شبه عسكرية)

الرائد: وصلت القوة.. صول عباس....

عباس: (يتقدم مؤديا التحية) تمام سعادتك...

الرائد: المتهم مهيب تسلمه تحت لسيادة المقدم بهاء.. وتسلم معاه حرز  
المسدس ده

(يتسلم عباس الحرز.. ثم يسرع الى مهيب)

عباس: قدامى يا مذنّب...

مهيب: (يتقدم خطوة ثم يقف.. يستدير ببطء مستعرضا الجميع) عادى  
... مفيش جديد... انا اللى استحلّيت القعدة والفرجة من  
المدرجات.. قعدت اربعين سنة اتفرج... ولما الماتش بوخ حدفت  
طوية.. ياريت ماتعملوش زى.. انزلوا الملعب والعبوا... وخلوهم هم  
اللى يتفرجوا (مشيرا للضابطين).. هم لعبه وحشين قوى.. لكن  
متفرجين كويسين..

عباس: امشى ياخويا امال بلاش لماضه... (يدفعه).. (يسير مهيب خطوات  
وعند الباب يلتفت مرة أخرى)

مهيب: زى ما قلت لك يا هانى... ما تبطلش قواله... ما تبطلش الشعر  
(يدفعه عباس للخارج ويخرج معه)

النقيب: والمتهم التانى سعادتك؟..

الرائد: (وهو يقترب من وحيد).. ايه رأيك يا باشمهندس؟...

وحيد: (منتفضا) انا؟.....

النقيب: امال خيالك؟..

وحيد: طيب انا متهم ليه؟.. انا ماضربتش رصاص.. بالعكس.. انا جريت  
ساعة الرصاصه الاولانيه ومسكت ايد مهيب ومنعته يضرب  
غيرها...

الرائد: واحنا جرينا قبضنا عليه اخدنا المسدس.. ممكن تكون صحيح  
مسكت دراعه علشان تضرب علينا وتكمل المؤامرة.....

وحيد: دا كلام مايدخلش العقل.. إزاي افكر فى محاولة زى دى وفيه اربع  
طبئجات ممكن تضرب على فى لحظة... انت وزميلك واللاتين اللى  
معاكم....

الرائد: دى تفصيله فنيه ممكن الرد عليها.. المهم فى الموضوع إنك محل  
شبهة وإذا ماكنش فيه تهمة... فيه على الأقل تحقيق.. عشان كده  
لازم ناخذك معنا الإدارة... إلا إذا...

وحيد: (بلهفة) إلا إذا ايه ارجوك.....

الرائد: حاقول لك.. بس على انفراد (مستديرا) سيادة النقيب أيمن...  
ممكن تسمح لبقية أفراد الأسرة يدخلوا اودهم ويرتاحوا إذا حبوا...  
(ناظرا فى ساعة يده)... إحنا خلاص... مهمتنا هنا قريب تنتهى

النقيب: (مشيرا للآخرين) اتفضلوا..

(فى تناقل يتحرك الجميع.. سعيد إلى الحجرة الأولى... وداد إلى

الحجرة الثانية.. وفيه تدفع كرسى هانى برفق إلى الحجرة المشتركة)

الرائد: وأنت يا أيمن لو سمحت.. استثنائى فى الفراندة..

النقيب: امر سعادتك.. (يخرج إلى الشرفة)...

الرائد: جعيصة..

جعيصة: (محييا) تمام سعادتك.. آفندم...

الرائد: على باب الشقة من برة..

جعيصة: (خارجا) تماما سعادتك آفندم...

(بعد أن خلت الصالة إلامنهما.. يدور الرائد حول وحيد الذي يتابعه برأسه في ترقب مشحون بالقلق)

الرائد: ايوه يا وحيد.. بقينا لوحدنا..

وحيد: (محاولا التغلب على توتره بالمزاح) حسدونا فى حيننا...

الرائد: آه.. حلوة.. على فكرة احنا ممكن نغنى.. ونضحك.. وتنتهى الليلة واحنا أصحاب..

وحيد: إذا؟..

الرائد: اذا؟. يعنى ايه؟..

وحيد: قول شروطك يا حضرة الطابط.. قدم العرض اللى فضيت المطرح عشان تقولهلولى...

الرائد: دوغرى انت ومباشر وتحب الخط المستقيم.. هه؟..

وحيد: زى ما بيقولوا.. الخط المستقيم أقصر الطرق بين نقطتين..

الرائد: رائع.. أحب أنا الشخصية الحاسمة اللى ما بتضيعش وقت...

وحيد: بس انت اللى بتضيعه دلوقت..

الرائد: سورى.. أنا عرضى محدد وحاقولهلوك فى كلمتين.. (يقتررب على كتفه.. (يحملق فيه مليا.. ثم بلهجة سريعة حادة).. تتعاون معانا؟..

وحيد: فى ايه بالظبط؟..

الرائد: تشتغل معانا؟..

وحيد: اشتغل ايه بالظبط؟..

الرائد: يعنى حاشتغتل ايه؟.... مدير الأمن العام؟..

وحيد: ما إنفعش....

الرائد: ما قلنا احنا بتوع الخط المستقيم.. وبعدين بقى؟.

وحيد: عرضك غامض ومش محدد يا حضرة الطالب...

الرائد: انت اتجندت فى البلد اللى سافرت تشتغل فيها... تحت يافطة النضال المشترك وشعارات وحدة الشعوب فى المنطقة قدروا يجندوك.. وادوك فلوس وطلبوا منك تنزل عشان تنفذ خطتهم

وحيد: (مقاطعا) دا تخريف.. ماحصلش.. وانتوا...

الرائد: (يقاطعه فى صرامة) ماتناقشنيش لان دى معلومات يقينية ومؤكدة وادلتها عندنا.. أنا باديك فرصة.. انت لسة ماعملتش حاجة... ما نفذتش أول خطوة... يعنى تقدر تلحق نفسك... ظاهريا حاتنفذ اللى طلبوه منك واحنا حانساعذك عشان تطمنهم إنك شغال ويأمنوك اكثر... وحانرسم معاك خطة لإستدراجهم عشان نمسكهم ونعرف أعوانهم هنا ونقبض عليهم.... ساعتها مش بس حاتحمى نفسك... لا.... داحنا حانساعذك ونوفرلك وظيفة محترمة أو مشروع تبنى بيه مستقبلك ويفتح طريق الثروة قدامك.. وحيد: بس أنا فعلا ماعنديش فكرة عن التنظيم اللى بتتكلم عنه ده... تحب احلف لك على مصحف؟....

الرائد: (متفجرا فى غضب) رجعنا لأسلوب اللف والدوران؟ اسمع.... أنا ماعنديش وقت.. بعد ساعة لازم أكون فى الشارع بانفذ خطة تأمين الموكب.. وإذا نزلت من هنا من غير اتفاق.. حاتنزل معايا... وحاتترمى فى السجن.. وحاتلبس قضية أمن دولة.. واوعى تفتكر انى باهوش....

وحيد: لا.... أنا واثق إنك مش بتهوش يا حضرة الطالب... واثق إنكم تقدروا تعملوا كل حاجة.... بدليل اللى حصل الليلة.. وحجتكم موجودة... وجاهزة... ووجيهه.... الأمن.... المحافظة على البلد وحمايتها من الاخطار الخارجية والداخلية..... مبدأ..... وواجب وطنى ماחדش يقدر يعارضه ولا يقول فيه كلمة واحدة..

(يتحرك بخطوات بطيئة تشكل دائرة حول الرائد)

ومش هنا بس.. فى بلاد كتير.. اكتر م الهم عالقلب.. حزام لافف  
حوالين الكرة الأرضية.. من اميركا الوسطى والجنوبية...  
لأفريقيا.. لأسيا.. مش حافظ خطوط العرض عشان أقول على  
جنوب خط كام

النص اللى تحت.. اللى بيقلوا عليه العالم التالت.. عالم الجنرالات  
والكولونيلات.. بلاد الموز والبن والبتروول وكل الثروات الطبيعية  
والمواد الخام.. مبدأ الحماية من الأخطار والتصدى للمؤامرات هو  
اليافظه....

وتحتها كل شئ مباح.. كرامة الناس وحررياتهم ورزقهم.. تدوسها  
الجزم الثقيلة وجنازير المصفحات وصوت الرشاشات والبيان رقم  
واحد.. ومجلس الانقاذ.. والأحكام العرفية.. والاستعراضات..  
والأناشيد والألقاب الفخمة.. والتماثيل والصورة الضخمة اللى تصد  
فيها العيون من اى ناحية وأصوات الميكروفونات اللى بتدق على دماغ  
المواطنين العزل اللى ميتين صباية فى غرام الزعيم القائد البطل  
الملهم اللى مفيش قبله ولا بعده.. ولا يأتية الباطل من بين يديه ولا  
من خلفه.. واللى مفيش حاجة فى الكون تمشى إلا بفضل توجيهااته  
لإن حركة الناس والتاريخ والجغرافيا لازم تقف عنده لغاية مايصحى  
له فى يوم جنرال تانى أو كولونيل أو حتى شاويش..... قدر يسبق  
زمايله ويقوم بدرى ومايدخلش الحمام ويجرى عالإذاعة عشان يطلع  
بيان رقم جديد زى الراجل اللى انتوا عاملين له موكب بتاع بكرة  
وجيتوا تآمنوا له خط سيره ودهستوا بيتنا وكشفوا مصاريننا برة  
عشان تحافظوا عليه م المؤامرة الرهيبة اللى بتستهدف حياته  
الغالية.. بالمناسبة.. انت حافظ اسمك؟..

**الرائد:** (نافخا صدره وهو ينتفض فى وقفة عسكرية) طبعاً.. فخامة  
الرئيس الجنرال دومينجو ماهارشنا ابوكو.....

**وحيد:** دومنجو ماهارشنا ابوكو.. الله. اسم يملا البق صحيح.. لا واية؟

جامع مانع .. دومينجو اسم لا تينى يقول انه من اميركا الجنوبية ..  
ماهارشنا ... مديه على اسويى .. باكستاني .. تايلاندى .. حاجة  
كده .. ابوكو دى واضحة .. افريقى مية المية .. يعنى رئيس ماركة  
عالم تالت صحيح .. تعرف؟ .. صاحب الفخامة ده الرئيس رقم كام  
فى بلده خلال ثلاثين سنة؟ ... الخمسة وعشرين .. يعنى فيه أربعة  
وعشرين قبله .. كلهم جم عشان يحموا بلدهم وشعبهم المحبوب من  
الأخطار والمؤامرات .. وكلهم كانوا بيتسابقوا مين يصحى بدرى .. ما  
عدا الألولانى طبعاً اللي كان نومه ثقيل .... مع انه فى الغالب هو  
اللى قاد حركة تحرير بلده م الاستعمار ..... بس الظاهر كان تعب  
م الكفاح . قال اريح .... حقه بقى .....

الرائد: (يقاطعه بلهجة من آفاق من ثبات على شىء مضزغ) وله. انت  
مثقّف؟

وحيد: (وقد فاجأه السؤال) إيه؟ مثقف. يعنى .. أنا معايا بكالوريوس  
هندسة ... و .. قرئت كتير و ..

الرائد: قوللى كده .. بقى كل شىء واضح ... ياللا يا حبيبى .. التفاهم مش  
حايجيب نتيجة معاك ....

وحيد: غلطان .. المثقفون دول أحسن ناس يتفاهموا .... دول الترزية ....

الرائد: إيه؟ الترزية ....

وحيد: طبعاً .. ماهم اللي بينظروا لأصحاب الفخامة دول ويفصلوا لها  
القوانين على قدمهم .. وقيفوا لهم بدلة ديمقراطية تمشى عليهم .  
عشان كده تلاقيهم كلهم عندهم ديمقراطية ... على كل لور  
ياباتسته ... اشى ديمقراطية شعبية .... واشى ديمقراطية وطنية ...  
واشى اجتماعية .. واشى لها أنياب ... واشى بديل .. وبعدين المثقفين  
دول هم اللي اخترعوا التعبيرات اللي تريح الكل وتمشى مع اى  
مزاج .. عندك مثال .. التوازن ... المواءمة ..... الاستمرارية .. وحدة  
الصف .. حشد كل الطاقات ... الخصخصة ...



**الرائد:** وانت بقى ترزى؟

**وحيد:** (باكتئاب مفاجئ) مانيش مثقف للدرجة دى.... صدقتى يا حضرة الظابط انا مجرد شاب عادى بيلطش ويبخبط يمين وشمال لأنه مش لاقى سكه.. مش لاقى أى نور يهديه لهدف..... مش عارف يعمل ايه بحياته.. وأديك عريتتى النهاردة ونسفت العلاقة بينى وبين اخواتى... وأنا ما بنكرش.. إنى أنانى باحب نفسى وممكن ادوس على اعتبارات كتير بشأن مصلحتى... جزء من حالة التخبط.. لكن ما قدرش انفذ اللى بتطلبه منى... ما قدرش بعد كل طموحاتى واحلامى الكبيرة أبقى مرشد للبوليس....

**الرائد:** ما عندكش اختيار تانى ياسيد وحيد.....

**وحيد:** پس انتوا معلوماتكم مش دقيقة.. واسمح لى اقول لك حقيقة.. أنا فعلا هناك.... اتعرفت بناس.... حاولوا يجرونى للمنظمة اللى بتقول عليها دى... لكن هربت... أنا أصلى باخاف م السياسة... بكرهها.. عقدة مترسبة جوايا من صغرى.. من يوم ماشفت بابا الله يرحمه بيحرجروه على السلم ويضربوه وجسمه كله بيخردم.. ماتتصورش كنت باحبه قد ايه.... كان بالنسبة لى شىء كبير قوى... شىء مهول.. عظيم.... بعقل طفل بيعتبر أبوه أهم إنسان وأقوى إنسان اتصدمت لما لقيته بيتبهدل قدامى صرخت... ماما خدقتى فى حضنها وهى بتبكى.. سألتها مين دول ياماما... قالت لى العساكر يا وحيد.. قلت لها بيعملوا فى بابا كده ليه.... قالت الله يقطع السياسة وسنين السياسة.. من يومها.. وأنا كده.. لا أحب السياسة.. ولا أحب العساكر.. ولا أطيق أقرب منهم...

**الرائد:** ومع ذلك قاعد تدينى محاضرة فى السياسة ونظم العسكر فى العالم الثالث...

**وحيد:** الحب والكره ما يمتعوش إنك تعرف.. بالعكس.. كل ما تعرف.. تحب أكثر.. أو تكره أكثر.

(صوت صفير جهاز اللاسلكى فى الشرفة...  
يلتفت الرائد نحو الشرفة.. بقعة ضوء على الشرفة لنرى النقيب  
يتحدث فى اللاسلكى..)  
النقيب: صقر معاك.. حول... (يضع الجهاز على أذنه) ايوه.. ايوه.. علم  
وينفذ.. تمام سعادتك.. (يغلق جهاز اللاسلكى)..  
(يتحرك النقيب من الشرفة إلى الصالة)  
النقيب: وصل التقرير سعادتك.. عملية التمشيط تمت فى كل البيوت موضع  
الشبهة فى الشارع وتم تأمين خط سير الموكب..  
الرائد: ونتيجة التمشيط يا أيمن؟..  
النقيب: سلبية يافندم.. وتأكد عدم جدية البلاغ والتحريات عن وجود  
المؤامرة الإرهابية..  
الرائد: (بغضب ولهجة أمرة) اسكت يا حضرة النقيب...  
النقيب: التعليمات لسعادتك بضرورة الرجوع لمركز الحملة...  
الرائد: (يهز رأسه) ... ماشى... اتفضل انت اسبقنى بالمركز.. وقوم  
جميعه حراسة على باب البيت تحت فى الشارع...  
النقيب: (مؤدبا التحية) تمام سعادتك..  
(يتحرك بخطوة عسكرية منتظمة حتى الباب... يفتحه)  
النقيب: (خارجا) ورايا يا شاوش...  
(يغلق الباب بقوة.. تقدم الرائد من وحيد)  
وحيد: اظن كده مفيش مشكلة...  
الرائد: بالعكس.. المشكلة اتعقدت وبقت أخطر.. مش ممكن أخرج من هنا  
بايدى فاضيه...  
وحيد: اذا كان زميلك بيقول لك إن بلاغ المؤامرة ثبت عدم جديته...  
الرائد: صحيح.. بس هنا.. فى البيت ده.. انضرب طلق نارى.. وفيه  
قضية....  
رحيد: برضه مش مشكلة.. الطلق خرج غلطة والراجل بينضف المسدس..

**الرائد:** (بحركة من يفكر باستغراق) وكان بينضف مسدسه واحنا موجودين  
وبنفتش ونحقق؟ مش منطقية. وبعدين المسدس مش مرخص...  
زى مسدس باباك برضه.. لا.. المسألة مش بالبساطة دي .. قضية..  
قضية (متوقفا يستدير له وحيد) وانا يا سيد وحيد.. ماحطش  
ايدي فى قضية هايفة... (بلهجة من تقمص) احنا توصلنا هنا  
لأول خيط فى مؤامرة خطيرة... دبرها المدعو مهيب... وانت  
شخصيا فوجئت بيها أول ما وصلت.... واى عليك ضميرك انك  
تسكت.. بلفتنا.....

**وحيد:** (ذاهلا) أنا؟....

**الرائد:** ايوه.. انت.....

**وحيد:** ماحصلش..

**الرائد:** (مقتريا منه بلهجة مختلفة تماما) تخيل اللى حاتكسبه.. تخيل  
كل الصحف وهى بتتكلم عن المواطن الشريف الغيور.... اللى بلغ  
عن أخوه شخصيا

**وحيد:** (منتقضا فى استنكار) أخويا.... وسعيد ماله؟...

**الرائد:** سعيد كان ايد مهيب اللى بتنفذ...

**وحيد:** انت راجل مخرف....

**الرائد:** (مواصلا) حاتبقى بطل.. وينزل عليك الخير زى المطر.. حاتتعين  
فى مشروع كبير بماهية فلكية.... والمحافظ حايدك شقة فى  
أجدع موقع... وأبواب كل البلد حاتتفتح لك.. واحنا حانضمن لك  
تبقى خلال سنتين مليونير.. اسمع. تحب تأخذ قرض من اى بنك  
فى البلد بعشرة عشرين مليون تبدأ بيه مشروع استثمارى..  
بسيطة.. بكره يحصل....

**وحيد:** (يرمقه مليا) وانت حاتكسب ايه من ورا الصفقة دي.....

**الرائد:** (منتصبا) حاكشف مؤامرة خطيرة... آخذ وضعى..

**وحيد:** وأنا اداتك.. من غير شهادتى.. ما ييقاش فيه مؤامرة.... ولا قضية.

الرائد: بالظبط..... اتفقنا...

(لحظة صمت)

وحيد: اخرج بره....

الرائد: بتقول ايه.....

وحيد: (منفجرا) باقول لك اخرج بره..... وحالا.....

الرائد: انت اتجننت... نسيت نفسك؟.. نسيت انت مين وانا مين؟..

وحيد: حانسى لمدة ثوانى تكفى اشيلك فيها وارميك من البلكونة دى...

(يتقدم نحوه)

الرائد: (سارع بإخراج مسدسه وصوبه نحوه) اقف مكانك...

وحيد: اضبط عالزناد واضرب لو كنت راجل.....

(مستمرا فى الاقتراب منه).....

حاتدينى فرصة احترم نفس مرة فى حياتى.. كل اللي فات من

عمرى أخطاء وذنوب.. ماترددتش ابيع حتة أرض فايتها أبويا... آكل

حق إخواتى.. ماترددتش انصب على خطيب اختى.. ماترددتش وانا

هناك ابيع نفسى للى يدفع... واشتركت فى عملية نصب كبيرة على

مدخرات ولاد بلدى.. جيت منها الفلوس اللى رجعت بيها... كاره

نفسى وقرفان من روحى... ودى فرصتى الوحيدة انطهر.....

(صارخا) اضرب.....

الرائد: (يرمقه بثبات ساخر.. وهو يعيد الطبنجة مكانها) واعمل منك

بطل ماتستهلش.. أنا خارج يا سيد وحيد.. واراهاك إنك حاتفكر

فى العرض اللى عرضته عليك...

(يتحرك مبتعدا عنه وهو يخرج من جيبه كارت)

الرائد: (يلقى بالكارت على المائدة) تليفونى اهه.. مستنى اسمع صوتك

(يتحرك نحو الباب وهو يقهقه ضاحكا.. يفتحه ثم يستدير نحو

وحيد) فرصة بعشرة مليون تغنيك عن النصب بقية حياتك... سلام

(يغلق الباب) (وحيد يقف كمن يوشك على التداعى.... نور النهار

يغمر المكان من الباب المشترك... يدخل هانى بكرسيه... ويتقدم نحوه)

هانى: ميشيوا يا وحيد؟....

وحيد: ابدأ.. اوعى تصدق.....

هانى: (يتلفت برأسه حوله فى حيرة)... امال هم فين؟.....

وحيد: جوانا يا هانى.. مش حايسيونا أبدا.....

هانى: (بعد لحظة يتأمل فيها أخيه) حاتفكر صحيح فى اللى قاله الراجل ده؟.....

وحيد: (مجفلا) انت سمعت؟...

هانى: ماشيلتش ودنى من عالباب.....

وحيد: وهو كان بيعجر زى ما يكون قاصد يسمع الكل..

هانى: حاتفكر فى العرض ده يا وحيد... أرجوك.. قوللى...

وحيد: (وهو يضع يده على كتف هانى) اخوك مش وحش للدرجة دى يا هانى...

(يرفع يديه ويبتعد خطوة)... وبرضه مش قوى لدرجة تخليه

مايفكرش... عشان كده الحل السليم إنى أهرب

(يتحرك إلى حيث وضعت حقيبة سفره المفتوحة)....

هانى: تهرب تروح فين...

وحيد: مطرح ما جيت... (يغلق الحقيبة).... دا الحل الوحيد..... وحل مريح بالنسبة للكل..

وحيد: (يوقف حقيبة على سيفها ويعتدل)... بعد اللى حصل الليلة

مافتكرش فيه فرصة لحكاية الله دى.... (يعود إلى حيث هانى

وهو ينظر فى ساعة يده)... فيه طيارة طالعة الساعة احداشر....

حاروح المطار ويتج ليست..... وحاسافر.....

هانى: من غير ما تسلم على ماما؟.. على فكرة.. هى أكيد صاحيه... مش ممكن تكون نامت....

وحيد: معلش يا هانى.. ابقى سلم لى عليها.. مش حاقدر ابص فى  
عينها بعد اللي حصل الليلة.. ولا هى حاتقدر تبص فى عينيه..  
(يميل ويقبله فى جبينه) سامحنى يا هانى.. وتأكد أنك أكثر واحد  
حبيته فى البيت ده..

(يتركه ويجرى.. يحمل حقيبته... ويفتح باب الشقة ويخرج)  
هانى: (مناديا...) وحيد،..... ارجوك ماتسافرش..... (يحرك كرسيه نحو  
الباب) ارجع يا وحيد.. كل شىء ممكن يتصلح واحنا مع بعض  
(تدخل وفيه... تتقدم نحوه)

وفيه: كان لازم يمشى يا هانى...  
هانى: (وصوته يختنق) ليه يا وفيه؟... كان ممكن ننسى خلافاتنا.. ونقعد  
مع بعض زى زمان ونتفق..  
وفيه: وحيد كان عنده حق لما قال.... إن اللي حصل الليه مش ممكن  
يخليكوا تتلموا تانى.....

هانى: ماتقوليش كده يا وفيه حرام عليكى...  
وفيه: (وهى تبدأ فى دفع مقعده برفق فى اتجاه الحجرة المشتركة) تعالى  
يا هانى.... انت ما نمتش خالص ولازم ترتاح..  
(تخرج به إلى الحجرة المشتركة.. ولا تغلق الباب خلفها)  
(يزداد ضوء النهار.. تنبعث موسيقى حزينة....)

مع دخول رباب تحمل حقيبة ملابس صغيرة وخلفها أمها)

وداد: يا بنتى اعقلى وماتبقيش مجنونة..  
رباب: اعتبرينى مجنونة وريحى نفسك....  
وداد: استغفر الله العظيم.. فيه بنت متربية بنت ناس.... تروح لراجل  
بشنطة هدومها تقول له اتجوزنى؟.... مش فيه أصول... مش لك  
أم.... وأخ كبير يتقدم لهم سى إبراهيم بتاعك؟.....  
رباب: مش اتقدم واتقنصلتوا عليه؟.....  
وداد: انت اللي حطيتى العقدة فى المنشار وفرضتى شروطك عليه....

**ريـاب:** وعرفت غلطتى..... وحاصلها.....

**وداد:** طيب استنى.. خليكى فى بيت أهلك ونبلفه يجرى يخطبك ويكتب عليكى وبعدها روحى معاه مطرح ماتحبنى... نستر المظاهر على الأقل...

**ريـاب:** (ساخرة) مابلاش نتكلم عالمظاهر والستر ياماما.. كلنا شفنا بعض الليلة من غير ستاير ولا براقانات.. وعموما ما عاdash ييجى منه.. أنا طلبت إبراهيم فى التليفون.. ومستنينى على ناصية أحمد سعيد.. حاياخدنى ونروح للمأذون.. (وهى تتحرك) سبت لك العنوان فى ورقة على الكومودينو..... يمكن تحبى تيجى تصبجى على بكرة... أنا داخلة اسلم على هانى وحاطل من هناك (تخرج إلى الحجرة المشتركة.... تبقى وداد وحدها.... تتهالك على الكنبه وقد اعتمدت برأسها على كفيها.. منكمشة فى جلستها... فى نفس اللحظة يندفع سعيد وخلفه منال

**سعيد:** مافيش فايدة..... ماتحاوليش.... مش حاينفع.....

**منال:** (نلاحظ إنها بلباس النوم) ارجوك يا سعيد بلاش فضايح....

**سعيد:** الفضيحة الكبيرة إنك كدبتى على يا.. يا مدام.....

**منال:** انت بتصدق اللى قالوه المتوحشين دول؟.....

**سعيد:** باصدق عقلى يا هانم..... (من الواضح إنهما لم يفتننا لوجود الأم)

**منال:** وعقلك كان فى لما صممت تتجوزونى؟..... وانت عارف كل حاجة؟

**سعيد:** (يواجهها بغضب) عارف إيه؟ عارف حكاية شقة المهندس؟.....

**منال:** .. عارف إن كان فيه علاقة بينى وبين عادل... وإننا كنا بنحب بعض وحانتجوز

**سعيد:** وماتتجوزتوش ليه؟.....

**منال:** .....

**سعيد:** ماتردى يا مدام.. ايه السبب اللى ما خلاهوش يتجوزك؟.....

منال: ارجوك بلاش تجريح اكثر من كده.. وماتحولش تتظاهر بأنك برئ وانضحك عليك... لا إنت برئ ولا أنا ضحكك عليك.. ولعلمك.. عادل أول امبارح بس قاللى أنه صارحك بكل شئ وإنك رديت عليه وقلت له بالحرف... مفيش مشاكل...

سعيد: (يقترّب منها بخطوات بطيئة)... وانت شتى عادل فين؟ إنت واخدة اجازة من أسبوع ومابتروحيش المكتب... يبق شفّتيه فين؟.. فى شقة المهندسين برضه؟..... (يعالجها بصفعة) ..

منال: (تتجمد فى مكانها لحظة....) انت بتضرينى يا حيوان؟..... دلوقت بس الدم غلى فى عروقك وبتمثل دور الراجل؟..... طلقنى.....

سعيد: انت طالق.....

(صمت على المسرح... الثلاثة جامدين فى اماكنهم..... مؤثر موسيقى... يتحول الى القيمة الاصلية للحن.... مع نهوض وداد)  
(منال ترى وداد..... تسرع خارجة الى الغرفة الأولى.. وداد تواجه سعيد)

وداد: الناس حايقولوا ايه يا سعيد؟.....

سعيد: الناس بيقولوا من بدرى يا ماما... أنا اللي كنت حاطط صوابى فى ودانى... ومغمى عنيه.... وكان ممكن افضل كده لولا ضيوفنا اللي طلبوا علينا الليلة.. شالوا صوابى من ودانى... وفتحوا لى عينيه غصب عنى....

حطونى قدام مراية وخلونى اشوف نفسى... واجهونى بالحيقة... الى ماعدتش اقدر اتجاهلها واهرب منها.. حاولت بس أّجل ساعتها.. اوهمت نفس بانهم زرعوا شكوك وبس.. وطلقونى فى صدرى شوية فيران.. ممكن لما رااسى تبرد افكر بالراحة اطردها واتخلص من أى شك.... لكن المحاولة فشلت.. وعروستى البريئة خدت ايدى عشان توقفنى قدام المراية تانى.. والمرة دى ماكانش



مممكن اهررب وأضحك على نفسى.. ماكنش قدامى إلا حاجة م  
الأتين.. انكسر انا.... أو اكسر المراية...

(تدخل منال وقد ارتدت ملابس خروج عادية... وتحمل حقيبة.  
وتعبر الصالة فى طريقها الى الباب... الذى تتوقف عنده..)

منال: اوعى تفتكر إنك حاتعدى باللى عملته... حاتفع التمن يا سعيد  
سعيد: (دون أن ينظر لها) مع السلامة.....

وداد: ما تيجى يابنتى وتستهدى بالله كده ونتفاهم... واللى وقع يتصلح

سعيد: (بلهجة أمرة) ماما... لو سمحتى... الموضوع انتهى بدون رجعة

منال: ماتخافش.. أنا مش فى نيتى أقعد فى البيت ده لحظة واحدة بعد  
كده كفاية ليلة واحدة خليتنى اشوفكم على حقيقتكم... (تخرج  
وتغلق الباب خلفها بعنف)

سعيد: (يضحك ضحكة مبتورة ساخرة) حقيقتنا.. سمعتى يا أمى العزيزة  
وتتقدم إلى المقدمة..... كمن تحدث نفسها) إيه اللى جرى لبيتك

وولادك يا وداد؟.. عملتى إيه ولا هم عملوا إيه؟.. هم غلطوا؟..  
ماهو كل الناس بيغلطوا.. وكل البيوت مقفولة على الغلط والصح..  
عالحب.. والكراهة.. عالمودة والخناق.. مفيش ناس ملايكة.. ومفيش  
بيوت خالصة... والجدران ياما بتدارى.. هاتولى بيت واحد  
مافيهوش اخوات بيتخنقوا.. مافيهوش أخ بيطمع فى اخوه.. ولا أم  
بتضعف فى لحظة.. ولا أب عنده سر مخبيه.... كل البيوت كده..  
اشمعنى احنا؟.. ليه يختارونا من دون البيوت عشان يكشفوا سترنا  
ويعرونا ويسيبونا ماحدش فينا قادر يبص فى عين التانى؟.....

سعيد: مش احنا بس ياماما.... كل بيوت الشارع كان فيها فرقة تفتيش  
الليلة.....

(ساخرا وهو ويتقدم من الشرفة) لو بصيتى تحت حاتلاقى كل  
الأبواب طالع منها ناس ماسكين شنط..

(تدخل وفيه وهى تدفع بكرسى هانى امامها)

وفـيـه: واخرتها يا هانى؟... دانت عنيك ماغفلتش لحظة....

(أصوات سرينة بوليس تمر..... وصوت ميكروفون فى الشارع)

الميكروفون: اقل الحارة اللى نازلة على ميدان رمسيس.. امنع المركبات عندك...  
 الونش يشيل أى عربية منتظرة.. (يبتعد الصوت حتى يتلاشى)...

سعيد: اطلع الفراندة يا هانى واتفرج عالموكب..

وداد: موكب ايه اللى حايتفروج عليه؟... التليفزيون موجود بيقى يفتحه..  
 الفراندة عايزة تترمم من زمان والحديد مش ماسك كويس....

هانى: (منفصلا عن النقاش الدائر)... وحيد سافر ياماما.. رجع البلد  
 اللى كان فيها...

وداد: .. سافر؟

هانى: ورباب خدت هدومها وراحت تتجوز ابراهيم...

وداد: عارفة.... بس الواد اللى مشى ده من غير مايقوللى...

هانى: (لسعيد) وعروستك مشيت يا ابيه...

سعيد: (ينظر فى ساعة يده) انا كمان لازم امشى..

وداد: ليه انت كمان؟.... (صارخة) هى شوطة وصابتكم؟....

سعيد: ياماما على مهلك.. أنا نازل رايح شغلى....

وداد: شغل ايه يا بنى؟... انت مش واخذ اجازة؟...

سعيد: كانت علشان شهر العسل.. ودلوقت ملاهاش داعى.. عايز كمان  
 اطلب نقل.. فيه مان فاضى فى فرع المؤسسة فى اسكندرية...

وداد: (وهى تجلس منهارة... مولولة) يعنى حاتسيب البيت.. يا مرارك ياوداد.

سعيد: مفيش مفر... يستحيل اقعد فى نفس المكان معاهم هم الاتنين.  
 (يسرع خارجا).....

وفـيـه: (بسخرية لازعة) اهى مشكلة الاولاد اتحلت.. ودلوقت نقدر نقسمها  
 على كيفنا.. الست هانم فى الاودة الكبيرة.. وأنا فى الاودة  
 الوسطانية.... وهانى فى اودة الاستاذ مهيب....

وداد: (تهب ثائرة) انت بتقولى ايه يا بنت؟..

**وفقيه:** (تتجمد مشدوهة) بنت؟.. دى أول مرة تقولهاالى....

**وداد:** ومش حاقولك غيرها من هنا ورايح.. اياك قام فى بالك إن اللى

عرفتية الليلة ولا حتى الورقة اللى لقيوها عند مهيب حاتغير وضعك فى

البيت ده؟ لا يا شاطرة.. فوقى لروحك.. وحكاية تقسيم الاود تنسيها..

اذا كان سعيد طلق عروسته وناوى يروح اسكندرية فأنا حاروح

لرباب وعريسها واجيبهم يقعدوا هنا... وانت عالسرير السفرى

الى كنت بتنامى عليه... مش عاجبك عندك السندرة....

**وفقيه:** كان زمان يا مرات ابويا.. وحقى مش حاسيبه

**وداد:** حق إيه اللى بتكلمى عنه يا بنت؟.. مالكيش حقوق عندى...

**هانى:** (محتجا) لها يا ماما.. لها نفس الحقوق اللى لى ولأبيه سعيد

ولرباب ووحيد....

**وداد:** (ثائرة) اسكت انت....

**هانى:** ماقدرش اسكت.. سكت كتير طول السين اللى فاتت.. رغم كل اللى

شفته واكتشفته عايز البيت يفضل زى ما هو.. لكن خلاص.. من

دلوقت مفيش حاجة غلط حاشوفها واسكت..

**وداد:** حتى انت كمان؟..

**هانى:** انا كمان ياماما؟.. عشان كسيح؟ يمكن ماقدرش اتحرك زيكم. لكن

لى لسانى.. وزى ماقاللى عم مهيب ووصانى... مش حابطل فواله..

مش حاسكت.....

**وداد:** (ملتفتة لوفية فى حلق) حرضتى ابنى على ومليتى دماغه؟....

طيب يا وفية..... يانا يانتي فى البيت ده.....

**وفقيه:** دا بيتى اللى أبويا سايبهولى بورق حكومة رسمى..... ومش حاتقل

منه.....

**وداد:** يعنى ايه؟... امشى انا؟..

**وفقيه:** ماقلتلكيش امشى. لكن لو مش طايقة تعاشرينى..... مش

حاغصبك

- وداد: (لهانى) سامع اللى بتدافع عنها؟...
- هـانى: وفيه بنت حلال.. وطيبة.. وبتحبك... بتحبنا كلنا.... وانت اللى بتخيريه. عايزاها تعمل ايه.... وتمشى تروح فين؟.....
- وداد: وانت لسة بتدافع عنها؟..... بتصرها على امك يا هانى؟....
- هـانى: انت ليه بس واخداها بالمعنى ده.... أنا.....
- وداد: (تقاطععه فى عصبية) انت ما بتحبينيش..... ايوه..... انت بتكرهنى.... بتحد على ومش قادر تنسى..... ماسامحتينيش ايدا
- هـانى: ماما.. ارجوك.. أنا مابحبش فى الدنيا دى كلها حد قذك.....
- وداد: (وهى توشك على البكاء) كذاب... وانا حاسة وعارفة من زمان..... وكنت باشفها فى عينيك لما اظبتك سرحان وباصص لى.. ايوه..... كنت بقراها زى ما تكون سطور مكتوبة فى نظراتك... انت السبب.. انت ام مهملة.. مجرمة..... سبتى ابنك الطفل يقف عالكرسى فى البلكونة ويشب من عالسور يتفرج عالشارع نهاية ما وقع وانكسر ظهره واتربط فى كرسى بعجل باقية عمره.....
- هـانى: (يسرع بكرسيه إليها. وقد سالت دموعه) لا يا ماما.. أنا عمري ماقلت كده.....
- وداد: لكن أنا حاسة بيه وشايفاه... بس انا ماكنتش أعرف إنك خرجت البلكونة... أنا فجأة بادور عليك عشان آلك مالقيتكش... دورت عليك فى الاود كلها.. وقعت انده يا هانى..... انت فين يا هانى؟.. افكرتك مستخبي فى الدولاب ولا تحت السرير زى ما كنت بتعمل.. الباب خبط.. فتحت. قالولى الحقى ابنك فى الشارع... (تنهار) سامحنى يا هانى.... سامحنى يا حبيبى.....
- هـانى: (وهو يحتضن رأسها باكيا بدوره) انت اللى تسامحينى ياماما... كل السنين دى بتعذبى بسببى؟.....
- وداد: (تنفست منه) عايز دلوقت تنتقم منى يا هانى؟.....
- هـانى: (يرفع وجهه لوفية)... وفيه.... عشان خاطرى....

(وفيه تتحرك بتثاقل حتى تصل إلى وداد)

وفيه: النظام اللى يريحك هو اللى حايمشى يا ست هانم.. قومى.. تعالى معايا اوصلك اودتك ترتاحى.. الليلة كانت طويلة.... ومتعبة.

وداد: (وهى تجفف دموعها) ايوه.. كانت طويلة قوى... خدى ايدى يا بنتى...

(وفيه تمد لها يدها... تمسك بها وداد..... وتنهض..... تسيران معا.....)

وداد: مش حاتم لك شوية يا هانى؟....

هانى: لا..... النوم طار من عينى خلاص... حاتفرج عالموكب فى التلفزيون..... افتحيهولى والنبي يا وفيه.....

(وفيه تدير مفتاح التشغيل فى التلفزيون..... حيث ظهره للنظارة... تنبعث على الفور..... موسيقى مارش عسكري.. بينما تخرج وداد يعدل هانى من وضع كرسية ليتوسط أمام جهاز التلفزيون. بجواره البندقية اللعبة التى أحضرها وحيد... يتناولها... يقلبها فى يده وهو يبتسم..)

ص. المذيع: سيداتى سادتى.. حان الآن موعد انتقالنا إلى إذاعة خارجية لننقل الى حضراتكم وقائع الموكب الرسمى والشعبى الذى نظم استقبالا لصاحب الفخامة الرئيس الجنرال رومينجو ماهاراشنا أوكو رئيس المجلس الثورى الحاكم فى تنجالا الصديقة.. فإلى هناك.....

(هانى يبدأ فى متابعة التلفزيون باهتمام)

ص. منيع الموكب: وهكذا أيها المواطنين يتقاطر ضيوفنا العظام يوما تلو الآخر ليكونوا شهودا على نهضتنا... على مسيرتنا الطافرة الميمونة... مسيرة العزة.. مسيرة الكرامة... كرامة الوطن والمواطن.... ها هو سيداتى سادتى موكب ضيفنا العظيم دومينجو ماهاراشنا ابوكو... يقترب.. أنا أراه الان يلوح للجماهير الغفيرة ويبتسم..... إن ابتسامته العريضة الوضيئة تعنى أشياء وأشياء..... تعنى أنه يرى فى الوجوه

التي تطالعه بالحب والترحاب يرى فيها ملامح الإنسان الجديد..  
الإنسان الممتلئ ثقة بالنفس وبالغد..... الإنسان الحر.... أجل أيها  
المواطنيين.. إن نسمات الحرية تهب على خد الوطن..... قوة  
منطلقة..... لتشهد ميلاداً جديداً يضرب المثل لبلاد العالم  
الثالث....

(صوت دقات عنيفة.. ثم اقتحام.. يفتح باب الشقة ويندفع منه  
مجموعة من الجنود شاهرين الرشاشات)  
(يتقدم الضابط نحو هانى)

الضابط: دى شقة ارملة المرحوم يوسف زغلول؟...  
هـانى: ايوه راجعين تانى ليه؟... مش كفاية اللي عملتوه الليلة؟....  
الضابط: اخرس انت..... (للجنود) فتشوا الشقة.....  
هـانى: (يعترض طريقه بكرسيه) كفاية بقى.. معاك إذن من النيابة  
الضابط: (يدفع الكرسي بخشونة فيقلبه بهانى) اوعى كده امال.  
(هانى الواقع على الأرض يمسك بالمدفع اللعبة ويرفعه.... ويصوبه  
نحوهم..)  
الضابط: المشبوه مسلح.. اضرب يا عسكري انت وهو.....

(ستار مع صوت طلقات نارية)

**أولاد اللذين**  
**(مسرحة في فصول)**





## الفصل الأول

**المنظر الأول :** مركب Compound لفيلا حديثه .. يبدو كل شيء فيها جديد لم يمس/ ريسبشن أو هول مودرن مؤسس بفخامة .. ومكون من أنتريه وركنه .. ومدخل شرفه/ شرفه مغطاة بجمالون عليه نباتات متسلقه .. «لبلاب أو لوف أو ياسمين» وبها كراسى وطاوله/ ركن مطبخ مودرن/ سلم يفترضانه صاعد لدور آخر/ ممر علوى بدرابزين يفترض إن يكون لوبى معيشة للدور الثانى/ من الريسبشن أبواب وارشات تؤدى إلى حجرة صالون وحجرة مكتب/ وباب تحت السلم العلوى مغلق ومفترض إنه يؤدى للقبو أو البدرن.

الوقت: من العاشرة مساء ليلة فى الصيف الحالى إلى شروق اليوم التالى

### قبل رفع الستار

#### لوحة تمهيدية «برولوج»

(فى مقدمة المسرح «الآفانسين وقبل الستار مساحة طوليه يفصلها عن الصالة ما يشبه صور قصير يحد سطح الفيلا .. يجاور كروكى طبق استقبال «دش» وما يشير إلى صهريج مياه ... وكلها يمكن طيها وإزاحتها بسهولة عند بدء الفصل ... من كالوس يعطى إحساس سلم صاعد إلى السطح يظهر بالتدرج شاب فى الخامسة والثلاثين/ ربما نسميه «الهجوم»/ نحيل .. ذو ملامح

مصريه عاديه ويفضل أن يكون ذو بشره قمحية .. يرتدى بنطلون  
جينز وتى شيرت صينى أو قميص كاجوال يتقدم إلى منتصف  
المسرح ... يروح بيديه على وجهه طلبا لآى نسمة ..).

**الهجوم :** حر .. حر ورطوبة ... والكهرباء مقطوعة .. يعنى مفيش تكييف ..

دا إيه الظلم ده .. مصلحة الأرصاد بقالها أسبوع تقول فى  
النشرة .. منخفض الهند الموسمى ... كل صيف اسمع الجملة دى  
يجى من خمستاشر سنه ويمكن قبلها لما عقدتنى .. كنت الأول  
مش فاهم يعنى إيه منخفض الهند الموسمى .. وكنت لأنى ماحى  
فى الجغرافيا متصور أن المنخفض يبقى فى الشتا والمرتفع يبقى  
فى الصيف .. ليه؟ ماعرفش ... سألت قالوا لى إن المنخفض ده  
عبارة عن رياح سخنه جايه من الهند ويتقف شويه فوق الجزيرة  
العربية عشان تجدد قوتها وتستبارك ولأنها قاصداننا هنا ...  
يبقى لازم تعدى على إيه؟ .. عا لبحر الأحمر طبعا وهناك تتشبع  
ببخار الميه لئمة عينها علشان تكمل المعانى .. تبقى حر ورطوبة ...  
حلو؟ .. لا .. مش حلو أبدا .. لأنها بتوصل مصر وتحتلها ... تعمل  
قاعدة جوية مستمرة طول الصيف .. عرض مستمر بدون  
انقطاع .. شواية والناس بيتقلبوا عليها ناقصهم بص أسياخ  
ويترشقوا فيها ازاي يا أخى نفس فكرة الخازوق اللى كان زمان  
وسيلة من وسائل الإعدام .. فاكسر سليمان الحلبي؟ ... بالضبط يا  
ساتر .. كل ما استرجع صورة الأتوبيسات والميكروباصات والناس  
جواها لحم على لحم وعرق ريحته خل على الهدوم والأنفاس  
ساعة الضهرية فى الجو ده .. ولادهم مشتحين فى بيوتهم  
بيشحتوا شويه أكسجين من مراوح تعبانه بترمى عليهم هوا  
سخن .. وعلى وشوشهم وفوق كتافهم بتتنطط عفاريت الحر فى  
القياله مع شقاوة العيال مع نواح النسوان وخناقات الجيران  
والكلام فى ولعة الأسعار وأقساط البقالة والأجزاخانه وفلوس

الدروس الخصوصية... كل ده مع ريحة البدنجان المقلّى بتاع كل يوم.. يا ساتر... حر وبدنجان طول شهور الصيف اللي بتبتدى من أبريل وتفضل لنوفمبر... عذاب اتقلبت على جمر السنين اللي فاتت كلها من يوم ما وعيت عالدينا.. لكن السنه دى... الحمد لله... الحال أتغير... من يوم ما لقيت الفيلا دى ولا جل حظى طلعت مكيفة.. سيبكم من النهارده... دلوقتى التيار يرجع (يتلطف حوله فى سعاد)... أول مره أشوف السطح... ظريف... ممكن يتعمل فيه قعده ورووف وبرجولا... والواحد يطلع فى الليالى اللي حرها بسيط... يشم الهو الطبيعى... الأكسجين.. بتاع ربنا اصل التكيف نعمه صحيح... بس صناعى... فريون بقى وبيقولوا مش كويس عالصحه وبيخرم الأوزون... لكن البطر وحش دا لولاه السنه دى كنت... سيبكم من ده... أنا الحقيقة عايزه أتسلى معاكم لغاية ما يجى التيار وكويس قوى أن القمر بدر.. ونوره الشاعرى ده يشجع عالفضفضه... وأنا بقالى شهرين دلوقتى باكلم نفسى... ليه؟ .. لان مفيش حد غيرى هنا.. هاكلم مين؟.. الفيلا دى فى منطقه جديده فى سته أكتوبر.. واللى بناها حوط عليها من الأربع جهات بجنيته كبيره تفصلها عن الفيلات التانيه اللي كلها تقريبا لسه ما سكنتش... فيه حارس صحيح... بس مخه ترللى شويه... بصندوقه والضمان معاه بس من غير كتالوج.. عالزيرو.. لسه حتى ما لينش.. وأنا واحد خريج جامعه ومثقف... غير ليسانس القانون اللي خدته أنا ولا فخر دودة قرايه.. واللى زى مش ممكن يبقى فيه حوار بينه وبين راجل متخلف زى ده... علشان كده باكلم نفسى... طيب... مش ممكن ادعى صحابى ييجوا يزورونى؟ أو انزل أنا أزورهم واشقر على أهلى؟.. لا طبعا مش ممكن... ليه؟ هى دى العقده... الحقيقة ماهيش عقده ولا حاجه.. (صوت كروان ينبعث فجأة) الله..

كروان.. الملك لك.. لك.. لك.. باتباشر بيه... يبقى التيار  
 حايرجع حالا.. الله عالكروان.. كانت ستي أم إبراهيم تقول أن  
 اليمامة لما تغرد تقول (مقلدا صوت اليمامة) وحدوا ربكم وحدوا  
 ربكم... والكروان يسبح ويقول الملك لك.. لك.. لك.. لك.. الله  
 يرحمها.. كانت.... (يتوقف لحظه) لكن ازاي.. كروان هنا في  
 المنطقة دي؟ ... دي تقريبا صحراء.. والكروان مش طائر  
 صحراوي.. ازاي؟ يمكن علشان في جناين حوالين الفلل الجديدة  
 دي وشجر وبتاع.. جايز.. ما أنا اهه.... متهيالى مفيش بشر  
 غيرى مقيم فى المنطقة.. ومع ذلك جيت.. ودى بقى.. هى العقدة  
 اللى مش عقده ولا حاجه.. (تضاء لمبات معلقه فى العمق.. ولمبه  
 على شخصيخه السطح) هيه... النور جه.. والليله حر.... حر  
 ورطوبة... ننزل نشغل التكيف ونكمل دردشة.

(بلاك اوت مع رفع الستار ليضاء المسرح... لنرى هول.. به  
 انتريه وركن سفره وأبواب سفره وأبواب: للمطبخ - للشرفه -  
 للبدروم - لصالون معلق - وسلم صاعد للدور الثانى (يدخل  
 الهجام نازلا من السلم الداخلى).

**الهجام :** ما تستغربوش... سلم السطوح بيوصل للدور الثانى.. ومن الدور  
 الثانى للدور الاولانى السلم ده... (يصل إلى منتصف المسرح)..  
 أيه رأيكم؟ حلوة؟ هه؟ فرش الترا مودرن وديكورات جميلة...  
 وكل الإمكانيات موجودة... مش ناقص حاجة... (وهو يدير بصره  
 حوله) مصروف عليها بالهبل.. اتبنت وانفرشت واتهيات عشان  
 اللى يستأهلوها... ناس قدها.. مش أنا طبعاً... أنا ضيف.. أو  
 فى حكم الضيف.. مش مفهومة؟ أشرحها لكم... الأول أقدم  
 نفسى.. أنا شريف.. يعنى.. دا مش اسمى الحقيقى علشان لو  
 حد فيكم من حبايينا البصاصين الخصاصين اللى ما بتتبش فى  
 بقهم فولة.. عموما الاسم مش مهم فى حالتى دى الاسم ما

يفرقش... سمونى شريف أو عادل أو شادى أو اللى يجى على  
بالكم.. المهم ماحدث يطلب منى البطاقة... صدقونى مش  
حاتتاجوها لأنكم هاتنسوا كل حاجة بمجرد ما اسكت... لأنكم  
مش موجودين أصلا... أو موجودين طول مانا باكلكم بس...  
وسبق قلت لكم أنى باكلم نفسى.. يعنى انتوا مجرد انعكاس  
لصورتى فى المرايه... مفهومه دى... مش كده... (يتحرك إلى  
أحد كراسى الانتريه) بالمناسبة أنا واقف ليه؟.. (يجلس) أيوه  
كده... بس الوقفة بتولد حركة.. بتبقى دافع.. لكن القعاد بيعمل  
استرخاء يستدعى النوم خصوصا وأنا لوحدى.. ولوحدى مدة  
طويلة متهيألى أكثر من شهرين دلوقت .. والأيام شكل بعضها  
ومقاسها واحد.. خصوصا فى الصيف البايخ ده بس التكيف  
عمل فرق... لو كنت لسه فى شقتنا اللى فى شارع ماراسينا كان  
زمانى با تسلق زى كل سنه... قعدت سنين كثيرة قوى أتسلق  
وانزل الشورية عرق.. كوكتيل عرق فى الحقيقة.. عرق الحرالى  
بيشرب من كل مسام الجسم... على عرق الخجل... خجل شحط  
زى متخرج بقى له سنين ومش لقى شغل وقاعد فى البيت يأكل  
ويشرب على حساب أخته اللى بتصرف عليه وعلى ثلاث أخوات  
فى ثانوى وإعدادى وجامعة وأب معاشه على قد دواه وأم عندها  
التهاب مفاصل وطول اليوم تصرخ وبالليل تنام بالمسكنات.. مش  
بس الأكل والشرب على حساب الأخت الكبيرة لا... وبيتخانق لو  
ما جانا بتش الجورنال كل يوم علشان بقراه ويحل الكلمات  
المتقاطعة فى الحمام... شفتوا برود وبلادة إحساس أكثر من  
كده؟.. بس خلاص اتحلت.. تعرفوا اتحلت ازاي؟ بسبب خناقه  
دبتها مع إلهام... إلهام مين؟ إلهام أختى طبعا.. كانت خناقه لرب  
السما.. ليه وليه شافتنى باولع سيجارة.. هو أنا كمان ملزمة  
اشترى لك سجائر يا أخى حس على دمك... أنت إيه؟.. جبلة؟...

عيب يا إلهام ما تقوليش كده أنت عارفة ظروفى... ودى منى  
ظروفى أنا لوحدى... دى ظروف جيل بحاله وبلد بحالها  
والنبى تلم الدور وتسكت لأن مرارتى انفجعت خلاص... بدل م  
تقولى خطبة ولا مقال عنه ظروف الأزمة الاقتصادية انزل شوف  
حاجة اعملها.. اقعد فى ميدان المحطة فى الجيزة مع الأنظار  
اللى مستتين مقال المعمار... ولا روح اشتغل تباع ولا عتال فى  
بين الصورين ولا فى سوق العبور.. أتعلم تلزق سيراتيك ولا  
تدقد صاج... بلاش... البس أووفرول بترتالى وامسك مقشة  
واكنس الرصيف واقف عند الإشارات حا تتمد لك ميت ايد من  
ميت عربية اللى بجنيه واللى بنص وترجع آخر النهار جيوبك  
دفيانه.. بلاش دا كله.. اشتغل نصاب ولا أتعلم النشل ولا أسرق  
شقه.. المهم تحل عن سمايا وتعتقنى لوجه الله... تصوروا لما  
أختى شقيقتى تقوللى الكلام ده... كان أهون طبعاً لو فرغت فى  
دفعة رشاش ولا غرزت سكينه فى صدرى.. بس عزرتها.. قلت يا  
واد عندها حق.. فاض بيها.. كلت بالحمل ونخت.. لا هى قادرة  
تشوف نفسها ولا تفكر فى مستقبلها ولا حتى عندها نفس تحلم  
ببيت وعريس وأولاد... لأننا عنسناها وبورناها وجبرنا سوقها  
من زمان... زعلت طبعاً والطعنة أمتى.. المتنى بس ألهمتى...  
ولع القرار فى دماغى زى لطشة البرق... كن ذئبا فى غابة  
الذئاب... انحرف... ومد أيدك... وحل مشاكلك على  
حسابهم... حساب مين؟... يوووه.. يوووه..... أدينى أول ما  
شطحت نطحت وقررت ادخل سرايه من سراياتهم اللى بيقولوا  
عليها فلل.. واقشله (ينهض واقفا) بس لازم انقى واحدة فى  
مكان بعيد.. مدينة من المدن الجديدة... الأمن فيها لسه بعافية..  
واحتمال الزوجان كبير... لفيتها من شرقها إلى غربها.. رجلى  
جابتنى هنا عجبنى شكل البتاعه دى... انتيكة ولها جنيته وزى

العروسة.. أكيد مليانه تحف.. عملت زى عتاة المجرمين وقعدت  
أراقبها لمدة أسبوع.. ما شفتش حد بيهوب ناحيتها غير البواب  
الدهل اللى قلت لكم عليه.. حلو.. يعنى كمان ما فيهاش ناس..  
قلت اعمل زيارة استكشاف وفى الوقت نفسه اجرب قدراتى  
الإجرامية وجراأتى على الاقتحام.. نطيت م الجنينه عالتراس وم  
التراس عالهل.. هوب لقيت نفسى هنا.. أيه الابهه دى كلها...  
يا قوة الله... عفش سرايات زى بتاع السيما... وكل الكماليات..  
أود نوم تهوس حمامات تحب تقضى حياتك فيها.. مطبخ كله  
أفران بالكومبيوتر.. والمهم بقى... ثلاجة بيعى ميت قدم بعرض  
الحيطة وضرف زى دواليب الهدوم وتفتح... يا عينى.. مالا عين  
رات ولا أذن سمعت.. من كل أصناف الأكل والشرب... نى  
ومطبوخ جاهز على التسخين... أصناف م اللى بيعولوا عليها فى  
الريستورانات الفرنساوى.. الحاجات اللى تأكلها من غير ما  
تعرف اسمها.. إيه والهلمه دى كلها وما فيش فى الفيلا صريخ  
ابن يومين ولا حدش بيهوب ناحيتها... يا ولاد الذين دا ايه الفجر  
دا.. دا انتو تتسرقوا وتتسرقوا... ودا أقل واجب... وقررت إن أنا  
اعملها على دفعات!... زيارات... وفى كل زيارة اشيل حاجه بما  
خف حملة وغلا ثمنه.. لغاية اللى ما خف حملة دا يخلص...  
ندور على فيلا تانيه بنفس ظروفها حلو؟.. أه طبعا بس ما  
حصلش.. لان سوسة الطمع لعبت فى دماغ المواطن... ليه ما  
بتعيش فى العز ده ليله.. وتتعشى وتسهر والصبح تروق نفسك  
وتأخذ اللى فيه القسمة وتتكل؟.. فكرة.. هه؟ فكرة وجيهه  
كمان... وعنفا ورحت منفذ.. بت الليلة من غير أى مشاكل.. طب  
ليله كمان... وليله بعدها... وبرضه مفيش مشاكل... راحت  
السوسة لابعه تانى... طيب ما تخليك هنا!... أخلىنى هنا؟ أيوه  
يا أخى... الحكاية مش لازمها غير إنك تبعد عن عينين

البواب... وتخفيض الإضاءة بالليل... وتوضب مخبأ تلجأ له لو  
فجأك أى طارئ... زى مثلا الوليه اللى بتيجى تنضف مرة كل  
أسبوع... أو لو طب حد من أصحاب الفيلا وحصل فعلا... بس  
جت سليمة واحتياطات الأمن نفعت... وبالتدريج ابتديت اعرف  
حاجات كثير... (صوت كلاكس من بعيد).

(يسرع الهجوم بإطفاء نور الهول... ويسرع إلى ستار الشرفة  
يزيحه وينظر من خلاله قد نفذ إلى المسرح أضواء مصابيح  
إماميه فى سياره).

**الهجوم :** يخرب بيتك ... اطفى العالى... زعلتني... أنت مين؟... أه....  
هو .... الراجل صاحب الهلمه دى كلها... ودى مين (يدقق  
النظر) هى برضه.. معلش.. مش حالحق أكلكم عنهم... يمكن  
بعد شويه... هه؟ حسب الظروف... لحظه... نطفى التكيف...  
(يطفى زر التكيف).

(يسرع نحو باب القبو، وهو موجود خلف السلم الصاعد للدور  
الثانى على النظام الأميركى ويخرج ويفلق خلفه)  
(يفتح باب الهول الرئيسى ويدخل شبحين مسطولين ويتبعهما  
ثالث...)

**شيرى :** النور يا بيبي... أنا مش شايفه حاجه..  
(يمد يده ليضغط على زر النور.. يضىء الهول... تظهر شيرى:  
بين الثلاثين والخامسة والثلاثين جميلة لها مظهر فتيات  
العلاقات العامة وإن كانت ترتدى فستان سهرة فخم وتبدو  
اكسسوارتها ملفتة للنظر بدرجة مبالغ فيها... أما هو فرجل  
ستينى فخم المنظر... يرتدى سموكنج أو تكسيدو... وفى أصابعه  
سيجار تشر شل كوبي ضخم... أما الثالث فهو البواب أو  
الحارس عطا الله... أربعينى... نمط حراس العقارات والأراضى  
المعتاد... لبده صعيدي حولها شال وجلباب أبيض على صديري  
وبندقيه معلقه على كتفه).



شـيرى : أيوه كده.... على فكره يا بيبى لازم تبقوا سايبين إضاءة والعه  
باستمرار....

فتـوح : حاضر يا شيرى ... ايه يا زفت يا عطا الله...؟ عايز ايه؟  
عطا الله : عايز سلامة جنابك.. إنى جلت أفضل جار جنابك لغاية ما  
تصرفنى... جايز تحتاجوا شئ... والجرس اللى كان بيضرب  
عندى بره الظاهر خسران ما بيضرش..

فتـوح : خلاص.. أنت حاتقرالى مقال... يا للا انصرف... روح..  
عطا الله : أروح يعنى أروح خالص؟  
فتـوح : أمال تروح الاحته... أمشى ياللا... وما شوفش وشك قبل الضهر  
بكره..

عطا الله : (رافعا يده إلى جبهته بتحية عسكرية ساذجة) حاضر يا جناب  
الباشا.. تصبحوا على خير..

فتـوح : اسمع قول للاسطى بديع السواق يا خد العربية ويروح هو كمان..  
عطا الله : وما عايجيش إلا الضهر برضك؟  
فتـوح : أيوه... يا للا... اخفى..

عطا الله : (خارجا) حالا يا باشا... خضيت خلاص!  
شـيرى : يا ساتر!... غبى قوى الحارس ده يا بيبى...

فتـوح : الراجل المناسب فى المكان المناسب يا شيرى... مش مطلوب هنا  
اذكيا.. ما حناش ناقصين

شـيرى : طيب والضيف اللى جاى الليلة؟

فتـوح : (ينظر فى ساعة الموبايل)... لسه ميعاده.. عندنا فرصة نريح م  
المشوار شويه.. ولما يقرب الميعاد عمروسى حايطلبنى (جرس  
الموبايل... يسرع بفتحه) أيوه.. فيه ايه يا صبريه؟ مانت عارفة  
إنى اضطررت انزل مصر علشان الضيف اللى جاى من بره.. يا  
ستى العيد عيد ميلادى أنا.. والحفلة حفلتى.. بس الشغل

أهم... والراجل ده بالذات أكبر مستثمر فى الشرق الأوسط..  
كملت أنت الحفلة مع الأولاد والضيوف... معقولة ده... مش  
حاقدر ارجع مارينا قبل المغرب بكره... ياللا... بطلت رغبى يا  
صبريه.. دماغى!  
(يفلق الموبايل وهو ينفخ)

شـيـرى : مستحملها ازاي دى يا بيبى... دا حتى مظهرها مهما لبست..  
بلدى خالص.. ما يشرفكش فى إلهى سوسايتى..  
فـتـوح : ما تفتحيش السيرة دى وحياة أهلك أنت كمان... يا للا نريخ فوق  
شويه قبل الراجل ما يجى.. قدامنا ساعة ونص ساعتين..  
بالمناسبة.. أنت حافضه كويس النظام.. الراجل ده لازم نطبقه  
ويفوق الصبح يطلع أمضته على العقد... وده أهم من كل اللي  
قبله..

شـيـرى : ما تخافش... إى ول نوت لت يو داون... وأنت عارف أنا شاطره  
قد أيه وما سبيلش خذلتك فى مواقف قبل كده... بس ما دمت  
فتحت الموضوع... الكوميشن بتاعى قد أيه..

فـتـوح : (وهو يتأبط ذراعها ويتجه بها نحو السلم الداخلى...) دى  
نتفاوض عليها فوق... (يخرجان عن طريق السلم... من باب  
القبو «البادروم» يدلف الهجوم إلى المسرح متسللا على أطراف  
أقدامه ناظرا أعلى السلم حتى يطمئن)

الهـجـام : ساعة ونص ساعتين مفاوضات... الموضوعات سخنه وعلى قدر  
كبير من الأهمية.. شفتوا البيت؟ أنا وربت الباب شفتها  
بالجنب... لطشة بر وفيل يا دوب.. بس عرفتها على طول ...  
جت معاه أربع مرات بعد ما سكنت هنا.. وفى كل مره كان بيحى  
واحد مهم بعدهم وكانوا يقعدوا هم الثلاثة الأول فى الصالون ده  
يضرىوا البلاك ليبل... وفتوح باشا يكبس عليه النوم يفرد

عالكنبه.. أحياناً على الأرض... أما السنيورة والراجل المهم قوى  
فيقوموا يطلعوا يكملوا المفاوضات فوق..  
(يتحرك إلى منتصف المسرح.. ويضع يده فى جيب بنطلونه..  
وينظر إلى أعلا ثم إلى أسفل) منظرى أنا وحسن... مش كده؟  
بالذات منظرى قدام نفسى! (يهرش رأسه) طبعاً بأبقى  
متضايق... وأحسس على رأسى... وأفرك م الغيظ لكن أرجع  
أبرد دماغى أقول وأنا مالى.... لا البيت بيتى... ولا البنت تقرب  
لى.. ولا باقوم بأى دور إيجابى فى العملية... وبعدين أنا موضب  
البدروم تحت للطوارئ اللى زى دى فرشاه على سرير نقلته من  
أوضة الشغالين لأنه مفيش شغالين غير الوليه اللى بتيجى  
تنضف ودى ما بتباتش... وجنب السرير موضب كل حاجه  
علشان لو جيت أنا.. أقفل باب البدروم من جوه بالترباس واديها  
وكانى مش موجود واللى يحصل يحصل... وأنا مش مسئول  
الأخلاق الحميدة فى المنطقة لامؤاخذه بالعكس دانا حرامى..  
سورى... دى أول مره لى... ولسه ما نفذتش مشروع النقل..  
أقصد نقل ما خف حملة وغلا ثمنه... صحيح عشت عالأكمل اللى  
فى التلاجه واستهلكت كهرباء للأجهزة... واستخدمت كل  
إمكانيات المطرح... وده نوع من السرقة بالإضافة لأن اقتحام  
مسكن خاص هو فعل مؤثم فى القانون... لكن الركن الأساسى  
فى معنى الجريمة غير متوفر... وهو عنصر الإضرار بالغير..  
وزى ما انتوا شايفين وجودى هنا واستفادتى من الإمكانيات  
الموجودة ما فيهاش ضرر لأى حد... وحتى فيما بعد... لما اضرب  
ضربتى وأنشل الفيلا... تفتكروا كل اللى حاخده مهما كان ثمنه  
حا يآثر فى ثروة السيد فتوح؟.. طبعاً لا ولا حتى تأثير نقطه فى  
بحر...

(صوت شجار فتوح وشيرى من الخارج)

ص. شيرى : دانا اعمل لك ايه؟ ... أنت اللى مرتبك...  
ص. فتوح : أنتى متعمدة تلخبطينى وتقللى مزاجى....  
الهجوم : (خارجا) أه.. المسألة باينها جابت خل... أحسن نتفرج من وربة  
البدروم  
(يخرج فى نفس لحظة دخول فتوح وشيرى من على السلم الداخلى)  
فتوح : وبعدين دى مش أول مرة... أنا فاهم قصدك كويس  
شيرى : حايكون قصدى ايه يا باشا؟..  
فتوح : واضح! عايره تكسرى عينى!  
شيرى : اكسر عينك ازاي مش فاهمة.. وبعدين دى حاله بتحصل للرجاله  
كلهم وبتبقى مؤقتة.  
فتوح : لما بتكرر بتبقى عقدة!  
شيرى : وأنا بقى عايزة اعقدك؟ ليه؟ حاكسب ايه؟.. بالعكس... دانت  
ممکن تضايق منى وتكهرنى وترمينى علشان مافكر كرش  
بالعقدة!..  
فتوح : آمال ايه اللى بيعصل ده؟ حتى الحبايه ما عملتش حاجه..  
شيرى : ماهى ما لحقتشى يا توح... بيقلولوا لازم تفوت ساعة أو ساعة  
ونص... وما تكونش واكل... وأنت بسم الله ما شاء الله أكلت  
أربع سندوتشات كبار واحنا فى العربية.  
فتوح : دى مش فياجرا... دى حبايه ألمانى جديده لها سيستم تانى  
خالص.. ما لهاش أى آثار جانبية وتأثيرها بيبتدى فى الحال..  
ومالهاش صلة بالأكل..  
شيرى : تبقى حالة نفسيه يا حبيبى!.. بالك مشغول ومش رايق..  
فتوح : (يتهالك على كرسى الانتريه) أنتى بتقولى فيها؟.. دا صحيح...  
شيرى : (تجلس على مسند الكرسى وهى تداعب شعره أو وجهه إذا كان اصلع)  
وآيه اللى شاغلك يا بيبى؟

فتسوح : الأحوال فى البلد اليومين دول كلها قلق... العباسى بعد ما شمع  
الفتله وخرج ساب الدنيا تضرب تقلب.. وأنا حاطط فى مشروعه  
النحاس ميه وخمسين مليون!

شـيـرى : يا خرابى!

فتسوح : قولى يا خرابك!..

شـيـرى : وهو خرابك مش خرابى يا بيبي؟

فتسوح : والله لو خريت بجد ما حاشوف وشك!..

شـيـرى : أخص عليك!.. دا رأيك فى؟

فتسوح : اهو كلام.. ما تدقيش!

شـيـرى : واليه والخمسين مليون دول ضاعوا عليك فعلا؟

فتسوح : على الأقل مش كلهم حايرجعوا.. وفين بقى على ما يحصروا

ممتلكاته ويعملوا قسمة الغرماء علشان يقسموا الملايم اللى

فاضله على الديانة!

شـيـرى : يا عينى ... تعويرة جامدة دى يا بيبي! بس متهىأ لى بالنسبة لك

أنت خربوشة زغنونه

فتسوح : انتى بتستدرجينى عايزة تعرفى إيه يا بت؟

شـيـرى : والله أبدا... عايزة اطمئن عليك بس...

فتسوح : اطمئنى.. ولعلمك الزبون بتاع الليلة دى... لما يمضى.. حانجيب

أضعاف اللى خده العباسى!

شـيـرى : يا خراشى!.. حامضيه... بس ليه واحد..

فتسوح : واحد إيه؟ باكو؟.. لا وغلاوتك... عشر بواكى يكونوا فى شنطتك

بكره قبل الضهر

شـيـرى : (وهى تطلق ضحكها ساخرة بجلجلة) اها... عشر بواكى؟... لا..

خليهم عشر قراطيس لب ولا عشر كيزان دره مشوى...

فتسوح : آمال عايزه إيه؟

شـيـرى : واحد أرنب يا حبيبي!

فستوح : نعم؟ مله... يون...؟  
شيري : بالضبط...  
فستوح : جاك مله على ودانك! أنت الظاهر سكرتي م البقين اللي  
طفحتهم فوق!  
شيري : بلاش .. أنا حته تعبانة الليلة وعايظه أروح!..  
فستوح : باقول لك إيه؟ خللي ليلتك تعدى.. لولا أن الراجل طالبك أنتي  
بالذات وميعاده قرب.. أنا كنت بالتليفون أجيب عشر بنات  
الواحدة منهم كعب جزمته بعشرة زيك....  
(بتنهض في تحدى... وتتناول الشال الذي كانت تغطى به عرى  
كتفيها.. وحقيبتها)  
شيري : خلاص... شوف لك كعب جزمه يمضى زيونك!  
فستوح : (بلهجة أمره) اترزى أقعدى... إحنا بنهرج ولا بنلعب فى الحارة  
الى اتولدتى فيها..  
شيري : ايه؟ حارة؟.. أنا مولودة فى مصر الجديدة!  
فستوح : صح... فى عزبة الصعايدة فى مصر الجديدة! عارفاه؟..  
شيري : (أنت عايز منى ايه دلوقتى)؟..  
فستوح : (ينهض بصرامة) تتلقحى وتكلمى شغلك..  
شيري : وتفضل تهزأنى بالشكل ده؟  
فستوح : (ملايئا) لا خلاص... بس أنا مباحبش الدلع خصوصا فى  
الشغل.. وبعدين فكرى أنا عملت لك ايه؟.. دا أنا حققت  
لك حلمك اللي كنتى نايمه صاحيه عليه وشغلتك فى  
السينما والتليفزيون وبقي لك اسم!.. والراجل اللي جاي  
الليلة ديه مخموم فيك ومتصور انك النجمة أم ديل  
الى حايرجع يتباهى مع أصحابه بأنه قضى معها ليلة  
العمر..  
شيري : والمطلوب منى؟

فتوح : تانى؟.. أنت أكيد سكرتى.. مش قلنا مش حاتسيبيه إلا لما يمضى؟  
شيرى : ولى واحد؟

فتوح : برضه؟.. أقول لك حاعمك فيلم ولا كليب ترقصى فيه  
وتسعيرتك تشعل فى المنطقة كلها وبدل الواحد حبقوا خمسه  
ولا سته.. مبسوطه؟  
(تهجم عليه وتقبله)

شيرى : ميرسى.. ميرسى يا روح قلبى!  
فتوح : ولو أنى ماليش فى حكاية الإنتاج دى ولا بأحبها! لكن أهو بقى  
«صوت كلاكس سياره وموتور يقترب»  
(منتبها) عربيه!! أكيد هو...

(يسرع إلى باب الشرفة حيث يزيع الستار وينظر من خلال  
الزجاج المغلق...)

فتوح : فى عربيه فعلا....  
شيرى : (تجلس وتفتح حقيبة يده) مش ملاحظ أن الهول مش حر مع  
أن التكيف مقفول؟

فتوح : (وهو مشغول بمراقبة الخارج) يعنى إيه؟  
شيرى : يعنى أكيد كان مفتوح قبل ما نوصل... فعلا... ساعة ما دخلنا  
لاحظتها وكنت حاسألك وقول لك مين هنا يا توح... بس  
نسيت... لكن بدا دلوقتى يسخن... ما تفتح لنا التكيف يا  
حبيبى علشان المكياج ما يسيحش؟

فتوح : (مبغوتا) .. ايه دى؟.. دى مش هى.. دى عربية الـ... يا دى الليلة  
السوده.

(بينما تنهمك شيرى فى ضبط ماكياجها)

شيرى : مالك يا بيبى؟

فتوح : دى عربية تامر أبنى.. (يعيد النظر من خلال النافذة).. ايه اللى  
جابه من اسكندريه؟ وعرف طريق الفيلا دى ازاي... يا خبر.. دا

معاه شلة أصحاب كمان (صوت صفق أبواب سيارة واختفاء صوت الموتور)... يا للا بسرعة..

شـيـرى : يا للا ايه؟...

فـتـوح : (وهو يسرع بإطفاء الأنوار) قومي معايا تتدارى فوق... استحالة الولد واصحابه يشوفونا هنا الليلة!..

شـيـرى : (وهي تلملم أشياءها) طيب وافرض عايزين يناموا... ماهم حايطلعوا فوق...

فـتـوح : حا نروح جناح الضيوف أنا قافل عليه بباب وسط مفتاحه معايا أنا بس... ومجهزه للضيوف الاسبسيال زى الزيون بتاع الليلة..  
(يندفعها أمامه)... يا للا..

شـيـرى : (وهما بيدأن صعود السلم) وافرض صحيح جه وهم هنا؟

فـتـوح : فراج جاى معاه وحافهم ويتصرف..  
(يخرجان من درج السلم الداخلى... من باب البدروم يطل الهجام)

الـهـجـام : الراجل والمرء فوق... وشلة الأنس تحت... والفرجة حاتحلو...

(يروى مناقشات وحوار: أصوات شبان وبنات)

الأصوات : الباب دا لو أتوارب وقعدنا وراه ممكن نحضر القعدة... اهو الباب بيتفتح...

(يفلق باب القبو أو يواريه.. فى نفس اللحظة يفتح باب الهول)

الأصوات : ياللا يا تامر... ولع النور... إحنا مش شايفين حاجة... والشيلة ثقيلة.. حاسبى يا نهى آمال... ما تقيد النور يا تيمو...

(يدخل تامر أولا: شاب بين التاسعة عشرة والواحدة والعشرين...)

تـامـر : معلش.. أصلها أول مرة اجى هنا... فحين مفتاح النور.. فحين.. فحين.. اهه..

(يضئ الديكور على المسرح... ويظهر شابان: سامح (سامو) ومجدى (ميجو) يعاونان يارا ودولله (داليا) فى حمل سمر المغنى



عليها.. الجميع فى سن متقاربة بين العشرين والرابعة  
والعشرين.. وكلهم فى حالة ارتباك وتبدو عليهم سمات من  
أفاقوا مرغمين من حالة «مزاج»

سامح : أول مرة؟ وضامن منين أنها فاضيه؟..

مجدى : ما قال لك ياخى أن أبوه هو اللى بانها وقافلها عالقاضى..

يسارا : وده وقت الكلام ده... حانحط دى فى؟..

تامر : عالكنبة دى... وأنا.. أنا حاطع أشوف الحمامات فوق يمكن  
الاقى حاجة فى الأجزخانة..

يسارا : أنا بأقوال نطلب لها دكتور (وقد انتهوا من وضع سمر على  
الأريكة)

دول الله : أنت عبيطة؟.. حانقول للدكتور ايه؟ وافرضى حالتها تستدعى  
تروح المستشفى..

يسارا : نودبها...

تامر : أيوه أروح فى سين وجيم... العربية عربيتى.. والفيلا فيلة  
أبويا... وبعدين إحنا مش عرفين فيها أيه..

يسارا : جسمها مثلج ونفسها مش منتظم ولونها مش حلو..

سامح : اطلع أنت يا تيمو شوف نشادر ولا حاجه تفوقها فى  
الأجزخانة...

تامر : (خارجا عن طريق السلم) ما حدش يجى ناحية التليفون ولا  
يستخدم الموبايل ولا يتصل بحد لغاية ما اجى..

(بعد خروجه.. يتهالك الأربعة الآخرون على الكراسى)

مجدى : أنا حاتجن... ومش عارف اللى خلاها تقلب بغم بالشكل ده...

سامح : بقى مش عارف؟.. لا.. حلوة..

مجدى : قصدك ايه يا سامح؟..

سامح : يا بنى اللى حصل كان قدامنا كلنا..

مجدى : ... البنت هى اللى عيانه... وداليا هى اللى جايهاها...

دولته : نعم؟.. يعنى ايه جاييها؟.. مش أنت اللي ميت عليها من يوم ما شوفتها فى خطوبة ماجدة شلبى... وخوتنى تليفونات تترجاني اسحبها لسهرة الليلة؟..

مجدي : ما قتلش ليه أنها عيانه؟..

دولته : ما عرفش.. وبعدين هى قالت الليلة وأنت مصر تفرض نفسك عليها..

مجدي : ما قالتش!...

سامح : لا.. قالت يا ميحو... بس احنا كلنا ما صدقناش!

يارا : داليا كانت عارفة... مش صاحبته؟..

دولته : (باستنكار) صاحبته مينين؟.. أنا ما اعرفهاش إلا عن طريق ماجدة...

يارا : ليه؟.. مش قالت أنكم كنتم جيران فى السيدة زينب؟

دولته : أنا؟.. سيدة ايه اللي بتقولى عليها دى.. وسمعتها أمتى؟

سامح : (متدخلا) ستوب!... دا مش موضوعنا دلوقتى... عايزين نشوف البنت دى مالها الأول...

يارا : عندها كريزة قلب... هى قالت أن قلبها تعبان وهى بتترجى الكابتن ميحو يسبها!..

سامح : قلب؟! يعنى ممكن تموت!... دا إذا ما كانتش..

دولته : (وهى تمسك بمعصم سمر.. ثم تضع أذنهما على صدرها).. لا .. هى مغمى عليها بس (من أعلى السلم يظهر تامر... ويهبط للهول بحماس)

تامر : (ممسكا بزجاجة يلوح بها) لقيت دى.. مكتوب عليها أملاح نشادر..

سامح : ياللا ... شموها!

(يتجمعون حول الفتاة ويبدأ تامر فى تمرير الزجاجة تحت انفها)

دولته : يارب... فوقى بقى...

**سامح :** رموشها بتتحرك...  
**يار :** متهيألى حاتفوق..  
**تامر :** بس وسعوا من حوالها شويه .. خلوها تتنفس...  
 (يتفرقوا عنها جزئيا ... نراها تتملل...)  
**سوسن :** أم..... (تشرئب بعنقها إلى أعلا)  
**الجميع معا :** فافت.. فافت...  
 (دولله تسرع بمساعدة سوسن على الجلوس)  
**دولله :** مرسى يارب.. الحمد لله ... أقعدى يا سوسن يا حبيبتي..  
**سوسن :** (تجيل بصرها حولها)... أنا نمت؟ .. إحنا فين؟ .. هو انتو برضه؟  
 (تحملق فى مجدى .. ثم تجهش بالبكاء) .. أوعى تقرب لى..  
**مجدى :** أنا فى مكانى ما تحركتش... و ... بعدين أنا ما كنتش أعرف أن قلبك تعبان  
**يارا :** حاسة بايه دلوقتى؟ تجى نطلب لك دكتور؟  
**تامر :** (بخشونه محذرا) إحنا قولنا إيه؟  
**سوسن :** ايوه يا دلال... أنا تعبانة... يا ريت تطلبى لى دكتور... ولا احسن أروح... اطلبى لى تاكسى إحنا فين؟  
**دولله :** إحنا فى الصحراء يا بنتى وبعاد بيجمى ميتين وعشرين كيلو عن اسكندريه...  
**سوسن :** (مفزوعة) يا خبر... وايه اللى جابنا هنا؟  
**سامح :** دى ناسيه يا جماعه..  
**مجدى :** ناسيه ازاي؟ دى عرفتنا أول ما فتحت عينها... وقالت هو انتو برضه؟  
 (تنتحى دولله بتامر جانبا) (مجدى وسامح يبتعدان إلى الشرفة... ويارا تجلس متهاكة على كرسى بجوار سوسن)  
**دولله :** وبعدين يا تامر... أنا مش متطمئه... البنت شكلها تعبان فعلا  
**تامر :** وعمايزانا نعمل إيه؟

دولله : إحنا لازم ننتهز فرصة فوقانها ونروحها...

تامر : اسكندريه؟ دلوقتي؟

دولله : إحنا نجيبها دكتور... أسمعنى بس... يشوفها وتحمله مسئوليتها.. ونخله يطلب لها عربية إسعاف أو عربية من أى مستشفى.. ونديهم عنوانها فى اسكندريه يبلغوا أهلها أو يودوها.. هم أحرار.. المهم نسلمهم البنت فايقة ونخلع إحنا المسألة..

تامر : طيب.. أنا حا تشاور مع الباقين.. بره فى الفراندة.. وخليكى أنت ويارا معاها...

(يتحرك يصفر بشفتيه يشير لصديقه إلى الخارج.. فيتبعانه إلى الشرفة بينما تعود دولله إلى كنية سوسن التى استندت بكتفها إلى ظهر الكنية وقد مالت رأسها عليه)

دولله : ايه الأخبار؟

يارا : الظاهر عايزة تمام...

سوسن : أه....

دولله : نامى يا سوسو...

(فيه إضاءة موسيقى انتقالية)

#### اللوحة الثانية

المسئطر : شرفة الفيلا....

(تامر - سامح - مجدى)

سامح : انتوا حاسين أنا موقفى كر يتيكال قد ايه..؟ مش كفايه اللى حصل..؟ عملنا اكروبيات علشان نزوغ من البودى جارد بتوعى.. وقلنا ساعة نخلص فيها مع التلات بنات ونرجع... الكابتن تيمو عمل فيها مايكل شوماخر بطل الفور ميولا وان وطار بينا من مارينا لسته أكتوبر هنا... ونشيل معانا تهمة... بنت قلبها تعبان

وحاتفتطس... وطبعاً زمان البودی جاردز اکتشفوا غیابی وبلغوا  
والدنیا مقلوبة

**مجدی :** الدنيا حاتتقلب من تحت لتحت يا سموحه من غير ما حد يحس  
أو يشم خبر

**سامح :** ليه بقى؟ لو البنت دى جرى لها حاجة مش حا يحققوا ويقولوا  
مين اللى كانوا معاها...؟

**مجدى :** (سافرا) أنت بالذات ماحدش حا يقول إنك كنت معانا... لا  
سيرتك ولا اسمك حد حا يستجرى يجيبهم على لسانه.. أنت  
خط احمر... ممنوع الاقتراب والتصوير..

**سامح :** ومالك بتكلم كده بلهجة اللى مضايقة الموضوع ده؟... أنا ما  
خترتش أكون ابن مين.. بس اخترت أكون صاحبكم.. وما تتساش  
إنك أنت سبب الورطة اللى إحنا فيها

**مجدى :** أنا؟ والله؟ أنا اللى خدرتكم؟.. وأنا اللى جبت البنات؟.. وأنا اللى  
قلت حاوديكم حته ابهه ما حدش قبلنا دخلها؟..

**سامح :** مش أنت اللى صممت تغلس عالبنات فى الطريق.. ومش قادر  
تصبر أما نوصل.. لغاية ما أغمى عليها وكان ممكن تموت

**مجدى :** كلنا كنا ضارين وغاسلين ومتشطفين والدماغ مضبوطة على  
سبعة ريختر... والبنتين مطرقيين وكل واحد فيكم حاجز واحدة  
وسايبين لى أنا العيانة... العنطرة والمنزحة حتى فى الهلس!

**تامر :** أظن كفايه كده... بطلوا خناق... أنا سألت سؤال واحد ما  
جاوبتوش عليه.. نطلب دكتور ونفذ فكرة البنت دلال ولا دوله ولا  
اسمها ايه دى؟

**مسامح :** هى الفكرة معقولة... بس مش مضمونه! افرض الدكتور شك فى  
المسألة وبلغ؟

**مجدى :** شك فى ايه وحايبلغ عن ايه؟ وبمعيدين احنا مش حنطلب أى  
دكتور... احنا حانطلب دكتور صاحبنا...

تامر : يعنى أنت موافق عالفكرة؟

مجدى : بس عندى فكرة احسن واسهل!

تامر : ايه هى؟..

مجدى : ايه رأيكم نركب احنا الثلاثة العربية ونفلسع؟..

سامح : ونسيت التلات بنات؟..... والله فكرة!...

تامر : والله فكرة؟ يا سلام!.. أهلا يا بن الباشا الكبير.. طبعاً.. ماهى

لو حصلت مصيبة جواها لا الفيلا فيللكم ولا إلى فيها حايقدروا

يقولوا الحقيقة.... حايخافوا من نفوذ سعادة فخامة والدك

المبجل!.. (مستديراً لمجدى) وحضرتك فاقد ومش فارقة

معاك... تعرف أنك أكثر واحد فى أصحابى محيرنى يا

مجدى؟...

مجدى : (وهو يستند لصور الشرفة) بجد... طيب قول... سمعنى...

تامر : أنت ابن مين بالضبط؟

مجدى : (مشدوداً) نعم؟ سؤال دا والا بق سفالة؟

تامر : سورى... مش قصدى اللى فهمته... أنا محيرانى حكاية

المعسكرين اللى أنت مشدود بينهم... معسكر أميرة هانم

البهنساوى.. الوارثة.. المليونيرة.. اللى عزبتها وجناينها.. مبدوره

فى طول مصر وعرضها من أسىوط لاسكندرية... والمعسكر

المعادى معسكر طه الخرادلى.. ملك الألومنيوم... وكبير تجار

السكر... والملح... والشاى.. وميت... سلعة تانيه... المعسكرين

متطلقين من عشر سنين... بس أنت شغال عالنتين.. بتغرف من

كل واحد شويه ومع ذلك يا أخى مش باين عليك.. داير نتسكج

على أصحابك.. أكل وشرب وفسح.. حتى المزاج... دماغات

مخدر... صحبة بنات... مش حاجة تحير برضه؟..

(يسود صمت متوتر... يرتفع فيه تدريجياً مؤثر موسيقى سول

(على بيانو أو تشيللو) (يتحرك مجدى إلى المقدمة....)

**مجدى :** الحقيقة أنا اللي محتار.... أنت بتحسدنى على أبويا وأمى؟...  
ولا زعلان لأنى زى ما بتقول بتسنكج على صحابى؟... يعنى  
عايش على قفاهم!... وسواء كان الاحتمال الاولانى... أو  
التانى... فده مالوش دعوه باللى حاصل الليلة... بس عايز  
افكرك بمثل بيقول.. اللى بيته من قزاز... كمل له يا سامح..  
(يتقدم سامح.. حتى يصل إلى تامر ويصبح الثلاثة على خط  
مائل «دياجونال»)

**سامح :** ما يضر بش بيوت الناس بالحجارة... عنده حق يا تيمو... وأنت  
كمان باباك واحد من التايكونات التقال قوى... وما متك صبريه  
هانم من أشهر سيدات المجتمع فى مصر كلها... وضيغه دايمه  
فى كل صالونات الهأى توبس... صحيح الفرق بينهم وبين بابا  
مجدى ومامته.. أنهم مش منفصلين زيهم.. لكن عاملين شركة  
مساهمة دمها خفيف قوى... كل واحد فى التراك بتاعه وشريكه  
ما يضايقوش.. فكريين أنهم بيمثلوا على الناس كلها مع إن الكل  
عرفين.

**تامر :** (مشدود فى تحفز) عارفين ايه؟

**سامح :** مش هاتزعل لو قولت؟

**تامر :** (لاحقا) وايه اللى هايزعلنى فى أى حاجه ممكن تقولها.

**سامح :** يعنى.. أى حد فى مكانك ممكن يتصدم لم حد يسمعه شىء مش  
عايز يواجهه وان كان عارفه

**تامر :** ما تتكلم دوغرى أنت كمان

**سامح :** أنت متعرفش إن بباك فتوح بيه أبو شبكه أكبر سمسار فى  
البلد؟

**تامر :** (مرتبكا فى تلعثم) مم ايه... سمسار فى ايه يعنى.. عقارات..  
والا أراضى والا..

**سامح :** كله يا تيمو.. أنا عرفت مثلا إنه بنى قصر مخصوص مسميه

«دار اللذات لإنهاء الصفقات» (وهو ينظر حوله) ممكن على فكره  
تكون الفيلا ديه.. فخامتها.. وفرشها.. ومكانها المعزول عن  
العمران.. يقولوا أنهاهى.. الوكر المناسب

**تامر :** (منفجرا) أنت بتقول ايه؟ أنت بتخرف.. مش واعى لكلامك أكيد  
الرمزمة اللي رمرمتها الليلة لسه بايته معاك.. البانجو الكوداين  
على البلاك..

**سامح :** مش قلتك هاتزعل؟ بس أنت عارف أنى بحبك صح؟

**تامر :** أمال لو بتكرهنى كنت قولت ايه؟

**سامح :** أنا أكرهك يا تيمو ده أنت انتيمى.. واللى قولتتهولك ده مش  
نميمة ولا إشاعات سمعتها ده من تقرير معلومات رسمى قريته  
لما عترت فيه صدفة فى مكتب بابا وأنا بادور له على الكاتر بتاع  
السجار.. وأنا مكنتش ناوى أكلملك عنه نهائى.. لولا أنى لقيتك  
فاتح جامد على مجدى.. جيت أقول لك إن الحال من بعضه..

**تامر :** (يتحول للهجوم) حالى أنا وحال مجدى طبعاً.. معاليك مش  
معانا.. لان حالك مش زى حالنا.. أنت تبع الخطوط الحمر أو  
الياقات البيضاء والبديل التاكسيدو...

**سامح :** (بهدهء) مسئوليتى؟

**تامر :** مش مسئوليتك.. بس حمايتك

**مجدى :** (متدخلأ) وأنت عندك حمايتك يا تامر.. وانا عندى حمايتى..  
إحنا التلاته محمين.. علشان كده مش عارف ليه مرتبكين  
ومخضوضين.. إحنا لازم نتصرف بمنتهى الهدوء والبرود

**سامح :** نعمل ايه يعنى؟

**مجدى :** ننفذ فكرة دوللى.. هاتوا الدكتور!

(فيه إضاءة مع موسيقى انتقالية)



### المشهد الثالث

#### المنظر: هول الفيلا

(سوسن فى مكانها على الأريكة وتبدوا كما لو كانت مستغرقة فى النوم.. حولها يجلس الثلاثة.. فى وقت واحد تدق أجراس موبايالاتهم.. ينهض الثلاث.. ويتجه كل واحد فيهم إلى جهة.. يتبع سبوت إضاءة سامح أولا..)

**سامح :** فى ايه يا كابتن؟ مش لاقينى يعنى ايه؟ هو أنا طفل صغير تايه؟.. محدش يقدر ياذينى واللى يهوب ناحيتى (يخرج من حامل حول وسطه مسدس) هتصرف معاه زى ما علمتوني.. متصدعش دماغى بقى باسطوانة المسئولية والواجب دى.. أنا حاغطيك لو الباشا حاسبك أو حقق معاك.. نعم.. مضطر تبلغه يعنى ايه؟ تخلى مسئوليتك يعنى؟ ما تبطلوا الجبن واخلاق العبيد ده.. المفروض أنى سهران.. والسهرة ده كانت للصبح.. اسمع.. لو اتصرفت بالغباوة دى أنا هشرذك.. وبدل ما تبقى قائد قوة حراسه هاخليك توصل طلبات للزيائن على تريسكرل يا.. بتاع الديلفرى! (مع إغلاقه للموبايل تطفى بقعة الإضاءة عليه وتركز بقعه أخرى على مجدى..)

**مجدى :** يامامى هكون فزين يعنى.. عند بابى طبعاً... اجى لك دلوقت ازاي؟ مقدرش.. الباشا عامل حفلة كبيرة علشان افتتاح التوكيل الجديد و.. نعم؟ لطشو منك يعنى؟.. أنت اللى بتحاربيه ي يا كونتسيه باهنساوى.. أه.. طيب أنتى بتسمعينى وصله الردح دى ليه دلوقت؟ اطلبيه هو وسمعيها له «صوة الام بلاى باك»

**ص. الأم :** أنا اطلب الجلف الجربوع ده؟ مش كفاية أنى قعده السنين اللى فانت دى كلها بداوى واصلح اللى عملته السنين السوده اللى جمعتنى أنا وهو فى سرير يووو.. سرير ايه بس.. قصدى.. قولى يا ميجو.. صحيح أبوك مرافق سوسوه سارى اليوميين دول؟

مجدي : لأفرقها اللي معها حاليا تماره حموى..  
ص. الأم : ينهار اسود.. مرات الد..  
مجدي : (تفلق الموبايل) بس.. كله الا دى (تطفى بقعة الضوء)  
(تسلط بقعة ضوء ثالثه) على تامر.. يتحدث فى الموبايل  
تامر : أنا مش فاهم حاجة يا دادى.. مين اللي قللك أنى مش فى  
مارينا؟.. أمال هاكون فى؟  
(بقعة ضوء أخرى على فتوح فى شرفة المستوى أو الدور الثانى  
للفيلا.. يتحدث فى الموبايل)  
فتوح : شوف أنت بقى ملموم على الشلة إياها وصايعين فى..  
تامر : طيب ايه رأيك أنى فى مارينا متحركتش براها نهائى.. وقاعد أنا  
وسامح ومجدي على النت فى الشاليه بتاع سامح.. تحب  
اندهولك تكلمه؟  
فتوح : ما أنا عارف انه جنبك.. بس مانتوش فى مارينا..  
تامر : حضرتك عايز تتأكد تعالى.. وعلى فكره سامح جاى له من  
الإدارة لكشة هيو لبنانى عظمه هتعجبك أوى  
فتوح : يا سلام؟ بتغبرنى كمان علشان اجى؟ دى ايه الشجاعة دى كلها؟..  
وياترى على كده معاكم موزز؟  
تامر : لا.. الموزز عليك.. وده لعبتك بقى  
فتوح : حاضر عشر دقائق واكون عندك (يفلق وتتسحب البقعه)  
تامر : (يضحك ويفلق الموبايل) أهلا يا دادى..  
(بلاك أوت - انقطاع تيار لانه من خلال الشرفة المفتوحة تظهر  
انعكاسات مصابيح الشارع)  
سامح : أبوك مفعوله فوري.. النور قطع  
مجدي : وده وقته.. الليلة حر ودلوقت هتشر عرق..  
تامر : والدكتور اللي زمانه جاى.. (الثلاثة يتحركون كالأشباح ثم تدوى  
صرخة دوللى..)

دواللى : يا ماما..  
 تامر : دوللى! أنتى فين؟ (فى شرفه الدور الثانى)  
 دواللى : أنا هنا.. كنت فى التواليت..  
 مجدى : وصرختى كده ليه؟  
 سامح : خايفه من الضلمه طبعاً.. أنت تايه عن البنات ومحن البنات؟  
 دواللى : ضلمة ايه؟ دى حد قرصنى فى دراعى وجرى.. مين فيكم؟..  
 (تنزل على السلم)  
 مجدى : أهلاً.. أنتى وصله متأخره قوى..  
 سامح : يا بنتى إحنا هنا متحركناش.. مين اللى هيلحق يطلعلك ويقرصك  
 ويجرى  
 تامر : ويجرى ليه؟ ما يشبع فيها قرص.. وبعد الخضه الاولانيه  
 هاترقع الضحكه تصحى الميتين.. (ثبوت نقير سيارة.. ثم يضاء  
 المسرح/ عودة التيار)  
 مجدى : هيه.. النور جه  
 تامر : والدكتور كمان.. مش سامع الكلاكس...  
 (الجميع يتحركون دون أن يفتنوا لعدم وجود سوسن)  
 سامح : عظيم.. هيكشف عليها هنا ولا احسن نشلها لاوده من أود النوم؟  
 مجدى : أنا رأى فى مكانها هنا.. ايه ده؟  
 تامر : هى فين؟  
 سامح : الا؟ مش كانت هنا حالا؟  
 دواللى : لغاية ما طلعت أروح التواليت كانت نايمة هنا.. وديتوها فين؟  
 تامر : ودينها فين يعنى ايه؟ هو حد لمسها؟  
 مجدى : ولا حتى سمعنا لها صوت.. (جرس الباب)  
 سامح : وبعدين.. ده الدكتور..  
 تامر : (يتجه إلى الباب) لازم نفتح له طبعاً..

(يفتح الباب.. يدخل طبيب.. بملابس مستشفى.. رداء أخضر  
للتعقيم.. وجو أنتى.. وغطاء رأس ويديه حقيبة طبية)

الطبيب : مين اللى سريعنى وجرجرنى من أوضة العمليات على ملا وشى؟  
تامر : أنكل صبرى؟ أنا تامر.. فتوح..

طبيب : ابن فتوح أبو شبكه؟ فين الحالة الخطرة اللى عندكم؟

دواللى : كانت هنا واختقت يا دكتور.. فاجأة ملقنهاش.. مع إن..

الطبيب : (يقاطعها) نعم؟ ملقتوش مين؟

سامح : المريضة يا دكتور..

مجدى : زى ما تكون فص ملح وداب!

الطبيب : (يجول بعينه بينهم جميعا) أه المريضة اختقت.. ضاغت.. طب

دورتوا عليها كويس؟ شفته تحت الكراسى؟.. أهلا يا حبايى.. ده

ليلتكم بقى!.. وأنا جاهز لكم.. والنعمة لأربيكم!

تامر : إحنا اسفين والله يا عم.

طبيب : عمى الدب فى عنيك وعين أبوك.. قو لتلى يبقى مين؟ فتوح أبو

شبكه؟ والله لما يكون أبو شبت نفسه.. أنت والعيال اللى معاك

دول لازم تتربوا (ويخرج من جيبه موبایل فى اللحظة التى يبدأ

ضرب الأرقام يطفأ التيار ثانيا بلاك أوت..) ايه ده.. مين طفى

النور؟

(هرج ومرج على المسرح.. صرخة حريمى.. استغاثة الدكتور)

(الجميع كالأشباح.. فى شرفة الدور الثانى يظهر سيطرة كل من

فتوح ومشير هى تصرخ وهو يجذبها)

ص . تامر : يا أونكل مش كده!

ص . سامح : أنت بتضربنى! أنت مش عارف أنا مين وابن مين؟

ص . مجدى : أما راجل مجنون صحيح!

ص . طبيب : سببنى.. اممم..!!.. (يتفرق الجميع ويتهاكوا ساقطين على

الكراسى)

(إضاءة كاملة.. الأولاد الثلاثة على كراسى.. وسوسن على  
الاريكه فى وضعها الأول)

تامر : شركة الكهرباء بتلعنا استغمايه..

سامح : متأكد إنها هى اللى بتلاعنا؟

مجدى : لا طبعا.. بصوا حوالىكم..

(يقف الثلاثة)..

تامر : فى ايه؟

سامح : أنا دايع..

مجدى : البت العيانه رجعت مكانها على الكنية.. والبت السليمة اختفت.

سامح : والدكتور كمان.. أتبخر (يتحرك إلى الشرفة ينظر خارج الفيلا)

تامر : وعريته بره يعنى ما مشيش

مجدى : يعنى ايه ده كله؟

تامر : متها لى واضحة..

مجدى : هى ايه؟

فيلة أبوك.. مسكونه!

(الثلاثة يتجمدون كالتمثيل.. دخول بمؤثر موسيقى.. قيد

تدريجى حتى البلاك الكامل ثم)

ستار

نهاية الفصل الأول



## الفصل الثانى





## الفصل الثانى

(يفتح الستار ويفيد أن الإضاءة تنتشر تدريجيا لذا المنظر الثابت فى آخر الفصل الأول مجموعة الشبان مجمدين كالتماثيل وسوسن ممددة على الأريكة... مع دخول الإضاءة وبالتدريج مع انتشارها تتحرك الشخصيات... وتبدو الحركة بطيئة أولا كالإفاقة من النوم ثم تنشط لتصل إلى ذروة اعتدالها مع اكتمال الإضاءة Full light...)

**مجدى :** أنا مقدرش ألقى عقلى.. بس مفيش احتمال تانى..  
**تامر:** أشباح ايه وعفارت ايه بس يا أخوانا؟ لا يمكن أصدق الهلوسة دى  
**سامح :** أوكى... أنا معاك أنها هلوسة... تفسر بإيه اللى بيحصل هنا..؟  
ثلاثة لغاية دلوقت أختفوا... اتبخروا... يارا.. ودوللى... والدكتور...  
**مجدى :** أنت نسيت الأخت دى..؟ مش اختفت وبعدين ظهرت تانى.. لأ  
وايه كمان... وهى مغنى عليها...  
**تامر :** أنا معاك أن فيه حاجة غريبة... بس فى النهاية كل شىء لازم  
يكون له تفسير منطقى  
**سامح :** أنا رأى التفسير المنطقى ده مش هو اللى حانفكر فيه دلوقت!...  
خلونا الأول ننظم المسألة فى الدماغ ونحدد خطوات الجاية...  
**مجدى :** يا سلام... شفت طالع متودك ازاي؟.. واخد على المريسة  
وبيستعد!

**سامح :** (غاضبا) وبعدين معاك؟ أنت ليه مصر تعبر عن حقدك بمناسبة وبدون مناسبة؟ أنا مستعد ابادلك لو ينفع..

**تامر :** احنا فى إيه ولا إيه دلوقت؟.. سامح بيتكلم صح... المهم دلوقت نعرف حانعمل إيه.

**مجدى :** أنا باجدد اقتراحى.... إحنا الثلاثة نركب العربية وعالرابع ما تغيرش.

**سامح :** والبنتين اللى اختفوا...

**مجدى :** هو احنا اللى خفيناهم؟.. إذا كانوا العفاريت هم اللى خطفوهم ماحناش قد العفاريت وإذا كانوا اختفوا بمزاجهم حايرجموا بمزاجهم..

**تامر :** عبقرى! طيب والبنت السطيحة دى؟

**مجدى :** دى بقى علشان ما نسيبلكش تهمة فى الفيللا بتاعة أبوك حانا خدها معنا.. وفى أى حته ضلمة قبل بوابة الرسوم حانخطها فى التراك بتاع الانتظار جنب الطريق... بس!

**تامر :** أنا مش متطمئن للحل ده والبنتين والدكتور عاملين لى قلق

**سامح :** طيب إيه رأيكم نوزع نفسنا احنا الثلاثة عالفيللا ونفتشها أوده أوده وخرم خرم لغاية ما نلاقيهم أو نتأكد أنهم مش موجودين فيها نهائى.

**مجدى :** ولما نوزع نفسنا.. ويستفردوا بينا اللى استفردوا بالثلاثة.. واختفينا احنا كمان واحد واحد؟..

**تامر :** بسيطة! بلاش نتفرق... نتحرك احنا الثلاثة مع بعض... و... إيه ده؟

(يلتف الثلاثة... إلى حيث وضع كشاف طوارىء إضاءة ذاتية أمام باب القبو المغلق)

**سامح :** فى إيه؟

**تامر :** البتاع ده.. ماكانش موجود.. وفجأة ظهر.

**مجدى :** (وهو يقترب من الكشف)... دا كشف طوارىء... بنقول ماكانش موجود؟

**تامر :** أيوه وإلا كان حد فنيا لاحظته.

**سامح :** ممكن ما نكونش مركزين.. وعموما أهو ظهر فى وقته.. ناخده معانا علشان لو التيار انقطع تانى.

**مجدى :** (يحمل الكشف) بينا... حانبتدى؟ منين.

**تامر :** من الدور الفوقانى طبعاً... هو اللي فيه الاود.. هنا مافيش الأنتريهات وصالون ومكتب والمنافع (يتقدمهم ويتابعه الاتنان الأخران ويصعدون السلم ليخرجوا منه.. بمجرد خروجهم.. تنهض سوسن تستيقظ من نومها أو إغماءتها..)

**سوسن :** ياه... كل ده كان حلم؟ والحلم ده اللي فات وأنا بتألم؟ ولا الحلم اللي ابتدا دلوقت؟... (تنهض فى وهن... وتتحرك ببطء)... دلوقت مافيش ألم... صدرى مش واجعنى... بس دايخة ياترى دايخة ولا نايمة؟... من شوية صحيت وقمت وجيت أمشى.. شفتنى نايمة على الكنبه... زى ماكون اتنين... واحدة خفيفة.. مش حاسه بأى ألم... والثانية راقدة مش قادرة تتحرك... خفت وغمضت عينى بسرعة ولما فتحتها لقيتتى زى ما انا كده دلوقت.. الله.. إيه الخفه دى؟.. مش حاسه بأى ثقل يربطنى بالأرض.. أنا طائره.. طائره.. تؤدى مايشبه حركات باليه أو رقص تعبيري... زى زمان.. بابا كان عايزنى أكمل فى معهد الباليه.. لما مات.. أونكل خيرى اللي أتجوز ماما صمم يخرجنى... بالباليه إيه يا روح أمك؟.. اتهببى كمل فى تجارة وخدى دبلوم يوظفك وتأكلى نفسك... كان بشع.. وكان دايم يمد يده على... أول نوبه جات لى من خوفى وهو محاصرني بين السرير والدولاب.. وماما فى الحمام بتغنى... أنكملت فى نفسى قوى وجسمى اتخشى وقلبي اتعصر فى ضلوعى... صدرى وجعنى ونفسى اتقطع وأغمى

على... بعدها خاف وحرم يمد يده... بعد عنى وسمعتة بيقول  
لأما بنتك دى شؤم.. يوم ما باصطبيح بطلعتها ما باعملش شغل  
يجيب ثمن البنزين.. فرحت بشؤمى... وفرحت بقلبى اللى  
حمانى بعلته... مش عارفة... أدبنى رقصت ده كله ما تعبتش..  
ومتهيا لى إنى ممكن أفضل أرقص طول الليل.. مش هاممنى أنا  
فين... ولا مين الأولاد اللى كانوا معايا... واللى اختفوا..  
وداليا... ويارا... سابونى بعد ما ستدروجونى.. عايزين يقدمونى  
لأصحابهم ولاد الذين إل... لأ.. ما تنسش يا سوسن... أنت  
كمان مش بريئة!.. إيه اللى خلاكى تسمى كلام دوله؟  
(يدخل لها الهجوم من باب القبو... ويدور معها فى لفة الرقصة  
الآخيرة)

**الهجوم :** كنت عايزه تتفرجى ولا تجربى؟

**سوسن :** (دون أن تستغرب وجوده) ماحبش أجرب اللى ما عرفوش...  
المجهول بيخوفنى.. يمكن كنت عايزة اتفرج... أشوف... بعدها أقرر  
إذا كنت أجرب ولا أهرب.. (تركع على الأرض لاهثة ويركع محتويا  
إياها وبورق مناديل كلينكس يخرجها من جيبه يجفف لها عرقها)

**الهجوم :** كانت داليا بتكلمك دايمًا عن الأماكن اللى بتروحها؟

**سوسن :** كانت بترسم لى بالفرشة والألوان.. وتعلق لى أنوار نيون حمراء  
وخضراء وصفراء.. وتهمس فى ودانى بكلام زى سرسوب الميه اللى  
نازل فى الكف المشقق فى يوم حر.. كلام عن متع مالهاش أول  
ولا آخر.. وولاد زى الفرسان والأمرا بتوع الحواديت.. حسيستنى  
أنى ست الحسن اللى مستنيها ميت شاطر حسن واقفين لها  
عالصفين وفى إيد كل واحد منهم بوكيه وردة ألماظ وردة ياقوت..  
وتاج مرصع على قد راسى أنا لوحدى...

**الهجوم :** وصدقتى!

**سوسن :** لاما صدقتش.. لكن قلت! أشوف.. لو طلعت الجنة كدابة أرجع

أرضى ثانى.. ولو اداتنى أماره أو شاره لسكه مفتوحة  
حاجرب..

**الهجوم :** وكانت الليلة أول خطوة فى السكه اللى جابتك هنا؟  
**موسن :** لأ.. الليلة ابتدت فرجه.. وما شفتش أماره ولا علامه..  
ومادينتش خوانه.. ثلاث أولاد ظراف.. واحنا ثلاثة.. و وقالوا  
لغه ونشوف القمر طالع عالبحر.. وفى العربية كله طار..  
ووالفرجه بقت كابوس..

(صوت سيارة تقترب..)

**الهجوم :** (وهو يسرع إلى مفتاح النور) فيه حد جاى... تعالى..  
(يسود الظلام... كشافات سيارة تعكس من خلال الشرفة.. بعد  
لحظات يفتح باب الهول.. ويظهر العمروسى.. رجل أربعينى...  
متأنق.. يبدو ونموذجا المشهلاتية والموصلاتية والمتخصصين فى  
الخدمات والعلاقات)...)

**العمروسى :** (وهو يضى النور) اتفضل يا صاحب السعادة... شرف!  
(يدخل عدنان باش بوزق... شخص ملهى الجثة.. يرتدى حله  
أنيقة له ذقن صغيرة أو نصف ذقن فى الواقع ومظهر غير محدد  
الانتماء أو الهوية..)

**عدنان :** وكر جميل.. فى مكان معزول... لا بأس... (يدور بعينه  
متغمضا) لكن ما لمحت سيكيورتى... فينهم؟

**العمروسى :** اطمئن سعادتك... كل احتياطات الأمن موجودة.. بس غير  
مرئية.. من غير ما عنيك تلمح إنسان أو يلمحك إنسان..

**عدنان :** فاين!.. (يجلس).. هو يرازيور بوس؟

**العمروسى :** حاضر.. ثوانى يكون معانا.... (يخرج المويابل ويطلب عليه).. آلو  
يا باشا.. صاحب السعادة وصل.. يا ريتك تشرفنا..

**ص. فتوح:** دقيقة يا عمروسى على مالف من ورا الفيلا... أصلى قافل باب

الوسط والعيال بيجاولوا يفتحوه واضطريت انزل من السلم  
الورانى..

العمروسى : (وهو يبتسم لباش بوازق) أول رايت.. احنا فى انتظارك (يفلق  
الموبايل) ثوانى وحايكون معانا..

عدنان : والموفى ستار تبعه؟

العمروسى : حاضرة معاه طبعاً.. اطمئن سعادتك.. كل الترتيبات مضبوطة  
بالشعرة

## (يدخل مسرعا لاهثا يجرشيرى من ذراعها)

- فتوح : جودنا يت يابو شامل..  
عدنان : العمى.. جاى منين خيو..  
فتوح : حاقولك بعدين.. اسمح الأول أقدم لك شيرى نجمتنا الى تنور  
السما والأرض... شيرى.. سعادته عدنان بك باش بوزق...  
شيرى : يا خرابى.. عارفاه.. شفت صورته فى المجلات وسمعت عنه  
واتهوست بيه قبل ما شوفه  
فتوح : هالعيوقه نجمة سينما عن جد؟  
العمرسى : وطالعة لفوق كما الصاروخ...  
فتوح : لها ثلاث أفلام فى اللعب وماضيه ثلاث عقود واشتغلت فى ثلاث  
مسلسلات  
عدنان : ينشوف.. بلكى تبين كرامه الليله تفتح لها طاقة القدر...  
(ناهضا) ياللا... بيصير نطلع الدور الثانى ناخذ شاور وكأس  
ونتعشى..  
العمرسى : ياللا يا باشا!  
فتوح : ياللا إيه أنت كمان؟ سورى عدنان بيه.. السهرة مش هنا.. هنا  
مجرد محطة... بنتقابل فيها وبعدين نتطلق  
عدنان : العمى! شوها الحكى... لسه بدنا نروح مكان تانى؟..  
فتوح : لازم يامونشير... هنا مش حا ينفع...  
شيرى : أنا عندى لوكيشن يهوس وفيه كل حاجة

فتوح : بالضبط كده... عوامه على النيل بعيدة عن العمران وعن الناس  
وعن الدنيا كلها...

عدنان : مافى روح مشاوير خيو.. تعبان كثير وبدي كون ريلاكس... ومانى  
شايف هون شىء مومنيح...

(يندفع الطبيب داخلا بنفس الملابس)

الطبيب : راحت فين؟ فين البنت اللي كان مغمى عليها هنا؟ كانت  
عالكنبه هنا... مساء الخير... مين.. فتوح بيه؟ إيه اللي بيعمله  
الواد ابنك ده؟

عدنان : ومين بيكون هالزله؟

العمروسي : دا دكتور العيلة يا باشا... إنما إيه لهلوبة..

الطبيب : الواد يجيني على ملاوشى علشان اشوف البنت العيانة.. وبعدين  
يقوللى اختفت.. مش لاقينها.. وبعد شوية ألاقوها بس.. بس..  
ماكانتش علكنبه دى... كانت عالكنبه تانيه.. أكيد حالاقوها  
هناك... عن إذلكم.. فرصة سعيدة يا حاج..

(يسرع بالخروج من أى كالموس)

عدنان : من فضلكون.. إذا بتريدوا.. حدا يشرح لى.. شو بتكون حكاية  
البنت العيانة مع ها الازعر يللى بنقولوا عليه دكتور؟

فتوح : (مع اقتراب أصوات أقدام بالدور العلوى)... حانحكى لك فى  
الطريق... بس دلوقت.. ياللا نمشى.. مش هانقدر نستنى هنا  
دقيقة واحدة كمان..

عدنان : دخللك خى فتوح.. أنت مزعوج كثير.. وبدي أعرف السبب!

فتوح : المكان هنا مش أمان كافية! وإديك شفت الراجل اللي كان هنا  
(من كالموس تدخل سوسن وهى تؤدى رقصة فالسى..)

سوسن : وصفوالى الحب! لقيته خيال وكلام فى الحب! يادوب يتقال..  
ترالا لالم.. لالم.. للم



(بينما يقف كل من فتوح والعمروسي وشيرين فاغرى الأفواه...  
ينفجر عدنان ضاحكا)

عدنان : إيه! فهمت.. فهمت عليكون.. هايدى مفاجأة الليلة.. مجهزين لى  
شى أيتمز تاروش وأعدل المزاج تبعنا.. عفارم.. شوك جوزال...  
(مقتريا من سوسن) هايدى يللى تستحق خيى.. (ملوحا بيده)  
هايدى النجمة تبعنا...

فتوح : لاتبعنا ولا نعرفها يا عمنا..

شيرى : مين دى يا فتوح؟

فتوح : مين دى يا عمروسى؟

العمروسي : دى حنة غريبة يا باشا... مش شغلى!

عدنان : ياللا يا شباب... ليش واقفين.. حالا بلشنا بالسهرة... كله  
يرقص عالقالس مع هالفراشة.

سوسن : (يطوق كتفها فتبعده) ممنوع اللمس...

عدنان : تقبرينى... ياللا خيى فتوح... ياللا خيى عمروسى.. ياللا يا  
نجمة الثلاث ثلاثات

(يضطر الثلاثة لمحاولة مجاراته فى الرقص... بلاك أوت على  
الجزء السفلى من الديكور وإضاءة كاملة على شرفة الدور  
العلوى... حيث يقف الشبان الثلاثة)

سامح : طيب أبوك وعرفناه.. ومين دول اللى معاه؟

تسامر : الراحل الضخم ده ما عرفوش.. لكن أعرف العمروسى.. دا  
سكرتير أبويا والمساعد الخصوصى بتاعه.. والوليّه ده مشتبّه  
فيها... زى ماكون شفتها فى التلفزيون ولا السينما!

مجدى : أنا عارفها.. ممثلة جديدة اسمها شيرى... اسم فنى.... اسمها  
الأصلى شربات.. وعلى فكرة كانت بتشغل فى سرايه أمى وبعدين  
مسكوها بسريقة... علقت بروش الماخذ وخدوها عالقسم.. فجأة  
لقينا المحامى بتاع أبويا بيدفع لها كفالة ويخرجها وانتقلت سراية

أبويآ .. شوية وظهر فى الصورة العمروسى بتاع أبوك ياتيمو ..  
وقالوا أنهم تقدم لها وحايجوزها .. أختفت لها كام شهر فجأة  
شفتها فى الكليب بتغنى وترقص (تطفأ أضواء الدور العلوى  
ويسلط سبوت على شيرى التى ترقص مؤدية نمرتها فى الكليب)  
شيرى : باحذرك واديك انذار... أنا ولعة .. أنا شعلة نار .. لو تقدر تبعد  
أحسن لك .. وأهرب ياللا بالمشوار .. أنا أصلى شرار .. وعلى  
أسياد .. يلزهم زار ..

(يدخل لها عدنان بعض الضوء)

عدنان : الله بيعطيكى العافية ... مايدنا نارك .. بدنا بكر مالمسها أنس ولا  
جان يدفعها خارج البقة/ يجذب سوسن داخلها) ضلى ارقص  
يايمامتى ...  
سوسن : تعبانة ..

عدنان : (بلهجة أمرة ثقيلة) أرقصى  
(تدور بببطء يدور فيها ثم نتسارع الدورة مع خفوت الإضاءة  
تدريجيا على المستوى الأرضى وتزيد على الشرفة فى الطابق  
العلوى)

سسامح : متهيألى كده الموقف بقى واضح .. أبوك ياتيمو موزب سهرة  
حمرا للراجل الكوكتيل ده

تامر : (مقطبا) مش فاهم!  
مسجدى : إيه اللى مش واضح فيها؟ سهرة عمروسية أو عمروسية ساهرة  
على شرف الراجل ال .. سميته إيه يا سامح؟

سامح : الراجل الكوكتيل ... أصلى افكرته ... شفته مرة .. كان معزوم  
عندنا فى مناسبة رسمية .. وسمعتهم بيكلموا عنه .. راجل  
مؤسسة .. مالتى ناشيونا لتيز ... تركى على لبنانى على خليجى  
على أمريكانى .. ما تقدرش تحدد له جنس صريح

**مجدي :** علشان كده أونكل فتوح والعمروسى بتاعه جاين الليلة .. أكيد فيها تربيط على صفقة سمينة!

**تامر :** أنتو حاتقعدوا تغنوا وتردوا على بعض؟ اشمعنى أبويا اللي ماسكين قافيه أنت بالذات ياتيمو .

**مجدي :** اشمعنى أنا بالذات بلاش؟

**تامر :** رد عليه أنت يا سموحة!

**سامح :** أم .. بلية الروليت لفت وقفت عندي! أوكى تامر قصده ياتيمو إن بابايا منطقة مغلقة ممنوع الدخول أو الأقتراب أو حتى التصوير ناقص يعلقوا لى يافطة على صدرى مرسوم عليها جمجمة وعصميتين ومكتوب تحتهم .. احترس .. خطر الموت ..! بس لعملكم أنا مقدر مشاعركم وفاهم الدوافع .. الغيرة والحسد .. مشاعر إنسانية جدا .. ومش بتزعجنى .. وبعدين أنا ممكن أغير منكم وأحسدكم .. بنفس الدرجة وأكثر كمان

**تامر :** أهى دى جديدة ..

**سامح :** وبسيطة .. أولا من ناحية النغمة والحياة المغلفة المدهونة عسل وغرقانة فى الكريم شانتى والهبر فيها شغال على ودنه وملغمط بالفساد الطعم اللذيذ .. إحنا الثلاثة عايمين فيها ... يمكن بالعكس أنا أقل منكم شويه بحكم أن أبويا لازم يتدارى ومايدش فرصة لحد بظبطه عريان .. إيه بقى اللي يزيد عندكم وأنا محروم منه؟

**مجدي :** قول .. افتينا ..

**سامح :** مش محتاجة فتوى! الحرية يا صاحبى .. أنتو أحرار أكثر منى ... ما عليكوش الرقابة اللي على واللى بتعد على أنفاسى وخطواتى .. يعنى أنا مثلا مش عارف قدرت أزوغ منهم الليلة ازاي .. لدرجة أن كنت منتظر وصولهم ورايا بين لحظة والثانية ...

**تامر :** أنا زيك مستغرب! المفروض يكونوا قالبين الدنيا عليك دلوقت!  
**سامح :** بلاش نجيب فى سيرتهم أكثر من كده... لأنهم بييجوا ويظهروا  
عالسيرة!

**مجدى :** الخلاصة دلوقت!.. حانعمل إيه؟.. أنت خايف من السكورتى  
بتوع باباك.. وتامر خايف أبوه يشوفه.. والبنتين اللى كانوا معنا  
اختفوا.. أنا باقول نتسحب وننزل من سلم السطح الورانى..  
وناخذ العربية ونقول يا فكيك!

**سامح :** أيوه! قبلما يشوفونا... كأتنا ما جيناش!  
**تامر :** الظاهر مافيش حل غير ده!  
(بلاك.. إضاءة تدريجية على الخشبة.. ليبدو الراقصين كأشباح  
تترنج..)

**سوسن :** تعبانة.. تتهالك على أقرب كرسى  
**عدنان :** (يتوقف عن الرقص) بدك ترتاحي؟ وين بنقدر نرتاح خي فتوح؟  
**فتوح :** هنا مش هالينفع يا جناب الباش بوزق... بينا يا جماعة  
نمشى.. حانكمل ليلتنا قريب.. فى قصر جميل عالمنصورية..  
خرافة.. كأنه قصر من قصور ألف ليلة وليلة.. مش كده يا  
عمروسى؟

**عمروسى :** يا سلام! ونعم الرأى والأختيار يا باشا!.. داخيال.. أسطورة..  
وفيه كافة شىء يا صاحب السعادة.. كل أفراد عيلة المستر جونى  
ووكر والمستر ديوارس وال لورد شيفاز أوف رويال ساليوت أوف  
سكوتلاند.. وسلالة آل بوربون.. المركيز دى كورافوازية والكونت  
هينسى والشيفالية بيسكويت دى بوشى والمسيو أوتار... وإطبعاً  
غيرالدوق ريمى مارتان

**عدنان :** بيكفى عمروسى.. بيكفى.. اتفضلوا... اذا بتريد تحملوا  
هاليمامة للسيارة.. مسكينة.. رقصت كثير..

شيسرى : آيه الحكاية يا فتوح باشا؟ أنا أخذت صابونة ولا إيه؟  
فتوح : احنا لنا أكل ولا بحلقة؟ اى واحدة تمشى الشغل وخلاص!  
(من الباب يندفع الشبان الثلاثة)  
تامر : مش باقول لكم فى حد فى الفيلا؟ مين؟ انت هنا يا بابا؟  
فتوح : (وقد أسقط فى يده) تامر؟.. إيه اللي جابك؟  
تامر : إيه اللي جاب حضرتك... ومين دول؟..  
فتوح : جاي تعمل إيه أنت وأصحابك هنا؟.. أنتو مش كنتوا سهرانين فى حفلة عيد الميلاد فى مارينا؟  
سامح : اسكت يا أونكل.. دا احنا دخلنا فى حنة دين مغامرة الليلة..  
عدنان : شو هالحكى يا عاماروسى؟ مين بيكونوا هالشبان؟..  
عمروسى : دول.. دول أودلانا.. وأولاد أصدقاءنا... مجرد صدفة يا صاحب السعادة.. اتفضل معاليك معايا نروح المنصورية..  
عدنان : شو منصورية.. بدى أعرف بالأول حقيقة هالموقف يللى عجقتونى فيه!  
فتوح : أنا أشرح لك.. بس مش حاينفع عالملأ كده.. اتفضل معايا فى المكتب خمس دقائق  
عدنان : منيح... خمس دقائق بسيطة..  
(متجهاً الى سوسن التى استرخت بجسدها على الكرسى ويدت خائرة القوى)  
خمسمة مع هالزلة وراجع لك.. لاتواخذينى..  
(ثم يقوده فتوح الى كالوس يخرجان منه... ثم يعود ليطل بوجهه)  
فتوح : عمروسى! تعالى معانا باروخ خالتك  
شيسرى : وانا يايبى..  
العمروسى : أه.. أنا بيبي.. معلش يا نجمة... جاي لك... اتسلى حبة مع أخواتك

(يخرج من نفس الكالوس)

**مجدي :** (معتز بامنها) .. أزيك يا شريات!

**شييرى :** أه وانتوا بقى كمالة الليلة الغبرا دى! .. نعم! بقى اسمعنى كويس

يا دقدق .. أنا اسمى مش شربات .. وانا دلوقت نجمة .. ولى

معارف كبار قوى اللى كان هنا دلوقت ده أهيفهم ... وأقل ما فيهم

يخللى المحروس أبوك يمشى يتلفت وراه

**مجدي :** الله الله ... وليه ده كله؟ وأنا بسلم عليكى ..

**تامر :** مانت ندهت لها بالأسم اللى بي فكرها بايام الفقر وكيس الخضار

وسبت الفسيل

**سامح :** كان المفروض برضه تديها برواز وتدلعهها ... مش كده برضه

يابت؟

**شييرى :** بت لما تبتك انت وال ... وال ... (تحملق فيه) باليلة كحلى هو

أنت ...

**مجدي :** أيوه هو .. طولى لسانك كمان ...

**شييرى :** (تجرى فزعة .. الى كالوس المكتبى) .. ياخويا أنا مش قده

ولا قدكم .. أنا حاروح للى جابونى يمشونى .. يخرب بيت دى ليلة ..

(انقطاع التيار ... صرخة مدوية لشييرى)

**تامر :** تانى؟ وبعدين؟ .. فين الكشف الكبير اللى كان معنا فوق؟

**مجدي :** ماحنا نزلنا بيه فى الجنينية لما كنا حا نزوغ ولما لقينا العربية

عطلانة والموتور ما بيدورش فتحنا الكبود ... والظاهر نسيناه ..

**سامح :** أيوه .. اتلخنا واتخضينا لما لقينا خرطوم البنزين مقطوع ...

**تامر :** وادى احنا اتلهينا وماجاوبناش عالسؤال .. مين اللى قطع

الخرطوم؟

**مجدي :** نفس اللى قطع النور!

(يسود الصمت مع ضربة موسيقية ... الثلاثة عبارة عن أشباح

سيلويت خلفيتهم أضاءة منعكسة من خارج الفيلا ...)

**مجدى :** (بعد لحظات صمت متوتر) شفتوا .. أهو دا اللى أنا باقصده ..  
نور الشارع والجينية والع .. التيار مقطوع جوه الفيلا بس!  
**تامر :** وده معناه إيه؟

**سامح :** باينه ياتيمو ... الفيلا دى مسكونة .. بس مش بالعفارىت .. فيها  
حد غيرنا وغير أبوك وضيوفه! (يعود التيار .. إضاءة كاملة ...  
الهجوم يقف فى مواجهتهم أمام باب البدروم)  
**الهجوم :** براوة عليك يا سمسم! ذكى مع أن شكلك فى الصور مدى لمسة  
غباوة مفيش كده (يتسمر الثلاثة فى أماكنهم .. بينما يجز هو  
كرسى ويجلس عليه ...) (بلهجة أمرة ...) أقعدوا ..

**تامر :** (متشجعا) ان .. انت مين؟  
**الهجوم :** قلت أقعدوا ... (تخفيهم لهجته ... يبدءوا فى الجلوس حيثما  
اتفق)  
**مجدى :** (منتبها) الله! سوسن اختفت! ..

(ينظر اليه بنظرة اتهام)

**الهجوم :** عايز منها إيه؟ ... عايز تكمل المحاولة الإجرامية التى بداتها فى  
العربية وأنتو فى الطريق؟

**مجدى :** إيه؟ محاولة إيه؟ .. أنا .. أنا ماليش دعوة

**تامر :** (متشجعا) وبعدين أنت مالك بينا .. وتطلع مين أساسا؟  
**سامح :** ماهى يانية .. أكيد حرامى ..

**الهجوم :** صح! وده أدعى أنكم تخافوا منى وتسمعوا كلامى!  
**مجدى :** أنت أخذتنا على خيانة وخوفتنا فى الأول بس .. (يقف) ودلوقت  
بقى نشوف مين اللى حايسمع كلام التانى ..

**الهجوم :** (يخرج فجأة من عبته مسدسا ضخما) أقعد ياله! يتسمر مجدى  
لحظة .. ثم يجلس) ايوه كده .. علشان نبقى فاهمين بعض من  
أولها .. أنا ماعنديش أى مانع أضرب أى واحد فيكم بالرصاص  
وعلى أهيف سبب وأقل حركة ماتعجبنيش ... أنا هربان من حكم

إعدام فى قضية قتل عمد مع سبق إصرار.. أنا اللى ضربت  
المدير بتاعى والنائب المحترم والمحامى اللى رقدونى من شغلى  
ولفقوا لى قضية رشوة وباقولكم ده علشان تعرفوا أن اللى قتل  
ثلاثة يقتل عشرة.. ماشى يا حليوة منك له؟ الثلاثة يومئون  
برءوسهم إيجابا.. صوت دقات وصرخات مكتومة (يضحك) دول  
الجماعة اللى دخلوا المكتب بيحاولوا يفتحوا الباب اللى قفلته  
عليهم من بره...

**سامح :** أنت اللى كنت بتقطع التيار وترجعه!

**تامر :** وأنت اللى قطعت خرطوم البنزين!

**مجدى :** وأكد أنت الى خبيت البنات...

**الهجوم :** دى ايه العبقرية دى كلها؟ بسم الله ما شاء الله! حاجة تفرح..  
الواحد لما يشوف ثلاث شبان زيكم بالجمال ده والذكاء والأخلاق  
العالية أكيد حايظطن على مستقبل البلد.. خصوصا أن واحد  
من ابهاتكم موجود معانا الليلة وشفنا بعيننا الجهد اللى يبذله  
فى خدمة قضية التنمية والاستثمار فى البلد... وقد إيه بيضحى  
بوقته وصحته وكرامته.. ولا بلاش دى؟ يعنى وباعتبار المثل اللى  
بيقول أن ابن الوز عوام وأن الولد سر أبيه.. وأن هذا الشبل من  
ذاك ال...إيه؟ أسد برضه؟

**مجدى :** الحق يا تامر ده فاتح على أبوك وطاير...

**سامح :** هو صحيح.. أبوك جايب الراجل اللى معاه ده والعمروسى  
والست ليه؟

**مجدى :** وهو أنكل فتوح له فى النظام ده؟

**تامر :** أألم أنت هو؟ فيها إيه لما يعزم جماعة أصحابه عالعشا فى بيته؟

**سامح :** معلىش... بس المنظر مش كده.. احنا كلنا عارفين وظيفة  
العمروسى

**مجدى :** والراجل الكوكيتل ده بيقى صاحب الحاج فتوح منين..



سامح : صاحب مين ياتيمو.. وزى ما قلت لكم سمسار أنتز شيونال...  
وأنت صدقت فى حاجة واحدة ياتيمو... أنه جاى معزوم..

مجدى : على عشوة ومزة ونومة!

تامر : (يفاجئ مجدى بصفعة) إخرس.. أنا أبويا أشرف من عشرة زى  
أبوك

سامح : مش كده يا كباتن شايفين يبص لكم وببيتسم ازاي؟

الهجام : إيه؟ مش عاجباك ابتسامتى ياسمو البرنس؟

سامح : مانت وقعتهم فى بعض وقاعد تتفرج!

الهجام : وهو فاضل لى أيه غير الفرجة؟ وفاضل لباقي الناس ايه غير

الفرجة؟.. أنتو وأهاليكم عالمسرح بتلعبوا واحنا بتتفرج... ياللا...

كملوا لعب.. وفرجونى

مجدى : مش حانلعب لعبتك!... ومش مشكلة أن تامر يافور شوية

ويضربنى! أحنا أخوات

الهجام : أولاً دى مش لعبتى.. لعبتى لسه جاية فى وقتها.. ولغاية ما بييجى

ميعادها.. حاتفرج واتسلى على لعبكم أنتو مع بعض.... ياللا

يا ميجو.. مش بينا دوا لك كده برضه..

مجدى : وافرض؟!

الهجام : تقدر تضرب تيمو زى ما ضريك... وياخذها هو ببساطة زيك

كده؟

تيمو : (ناهضاً) أنا ماحدث يضربنى..

الهجام : (بخشون أمره) قعد.. وما تتحركش الا أما أقولك... وأنا رد فعلى

يتم فى ثانية.. وممكن أى حركة مفاجئة منى تكون نتجتياها

رصاصه ترشق فى دماغك!

سامح : (بينما يعود مجدى للجلوس) إهدا ياتيمو.. وأنت... لازم تفهموا

لعبة الشخص ده.. عايز يضربنا ببعض ويقعد يتفرج ويضحك..

لازم نفوت عليه غرضه ونفضل هاديين

الهجوم : يا حبيبى! صحيح.. العقل زينة.. والتبى أنت خسارة فى أبوك!

سامح : ماله أبويا هو كمان؟

الهجوم : ومال لهجتك كده فيها لون تهديد مش هو؟.. لازم تلاحظ أنك

بعيد قوى عن بابا ورجالة بابا.. وإن المسدس فى إيدى أنا...

سامح : على فكرة أنا مش خايف منك.. وعاييز أقولك أن الدنيا مقلوبة

على وفى أى لحظة حاتلاقى المكان ده بيترج تحت الكعوب الميرى

وتشوف مسدسك حايعمل ايه مع الإم سكستين! ولعلمك.. لما

لقينا العربية عطلانه بره أنا اتصلت بالتليفون وقلت لهم على

مكانى..

الهجوم : بجد؟ (ينهض ناظرا فى ساعته).. كده لازم أخاف.. (ينادى)

يارا... يارا

(وسط دھول الثلاثة تدخل تدخل يارا باب البدروم)

يارا : ندهت على؟..

الهجوم : وحافضل انده طول عمرى... (ناظرا لهم) من أحلى الصدف فى

ليلتكم دى تفاهمت أنا والقمورة من أول قعدة... خدى

يامدموازيل... دا مفتاح أوضة المكتب... افتحى للبهوات اللى جوة

وخليهم يتفضلوا.. الطريق من هنا

يارا : حاضر...

(تخرج فى اتجاه إشارته)

الهجوم : المفروض دلوقت إنى خفت ولازم أنهى الموقف دا واهرب.. قبل

ماتوصل الحملة..! بس الحقيقة أنا مش بالغ منظرى وأنا باهرب

كده فطيس.. عالبارد... لازم الخروج يبقى فخم.. ماستر سين

بلغة السينما.. ايوه.. هو ده.. عايزه منظر سيما.. ومتهيالى أن

ده حايتحقق دلوقت (ينظر فى ساعة يده)... عندى فرصة ألعب

لعبتى اللى أنتوا مستنيينها.. بس تساعدونى فيها.. (من

الكالوس يندفع عدنان وفتوح ثم شيرى والعمروسى.. ويارا)

عدنان : يخرب بيت دى ليلة .. ويخرب بيت هالعمروسى ... وبيت كل يللى تبعون ... الله وحده بيكون فى عون الازعر يللى سوى هالبروجرام ..

فتوح : بروجرام إيه وهباب الى سويناه إيه؟ ماحنا متفاجآن زيك!

العمروسى : وأنت مين بقى؟

شيرى : ألحق يا بيبى .. دا ماسك مسدس ..

عدنان : (يتحسس جيوبه واجنابه) العمى ... بلكى الريفولفر تبعى

فتوح : واللى تبعك ده مش كان فى حزام معلق على كتفك تحت الجاكت؟

العمروسى : خلعه واحنا فى العربية ... وسابه عالكنبة الورانية ..

الهجوم : بس باين عليه حتة جامدة قوى ..

عدنان : معلوم .. لو جار تسعة مللى .. مابيصير زلة زيك يحمله ..

الهجوم : آه .. دانت بقى نجم الليلة .. ماشى .. اتفضلوا اقعدوا كلکم (بلهجة

أمر صارخة) قلت أقعدوا ...

فتوح : يابنى فهمنا أنت عايز مننا إيه الأول!

عدنان : بدو مصارى ... إسمع يازلة .. مثل ما بتريد بنعطيك ...

فتوح : طلع النقدية اللى معاك كلها يا عمروسى ..

العمروسى : فى شنطة ايدى فى العربية ..

الهجوم : ألف وسبعميت جنيه وكارت فيزا ... ومعاهم دى ... (يخرج من

جيبه مفكرة جيب)

نظرة سريعة على اللى جوه المفكرة دى تفتح باب مغارة على

بابا ... اسماء وأرقام حسابات ومبالغ بكل العملات ...

فتوح : .. دى .. ده المفكرة اللى داخ عليها مش لاقياها ...

الهجوم : كانت فى الحفظ والصون ... فى شنطة الراحل بتاعك ..

فتوح : أنت يا عمروسى الكلب؟

العمروسى : مش وقته يا زعيم! ... خلىنا نخلص م المطبخ ده الأول

الهجوم : معاه حق العمروسى ... مطب أهون من مطب ... ولو أنى مش

عارف حاتخلصوا م المطب ده ازاي... (يرفع يده بالمفكرة.. وييده الأخرى يلوح بالمسدس اقعدوا.

(يستجيب الجميع ويجلسوا...)

عدنان : شوفها هالفكرة خيو فتوح؟

فتوح : مصارينى كلها ياخيو عدنان..

الهجام : بابا أهه ياتيمو.. إيه رأيك.. فخور بيه؟

تامر : فيها إيه بتهدده بيها؟ أرقام حساباته فى البنوك؟ وإيه يعنى؟ الناس كلها عارفة أنه مليونير

الهجام : والأسماء وأرقام تليفونات أصحابها.. والمبالغ المحلوطة قدام كل إسم؟ (ملتفتا لسامح ومجدى).. على فكرة أسامى بابا هاتكم وماماها تكم فى المفكرة دى (مستديرا للأقانسين...) الليلة مليانه أسامى تخوف وتخللى الدم يتلج فى العروق... خمنوا أى إسم بيحى على بالك كده... حاتلاقوه... وقدام اسمه المبلغ اللى قبضه.. ومواعيده مع الستات.. وتليفونات الستات دول.. خمن حضرتك... مين؟... بالضبط... وحضرتك؟... برضه صح... قلتي مين يا هانم؟.. موجود.. شفتوا بقى؟.. حد فيكم كان يتصور ده؟

عدنان : باشتري منك هالمفكرة فى التو بنصف مليون يورو... ودفتر الشيكات تبعى بتابلوه السيارة...

الهجام : (يربت على صدره) معايا... خى عدنان فتح المزداد... بنصف مليون يورو.. مين يزود؟ يعنى ساكت يا فتوح باشا؟...

فتوح : أنا أقدر ادبرلك ليكويدمونى... عدنان حايديك شيك ماتعرفش أصله ويمكن تروح بيه البنك ماتلاقيلوش رصيد...

عدنان : العمى بقلبك.. بتحكى هيك عنى؟ أنا؟.. عدنان الفهد ألباش بوزق؟

فتوح : أمرك عجيب يا أخى.. المفكرة بتاعتي.. وانت عايز تشتريها..

**عدنان :** إيه.. المفكرة بتاعتك لكن يللى فيها ماهو بتاعك.. تبع الناس يللى مكتوبية فيها

**العمروسي :** دى معاملات خصوصى يا جناب الباشا بوزق!

**عدنان :** شو خصوصى وعمومى.. مانك واخدها منشأن تعمل بيها بلاك ميلينج يا أزعز؟

**العمروسي :** وأنت عايز تشتريها ليه؟

**عدنان :** باقتيتها.. باحفظها تذكار.. بأعملها شى تميمة وعلقها برقبتى تاحفظنى وترعانى..

**فتوح :** على فكرة ياخى عدنان.. أنت لك صفحة كاملة فى المفكرة دى!

**عدنان :** أكيد خيى... بأعرف أن زلة مثل حضرتك بيسوى هيك حركات.. بس ياللى مابتعرف جنابك إن أسمى الحركى فى عالم المال والبيزنس... (يلف ويتقدم ويسمح له الهجوم.. حتى يواجه الأفايش)

**عدنان :** سفن فيز يعنى عدنان ده السبع وجوه... فى لحظة أرفع ماسك الباش بوزق.. ييجى بدله ماسك طليانى وفرنساوى.. ألمانى.. يابانى.. أمريكانى.. كيف ما بدى.. يعنى بكرة بيخفى عدنان آل فهد.. بوش بوزق.. وما يصير يظهر بيجى مين بعده؟.. هلا ما بعرف... لكن بكير بنشوف.. (يتقدم الهجوم ويضع المسدس فى جانب رأس عدنان)... عنده حق

**الهجوم :** علشان كده مالوش غير حل واحد.. الاستئصال من المنبع... وده اللى قررته... يا تصفيه بإيديك يا فتوح باشا... يارجع له المسدس ببصفيك هو... لكن ده برضه حايفير إيه؟.. (متجها للأولاد) طول مالى زى ابهاتكم موجودين.. حايبقى فيه عدنان.. وميت عدنان أنا على فكرة متورط زيكم.. ومش عارف اخرج من ورطتى ازاي... أنا كنت هنا لوحدى باقضى يومين لغايه ماتجيلى فرصه أقشل الفيللا وامشى.. طبيتوا كلكم على زى القضا

المستعجل... قلت اللعب ببيكم.. بس اللعبة قلبت بورطه...  
والإنسان لما بيغلط ما بيقدرش يتحكم فى ردود أفعال الغلط...  
هو بيختار بس الغلطه فى الأول.. بعد كده هى اللى بتفرض  
قوانينها والحجم اللى حاتوصل له.. غلطتى انى دخلت الفيلا  
دى... وماخرجتش فى الوقت المناسب... استحلطت القعده لغاية  
مالقتينى وسط الممعه... ومتهيألى كده خلاص... موقفى اتعقد  
لدرجه ميئوس منها...

(بينما يتقدم متسللا عدنان.. ويتبادل إشاره مع العمروسى  
ليفاجنا الهجام)

يارا : (مخدره) الحق...

الهجام : (يطلق رصاصه لأعلا ينبطح عدنان وفتوح والعمروسى أرضا)...  
شايفهم والمره الجايه الرصاصه مش حاتبقى فوق! مرسى لك  
ياروح قلبى...

يارا : موش لك انت... عشان كل اللى علمتهولى الليلة...

الهجام : بلاخييه.. غالبا حاتتاخدنى فى الرجلين بسبب وقفتك معايا..  
خصوصا انى مضطر دلوقت مادمت رايح رايح.. اضرب كرسى  
فى الكلوب واضلمها.. بس الأول نكمل العقده... لو سمحتى..  
اندهى لى فى البدروم...

يارا : حاضر (تتخرك وتخرج من باب البدروم)

الهجام : ايه با باشا بوزوق؟ وانت يا عمروسى..؟ استحلطتوا الرقده؟  
خليكم... دا المكان المناسب للى زيكم... بس مسموح لكم تتقلبوا  
وخدوا بالك.. الطلقة الجايه حاتبقى تحت

شيرى : طب وانا يا باشا... أنا ماليش دعوه بالناس دول كلهم.. أنا  
فنانه.. ولو سبتتى امشى أوعدك افضل صاحبك العمر كله!

الهجام : تمشى تروحي فين يا فنانه؟ ويفوتك الشو الكبير.. وأهم نمره  
فيه

شـيرى : حاتعمل ايه؟.. انت شاب طيب وبابن عليك ابن ناس.. ماتضيعش مستقبلك..

فتـوح : أيوه احنا لسه عالبر ويا دار مادخلك الشر.. سيبنا وامشى..  
وخذ عرييه م اللى برة واتكل على الله.. انا قلت انى اقدر ادبر  
لك فلوس كتير.. عندى خزنه فوق فى أوضه النوم.. حاتدينى  
المفكرة.. واديك الكومبنيشن بتاع الخزنة.. فيها ما يقلش عن ربع  
مليون جنيه.. وعلبة مجوهرات اللى فيها يسوى اكثر.. حلال  
عليك.. ياللا.. بدل ما تورط نفسك فى عنف ودم وأكيد  
حاتتمسك... قلت إيه؟

الهـجـام : لو سمعت كلامك حاتجيبونى من قفايا مهما هريت.. ماحدث  
فيكم حاينسى الليلة دى أبدا إلا إذا كنتوا شركاء فى نهايتها  
معايا....

(من باب البدروم يظهر الطبيب وهو يسند سوسن يكاد يحملها  
وخلفه كل من يارا وداليا)  
أخبار سوسن ايه؟..

الطـبـيب : مش كويسة.. المسكينة اتعرضت الليلة لاجهاد عصبى ونفسى  
غير عادى  
(يريحها على الكرسي)

الهـجـام : (يقترب منها)... أنسه سوسن... سامعانى؟  
سـوسـن : (فتحت عينها بصعوبة) لوسمحت... فين داليا..  
دالـيـا : أنا اهه يا حبيبتي

(تركع بجوارها وتمسك يدها)

سـوسـن : داليا.. روحى لماما قولى لها سوسن جدعة.. ماحدث قدر يحنى  
راسها...

الهـجـام : ما تعمل حاجة يا دكتور... خدها وانزل بيها على أى مستشفى..  
الطـبـيب : (يهز رأسه اسفا) مش حانلق..

الهجام : (شاهرا المسدس فى وجهه) ما تقولش وتقولى مش حانلحق...  
اتحرك!

داليا : (صارخة).. سوسن... ردى علىّ يا سوسن...  
(يسرع إليها الطبيب يقيس النبض ويضع أصابعه على وريد فى  
رقبتها ثم يطاطئ رأسه)  
الطبيب : أنا أسف جدا.. (موسيقى... البنات ينهرن فى بكاء ونشيج  
عنيف)

الهجام : اتنين مسئولين عن موت سوسن.. اللى هاجمها فى العربية...  
واللى أجبرها ترقص!.. وهم دول اللى حايقدموا لنا العرض  
الأخير... تامر حايضرب مجدى بالنار.. وفتوح حايضرب  
عدنان... واللى حايمتنع... حاينضرب.. وأنا اللى حاضربه!  
والباقيين حايفضلوا شهود وفى يوم من الأيام حايكروهوا بعض  
ويشهدوا على بعض.. لكن صلاتهم ونفوذهم وفلوسهم حاتكفل  
بالمهمه.. ويندفن كل شىء تحت رملة ستة أكتوبر... ستة  
أكتوبر.. يوم ماييتنسish... والليلة مش حاتعدى... ولا حاتدفن  
سوسن إلا وتارها متاخذ...

(صارخا...) تامر... قرب هنا...  
(يندفع تامر كالمغرم) حاتضرب ولا تنضرب؟  
(يقدم له المسدس)

فتوح : اسمع كلامه يا تامر وأضرب..  
تامر : ما قدرش... (يزيح المسدس بيده)  
مجدى : أضربنى يا تامر... أنا استاهل.. (باكيا).. صوتها وهى بتترجانى  
فى ودانى ومش حايبعد أبدا... مش حاقدر اعيش بذنبا...  
أضربنى... أنا حياتى زى قلتها... وماحدش عايزنى.. لا أمى..  
ولا أبويا.. ولا أصحاب.. ولا قرايب.. ولو طلبتم دلوقت من أمى  
أو أبويا يقدونى حايفكرو فى الأثنين ومش حايشترونى...  
صدقونى...

(يلتفت للهجام) ممكن تدينى المسدس؟



الهجاء : لعبتي ما فيهاش أنتحار...  
 مجدى : صدقنى مش حانتحار....  
 الهجاء : أمال حاتعمل إيه؟... حاتضربنى؟  
 مجدى : إيه خايف؟  
 الهجاء : (يرفعة عليا)... خايف؟.. طبعا.. لأن الاحتمال وارد... واليأس  
 أخطر م الغضب ومع ذلك اللعبة من غير مخاطرة مايقالهاش  
 معنى... خد.. المسدس أهه..  
 (يمد له يده بالمسدس... يتناولة مجدى ويتفحصه...)  
 سامح : اعقل يا مجدى... بلاش تتهور على أى حد...  
 تامر : انت سامعه بودانك بيقول دى لعبة... يعنى بيتسلى علينا...  
 فتوح : ماتستفزوش انت كمان... أخرس خالص!  
 تامر : جرى أى يا حاج؟ انت لسة فيك حيل تشخط وتنظر... يا راجل  
 دور على منظرلك الليله ودارى وشك!  
 (أصوات موتورات تقترب وموتوسيكلات وأضواء ملونة تظهر مع  
 سريته بوليس)  
 سامح : (بلهجه انتصار)... أهم! وصلوا!  
 الهجاء : داليا.. إطفى النور..  
 (تسرع داليا إلى باب البدروم...)  
 داليا : حاشيل السكينه.... خبى ديلك يا عصفور...  
 (إظلام تام- موسيقى- حركة على المسرح)  
 (سبوت أضواء على عدنان والعمروسى.. ينهضان فى بطء  
 وتناقل)  
 عدنان : العمى بقلبك يازله... شوحاطط لى فى قنينه البلاك؟...  
 داتوره؟..  
 العمروسى : (مع رجوع الإضاءة بالتدريج) هو انت وقعت م الخضه ولام  
 الخمره؟

(الجميع على المسرح ماعدا الهجام.. الشبان الثلاثة... والبنتين  
حول سوسن المسجاء على الأريكة . فتوح وشيرى والطبيب  
يواجهون جميعا ضابط حراسة خاصة ومعه شلة من جنود  
الأمن المركزى)

عدنان : دخليك الله يا فخامة الجينرال.. فينا نطلع نرتاح بالدور  
اللو٩٩.

الضابط : آمال فين الخطر اللي قلت لنا عليه يا سامح بيه٩٩.  
سامح : كانت صديقتنا سوسن... بس للأسف مالحقنوهاش  
الطبيب : وأنا للأسف.. حاولت بكل جهدى لكن قضاء ربنا حل...  
الضابط : دى مشكلة... انتوا هنا.. وفيه جثة... وبيزنس مان خطر زى  
صاحب السعادة وكمان فتوح باشا... وفى ظروف مش مفهومة...  
حانقدم تقريرنا ازاي٩٩.

فتوح : وانتوا لازم تقدموا تقرير٩٩.  
عدنان : يا جناب الفيلدمارشال... الموضوع انذار خاطيء... فولس  
الآلام... وبترجعوا ومعكن المحروس وأصحابه.. يكونوا بنهايا  
السهرة مع أهاليهم بالحفلة تبع مدامتك ياخى فتوح

فتوح : بالضبط... ونمشى أحنا كمان...  
العمرسى : نكمل فى المنصورية...  
الضابط : (يفتح جهاز اللاسلكى).. ألو.. فجر ينادى حول.. تقرير عن  
المهمة.. لا شىء أنذار خاطيء... الجميع بخير...  
(يؤدى التحية العسكرية لسامح.. ثم يستدير ويخرج مع  
رجاله)

فتوح : ياللا يا ولاد معهم.. وانتوا يا بنات...  
يارا : ونسيب سوسن...  
فتوح : الصبح حانبعث ناس يجهزوها ويسلموها لأهلها... ومفيش  
واحد فيكم تفتح بقها بكلمة... ياللا...

دالـيـا : اسمى الكلام وياللا بينا...

(مع شيرى وخلفهم عدنان.. وفتوح.. والعمروسى.. يخرجن..

يخلو المسرح... تنحت الإضاء.. ينار السطح.. يقطع التيار...)

(الهجوم فى جلسته الاولى على السطح بجوار السور....)

الهجوم : حرّ.. حر ورطوبة.. والكهربا مقطوعة والإخوه ١١ نسيوف مشيوا

ومناطقوش بحرف معايا... بس معانا كشاف.. نقرا عليه..

(يضىء الكشاف ويخرج المفكرة ويلوح بها... ويفحتها) ليلتنا

أنس!

«ستار»



ليلة ١٤



ليلى ١٤





**المنظر** شرفة شاليه منعزل بمنطقة شاطئيه على حدود قرية من  
قرى الساحل الشمالى..... هناك مفردات ديكور تعبيرية  
إشارات فقط لموجودات أساسية تشغل الفراغ المسرحى/ مثل  
الكرسى الهزاز فى الشرفة.. مكتب عليه أوراق (ليس عليه  
فى الواقع بل هو أقرب إلى مائدة بلاج تتوسطها شمسية  
بحر.. كرسى شاطئ.. هناك كتلة تشبه الصخرة ممكن  
تحريكها فى أماكن مختلفة.. بحيث تكون فى النور أو فى  
الخلفية أو فى أحد الجانبين و قد تختفى عند اللزوم.. (وأنا  
لن أعين لها توقيينات بعينها فى النص تاركاً لمخرج العرض  
توظيف هذه الأماكن).. فى أقصى العمق توجد تلك الشرائح  
الشفافة التى تشير إلى البحر المظلم ليلاً بالضرورة...

**الزمن** وقت ما فى ليلة صيفية مقمرة (لامانع من وجود القمر  
المكتمل بدرأ)

[ مع رفع الستار أو اكتمال الإضاءة (The Full Liht) نرى ثلاثة  
أو أربع فتيات كنا نراهن سيلوين من خلال إضاءة الخلفية  
وتعتيم الافانسين.. ومع الإضاءة الكاملة نراهن يؤدون  
حركات إيقاعية تحاكي الأمواج أو الرياح.. هن يرتدين  
ملابس غريبة إلى حد يمكن تخيلهن كمخلوقات فضائية أو  
كائنات من أعماق البحار .. الموسيقى المصاحبة تتخللها تلك  
الأصوات المسجلة للدلافين

من كرس الشيزلونج الشاطيء (ظهره للمقدمة) ينهض  
«الرجل» ببطء.. يتابع الفتيات ثم يفرك عينه.. ثم يتقدم..  
مدهش!

الرجل: (بنبرة أعلى).. مدهش!... (ثم أعلى) بأقول مدهش....  
الرجل: [تستمر الفتيات فى أداء نفس الحركات دون أن تبدو عليهن  
زى ردود أفعال.. يكمل الرجل خطواته إلى المقدمة]  
الجماعة دول باشوفهم فى الحلم.. بيأدوا نفس الحركات ويطلعوا  
نفس الأصوات.. بس المفروض أنى صحيت.. ومجرد ما فتح  
عينية ما شفهمش!...

(وقد خطر له شيء) يمكن مش شايفهم؟.. آه يعنى.. فى الواقع  
ما هماش موجدين وده انطباع الحلم فى الذاكرة.. يعنى الأثر  
اللى بيفضل.. زى مثلا ما بيفضل مكان اللى كان نايم على مرتبة  
قطن غطسان شوى و واخذ شكل جسمه بعد ما يقوم من النوم  
ويسيب السرير.. أو زى ما تدوس فى رملة مبلولة على الشط  
وتطبع فيها شكل القدم بعد ما تخطى لغاية ما الموجة اللى جاية  
تجرف المكان وتضيع الأثر.. بس الانطباع بتاع الحلم طول  
شوية؟.. ممكن ما يكونش ده السؤال الصحيح.. ويكون السؤال  
هو أنا صحيت ولا لسة نايم؟.. دى مشكلة فعلا.. لأنها بتحصل  
لى كتير.. ساعات ببيتهيا لى أنى قمت من النوم وانى باكتب.. أو  
بارسم.. أو بالعب عاليانو.. وبعده مدة اصحى تانى واكتشف  
أن اللى حصل قبل كده كان حلم عموما... أنا عندى وسيلة أتأكد  
بيها..

[يستدير نحو الفتيات.. يتحرك فى إتجاههن... يتوقف أمام  
الأولى (يحاول أن يدور مع الحركة التى تؤدى بها)]

الرجل: أنت.... (يحاول الإمساك بدراعها تجرى هاربة وتختفى)...  
[يتجه للثانية]

الرجل: طيب أنت... (يكرر الموقف... وتهرب)... طيب الثالثة...  
 [تفر ويختفين جميعا... يقف هو يفكر للحظة] كده  
 اتحمست.. هو بس الانطباع كان ثقيل شوية.. لكن حلم! ..  
 آه.. با حلم كل ليلة وينت.. (يتوقف ناظرا إلى كفيه).. لكن  
 ... ازاي.. ايدية مبلولة .. آهة .. غرقانة مية.. إذا ما كانش  
 حلم.. البنات كانوا مبلولين.. لا مش عرق... دى مية ملحّة  
 (يتنوق إصبعة).. أيوه مية بحر... بسيطة! بسيطة ازاي؟ ...  
 دى معناها.. أنه مش حلم! .. ولوا.. برضه بسيطة..  
 [يتحرك إلى كرسى البلاج] ويتناول فوطه ملقاة عليه..  
 يجفف بها يديه.. ثم يلقيها على كتفه فى نفس اللحظة تتغير  
 الإضاءة... تطفأ أنوار المسرح كلها ماعدا بقعة يقف فيها  
 الرجل.. مساحة فى المقدمة.. يدخلها «هو» طفلاً فى  
 السادسة مثلاً.. يجرى .. وخلفة.. أمه.. سيده فى الثلاثين..  
 ياوادم.. ما تجرينيش وراك.. هديت حيلى.. ينيلك عيل من  
 الأم:  
 دون العيال..

هو: (بتحدى) مش عايز استحمى! (يخرج)  
 الأم:  
 نعم؟ حاستحمى ورجلك فوق رقبتك.. (تسحب الفوطه من  
 على كتف الرجل وتخرج) ترجع الإضاءة كما كانت لنرى  
 الرجل يقذف الفوطه إلى الكرسى.. أو الحركة بدون فوطه  
 لايهم]

الرجل: المشكلة إن ده جديد.. مع إنى باشوف نفس البنات كل ليلة  
 من أو الهلال مآظهر.. بس كانوا بيعتفوا أول ما أصحى..  
 يمكن المسألة لها علاقة بحجم القمر؟ .. آه.. إحنا الليلة كأّم  
 عربى.. ثلاثاشر.. مضبوط .. ليلة.. اربعتاشر!

(إظلام تام)

## اللوحة الثانية

[قبل إضاءة المسرح.. أصوات أهزوجة شعبية مصوبة بطرق على أواني نحاسية.. هي الترنيمة التي يغنيها الأطفال في الريف والمدن الصغير عند خسوف القمر وتطلب بنات الحور بإطلاق سراح القمر المخنوق (Full Light) الشرفة تحولت إلى مصطبة.. والبحر إلى شاطئ النهر.. الرجل مرتديا ملابس ريفية..

ص. العروس: حسن.. يا حاسان.. حاسان...  
الرجل: (مشنفاً).. أنت مين؟.. أنت فين؟  
ص. العروس: أنا جنبك. أنا وراك.. أنا قدامك.. أنا نصك.. أنا كلك.. أنا ست الحسن!

الرجل: (يهب واقفاً).. لا.. أنت النداهة .. ايوه. الليلة القمر بدر..  
[من جهة النهر.. تدخل عروس البحر.. في ملابسها إشارة إلى صورة التي ترويها عنها الأساطير.. نصف فتاة.. نصف سمكة]

العروس: القمر بدر ازي؟.. أنت ما سمعتش الولاد بيغنوا لبنات الحور  
علشان يرحموه وما يخنقوهوش  
الرجل: أنت.. معقولة؟.. نص بنى آدم.. ونص.. مش باقولك انت النداهة؟

**العروس:** نداه ايه؟ دى خرافات الفلاحين اللي زيك  
**الرجل:** بس أنا مش فلاح.. أنا لابس بس كده لما جيت ازور خالتى  
 فى الإجازة بتاعة الصيف  
**العروس:** أمال عرفت حكاية النداهة ازاي؟ (وهى تتقدم نحوه...)  
**الرجل:** (يتراجع أمامها).. كل الناس يعرفها.. مش الفلاحين بس...  
**العروس:** أنت خايف منى؟  
**الرجل:** لا طبعاً.. خايف منك دا ايه؟.. لكنى .. ايه ده؟  
**العروس:** ايه؟  
**الرجل:** عندى سؤال لو تسمحي!  
**العروس:** اسأل  
**الرجل:** هى النداهة.. هى نفسها عروس البحر؟  
**العروس:** عايز تعرف  
**الرجل:** لازم أعرف؟  
**العروس:** (تمد له زراعها فى حركة دعوة) تعالى معايا...  
**الرجل:** (مبهوراً) على فين؟  
**العروس:** تعال من غير ما تسأل...  
**الرجل:** (يبدأ فى الحركة كالمنوم) تعرفى انك حلوة قوى.. انت حلم..  
**العروس:** ابدا.. دانا الحقيقة الوحيدة إلى تقدر تمسكها.. وتتأكد  
 منها..  
 [يندفع داخلا العسكرى.. شرطى بدون علامات]  
**العسكرى:** أوعى يا عبيط.. فوق لروحك.. دى النداهة.. وبتسحبك  
 للمية علشان تاخذك للغريق!  
 [يتجمد الرجل مكانه.. وقد وقف العسكرى بينه وبين  
 العروس]  
**الرجل:** انت تعرفها؟..  
**العسكرى:** عز المعرفة.. د أنا متعين فى الموقع ده بالذات علشان ارقبها

- العروس: ما تسمعلوش!  
العسكري: (رافعا صوتة فى أمر بالسكوت) ولازم أفضل صاحى لها!..  
هى صحيح غافلتنى ساعات.. وخطفت شبان كثير.. لكن  
أخذت عهد على نفسى ماديهاش فرصة تعملها تانى ..  
ومعالك أنت بالذات
- العروس: ما تصدقهوش!  
العسكري: (يرفعة صوتة أكثر وكأنه يهدد) أنت ثروة قومية لا بد نحافظ  
عليها .. ولا بد اللى تحاول تلعب فى الثروة القومية لا بد من  
قطعها ..
- العروس: طيب أنا حالعب فيها .. وورينى حاتقطعنى ازاي!  
السرّجل: صحيح.. مادمت بتقول.. إنها النداهة.. وأنها خطفت قبل  
كده شبان.. وطبعا قتلتهم غرقتهم.. طيب ما تقبض عليها!  
العروس: (بمياصة) ايوه.. تعالى.. تعالى اقبض على.. ماتجى.. [تبدا  
فى الرقص]  
العسكري: مش مأذون! وهى كمان محجبة.. ده عفريّة وعليها طلسم!  
حتى شوف.. عامل نص جسمها ازاي؟ [بينما تودى العروس  
رقصتها]  
السرّجل: ايوه.. نصها سمكة.. علشان كده افكرتها عروس البحر..  
العسكري: عبيط.. ديل السمكة ده غيره.. لو شاله حاتلاقى مكانه  
رجلين معيز وحوافر ياللا.. وهى مشغلة برقصتها دى..  
زوج.. أهرب..
- السرّجل: بس ده حلوة قوى..  
العسكري: ما هى حلاوتها دى اللى بتسحب بيها العبيط اللى زيك.. وإلا  
شى بقى غنت.. لو أبتدت  
تغنى ما حدش يقدر يلفص منها  
السرّجل: حتى أنت؟

العسكري: أنا لا .. معمول لى عملية تخلينى ما سمعش الغناء ولا يآثر فى ..

[ينبعث صوت غناء العروس .. يتسمر الرجل مكانه]

الرجل: الله! سامع؟

العسكري: يبقى ابتدت تغنى .. اسمع يا جدع أنت .. سماع الغناء منكرو وكبيرة من الكبائر وكلا الاثنين فى النار .. المطرب ومن طرب له .. حط صوابك فى ودانك ..

الرجل: ما قدرش

[يسرع بوضع إصبعيه هو فى أذن الرجل]

العسكري: لكن أنا اقدر

(بلاك اوت)

[خلال ما يقرب من دقيقتين فى البلاك تملأ أصوات صفير وتصفيق مع موسيقى .. مما يحدث فى علب الليل الرخيصة من مظاهر الترفيه السوقي ثم تنتشر أضواء نفس الأماكن خافتة ملونة وتظهر فرق موسيقية صغيرة مكونة من ثلاث عازفين على الكمان والاكورديون والطبلة .. وراقصة درجة ثالثة ترقص على أنغام أغنية ذائعة .. وهناك ثلاث موائد تقريبا يجلس عليها من المفترض أنهم رواد المكان من أى كالوس يتقدم نفس العسكري فى المشهد السابق وقد ارتدى هذه المرة بدلة سهرة سمكونج فرينه بما يشبه الترتر أو خرج النجف أو ما شابه .. يمسك بالميكروفون ويتقدم حتى يصل إلى قرب الراقصة يخرج من جيبه «ريموت كنترول» يوجه نحوها ..

العسكري: بس!

[تتجمد الراقصة على وضعها لحظة توجيه الريموت

نحوها .. ]

العسكري: (ناظرا لنفس الكالوس)... هاتوه!  
[يدخل اثنان من البودی جارد يجران «تقريبا» الرجل بنفسه  
ملابسة الريفية]

الرجل: موديني فين في لیتلتکم إلى مش فایته دی؟  
العسكري: حانسليك ونمنعك ونریي وجدانك على الفن الحقيقي  
(للبودی جاردز).. قعدوه!  
[يجلسانه عنوة على المائدة الاولى ويقيفان خلف في وضی  
تهديد]

العسكري: (متقدما للافانسين).. والآن مع الفن الراقی.. الفن  
الحقیقی.. الفن النابع من حمیم أعماق وأغوار وأبعاد.. ومن  
جنور وبذور وشعور.. كل الحاجات.. مع تابلوه غنائی راقص  
هايص مايص.. مع فن الألفية الثالثة والرابعة.. وألفية ابن  
مالك وابن هالك.. وسكة أبو زيد كلها مسالك.. (مشيرا  
بذراعه) افتح..

[ثم يوجه الريموت إلى الراقصة] اشتغل.. هز يا وز  
[تبدأ الراقصة بنفس طریقتها الآلية.. ترقص.. وتتشاءب  
وتشير بیدیها إشارات» المعددة «بينما تدخل فتيات  
الاستعراض.. هي الوصة في المشهد السابق».. يؤدين  
الرقصات التوقيعية البلهاء الشبيهة بما تؤديه مثیلاتهن في  
عروض المسرح الصیفی للقطاع الخاص]

العسكري: (يؤدي دور المطرب) ما تخشليش تحدى لاديك بالی عندی..  
أنا عندی فردة سودة وفرد بكعب فضی..

هییییی

[تهلیل... تصفیق.. وتحية]

الرجل: (يهب واقفا ويصرخ).... عایز ارجع.. عایز ارجاع..  
[البودی جاردز يحاولان أجلسه بالقوة]



العسكري: لا.. مش بالعافية! سيبوه يتكلم.. (يتقدم نحوه) عايز ترجع  
فين يا سيد؟

الرجل: لطرح ما جبتوني.. للمكان اللي كنت فيه  
العسكري: عايز تتراجع؟ عايز تتأخر؟ هواحنا بنعمل دا كله علشان  
مين؟.. المنظومة دى كلها مين.. دا حنا صرفنا عليها اللي  
حيلتنا وطفحنا الكوته.... علشان نمدنك وندخلك عسر  
الفدائيات.. حتى القمر اشتريناه.. نايل سات ١، نايل سات ٢  
وثلاثة فى الطريق

[ينزل من الشبكة صورة على لافتة للقمر وسهم مكتوب  
بجواره هذا قمر يا قمر]  
المجموعة (العازين والراقصة وفتيات الاستعراض) وقمرنا.. وقمرنا  
فوق.. يحرسنا.. يحرسنا تحت  
العسكري: (يشير أمراً).. بس! إيه رأيك؟.. ناقصك إيه هنا علشان عايز  
ترجع هناك؟

الرجل: هناك؟! هناك البحر.. وعروسة البحر..  
العسكري: وهنا النيل.. والنيل نجاشى.. حليوه اسمر.. النيل يا مصرى!  
الرجل: لو بصيت للنيل كويس حتلاقيه زى.. بيجرى.. بيجرى..  
بيجرى.. لغاية ما يوصل للبحر فاتحه له حضنه وممدد له  
دراعين واحد فى رشيد وواحد فى دمياط

العسكري: بس بيجرى منظم ملتزم.. زى ما بنقوله بيمشى..  
الرجل: (مستديراً بالكامل نحو) لأنكم سارقينة.. ايوه.. وأنا فهمت  
دلوقتي ليه البحر له عروسة.. حلوه وجملية ودائماً حواليتها  
هالة نور.. والنيل مالوش..

العسكري: ازاي؟ ما سمعتش يا رجال عن عروس النيل  
الرجل: عروسة النيل قريان وثنى.. بترموا فيه الحياة للموت..  
عروس النيل بتنزل تغرق.. لكن عروس البحر بتطلع

تنورا النيل مالوش عروسة هنكم اختراعتو له نداهة  
تسرق اللى بيحلموا .. تغنى لهم وترقص لهم زى ماكنتوا  
بتعملوا دلوقتى .. تاخدكم لحلم ماهوش حلم ..  
نومة .. نومة فى القاع الغريق ما حدش بيصحي  
منها!

العسكري: انت مش وطنى! .. أنت طابور خامس  
الرجل: وأنت حرامى .. شيل صوابك من ودانى ..  
العسكري: انا بعيد عنك .. ما لمستكش ..  
الرجل: لكن صوابك مغروسة جوه وادنى  
العسكري: متياللك .. يمكن بتحلم  
الرجل: ما هوش حلم .. غالباً كابوس ..  
العسكري: (مشيرا للبنات بدان يؤدين رقصة ذات إيهاءات جنسية  
مفرية) بذمتك .. فيه كبوس بالحلاوه دى ..  
الرجل: (يغمض عينه) زغلله .. لازم اغمض عينى!  
[يشير العسكري للراقصة .. فتبدأ فى الغناء بصوت فيروز  
بلاد باك]

العسكري: طب اسمع .. أنت مش بتحب صوت فيروز؟ ..  
الرجل: (يضع سبابتى يديه فى آذنيه) .. مش صوت فيروز .. دا  
صوت النداهة ...  
العسكري: (غاضبا) شيل صوابك من ودانك ..  
الرجل: طول مانا هنا .. صوابى حاتموت جوه ودانى ..  
العسكري: كده؟ .. مش عايز تسمع الكلام؟ اسجنوه!  
[بينما يحيط البودى جاردز بالرجال .. تخفت الإضاءة  
تدريجيا .. ويختفى باقى الممثلين رافعين معهم الإكسسوارات  
حتى تخلو الخشبة إلا من .. الرجل طفلا .. وأمه تدخل بعصا  
قصيرة .. تنادى دور الأم والمدرسة]

المدرسة: ما عملتش الواجب.. والإملاء كلها غلط.. وغبى فى الحساب.. افتح ايديك  
الرجل: حرمت يا أبله! (تضربه على ايديه المفرودين)  
المدرسة: وصوابك متعاصه حبر.. وضوافرك طويلة.. افتح ايديك..  
الرجل: معلش والنبى يا أبله  
المدرسة: (تضربه).. وما تقولش يا أبله.. وقل يا مس!  
الرجل: حاضر يا مس...  
المدرسة: أنت تلميذ بليد ولازم نحبسك فى اودة الفيران.. (تتقدم إلى الافانسين وتصبح تصبح لهجة أمرة) ادهنوه غسل.. وارمونه للفيران..

[بلاك اوت]

[.. ظهور فى الإضاءة مناسبة لحجرة التحقيق.. أداء راقصة تعبرية.. البودى جارد فى تنكر بشكل فارين.. وكذلك بنات الاستعراض]  
الرجل: ( صارخا ) كفاية كوابيس بقى!.. اعملوا معروف... كفاية...  
[يدخل العسكري منتكراً فى شخصية الأب]  
الأب: ولدا ما اسمعش صوتك!  
الرجل: (يجرى نحوه) بابا!.. الحقنى.. انقذنى...  
الأب: ما تقربش منى.. حاتمىنى غسل! ابعد  
الرجل: طلعنى من هنا  
الأب: لما تخلص مدة عقابك لازم تتأدب.. مش كفاية انك تلميذ فاشل وكل شوية تجينى شهاداتك مليانة كحك احمر.. والمدرسة تبعت لى جوابات وتستدعينى.. ويسمعونى هناك كلام زى السم.. لا.. كمان ارجع كل يوم البيت أمك تشتكلى منك..  
الرجل: انا ما عملتش حاجة...

الأب: لا .. عملت!... ثلاث حاجات تستاهل عليها الحرق فى نار جهنم.. أول حاجة .. ما بتواظبش على الصلاة... ما بتصلبش الوقت فى وقته... ومرتين يرن المنبه ساعة أذان الفجر وما تومش تصلى...

الرجل: بيبقى غصب غنى.. وباصلى الصبح!

الأب: الكسل عن الفجر إهمال..

الرجل: بتبقى فى عز الشتاء.. والمية نازلة زى الثلج.. دما.. ما بقدرش اتوضأ..

الأب: عذر أقبح من الذنب... افتح السخن

الرجل: أيام مكانت طفل ماكانش عندنا سخان

الأب: (متجاهلاً) تانى حاجة بتكلم فى السياسة وبتمشى فى المظاهرات...

الرجل: أمتى ده؟ .. أنا طفل صغير.. والسياسة والمظاهرات دى لسة بعد كده

الأب: (متجاهلاً يعطيه ظهر) ما تناقشنيش...

الرجل: طيب تالت حاجة ايه؟

[مستدير له.. بيط... ناظراً نحو فى تخابث]

الأب: يعنى ما نتش عارف؟

الرجل: لا.. مش عارف!

الأب: على أنا برضه؟.. طيب عيني فى عينك كدة ..

الرجل: (يقترب ويحملك فى وجه الأب).. اهه

الأب: ياواد! مبروم على مبروم ما يلفش!

الرجل: لا.. ساعات بيلف!

الأب: (بلهجة انتصار) شفت؟ اديك وقعت بلسانك.. اعترفت..

الرجل: بايه بس؟.. أنا مش فاهم حاجة!

الأب: انت فاهم كل حاجة.. ومع ذلك حاقول لك...

(بإشارة من إبهام يده للخلف).. بير السلم!

- الـرجل: ما له بير السلم؟  
 الأب: تحت السلم!.. أنت و بنت الجيران...  
 [يفاطيء الرجل رأسه خجلاً].... شفت الخذوة؟
- الـرجل: كنا بنعلب...  
 الأب: (يسرع نحوه محاصراً) بتلعبوا ايه؟.. عريس وعروسة؟..  
 مش كده؟  
 [تطفأ الإضاءة فى عمق المسرح.. وفى بقعة ضوء تظهر الأم  
 مواجهة الأب]
- الأم: فتحت عين الواد.. بيشوفك!  
 الأب: هو اللي صحى م النوم فجأة ودخل علينا الاوضة!  
 الأم: ما قصدش أنا وأنت يا أستاذ...  
 الأب: (بغضب) امال انت ومين؟  
 الأم: قول انت ومين!  
 [يدخل لهما الرجل بقعة الضوء]
- الـرجل: بابا.. ماما.. عايز اشرب!  
 الأب: شفتى؟... سمعتى؟.. بابا وماما!  
 امشى يا ولد ارجع نام فى سريرك.. عيب كده!  
 [تطفأ المقدمة.. إضاءة كاملة فى العمق.. يعود العسكرى  
 لدورة الأضلى.. ويسارع البودى جاردز إلى الإمساك بالرجل  
 ويسجيانه.. ونلاحظ انهما خلعا تنكر الضئران]
- العسكرى: إحنا جبنك هنا علشان نحميك  
 الـرجل: بس أنا مش عايز حمايتكم.. وأنا قادر احمى نفسى!  
 العسكرى: متهياك ! الأخطار حواليك من كل ناحية..  
 الـرجل: مانيش شايف أى اخطار.  
 العسكرى: أنت ما شفتش! إحنا اللي بنشوف.. أنا عينك. وودانك ..  
 ولسانك ووظيفتنا. وأنت ما عليك إلا إنك تغمض..

وتسترخى.. وتسرح مع الأحلام.. نام لو حبيت.. روح فى النوم قوى .. استغرق.. شجر.. بعلو حسك.. خلى شخيرك يسمع الكون كله.. (وهو يمل عليه كما لو كان ينومه مغناطيسيا).. أنت أول ما حاتفمض عينك حاتلاقى زى ما تقول ايه.. نفق طويل واسود.. مخيف.. لكن فى آخره خالص حاتلاقى نور.. سيب نفسك.. حاتحس انك بتتتمر مع فى توب حرير أسود.. ياخذك لآخر النفق.. النور حايبهر عينك زى اللى ببص فى قرص الشمس.. شوية حتاخذ عليه.. تتلفت تلاقى روحك فى الجنة.. ايو جنة رضوان بذات نفسها وحاتلاقى رضوان عالبااب ارمى عليه السلام.. كلمة السر.. يقولك لو سلامك سبق كلامك لرميتك فى جهنم تحرق عظامك.. ويدخلك الجنة.. يا بختك يا سيدى.. دا ايه دا كله.. [يمكن مصاحبة المولود هنا بنجلفين من الحركة التوقيقية وتمثل صورة الجنة باستخدام بنات الرقصة مع تغير الإضاءة ولوحات الخلفية] نخيل وأعناب.. وانهار فى كل حنة.. نهر غسل.. ونهر لبن.. ونهر خمر.. والخمرة متفرقة ميت قناية.. قناية لكل نوع.. الاسكوسكندى.. وقناية للشمبانية البنك.. وقناية للشمبانية البيضاء العادية.. وقناية للكونياك.. وغيرها للنبيت.. لا النبيت لوحده له عشرين قناية.. فيه إيطالى.. وفيه بوردو بورندى.. وماديرآ.. آه حاجات كتير قوى.. تشاور بصباeck تتفرد التراييزة وعليها الشامبانييرة قزايز الويسكى وكل اللوازم.. أفخم مزارت.. فواجرا.. تعرف الفواجرا.. يعنى كبد الوز المدخن.. والكافيار إيرانى وروسى.. واشمعنى إيرانى وروسى؟ علشان الاثنين على بحر قزوين.. هما الاثنين بس وسمك الاستراجون اللى بيضه هو الكافيار ما بيتوجدش غير فى البحر ده.. نهايئة

عندك عشر تلاف نوع من المرات .. لاحظ كل ده وانت ممد  
على مرتبة ريش نعام فى التراس بتاع قصر من السبع وسبيع  
آلف قصر بتع جنابك فى الجنة...

الـسـرجـل: (وقد بدأ ينعس ويستجيب للإيحاء) ياه... كل دول؟

العـسـكرى: آمال وأنت ممدد ويتمد إيديك تلاقى الفواكه بتسقط فيها  
لو حدها .. حواليك مين؟

الـسـرجـل: مين؟....

العـسـكرى: الحور العين! سبعين ألف حورية .. كلهم عذارى..  
ما حدش لمسهم .. حوريات إنما ايه كل واحدة تحل من  
عالمشقة..

الـسـرجـل: (وهو يغمض) ياه .. سبعين ألف واحدة .. وكلهم ايه؟

العـسـكرى: عذارى .. أبكار .. يا باختك ... ايه رايك بقى؟

[يتاعلى غطيظ الرجل .. مع موسيقى الكترونية تفيد  
التشوش الاضطراب]

العـسـكرى: (يهز برفق ثم اشد). ما بتردش ليه؟ .. نمت؟ جميل خليك  
نايم .. مش حاتصحى إلا أما أنا أقوللك .. [فيد تدريجى  
للإضاءة .. حتى الإظلام الكامل .. بلاك أوت .. ويظل صوت  
العسكري فى المقدمة وتنسحب الموسيقى للباك] ولما تصحى  
حاتنسى كل حاجة .. اللى أنا عايزك تفتكره .. ودلوقت بطل  
شخير وجعت دماغنا .

[ينقطع صوت الغطيظ والموسيقى .. ثم إضاءة كاملة .. لنرى  
المنظر فى اللوحة الأولى شاطئ البحر .. وشرفة الكابينة ..  
والشمسية وما ندهتها .. ظهر شيزلونج البلاج للأفانسين وقد  
بدا طرف راس الرجل]

ص. السـرجـل: ياه... أنا نمت دا كله...

[يدخل إلى شرفة الشاليه .. يتنطى .. ويتناوب .. ثم يتقدم فى

اتجاه الشمسية..] بس شيء غريب جدا .. أنا فاكرك أنى كنت  
بره الشالية .. ايوه .. كنت نايم عالشيزلونج .. تحت الشمسية  
دى ..

[يقف تحت الشمس .. يرتاجع خطوة فى زعر ..] ايه دى ؟ ..  
دى راس .. مين اللى حطها هنا .. (يمد يده فى تردد .. ثم  
يستقر رايه فيمسك بقناع جلدى يخيل راس لها شعر مما  
يستخدم فى الحفلات التنكرية والعاب راس السنة .. ها هو  
يتقدم بها إلى المقدمة) ... هزار سخيف كان المقصود منه  
أنحض واترعب .. طبعاً .. لازم أترعب وأنا باشوف راس  
لوحدها قدامى من غير جسمى .. خصوصاً أن الوش شبهى  
تمام .. (يضع رأسه فى الماسك) .. بالظبط .. اعتقد أن أنا كده  
أحلى ..

[تدخل من باب الشاليه إلى الشرفة الأم / المدرسة / الزوجة]

الزوجة: أنت مش حاتبطل عادتك الرزله دى؟  
الـسـرجـل: عادات ايه؟ وايه اللى صحاكى من النوم؟ ..  
الزوجة: (وهى تنزل من درجات الشرفة) اللى بتعمله كل ليله .. تيمنى  
وتتسحب وتخرج .. وكل ما فتح عينيه ما لاقيكش ..  
الـسـرجـل: أنت عارفة أنى بأحب أشوف القمر وهو بدر وانعكاسات نوره  
عالبهر ..

الزوجة: بلاش حجج فارغة! .. الكلام ده لما تبقى ليلة وليتين  
ولاتلاتة .. لكن دا على طول .. كل ليله حتى الليله اللى من  
غير قمر ، اللى بيسموها لياالى .. لياالى ...

الـسـرجـل: لياالى المحاق!  
الزوجة: ايوه .. زى ما بتقول كده .. والمسالة يا حبيبى مالهاش دعوة  
بالقمر ولا بالبهر .. أنت اللى ما بقتش طايقتى وبقت حياتنا  
مع بعض اسطوانة مشروخة مملة .. عمال تبعد عنى يوم وار



يوم.. وكل ما حاول أقربك ثانى.. تهرب زى المية اللى بتفر  
من بين صوابع رجلك وانت واقف على الشط

الـسـرـجـل: (وكأنه يكلم نفسه) شىء طبيعى.. إحنا متجوزين بقى لنا  
كتير قوى يعنى احتمالات الملل وادره بشدة.. سواء منى أو  
منك.. أو مننا إحنا الاثنين (بصوت أكثر مباشرة).. ومع ذلك  
أنا باعملك كويس قوى

الزوجة: هى ايه المعاملة الكويسة فى نظرك؟

الـسـرـجـل: طلباتك كلها مجابة.. عايشة فى مستوى احسن من كل  
صديقاتك.. وقرياك.. شقة فى ارقى حى فى القاهرة..  
مفروشة زى القصر.. وشالية هنا فى الساحل الشمالى..  
وشالية شتوى فى اسمها ايه دى؟

الزوجة: فادى!

الـسـرـجـل: (بعد لحظة) فادى ده جوز أختك!

الزوجة: قصدى فايد.. ما غلطش فى البخارى يعنى.. بتبرق لى كده  
ليه؟

الـسـرـجـل (مشيحا عنها) ولا حاجة.. الخلاصة أنى معيشك عيشة الأميرات!  
الزوجة: شوف بتكلم عناية؟.. عن الفرش والشقة والشالية والفلوس..  
وكل ده ما يسعدنيش.. أنا باتكلم عن المشاعر.. عن  
العواطف.. عن الحب.. أنت عارف آخر مرة بوستنى فيها  
كانت أمتى؟

الـسـرـجـل: (بلا اهتمام) بصراحة لامش فاكر!

الزوجة: أنا فاكره.. كان فى القرن الماضى

الرجال: يا شيخة بلاش مبالغة

الزوجة: لا.. صحيح.. بالتحديد فى آخر العقد الثامن من القرن  
العشرين.. وبالتحديد أكثر يوم ١٢ سبتمبر سنة ١٩٧٨.. يوم  
حفلة عيد ميلادى..

الـسـرـجـل: اليوم النحس!

الـزـوجـة (مبهوطة) بتقول ايه؟

الـسـرـجـل: (يتحول لها فى شراسة مفاجئة) بأقول إالى سمعته  
وماكنتش عايز اقله لولا زك وإصرارك.. تقدرى تقولى يا  
هانم كنتى فى ليلتها بين الساعة تسعة والساعة تسعة  
وعشرة؟

[بلاك أوت سريع.. خلال تغيير المشهد تسمع أصوات أغنية  
وموسيقى عيد الميلاد.. وضحكات، نداءات.. يضاء ألا  
فنسين.. لئرى العسكرى فى شخصية زوج الأخت.. يدخل  
وهو يسحب الزوجة التى ارتدت فستان أنيق سواريه مشير من  
زرعها]

الـزـوجـة: اعقل يا فادى؟.. أنت اتجننت؟.. مرأتك وجوزى والمعايير  
حايقولوا إيه لو لاحظوا أن أنا وأنت اختفينا فجأة..

العـسـكـرى: الكل ملخومين فى الأكل والشرب.... وبعدين إحنا مش  
حاتغيب دقيقه... أنا جيتلك علشان أعيد عليكى لوحدنا..  
مش قدام حد.. (يميل عليها ويقبلها)  
(بلاك أوت آخر... ويسمع الصوت فقط)  
كل سنة وإنط طيبة...

ص. الـزـوجـة: وإنط طيب.. خلاص؟ إرتحت؟

ص. العـسـكـرى: ولا ميت بوسه تريحنى

ص. الـزـوجـة: عيب بقى.. مش كده...

(إضاءة FULL LIGHT... الراحل والزوجة متواجهان)

الـسـرـاـجـل: شفتكم يا هانم أوعى تنكرى

الـسـزـوجـة: ومن قال لك حأنكر؟ لو سألتنى من أربعة وعشرين سنة كنت  
قلت لك....

الـسـرـاـجـل: قلتى لى؟ حاتقوللى إيه فى اللى شفته بعينيه يا مدام؟

الزوجة: أشرح لك.. أفهمك....

(صوت عروسة البحر)

ص. العروس: أوعى تصدقها...

الرجل: (وهو يلوح بيده كمن يبعد شيئاً) هشش....

الزوجة: إيه؟ مش عايز تسمع؟

الرجل: قولى وخلصينى

ص. العروس: حاتكذب عليك...

الزوجة: أنت عارف إن فادى كان متقدم لى قبلك.. ولما اصريت

أتجوزك أنت.. أتقدم هو لأختى.. حاولت أمنع جوازهم

فهمتنى غلط وأتهمتنى بإنى غيرانه منها.. سببتها تتفلق

وأنت فاكركويس إن أنا كنت شبه مقاطعاهم.. وهو كان

بيحاول يطاردننى بكل الطرق.. ولعلمك.. قبل الليلة دى..

فى النادى.. ودخلت تواليت السيدات... إتجرأ ودخل

وريا.. فوجئت بيه ولما قرب منى حاول يبوسنى ضربته بقلم

نزل على وشه سوره وندهت الداده بتاعة الحمام طلع

يجرى...

الرجل: يا سلام.. وسبتيه يبوسك ليه ليلة عيد ميلادك؟

الزوجة: خفت يعمل لى فضيحة قدام الكل لأنه كان شارب وسكران...

ص. العروس: يا خرابى على كدبك (تدخل عروسة البحر وتواصل كلامها..

وتلاحظ أنه يراها ولكن الزوجة لاتراها..) طبعاً بتقول لك

كده.. لأنك شفت لكن ما سمعتش...

الرجل: (للعروسة) ومين قال لك إنى حصدق؟

الزوجة: تصدق أو ما تصدقش... هى دى الحقيقة

العروس: إوعى تديها فرصة تلعب بيك... الحقيقة أنا بس اللى

عارفاها.. وممكن أقولها لك...

الرجل: مش عايزك تقولى حاجة.. ومش حاسمك.

الزوجة: أنت بتبص لفين وأنت بتكلمنى؟ طبعاً مش قادر تواجهنى

ولا تبص فى عنيه لأنك أنت الخاين.. أنت اللى بتلعب بيديك

طول السنين اللى فاتت وأنا بأتظاهر بإنى مش عارفه..

وبأتمثل دور الزوجة المخدوعة اللى نائمة على ودانها....

العروس: شوف قدرت تقلب الموقف إزاي وحولت نفسها من متهمة

لضحية

السرّجل: أنا عايز أعرف حاجة.. هى مش شايفاكى؟...

(بينما تتابعه الزوجة فى دهشة)

العروس: لأطبعاً.. ماحدش غيرك حاشوفنى... أنا وعدك اللى جاى

لك أنت وبس..

السرّجل: ولا حتى سامعاكى

العروس: ذبذبة صوتى شفرة ماتحلفاش إلا ودنك الجميلة (تداعب

أذنه بإصبعها)

السرّجل: لا.. لا.. بأغير

الزوجة: حلّو قوى الورقة الوحيدة اللى باقية فى إيديك علشان

ماتواجهنيش.. إفتعال الجنون وهو كذلك.. أنا داخلة ألم

هدومى.. وحاخذ عربيتى وأسافر.. ومش عايزة أشوف وشك

تانى... (تجرى الزوجة خارجة... ويهم الرجل بالجري

وراءها)

السرّجل: استنى

العروس: إوعى.. لو رحّت وراها تبقى خسرت فرصتك الوحيدة..

الفرصة اللى جت لك على صحن ذهب.

السرّجل: فرصة إيه

العروس: حريتك.. هى لسه محرراك دلوقت وفاكة قيودك ومطلق

سراحك؟

السرّجل: بس أنا كده حابقى لوحدى؟

- العروس: لأحتيجى معايا ...
- الرجل: (يتراجع) أجى معاكى فين؟
- العروس: عاجباك عيشتك هنا؟ العيشة اللى كلها جهل وتخلف و....
- الرجل: (يقاطعها) العيشة دى هى الواقع.. مرأتى واقع...
- العروس: وتستسلم لواقع مر ليه؟ طلاوعنى وتعالى معايا.. حاعديك البحر...
- الرجل: حاتعدينى ولاتفرقينى؟
- العروس: نسيت كلامك؟ عروسة النيل بتنزل تفرق.. لكن عروسة البحر بتطلع تنور؟
- الرجل: بس أنا مش عروسة البحر.. غالباً إنت النداهه..
- العروس: النداهه دى هناك.. فى الرياح.. فى النيل.. فى بلدك الريفية الصغيرة المسكينة اللى اخترعوا فيها النداهه علشان تفضل نائمة وخايفه.. للأبد..
- الرجل: هى خرافة... وأنت سراب...
- العروس: (تقترب منه) إنت خايف منى؟
- الرجل: مانكرش... الوهم بيخوف زى المجهول ما بيخوف....
- العروس: المجهول ولا الجهل...
- الرجل: الاتنين جذر واحد..
- العروس: مش قلت لك حاخذك أفرجك.. البحر مليان جواهر.. وكل جوهرة كلمة سر تفتح لك كتاب .. والكتاب يخذك خطوة.. وخطوة خطوة حاتوصل..
- الرجل: مين يضمن لى إنك مش بتغرينى لغاية ما تفرقينى؟
- العروس: إحساسك.. مشاعرك.. أحلامك.. إنت حلمت بى كثير..
- الرجل: جايز.... وجايز دلوقت أكون بأحلم...
- العروس: حتى لو كنت بتحلم مش حاتخسر حاجة.. حاتيجى معايا أفرجك من غير ماتخاف لانك حاتصحى فى أى لحظة...

- الرجل: وأتحسر على الكنوز اللى شفتها؟
- العروس: لو مصدق يبقى علم... مش حلم...
- الرجل: حافكر..
- العروس: ما تخليش تفكيرك يطول.. أنا ميعادى نزول القمر فى البحر... بعدها بثنائية واحدة مش حاتلاقينى قدامك... مستنيك ورا الصخرة دى... مستنيك (تبتعد بخطوات راقصة.. تنبعث موسيقى... لتكن سوناتا بجنود القمر بيتهوفن... الرجل... يلقي بنفسه على الشيزلونج الموجود الآن الافانسين مواجهاً الصاله)
- الرجل: المشكلة الاساسية هى الفصل بين الحلم والعلم.. إنك تعرف وأنت صاحى إنك صاحى ما بتحلمش... دى النقطة الحرجة.. بس إزاي تمسكها.. (صوت سرينة بوليس...)
- الرجل: (مصغياً)... البوليس؟ إيه اللى جايه هنا؟.. دى مكان بعيد عن (يدخل العسكرى مرتدياً حلة ضابط بوليس.. ومعه جنديان)
- العسكرى: أهه.. أتحفظوا عليه...
- (يسرع الجنديان بالوقوف إلى جانبي الرجل الذى يقف محملاً فى العسكر)
- الرجل: إنت تانى؟
- العسكرى: إنت تعرفنى؟
- الرجل: الله؟ كنت لسه بأكلم نفسى على النقطة الحرجة....
- العسكرى: بتكلم نفسك؟ حلوه... بس إدعاء الجنون مش حايعفيك من العقاب...
- الرجل: العقاب على إيه بالضبط؟
- العسكرى: حالا تعرف (منادياً) هاتوا المجنى عليها...
- (من الكالوس.. تدخل الزوجة وحولها جنديان آخران.. مشعة الشعر.. ممزقة الملابس ووجهها ينزف من جراح به..)

الـرجل: (يحملق فيها ذاهلاً) إيه ده...؟ مين عمل فيكى كده؟  
الزوجة: أنت  
العسكري: الهانم جت لنا وهى فى حالة يرثى لها... هيسستيريا تقريباً..  
وقالت أنك ضربتها.  
الزوجة: وحش..  
الـرجل: أنا ؟ ضربتك..  
العسكري: كنت عايز تقتلها بعد ما حاولت إغتصابها وفشلت لولا إنها  
جريت ونطت فى عريبتها..  
الـرجل: إنت بتقول إيه يا حضرة؟.. قتل إيه واغتصاب إيه؟.. دى مراتى..  
الزوجة: أنا مراتك؟ فشر...  
العسكري: يعنى إنت ما تعرفيهوش يا هانم؟  
الزوجة: إزاي؟ أعرفه طبعاً.... دا جوز أختى...  
الـرجل: (ذاهلاً) إيه؟ جوز أختى...  
العسكري: إخص اسفخس وإخيه.. فضيت الدنيا من النسوان خلاص..  
وما فيش قدامك غير أخت مراتك؟... وبتضربها؟... وعاييز  
تغتصبها؟... يعنى بالعافيه كمان؟  
الـرجل: أنت بتصدقها..  
العسكري: آمال أصدقك أنت؟ وبعدين الست قدامى أهه.. متبهده..  
الـرجل: أوكد لك إنها افتعلت الإصابات دى وقطعت هدومها وبتتبلى  
على لأن الحقيقية معكوسة تماماً.. دى هى اللى بتلعب من  
ورايها مع جوز اختها..  
الزوجة: كذاب فى أصل وشه  
الـرجل: بالأمانة اسمه فادى  
الزوجة: الحق يا حضرة الظابط..  
العسكري: الحق إيه بالظبط؟  
الزوجة: بيعترف... بيتكلم عن نفسه بضمير الغائب.. لأنه هو فادى...

الـرجل: أنا فادي؟ لأحلوهم.. أدى أكبر دليل على كذبها يا حضرة النقيب..  
العسكري: رائد من فضلك...  
الـرجل: ماشى يا جناب الرائد.. أنا اسمى مش فادي..  
العسكري: طيب أسمك إيه؟  
الـرجل: كمال.. كمال راشد عبدالبارى  
الزوجة: يادى المصيبة.. كمال راشد ده يبقى جوز أختى..  
الـرجل: أنت بتهرجى ولا بتستعبطى ولا بتعملى مؤامرة على علشان  
تجنينينى؟  
الزوجة: أنت اللي راجل واطى وخاين ومالكش مبدأ.. وفاكر إنى  
حأضعف قدام دناوتك  
الـرجل: لا دا الجنون بعينه.. أنا كمال راشد..  
الزوجة: أنت فادي الزفت..  
العسكري: (متدخلًا) حانحسمها.. ورينى إيديك يا سيد..  
الـرجل: إيديه؟ أوريها لك إزاي؟ بس فاهم..  
العسكري: إفرد كفك مقلوب.... حاشوف بصماتك..  
(الرجل يفرد كفيه.. يتناول العسكري الكف اليمنى.. ثم  
اليسرى)  
مفيش شك... أنت فادي...  
الـرجل: دى مؤامرة.. إنتوا كلكم مشتركين فيها....  
العسكري: أخرس يا مذنّب إتفضلى أنت يا هانم جوه الشاليه.. وضبى  
نفسك.. غيرى كده وسرحى شعرك وحط بارفام.. واعملى  
نيولوك وإحنا مستتينك...  
(وهى تتسحب نحو الشاليه تلقى بنظرة وغمزة لعسكري..  
وتخرج لسانها للرجل)  
الزوجة: مش حا تاخر...  
(صوت العروس من الكواليس)



ص. العروس: تعالى... القمر قرب يسقط فى البحر.... (قرص القمر فى الخلفية يهبط ببطء)

طاوعنى.. الفرصة حاضيع وحاتندم...

الـرجل: واللى حوالى دول...

ص. العروس: ماتخافش.. أول ما أغنى حيسمعونى ... وخايتحولوا لتماثيل من حجر...

(تبدأ الفناء... العسكرى والجنود.. فى حركة بطئة..)

العسكرى: أقبضوا عليه وعليها.. أقب... بضوا... على... ه..

(ثم يتجمدوا جميعاً فى أماكنهم)

الـرجل: (يستعرضهم... يلمسهم... يختبرهم).. دا فعلا بقوا تماثيل مافيهاش حياه.. آه النقطة الحرجة تانى...

بس سواء كانت حقيقية حلم أو متحققه فى العلم... هى صح... هى مش نداهه بتسحب للفريق.. لأ.. دى عروسة بحر بتطلع للنور (يدور حول الصخرة) إنت فين؟ ... عروسة البحور.. إنت فين.. الله والقمر فين؟ القمر اختفى.. بس ما وقعش فى البحر.. القمر اتخطف بس موجود.. أنا حاسس بيه... وفاكر لما كنت طفل والقمر ينخسف... كانوا يقولوا لنا إن بنات الحور خنقوه.. وكنا نغنى.. نلم بعض ونضرب على الحلل وأوانى النحاس.. ونطلب من بنات الحور يسيبوا القمر.. لو بس أعرف هو اتخطف ولا الوقت شرقنى.. وسقط فى البحر من غير ما ننتبه..

ص. العروس: تعالى.. تعالى.. عدى البحر.. ماتخافش.. القمر مستيك..

(يستدير بخطوات من يسير أثناء النوم.. يتجه نحو البحر....)

الـرجل: جاى.... ماعتدش قدامى طريق تانى علشان أبقى حر....

ستار. بلاك أوت



مسرحية  
في عز الظهور



قبل رفع الستار

الزمن الوقت الحاضر . يوم فى أغسطس

المكان منطقة، سكنية مطلة على أحد شواطئ الإسكندرية

## الفصل الأول

### المشهد الأول

الوقت : قبل الظهر . صباح متأخر

المشاهد : ساحة بيت الحاجة «زينة» على شكل قوس نصف دائرى الباب «بوابة خشبية» فى المقدمة «الافانسين».. قصيرة.. مفتوحة دائما منها على جانبى المسرح جناحى بيت من دورين الدور الأول له شرفة ببواكى تحمل الدور العلوى الأبواب على يمين واليسار لشقق المكان.. وفتحة السلم.. وفى صدارة العمق (الوسط) جلسة معدة بكنبة ومائدة عليها أغراض مختلفة وهى المعدة لجلوس صاحبة البيت «الحاجة» الساحة تتوسطها نافورة قديمة متهاكة منحنى القوس يكتمل فى اتجاه المقدمة بسور خشبى قديم نمت عليه أفرع من نبات متسلقة.. وبجواره كرسي وشمسية بلاج.. ولافتة معلقة «سمسار . عقارات . شقق مفروشة وخالية»

مع رفع الستار أو الإضاءة الكاملة نرى شعبان الذى يعمل بواباً للبيت وسمساراً فى الوقت نفسه.. رجل بين الأربعين والخمسين.. بجواره على الكرسي المجاور جهاز كاسيت مفتوح على إحدى أغاني حكيم أو شعبان عبدالرحيم أو غيرها من مطربي المنولوجات الشعبية الجديدة.. من فتحة السلم.. تدخل «هندام» زوجة ثلاثينية.. جميلة.. ملفوفة القوام...

هـندام: فين السبت يا شعبان؟.. شعبان يا خويا وطى البتاع ده واسمعنا  
(تفتح نافذة فى الدور الثانى.. تطل منها «صباح» شغالة شابة فى الثلاثين)

صباح: هندام بت يا هندام...

هـندام: (تتوقف وتلتفت إليها) بت لما بتبك أنت كمان؟ عايزه ايه تانى؟

صباح: عايزين بجنى فلافل مع الفول والخضرة.. وماتبقيش تتخلقى  
على قوى كده. أنى مش ناقصاكى (تخرج صباح)

هـندام: ياخواتى أنى عقلى دفتر؟.. حافض ايه ولا إيه؟

شعبان: مانا قلت لك تنبهى عليهم.. كل شقة تكتب طلباتها فى ورقة...  
وتلميهم.. وتفترى وأنت بتشتري الحاجة

هـندام: بدل ما تعدل على خد أنت وهات حاجة السوق

شعبان: احنا حانعيده تانى تانى يا بت؟

هـندام: حانعيد ايه يا شعبان؟ هى مش الرحمة حلوة برضه؟ من يوم

ماتجوزتنى وأنت رامى على هم البيت وسكان البيت ومفضى  
روحك لشغلانة السمسة وتوضيب قعدات الأنس وسهرات  
المزاج.. واستحملت علشان خاطرك وقلت أهو كله للعيال

شعبان: عين العقل.. كله للعيال.. وليكى

هـندام: تعبت يا شعبان.. وقلت لك شوف بنت صغيرة ولا جدع صغير

يقضى طلبات السكان بدالى.. ومش حايكلفنا حاجة.. لو الست  
زيزى.. مارضتش تشيل أجرته.. يلماها من البقشيش

شعبان: اتكلمنا فى الموضوع ده وفهمتك ان الحكاية لازم تفضل ملمومة

بينى وبينك وبلاش نجيب حد من بره يشاركنا فى رزقنا وتبقى  
عينه مدبوبة فى اللقمة اللى بناكلها واقتنعنى وسكتى.. ايه اللى  
خلاكى تفتحي الموضوع تانى؟ وتعيب ايه اللى بتشتكى منه وانت  
لسه صغار وصحتك والحمد لله ومن غير حسد يعنى..

هـندام: تعيب مش من جسمى يا شعبان تعيب فى المرمطة اللى انى فيها

كل يوم.. والرجالة اللى ما بيتعبوش من الزن حوالى سوا هنا فى

البيت ولا بره فى السوق عند الخضرواتى والجزار والمكوجى  
والبقال..

شعبان : (يتظاهر بالقلق) ايه؟... مين اللى اترازل عليكى يا بت وانى  
نجيب كرشه..

هنندام : مش واحد بالذات يا شعبان.. كلهم. الحجر الداير لابد عن  
لظه..

شعبان : وانى رحت فين يا بت؟ لعلك انى عينى عليك مابتوريش ولا  
يمكن حد يستجرى يقرب لك.. وبعدين آنى متأكد منك ومن  
جدعتك وعارف انك تقدرى تفوتى فى النار وماتلمسش طرف  
هدمتك.. ياللا روقى كده عا الصبح وشوفى اللى وراكى.

هنندام : طيب خليك يا خويا متطمئن.. ناولنى السبت

شعبان : أنا عارف راح فين؟.. وبعدين سبت ايه؟ أكياس البلاستيك فى  
ايدكى وخلص

هنندام : بالتخبط.. من غير السبت باحس أنى عريانة

(من باب شقتها المفتوحة على الشرفة تدخل زينة.. فى الستين  
وتبدو أصغر.. متبرجة تضع ماكياج كثيف وايشارب على شعرها  
الذى تبدو خصلة مصبوغة منه.. وتضع فى صدرها وذراعيها  
حلى ذهبية).

زينة : يا حلاوتك انت والمدعوق جوزك...

(تستدير ببغوته ويهب شعبان واقفاً)

هنندام : ست الحاجة ؟

زينة : ست عفاريت ينططوكى عالصبح... واقفه ترغى مع بسلامته

والناس اللى مستتين حاجتهم ينفلقوا

هنندام : (هى تجرى خارجه فى اتجاه البوابة) لا يا ست حاضر.. حاطير

طيران وارجع حالا...

(بعد خرجها.. تقدم زينة نحو السور)

**شعبان :** صباح نادى وزى الفل يا ست الحاجة..  
**زيننة :** والله؟.. مش باين.. كنت فين يا واد من ساعتين؟ اصحى من  
 نومى.. واطلع أشقر عالبيت الأقى الهانم مرأتك فى سابع  
 نومة.. وأدور عليك ما لاقيكش.  
**شعبان :** (فى ثبات ومسكنه معا) أعمال ايه يا ست الكل.. وربنا فاتحها  
 علينا من طلعة النهار الساعة سبعة إلا ربيع طب زباين للبيت اللى  
 فى اسكندر إبراهيم.  
**زيننة :** عيلة ولا فرقة؟  
**شعبان :** فوج شركات.. كان عليمى متفق معاهم واتسطل وأجر العمارة  
 كلها.. طبوا عليه وقع فى عرضى لاجل حظه وحظنا.. و..  
**زيننة :** خد حلاوتك .. مش خسارة فيك ..  
**شعبان :** (ياخد النقود ويدسها فى جيبه) من يد مانعدها  
**زيننة :** ياللا.. اطلع باللى عندك..  
**شعبان :** مانى لسه مديهم لجنابك..  
**زيننة :** أنت حاتتلائم علىّ يا جعيدى؟  
**شعبان :** أبأى .. مابلاها جعيدى دى يا ست !  
**زيننة :** ولما هى واجعاك.. مابتسلکش ليه !  
**شعبان :** أنا تحت أمرک .. اسألى وأنا أجاب  
**زيننة :** عملت ايه مع ثريا فى كلوباترا  
**شعبان :** فهمتها زى ماحضرتك قلتيلى ... واتعهدت إن مفيش بنت من  
 بناتها حاتهب نواحى ميامى تانى.  
**زيننة :** آه .. أنا العمارات بتاعتى سمعتها زى الفل.. وماحبش الواغش  
 دول ينجسوها..  
**شعبان :** أدیکى ورتيهم العين الحمراء.. بس اللى نفسى أفهمه إزأى عرفتى  
 إن البنات دول بتوع ثريا الكاتعة؟  
**زيننة :** خبرة يا منيل.. هيه.. غيره.. الأخبار هنا ايه ؟



شعبان : اللى اسمه الأحمدي جه نص الليل امبارح.. وسمعتة بيتخانج مع مدامته.. والحاج خربوش بايت هنه ولولا مارجعتش. وسى حمادة لم ولاد المأجرين ورأحو البلاج.. وحضرة، الصول عرفه طول الليل يكلم نفسه فى المنامات.. وسى صاصة.. كان حايجر ليلة امبارح ورجع فى كلامه.

زيننة : طيب اسمع اللى حاقولك عليه ونفذه بالحرف.

شعبان : باللى....

زيننة : مش عايزه صاصه يهوب بره البوابة دى.. لأنه لو خرج مش حايرجع تانى (وكأنها تحدث نفسها) كلهم.. اللى بيخرج.. مايرجعش.

شعبان : لا والله.. بيرجعوا. الست لولا..

زيننه : اتلهى على عينك.. لولا مابتخرجش

شعبان : ايهى؟.. امال مين اللى بترجع كل ليله وش الصبح عاد..

زيننه : مش حاتفهم.. لسه لك عشرين ثلاثين سنة وتبقى حمار.

شعبان : مجبولة منك برضك.

زيننه : أصلها حسب عويصة قوى يا شعبان.. وخروج لولا ماهوش خروج.. دا دخول بالقوى لكن صاصة غيرها.. نهايته..

زيننه : فين الفلوس؟

شعبان : (يخرج من جيبه مظروف منتفخ) تحت أمرك.. أتفضل

زيننة : (تضعهم فى سيالة قفطانها) كام؟

شعبان : عديهم يا ست الحاجة.. احداش ألف جينه.. وفيه تسعة جاين اخر النهار ده

(تمد يديها وتخرج من جيبها كيفما اتفق «كبشة» أوراق مالية)

زيننة : خد حلاوتك.. مش خسارة فيك.

شعبان : (ياخد النقود ويدسها فى جيبه) من يد مانعدها

زيننة : فين الموبايل اللى معاك

شعبان : موجود يا ست الكل  
زيننة : اطلب لى عباس. على ما يلبس يكون عندى هنا عشان يودينى  
البنك.. (تستدير خارجة إلى شقتها)

شعبان : من عنيا حاضر  
زيننة : (مبتعدة) صاصة.. انت يا صاصة.. اصحى بقى.. إحنا بقينا  
الظهر

(بعد خروجها يخرج شعبان المويال)  
شعبان : (يطلب الرقم) عايزه تجرى وتلحق تستفهم تقولش حايطيروا.  
عباس!.. صحيت يا عبس؟... آيه؟.. تعميرة امبارح كانت  
مضروية برشام؟.. خف يا حبيبى واجمع هنا .. الحاجة زيزى  
عايزاك..

(نسمع من الكواليس .. صوت توقف سيارة)  
ص. لولا : جرى ايه.. قلت لك حا ابعث البواب يحاسب... شعبان..  
(تدخل لولا.. فى الثلاثين أو اكبر قليلا.. لها مظهر داوهر،  
فى المكياج والملابس الضيقة) شعبان.. حاسب التاكسى.  
(قبل خروج لولا.. وقبل دخول الأحمدي ونجوان...)

ص. عرفة : (مناديا) شعبان.. يا شعبان  
شعبان : (فى طريقه للخروج) مش فاضى لك دلوقت يا عم عرفة...  
لولا : ماتستى الراجل ياوله..  
ص. شعبان : (بعد خروجه) فرصة تانى إن شاء الله  
(يدخل عرفة بملابس عسكرية بلا رتب.. حوالى ستين عاما..  
طليق اللحية والشارب بدون توضيب).

الصول : هو فىن الواد ده؟ (متلفتا.. لولا على الشرفة الخشبية أمام  
باب شقتها تبحث عن المفتاح فى حقيبة يدها). ماشفتيهوش  
يالولا؟

لـولا : صباح الخير يا حضرة الصول.. لاشفته ولاشفت غيره.. ولا  
قادرة افتح أشوف المفتاح وخرم الباب...

الصول : مسكينه ما أنتى عميانه.. طول الليل شقيانه.. خفى على نفسك  
شوية.

لـولا : أعمل ايه بس يا بابا.. الشغل ما بيرحمش..

الصول : آه خصوصا والموسم فى عزه.. الإسكندرية بتشغى سياح على كل  
لون

لـولا : يا خرابى.. راح فى المفتاح؟

الصول : (يتقدم بصدد درج الشرفه) تحبى أدورك عليه؟

لـولا : (تحتضن الحقيبة فى خوف مفاجئ) لأ.. قصدى مش حاقدش  
اديك الشنطة.. أصل فيها حاجات.. يا خرابى.. لا.. ماقدرش..

الصول : طيب اوعى كده.. اهه.. (يدفع الباب فى رفق فينفتح) الشقة  
مفتوحة أصلا.

لـولا : يا خرابى.. يبقوا البنتين نسيوا يقفلوها.. عالعموم متشكره يا  
بابا.. أنت فيك شىء لله تصبح على خير.. مش حالق حتى أغير  
هدومى.. أنا حادخل أنام سطيحة (تخرج وتغلق الباب).

الصول : (وهو يهبط إلى الساحة) وأنت من أهله (ينظر نحو باب زينه..  
يهتف)... زينه.. صاصة.. ويعدين.. معقول لسه نايمين؟.. لازم  
أحكى لهم عال حلم اللى حلمته وش الفجر.. ولازم أقول لشعبان  
يفوت على الشقق كلها يتمم عالولاد وينبه عليهم مايقربوش  
للبحر النهارده.. أيوه.. حلم الفجر ما بيكدبش.. شعبان..  
(يتحرك خارجاً) أنت يا شعبان.

(فى نفس اللحظة.. يدخل من باب السلم.. الأحمدي أبو راغب..  
فى الخامسة والخمسين وخطوات سريعة وهو أميل للبدانة  
ولكنه قلق دائما سريع الاستجابة ورد الفعل.. تكاد تجرى خلفه  
زوجة نجوان)

نجـوان : دى ما بقتش عيشة يا حمادة... استتى.. أنت بتجربنى وراك.  
الأحمدى : اهدى يا نجوان وحكمى عقلك  
(يواصل سيره ولكنها تمسك بزراعة وتستوقفه نجوان فى  
الأربعين امرأة فاتتة)

نجـوان : معقول تيجى بالليل.. وولادك نايمين وتمشى النهارده بعد ما  
راحوا البحر من غير مايشوفوك؟  
الأحمدى : غصب عنى يا حبيبتى.. مانت عارفه ظروفى.. أنا كل اللى فاضل  
لى عشر أيام أجازة ونسه ورايا هم ما يتلم.. احجز عوده..  
وأجدد تصريح العمل واخلص أرض وأسجل (وينظر فى ساعة  
يده).

نجـوان : على كده كنا فضلنا فى مصر أحسن لنا.  
الأحمدى : ازاي؟ وما تصيفوش؟ (ونظر فى الساعة)  
نجـوان : وهى دى تصيفة برضه؟.. كل صحباتى اللى ليها فى الساحل  
الشمالى.. واللى مأجره فى العجمى.. واللى مأجره فى المعمورة..  
الأحمدى : أعمل إيه.. اتأخرنا على ماجيت م السفر وحاولنا نأجر  
مالقيناش إلا هنا وعموما التصيفة مش مكان للنوم. التصيفة  
فسحة.. والفسحة فلوس.. وأنا سبتلك فوق فلوس كتير..  
اتفسحى يا حبيبتى وفسحى الأولاد.. ميعاد التوربينى قرب..  
شعبان وقف تاكسى يا شعبان

زينـة : (تدخل قادمة من باب شقتها وقد ترتدى ملابس حجاب فنخة  
وفى يدها موبيل تتكلم) يعنى أنت هنا يا عباس طب أنا طالعالك  
اهه.. أستاذ أحمدى؟

الأحمدى : ايو.. أهلا وسهلا.

زينـة : مدامتك زى القمر..

نجـوان : مرسى خالص.

الأحمدى : حضرتك الحاجة زينة؟.. شفتى أنا فاكراً من يوم ما أجرت ؟  
زينة : يا راجل يا طيب دانت فايت على نص الليل امبارح ومسلمين على بعض.

الأحمدى : أيوه صحيح.. أهلاً وسهلاً معليش.. أصلى مستعجل (صوت كلاكس) أهو شعبان جاب التاكس.

زينة : لا.. لا دا كلاكس عربييتى.. تعالى معايا أوصلك.

الأحمدى : (تتأبط زراعه ويستجيب لها) .. بس كده حا

زينة : لا حا.. ولا شى.. ياللا

(تخرج مع الأحمدى.. تنتهيا للعودة... وتتجه إلى السلم.. فى لحظة دخول صا صا خارجاً من شقة زينة فى حوالى الثلاثين).

صا صا : نقول صباح الليل اللى أوله زى آخره؟ والا اللى آخره أحلى من أوله؟

نجوان : أهلاً هو أنت؟..

صا صا : كنت مستتية حد غيرى ؟

نجوان : وسع من سكتى.. بابنى .. خلىنى أشوف اللى ورايا..

صا صا : اعتبر ده وعد؟

نجوان : هو ايه ده؟

صا صا : أبلك ؟! معنى تتبينى وتربىنى.. وتغذىنى و...

نجوان : وبعدين ؟ مش احسن برضه تقول يا فتاح يا عليم وتلايمها؟  
(من السلم تتقدم داليا فى العشرين.. ذات جمال هادئ وسمت حزين..)

داليا : عايز ايه يا ماما؟

(نجوان تفاجأ لدرجة الخضة)

صا صا : أنا مش عايز حاجه يا مدموازيل.. أنا باصباح وبس.. مجرد صدفة.. عن أذنكم (ينسحب بسرعة)

نجـوان : داليا؟.. انت هنا مارحيتيش معاهم البحر؟  
داليا : لا يا ماما.. صحيت معدتي تعبانه ونفسي غامة على قلت لطارق  
يروح هو.. واتفقت معاه لو حالتى اتحسننت ادى له ميسد عشان  
يقوللى هم فى أى بلاج واحصلهم..

نجـوان : بس كده خضيتينى  
داليا : ماله ومالك الشخص السخيف أخو الست السخيفة صاحبة  
البيت؟

نجـوان : أدىكى قلتيتها بلسانك سخيف..  
داليا : بس انت بتدى وتاخدى معاه ليه؟  
نجـوان : (بجفاء) السؤال دا عيب وفيه قلة أدب ومع كل أنا قادرة أوقفه  
عند حده من غير ما اعمل فضيحة فى وسط بيت مليان  
مصيفين من كل حته

داليا : (متراجعه) اسفه يا ماما!..  
نجـوان : كله من أبوكى!..  
داليا : ماله بابا بقى؟.. دا حتى من أول مارجع من الأجازة وهو داىخ  
مارتاحش يوم .

نجـوان : (سافر) ايوه.. لدرجة انه كان بايت هنا امبارح وماستنش  
يشوفكم..

داليا : (مصدومة) بتقولى بابا كان بايت هنا امبارح؟  
نجـوان : وما صدق عينه فتحت قام جرى لبس هدومه وراح يكمل الدوخة  
الى داىخ فيها ومدوخنا معاه.

(تتكوم داليا حول نفسها.. وتستدير بخطوات بطيئة لدخل  
السلم وتخرج ثم تتبعها نجوان) استنى يا داليا أنا طالعة  
معاكى.. اطلبى أخوكى شفيهم فين.. وينفع نروح لهم ولا لأ  
تدخل هندام تحمل فى كل من يديها أكياس بلاستيك مليئة..  
ويدخل خلفها شعبان)

شعبان : اعملى لك همه الناس عايزة تفطر وبقينا الضحى..  
هنندام : هم فين الناس دول؟.. الشباب؟ كلهم نزلوا من أول الشمس  
ماطلعت راحو البحر..

شعبان : كلهم ازى تمتى عليهم وعدتيهم؟  
هنندام : شفتهم وهم خارجين.. كلهم مع بعض طارق ابن الست نجوان  
ووليد ابن الست بئينه واخوه حسام وميمى ابن الحاجة وهالة.  
أخت لولا ومريت بنت خالتها.

شعبان : طب ياللا زقى عجلك، حاسبى حايقع منك كيس، دى ايه الخيبة  
دى !

(تضع الأكياس على الأرض فى تبرم)  
هنندام : خد أنت يا شاطر طلعم لأصحابهم بدل مانت عاملى فيها  
كومندا

شعبان : انت اتخيلتى فى مخك يا بنت ستوتة؟  
(تتجه للنافورة وتجلس عل حرفها)  
هنندام : ايو يا شعبان ! ما عايش فى مخ خلاص والبركة فيك...  
شعبان : (يقترّب منها) لا دا أنت تعبانة ودواكى عندى علقه من بتوع  
زمان!.. مادام الكلام اللى قلناه من شويه مش محقوق  
فيكى...

هنندام : (بدون خوف) كان زمان على رأى أم كلثوم.. الله فى سماه لو  
مديت صباع.. عارف صباع واحد بس لكون راميّه نفسى فى  
المالح وجايبالك مصيبه..

عـرفه : (يدخل الصول عرفه) أخيرا يا سى شعبان ؟  
شعبان : بعدين يا عمنا.. نخلص شغلنا الأول..  
عـرفه : فى شىء أهم من الشغل ألف مرة..  
شعبان : يا فتاح يا عليم.. دماغنا يا حضرة جناب الصول باشا..  
عـرفه : اسمعنى وما تقاطعنيش.. مفيش وقت.. عايزك تفوت على جميع

الشقق وتندّر كل السكان.. تقول لهم الرايات السوداء متعلقة على كل الشطوط.. والبحر مقفول النهارده..

شعبان : والله ؟ وده ليه ؟.. أجازة البلاج الأسبوعية النهارده ؟

عرفه : اسمع اللى باقولك عليه ونفذهم.. الأولاد.. الشباب.. صبيان وبنات.. يفضلوا كلهم بعيد عن البحر...

شعبان : معلش. فرصة تانيه إن شاء الله.. الكل نزلوا فعلاً وراحوا البحر.

عرفه : (يتسمر مكانه مبهوراً) ايه ؟ راحوا ؟ ليه.. مين سمح لهم ينزلوا ؟

شعبان : ربنا يلطف بينا جميعاً.. (يشير بيده إلى رأسه إشارة على عقل عرفه) روح الملحق بتاعك ونام لك شوية يا حضرة الصول حاتقوم فل الفل إن شاء الله..

عرفه : (وهو يتحرك بخطوات متناقضة في اتجاه الكالوس مغمغماً) اتأخرت يا عرفه.. زى العادة المنبه مارنش وراحت عليك نومه.

شعبان : هاتشيلي الأكياس يعني هاتشيلي

هندام : أنا قولت مش شايله

(من الدور الثاني تطل صباح).

صباح : فين الطلبات يا هندام.. وأنت يا شعبان.. فين الطلب اللى بثينة هانم موصياك عليه من امبارح ؟

شعبان : من عينيه قولى لها ساعة زمن ويكون عندها (لهندام) قومى يا هندام واقصرى البشر أنى ما عرفش أفنط الطلبات ودى بتاع مين ودى بتاعة مين.. ولو عالشياله أشيل معكى.

صباح : يا عينى عالحب والحنية. والنبي خسارة فيكى.

هندام : (وهى تتجه للأكياس وتعيد حملها) اتسدى يابوز الأخص.. وأدينى طالعالك هه !

شعبان : (يساعدها فى حمل الأكياس) ياللا كبرى دماغك وسيبك منها

هندام : طيب خليك انت.



شعبان : أنا حاخطف رجلى لغاية بدوى فى عمارة المندره وراجع.. مش  
حا تأخر.

هـندام : مع السلامة

(على الشرفة يظهر صاصة)

صاصة : طيب مش تجيبى حاجتنا الأول؟

هـندام : حاجة ايه يا سى صاصة؟ ست الحاجة ما طلبتش النهاردة فطار.  
(يقترب منها)

صاصة : بس أنى لى طلب.. الأول هاتى عنك.. أصل شعبان ده خسع. حد  
يسيب مراته تشيل الهم دا كله ويقف يتفرج عليها.. خصوصا لما  
تكون مراته دى.. حته هريسة بالسمن البلدى المعتبر

هـندام : (متضاحكة هو تبعد الأكياس وتتحرك) وده بيقى ايه؟ إعلان فى  
التليفزيون؟ والنبي انت مسخره !  
(ثم تخرج)

صاصة : (بعد خروجها) بكره تشوفى المسخرة اللى على أصولها..  
(يتقدم إلى النافورة فى منتصف الساحة)

صاصة : ما هو أصل ما عدش فيه غيرها.. المسخرة! المسخرة للى بيعرف  
هى ايه.. فن.. فن مش كل حد يعرفه أو يقدر عليه..  
(يجلس على حافة النافورة.. ويخرج علبة سجائر يخرج منها  
سيجارة ملفوفة يتأملها كأنه يتغزل فى امرأة).

صاصة : فن المزاج اديها اصطباجة ياواد يا صاصة! (يشعل السجارة  
ويجذب منها نفس طويل) ياه.. ادى علامة الصنف  
التضيف.. نفس الحشيش يخش ينخشش فى النخاشيش. الله.  
حلوه.

(من الشباك الذى أطلت منه صباح يطلل الآن «عزت خربوش»  
فى الستين له شكل تجار الوكالة وسمت الحشاشين).

خربوش : اللى يسحب لوحده يزور..

صاصة : بس سمعتها يعنى ولا موآخذة....

زيننة : (تقاطعه فى صرامة) ولا كلمة.. ولا نفس..

صاصة : على رأيك.. بلاش نحسس على روسنا بس عندى سؤال صحيح لولا تقرب لك.

زيننة : انت كمان حاتقول زى ولاد الهرمه إلى مطلعين إشاعات أنها بنتى ؟

صاصة : لا طبعا. أنا متأكد أنها مش بنتك.. بس جايز تقرب لك برضه..

زيننة : (بغیظ) طب واللى تقرب لى ما هى تقرب لك انت كمان.

صاصة : مش شرط.. ممكن تكون قريبة المرحوم سعد الأشقر.. أبو ميمى..

زيننة : (متجهة) الله يرحمه!.. ماتسينا م السيرة دى بقى !

صاصة : دى مش إجابة يا زينات..

زيننة : وانت مالك ومال سعد ولولا واللى يقرب لهم واللى يبعد عنهم ؟

صاصة : إلا مالى؟.. مش سعد ده اللى بعته الدنيا عشانه وأول ما بعته بعته أخوكى الصغير.. الأمانة الدفيانة فى حضنك.. رميته على طول ذراعك ولا همك

زيننة : ورعيتك وصرفت عليك بدل الجنى ألف.. وبدل الألف عشرة..

صاصة : من بعيد لبعيد.. سيبتينى اتقلب فى بيوت الناس من حضن لحضن ومن ايد لايد.. ومن رجل لرجل.

اتلاعبت وانضريت واتاخذت على قفايا واتشطت بالقديمة..

زيننة : ليه؟ مانت لسه قايل بعظمة لسانك إنك اتخرجت بتقدير..

صاصة : الحته اللى فاضل فيها الروح منى.. لكن الباقي.. جته هامده.. شلتها بايديكى علشان تعيش معاكى تهشى بيه الواغش زى البو ولا خيال المآته. وانت عارفه إنه خلاص مافيهوش. وما بقاش ينفع لحاجة.. ديك النهار دخلت على ابنك ميمى لقيته مقرقص على السرير وحاضن رأسه بدارعاه وجسمه.. كله بيترج من

خريوش : ابن البواب؟.. بتهزر يا اسمك ايه؟  
صاصة : مش باهزر.. دا اللى فى ايدها دلوقت.. زمن الزباين التقال  
انتهى.. وال.. ايه.. زباين دى.. تقصد مين بالزباين  
يانغبوش؟

خريوش : خريوش ولا مؤاخذه.. وانت اللى قلت زمن الزباين التقال.  
صاصة : بس انت قلت فى الأول.. نفوذ الحاجة وزباينها.. تقصد ايه؟  
خريوش : مانيش فاكر.. وقوللى انت تقصد ايه بالزباين التقال؟  
صاصة : إذا كنت انت مش فاكر الزباين الاولانيين.. حافتكر أنا  
الأخرانيين؟

خريوش : صحيح!.. تيجى ننسى دول ودول؟..  
صاصة : والله فكرة.. خصوصاً إن التعميرة دى نسايه  
(يندفع رجلاً «الزبون».. رجل خمسينى)

الزبون : هى فين؟

صاصة : هى مين؟

الزبون : الحرامية اللى سرقتنى

خريوش : حرامية مين اللى سرقتك.. ومين قال لك إنها هنا؟

الزبون : التاكس اللى ركبته من قدام بيتى ووصلها لحد هنا.

صاصة : راجعه يا حاج.. يمكن العمارة اللى جنبنا

الزبون : الراجل واقف بالتاكسى على القمة.. وشاور لى عالبيت ده..  
وكمان معاه الأمانة

(باب شقة فى الدور الأرضى (شقة لولا) يفتح وتندفع بملابس  
النوم)

(مستنده إلى السور) شعبان.. هندام.. ها تولى البوليس أنا  
اتسرقت

الزبون : (يراها).. آهه.. هى دى.

لولا : الموبايل بتاعى يا حرامى (تقفز إلى الساحة لتمسك فى خناقه)

الزبون : موبايل ايه يابنت الحرام.. دانت اللي سرقتي... طلعي الساعة  
الرولكس المرصعة أم عشرين ألف جينه دلوقتي حالا وإلا مانيش  
سايبك إلا فى الكركون!

لولا : ساعة؟.. ساعة ايه يا ابو ساعة؟ وهى الحكاية خدوهم بالصوت.  
وسيدى المرسى ان ماجبت الموبايل بتاعى لانكون فاتحة قرنك  
ورامياك فى المالح..

خريوش : بالهداوه شويه وإحنا نحل الموضوع.. ايه حكاية الموبايل دى؟  
الزبون : ما هى ده الأماره اللي باقولك عليها.. نسيته فى التاكس اللي  
جابهها.

صاصة : لى الموضوع يالولا.. احسن هايجب خل..

لولا : موبايل يا صاصة.. موديل جديد تمنه فى المحروق جوز بواكى  
صاصة : (يغمز لها بعينه) خلاص كل واحد ياخذ اللي له.. أنتى تدى  
للراجل ساعته وهو يرجع لك الموبايل

لولا : اسم الله/ دى مش زى دى .. قصدى ساعة آيه يا عمر أنت حا  
تلزقلى تهمه؟

صاصة : لايمها بقى.. خللى موضع السياحة يمشى بدون حوادث إرهابية  
خريوش : وأنت يا حاج.. المسألة فيها لخبطة مش مقصودة.. والطيب  
احسن

الزبون : الساعة تجيلى.. وبعدها وكل حى يروح لحاله..

صاصة : سيب لى أنا الحاج.. تعالى معايا. يا حاج.. (يحاول تأبط ذراعه)

الزبون : (ينزع ذراعه) آجى معاك على فين.. وايه الحكاية بالضبط؟ انتوا  
باينكم عصابة آه فاتحين بيت ومسرحين النسوان اللي فيه  
يسرقوا العالم!

صاصة : لا. كده تبقى غلطت. أنا كنت عايز أخدمك وارجع لك ساعتك  
إنما بالشكل ده تبقى راجل لا مؤاخذه...

صاصة : خديه بره وحلى الموضوع معاه يالولا

**لـولا :** تعالى معايا يالمض (تشبك زراعها بذراعه)  
**الزبون :** (مقاوما) حيلك.. اجى معاكى على فين ؟  
**لـولا :** مش انت عايز ساعتك؟ (تقوده إلى المقدمة)  
**الزبون :** ايوه هتهالى..  
**لـولا :** عشان تلبسنى قضية؟.. انت تيجى معايا وأشاور لك عليها..  
وانت اللى تمد ايدك وتاخدها.. وبعدين أصل مش أنت واخذ  
بالك.. أنا وأنا بالم حاجتى مستعجلة الساعة جت معاها..  
وماخذتش بالى خالص إلا وانت بتتكلم دلوقتى.. افكرت.. أخ..  
يخرب عقلك يا لولا.. تلاقىكى تقلت العيار امبارح وافكرتى  
الراجل سايح من ضمن السواح. معلش.. كويس إنك فكرتتى..  
ياللا  
**الزبون :** (وهو ينقاد إليها. نحو كالوس المقدمة يساراً) بس انت موديانى  
بعيد عن البيت  
**لـولا :** ماتخافش.. الأمانة فى الخزانة  
(بعد خروجهما.. يقترب خريوش وصاصة لينظر فى أثرهما)  
**خريوش :** هى مودياه فىن يا صاصة ؟  
**صاصة :** (ضاحكا) عند عبد العال حسره عليها.. حسره عليها  
**خريوش :** عبد العال مين؟ ده بتقول له الأمانة فى الخزانة  
**صاصة :** يا راجل إحنا مالنا.. باقولك ايه.. ماتيجى نقعد على رواقه  
عندى فى اودتى.. الحاجة خرجت والوله مينى زاح البحر مع  
باقى الأولاد.. نقعد كده نرص لنا حجرين ونشغل شريطين  
كاست حلوين ونبهنس الأمرجى  
**خريوش :** بس آنى لازم نروح زهراء العجمى النهاردة.  
**صاصة :** مش لازم ولا حاجة إيه أحلى بدمتك المزاج ولا الشغل.  
**خريوش :** الاثنين مع بعض.. مشوار العجمى .. مزاج وشغل  
حتة دين نتفه مزه ماتقولش لعدوك عليها مكس باخد بالعكس.

صاصة : مكس؟ تقصد  
(من نافذة الطابق الأول تطل بثينه.. فى الخامسة والأربعين..  
وتبدو أكبر..)  
بثينة : يا عزت .. يا حاج  
خريوش : أخ .. اه اصطادتتى قبل مازوغ (يرفع صوته) خير يام وليد؟  
بثينة : حلو إنك لسة ما مشيتش.. أنا عايزاك فى حاجة مهمة  
خريوش : ماتستناش لبكره؟.. أنا اتأخرت ولازم أكون فى مصر قبل  
الساعة ثلاثة.  
بثينة : " ده حاجة مهمة وما تستناش..  
خريوش : ليه؟.. حاتحمض؟.. حطيها فى الثلاجة !  
صاصة : الله! حلوه.. (يتبادلان دق الكف)  
بثينة : يا عزت .. أنا باتكلم جد..  
خريوش : يوه.. طيب ما تقولى .. فى ايه ؟  
بثينه : أقول كده وأنا هنا .. وانت تحت؟ ما نجيب مكروفون ونسمع  
الناس كلهم أحسن !  
خريوش : (مغمغما) الصنف ده على قوى قوى يا صاصة.. يخرب بيته  
(رافعا راسه وصوته) مش قادر أطلع لك يا بثينة.. انزلى لى  
انت..  
بثينة : يا راجل دا موضوع حساس.. ما ينفعش قدام الناس...  
(تظهر هندام نازلة من السلم)  
هندام : ما تطلع لها بقى ياسى عزت..  
خريوش : مش ناقص إلا مرات البواب كمان.. على الحرام ما أنا طالع !  
صاصة : خلاص.. احنا حانفضى المطرح. تعالى يابت هندام.. انزلى انت  
يا بثينة هانم  
(يتحرك فى اتجاه شقة الحاجة.. وتختفى بثينة من الشباك)  
هندام : معلش آنى خارجة أجيب طلب نسيته

صااصة : يابت بدرى على الطلب.. تعالى روقى الشقة قبل الحاجة زيزى  
ما ترجع وتطين عيشتك

هنندام : أحسن ما تطينها انت.. (تخرج مسرعة)

صااصة : (قبل دخول شقة الحاجة) خد راحتك وكبر دماغك وماين لغاية  
ما تقول الكلمتين بتوعها وتكت انت

خريوش : (بعد خروج صااصة) انت بتقول ايه يا سطل (نظر فى ساعة  
يده).. الوقت بيجرى (تدخل بثينة من مدخل السلم).

بثينة : (وهى تحمل لفافة فى يدها) آدينى نزلت لك يابو وليد

خريوش : أهلا وسهلا.. خير؟ ايه الموضوع الملهب اللى ما يستتاش لبكره..

بثينة : حاجة نسيتهها ولازم تاخذها معاك !

خريوش : حاجة ايه دى ؟

(تفتح اللفة وتخرج منها كيس هدايا.. تلوح بها أمام عينه فيفاجأ)

بثينة : ايه رأيك؟.. مش دى أمانة برضه واخذها لحد وكنت حاتنساها ؟

خريوش : دى... دى... دى كانت فى العربية.. ايه اللى طلعتها الشقة؟

بثينة : انت مش اديت لشعبان المفتاح ينضيفها بره وجوه؟.. الجدع لقى

الحاجة.. طلعتها خاف لتكون ناسيها.. كتر خير.. حاتقوللى ايه

اللى فيها ولا افتحها (تخرج من الكيس علبة مجوهرات ملفوفة

فى ورق من هدايا مزركش)

خريوش : (وهو يختطف العلبة) اوعى! دى.. أمانة زى ماقلتى.. بتاعة

عبدالسميع أبو راضى.. نسيها عندى فى العربية.

بثينة : والله.. غريبة.. واحد غيره كان خوتك تليفونات يسألك عنها..

اقله يتظمن إنها معاك

خريوش : ماهو.. تلاقية حاول يطلبنى عالموبايل وأنا قافلة.. فكرينى

اطلعى ابعتيه مع البت صباح

بثينة : انت جرى لك ايه.. ياعزت.. مش اديت الموبايل لحسام امبارح

وقلت له إن معاك واحد تانى.

خريوش : آه.. والله. افكرت.. أصلى بينى وبينك الواد صاصة ده عكمنى  
سيجارتين ملغمين تولونى كانوا متمونين كويس.. يا خرابى على  
دى ظهريايه أما أجرى الحق مواعيدى..

بثينة : استنى إزاي حاتسوق وانت كده ؟

خريوش : أسوق وأنا كده.. وأبو كده.. وأم كده.. وكده وكده.. هاهع.. سلام  
يابسبس

بثينة : (يتحرك فتعترضه) امال فين الموبايل التانى ؟

خريوش : هناك فى العربية (يزوغ منها ويسرع خارجا)

بثينة : (تهتف فى أثره) لو كان هناك كان شعبان لقاء .. عزت... يا  
عزت (تقف جامدة.. حزينة) ... رايح لها!.. وبعدين؟.. نفسى  
أعرف حاجة واحدة بس.. المخفية دى واحدة زى اللى قبلها  
يومين وتغور.. ولا

لولا : (تدخل لولا .. تتحدث فى الموبايل..)

كان ضايع يا بلبل.. ماكانش معايا.. مين اللى رد عليك؟.. دا حته  
سواق تاكسى مالوش دعوة بحاجة.. هالة مع مريت وأصحابهم  
طلعوا البحر.. هما كمان قافلين موبايلاتهم؟.. إيه جرس  
بيضرب وماحدث بيرد.. الاثنين؟ غريبة (تمر بثينة) ازيك يا  
بثينة هانم

بثينة : (ببرود.. وهى تتحرك خارجة) أهلا

لولا : دى جارتى ياوله.. خلاص لما هالة ترجع حاقول لها.. بالسلامة  
(تغلق الموبايل)

صاصة : دانت جبتي الموبايل ايه ..

لولا : أمال!.. أنا ماحدث ياخد منى حاجة ..

صاصة : والساعة الروليكس ؟

لولا : انت بتصدق برضه؟ دا راجل خلل.

صاصة : المهم.. عملتى ايه معاه.. مشتيه إزى ؟



**لـولا :** أنا لا مشييته ولا قعدته.. سبتة لعمك عرفه يتصرف معاه  
**(تضحك فرحه.. تخرج إلى شقتها)**  
**صااصة:** آه .. يبقى نهاره مش فايت  
**(تدخل الحاجة زينة)**  
**زيننة :** امال فين المخبل على عينه شعبان؟ .. وفين البت هندام ؟  
**صااصة :** ولا أعرف ..  
**زيننة :** والوله ميمى.. ماشفتوش ؟  
**صااصة :** حاشوفه فين يا زيزى؟ .. انت مش قلتي انه راح مع الأولاد  
**البحر؟**  
**زيننة :** أيوه.. لكن عماله أضرب له عالموبايل مايردش  
**صااصة :** تلاقيه عامله عالسايلانت.. ولا مش سامعه من دوشة  
**البلاج..**  
**زيننة :** قلقانة عليه.. (تجلس على الكنبه فى صدارة الساحة... وتضع  
**الموبايل وحقيبة يدها)**  
**صااصة :** دلوقت يشوف الميسد ويطلبك.. على فكرة.. انت مبوظه الواد ده!  
**زيننة :** وبعدين يا صااصة؟ .. حانفتح الموضوع ده تانى وانت عارف انه  
**بيعفرتنى..**  
**صااصة :** (وهو يجلس على حافة الشرفة بجوارها) أنت أختى يا زينات  
**وماقدرش أغشك.. وانت عارفة أنا باحب ميمى قد ايه.. زى ما**  
**يكون ابنى واكثر .**  
**زيننة :** عارفة يا صااصة.. انت كمان عارف أنا ما ليش غيره. وانه هو  
**اللى يهمنى فى الدنيا دى كلها.**  
**صااصة :** ايو بس الدلع له حدود. والفلوس الكثير من غير حساب بتخسر  
**الأولاد.**  
**زيننة :** ياواد يا مُنصح وما ينصح الا أنت.. يا خويا خليك فى حالك  
**وبص لروحك.. وفكر فى اللى انت.. فيه.. راجل عدى فوق**

الأربعين سنة وراقد فى بيت أخته لا شغله ولا مشغلة.. حياته  
أكل وسهر ومخدرات..

صاصة : ما تبتيش موال المقيطة والمعايرة يا زيزى.. انت عارفة انى معايا  
بكالوريوس اقتصاد وعلوم سياسية بتقدير جيد جداً..

زيننة : وعملت بيه ايه يا ضنايا؟.. قعدت عالقهاوى بالنهار.. وفى الغرز  
بالليل.. تخرج منها .

تتلطع هنا وهناك وياخدوك تحرى.. ولولا أخذتك فى حضنى  
ولميتك فى بيتى كنت زمانك لابس جناية ومرمى عالاسفلت أو  
غرقان فى المالح للسّمك يمزمز فى لحملك! (تلاحظ رد فعله كما  
لو كان يوشك على الإغماء تلين لهجتها) .. ايه اللى جراك  
ياوله؟.. مين اللى عمل فيك كده.. دانت كنت زينة الشباب.. كنت  
وردة مرعرة على عودها..

صاصة : (ينهض) أنا مسطول ودماغى مش موزونة.. ومش عايز أتكلم  
يا زيزى.. وميت مره أقول لك ارمى طوبتى.. وارمى لى هدومى  
فى الشارع واكرشينى. تبقى عملتى فى جميل وعملتى طيب  
لنفسك.. وبلاش كل شوية تمسكى السكينة وتشرحى فى جلدى  
وتخرينى دم.

زيننة : طب ادخل وارتاح دلوقت يا جابر.

صاصة : جابر؟ ايه اللى فكرك؟.. الله جابر أبو الوفا الرشيدى. كأنه اسم  
واحد تانى ليه مش بتندوهولى بيه

يا زيزى؟.. (يمسك الشرفة ويتجه ليجلس بجوارها).

زيننة : وماله صاصة يا جابر ؟

صاصة : لازق فى زى الشامة اللى فى بطن رجلى

زيننة : كارهه ياوله ؟

صاصة : لأنه أنا النهاردة.. وأنا عايز أنا بتاع امبارح..

زيننة : تعالى.. تعالى على دراعى (يستسلم صاصة لعناقها) انت اللى

سميت نفسك على فكره. أما كنت تروح لام جابر وتقول لها  
أمه.. عايز صاصة.. تديك الشلن تشتري بيه المصاصة.. وتجلى  
تجرى وتقول لى صاصة وأنت لا.. صاصة وأنت لا.

صاصة : مين اللى كان بيغنى لى؟.. انت ولا أمى ؟

زيننة : أنا.. كنت باعاكسك الأول.. وبعدين بقيت أخذك فى حضنى  
وانيمك وأنا بغنى لك (تغنى) صاصة الهجاصة البصباصة ! فى  
عينها تندب رصاصة

صاصة : (وقد أوشك على النوم فعلا) الله.. كأنه حضن أمى..

زيننة : مانى اللى اتعهدتك بعد ماسابتك ابن ست سنين.. (تهدهده)..

هيه ياللايه.. يارب تمام يارب تمام.. وأجيب لك جوزين حمام.

صاصة : (ينفض متخلصاً من حضنها) لا مابقاش هو.. ما عادش

متعطر بريحة الصابون النضيف البرىء بتاع زمان.. دلوقت بقى

كوكتيل روايح.. صندل هندى عود خليجى.. على بارفانات

فرنساوى وطلليانى وأمريكانى.. نفس ريحة الأود اللى بتأجرىها

للمصيفين. وقبلها كنت مشغلاها فى الكار.

زيننة : (تنفض وتنهض غاضبه) اخرس.. زمان خلص وراح بكل اللى كان

فيه.. وحجينا وتبنا.. تتحرك مستعرضه المكان) وعاشين بما يرضى

الله.. البيت ده.. وبيت ميامى.. بأجرهم فى الحلال فى النور..

صاصة : ولولا ؟..

زيننة : سمسرة.. وعقارات.. بيع.. وشرا.. تجارة

صاصة : ولولا ؟..

زيننة : وربنا يبارك فى التجارة.. ويفتح على أصحابها من وسع

صاصة : (صارخه) ولولاً ؟..

زيننة : (تستدير إليه غاضبه) مالها ياولة؟ مالها؟.. بنت غلبانة بتربى

أختها ومابتأذيش حد.. وواخده الشقة صيف وشتا ما بتأخرش

دقيقة واحدة فى دفع الشهرية.

- صاصة :** بس سمعتها يعنى ولا موأخذه....
- زيننة :** (تقاطعه فى صرامة) ولا كلمة.. ولا نفس..
- صاصة :** على رأيك.. بلاش نحسس على روسنا بس عندى سؤال صحيح لولا تقرب لك.
- زيننة :** انت كمان حاققول زى ولاد الهرمه إلى مطلعين إشاعات أنها بنتى ؟
- صاصة :** لا طبعاً. أنا متأكد أنها مش بنتك.. بس جازز تقرب لك برضه..
- زيننة :** (بغيط) طب واللى تقرب لى ما هى تقرب لك انت كمان.
- صاصة :** مش شرط.. ممكن تكون قريبة المرحوم سعد الأشقر.. أبو ميمى..
- زيننة :** (متجهة) الله يرحمه!.. ماتسينا م السيرة دى بقى !
- صاصة :** دى مش إجابة يا زينات..
- زيننة :** وانت مالك ومال سعد ولولا واللى يقرب لهم واللى يبعد عنهم ؟
- صاصة :** إلا مالى؟.. مش سعد ده اللى بعثى الدنيا عشانه وأول ما بعثى بعثى أخوكى الصغير.. الأمانة الدفيانة فى حضنك.. رميته على طول دراعك ولاهمك
- زيننة :** ورعيتك وصرفت عليك بدل الجنى ألف.. وبدل الألف عشرة..
- صاصة :** من بعيد لبعيد.. سيبتينى اتقلب فى بيوت الناس من حضن لحضن ومن ايد لايد.. ومن رجل لرجل.
- اتلاعبت وانضريت واتأخدت على قفايا واتشطت بالقديمة..
- زيننة :** ليه؟ ماتت لسه قايل بعضمة لسانك إنك اتخرجت بتقدير..
- صاصة :** الحنة اللى فاضل فيها الروح منى.. لكن الباقي.. جته هامده.. شلتها بايديكى علشان تعيش معاكى تهشى بيه الواغش زى البو ولا خيال المآته. وانت عارفه إنه خلاص مافيهوش. وما بقاش ينفع لحاجة.. ديك النهار دخلت على ابنك ميمى لقيته مقرفص على السرير وحاضن رأسه بدارعاته وجسمه.. كله بيترج من

عزم البكا .. اتفرغت .. وقلت . له يا محمد صارحنى وفضفض  
لى أنى خالك .. بص لى من فوق لتحت وقاللى ياريتك تنفع .  
خليك فى حالك .. ونط فات من قدامى وسابنى ..

زيننة : بس برضه بيعمل لك حساب (وقد شردت بعينها) .. ويجرى  
ويلعب ويتشاقى .. ويرجع موطى فى الأرض .. ويتسحب علشان  
ماتشوفهوش ..

صاصة : ( بضحكه ساخره مبتورة) .. بتضحكى على نفسك . داجيل مايعلم  
بيه إلا ربنا .. إنت عارفه إن أولاد زباينك فى الشقق الصيفية دى  
ملومين على بعض وعاملين عصابة ؟

زيننة : (تنتفض باستنكار وجزع) بتقول ايه يا جابر ؟ عصابة .. عصابة  
ايه كفى الله الشر ؟

صاصة : أنا مش متأكد .. بس متهيالى .. دايمًا خارجين داخلين .. نازلين  
طالعين مع بعض .. يتوشوشوا ويهمسوا .. شفتيهم وهما بيرقصوا  
على الشط بالليل ؟ من كام ليلة .. (شاردا) كان منظرهم يجنن .  
وهم لما يرقصوا مع بعض يبقوا عاملين عصابة ؟ على النعمة ..  
زيننة : انت دماغك سوست خلاص  
(يدخل عرفه ...)

عرفه : قلت لهم ما حدش صدقتنى ! شاورت لهم علشان يشوفوا .. ديروا  
وشوشهم .. مع أن كان مالى الدنيا حواليتهم وسارح فى كل حته .

صاصة : هو ايه يا حضرة الصول ؟

عرفه : السوس يابنى ! السوس ! فاكراه يازينه ؟

زيننة : (للخارج) أه .. دى اشتغلت .. ونهارنا قل ..

عرفه : لسه موجود .. ويكثر .. الراجل الى جه ورا لولا وأخذته عندى  
فى الملحق .. نفضته نزل منه سوس بالهيل .. طوابير .. طوابير ..

زيننة : نهارك مش فايت ! يعنى إيه نفضته يا عرفه ؟

**عسرفة :** برة الأوضه ما تخافيش.. سحبته عالجنينه المهجورة اللى ورانا ..  
ونفضته .. مأهو ماكانش ممكن أسيب السوس يسرح فى  
أوضتى .. تصوروا يطلع مليونير وعنده أطيان وعقارات وتجارة  
ملهاش أول من آخر. لكن مزاجه غريب جداً .. لازم يصطادهم  
من عالكورنيش يسرح بعربيته .. ولما يلمح واحدة منهم يفتح لها  
الباب ( غاوى الصنف ده بالذات .. مايعجبوش الصنف الغالى  
اللى فى القطارين بيضوى ويحط مسك ...

**زيننة :** (منفعلة) جرى لك إيه يا عرفة النهاردة؟ ماتخللى نهارك يعدى ..  
**عسرفة :** النهارده غير أى نهار يازينة ..

**صاصة :** طيب فهمنى أكثر\* يا عم عرفة ..

**عسرفة :** باين قدامك لو بصيت يا جابر .. ماهيش مستخبية ولا فى  
الضلمة .. دى فى عز الضهر الأحمر. قاعدين تعملوا إيه فى  
روحكم .. وسايينهم؟ ميمى فىن دلوقت يا زينة؟

**زيننة :** آه .. دى كل السلوك دخلت فى بعض ..

**عسرفة :** (يتحرك خارجاً) ميمى فىن يازينة ... ميمى فىن يا زينة

**صاصة :** (مخضوضاً) .. سامعة يا زينة ؟

**زيننة :** سامعه يا وله ..؟ انت تايه عن تخاريف عرفة ؟

(يدخل السنجابى .. خمسينى يحمل صندوق الحلويات ..

ويرتدى سروال اسكندرانى فوق تى شيرت يعلوه صديرى

مفتوح .. وعلى رأسه طاقيه صياد)

**صباح :** عايزه حاجة من سوق السمك يا ست الحاجة؟

**زيننة :** لا يا صباح ..

**صباح :** قوليلى يا ست الحاجة آنى وحشة ؟

**زيننة :** مين اللى قال ؟

**صباح :** يعنى لو لبست واتمكيجت كده زى الهوانم .. انفع ؟

**زيننة :** (بشء من الغضب) تنفعى لأيه يابت ؟

صباح : تشغليني فى السياحة زى الست لولا ؟  
زيننة : (مبهوته) ومين اللى قال لك يابنت الموكوسة أنى اللى مشغلة  
لولا ؟  
صباح : معنى.. كل الناس بيقلوا.. الخضراتي.. والجزار.. والفران.. والمكوجى  
زيننة : (وهى تكظم غيظها) صلاة النبى! تعالى يا صبوحة  
صباح : على فين ؟  
زيننة : حاتشوفى.. (تنادى) هندام.. يابت ياهندام  
(تدخل قادمة من كالوس المقدمة)  
هندام : نعمين يا ست الحاجة ؟  
زيننة : أودتك فاضية ؟  
هندام : أيوه.. شعبان لسة مارجعش.. وانى خلصت توضيبها  
زيننة : (تمسك بيد صباح.. وتتحرك نحو الكالوس) طيب... حاستلفها  
منك خمسة علشان عايزه البت صباح فى كلمتين..  
هندام : وماله.. اتفضلى .. عايزانى معاكى ؟  
زيننة : لا.. خليكى هنا  
(تخرج زيننة وصباح.. تتحرك هندام إلى الكنبه)  
هندام : أنى عارفة ماخدتهاش جوه شقتها ليه؟.. آه.. اريح شوية على  
كرس العرش.  
(يظهر شعبان داخلا من البوابة.. يعبر فى طريقة لكالوس  
المقدمة) على فين يا شعبان.. تعالى  
شعبان : انت هنا؟. ومالك متبكه كده.. وقاعده براحتك.. مش خايفة م الحاجة  
هندام : الحاجة عندنا ومعها البت صباح  
شعبان : أخ.. يبقى فيها علقه  
(صوت صراخ صباح)  
ص. صباح : (خارج المسرح) آه.. آى.. أبوس رجلك ياست الحاجة.. آيا بويا..  
آخ أنا فى عرضك. حرمت .

(صوت الحاجة مختلط مع صوت رجل فى عراق)

الوصول: تعالى يا صباح ماتخافيش.. مش حاتم ايدها عليكى تانى

شعبان : ارمى.. حضرة الوصول طلع لها..

(من كالوس المقدمة تندفع زينة غاضبة لاهسة وخلفها الوصول..)

بملايس عسكرية بلا رتب .. حوالى ستون عام طليق اللحية

والشارب صباح التى تبكى وقد تمزقت ثيابها وتشعث شعرها)

زينة: لسه مش مكفيك اللي عملته.. جاى ورايا كمان ؟

الوصول : مانت مش راضية تبطلى افترا.. نازلة ضرب فى المسكينة زى

ماتكون أذنبت الذنب اللي مالوش استغفار..

زينة : مآنى قلت لك الحكاية !

الوصول : وايه يعنى؟ قالت آيه غير اللي الناس بتقوله ؟

زينة : عرفه انت كده بتتقضى الاتفاق اللي بينا...

الوصول : الاتفاق اللي بينا سقط بالتقادم.. مدته خلصت.. رَوَحى انت يا

صباح وانسى حكاية السياحة دى.. أصلها زغللة عينين يا بنتى

آخرها عمى حيثى.

صباح : يعنى ماجيش تانى يا ست الحاجة؟

زينة : (تشيع عنها). اسمعى كلام... حكيم الزمان..

صباح : يعنى مسامحانى؟...

زينة : غورى من وشى الساعة دى

صباح : حاضر (تتحرك متلفتة من الأثم وتخرج)

(تلتفت زينة إلى الوصول).

زينة : خلصت المنظر بتاعك يا عرفه؟ اتفضل على أوضتك!

الوصول : هى الساعة كام؟ (يتحرك معه لتوصيله)

زينة : واحدة ونص ...

الوصول : والنهارده ايه ؟



زينة : الخميس

الصول : موافق كام ؟

زينة : ستاشر منه ...

الصول : ستاشر منه سبعة وستين بس مالحقتهمش.. المنبه ماضريش..

أو ضرب وأنا ماسمعتوش (يتوقف عند كالوس الخروج وتنظر

فى ساعة) اتأخرنا؟.. مش كده؟ معلش نحاول برضه

(ثم يخرج)

زينة : معاه يا شعبان لغاية ما يرجع أودته

(تحرك إلى الكنية.. تتهالك عليها) يا.. مالى تعبانة كده

النهاردة

هندام : ( تهرع إليها) سلامتك يا حاجة.. البت صباح فرهدتك

زينة : هو فرهدنى أكثر يا هندام

هندام : قال صحيح يا ست هانم ؟

زينة : هو ايه اللى صحيح انتِ كمان ؟

هندام : بيقولوا انه.. انه يعنى.. ادينى الأمان الأول

زينة : وعليكى الأمان.. ياللا انطقى

هندام : يعنى مش حا تضربينى زى ماضريتى صباح ؟

زينة : مابقاش فى حيل اضرب قطعة..

هندام : بيقولوا انه بيقى أبو المحروس ميمى.. يعنى جوز حضرتك ؟

زينة : (تحقق فيها.. بعد لحظة) مين دول اللى بيقولوا؟ عرفه بيقى

سعد؟.. ازى؟ ياريت سعد؟.. سعد ركب البحر ولا رجعش

يا هندام.. كنا الفجر.. صحانى.. وصحى محمد وسلم علينا..

وباسنا.. وقال مشوار صغير.. حايعدى البحر يادوب ويرجع..

سنة ورا سنة.. بقوا خمسة.. بقوا عشرة.. بقوا عشرين والدنيا

اتغيرت (تنهض متناقلة) فى يوم الباب خبط.. ودخل عرفه..

الشمس حارقاه.. ورجليه وارمة وبتشلب دم.. كان حافى..  
وهدمته الميرى مقطعة.. أثاره رجع من سيناء ماشى.. سألنى  
عن سعد قال انه ابن خالته.. وقع مسروق. شلناه وحطيناه فى  
الأودة اللى جنب أودتكم فضل فيها لغاية النهارده.. وعقارب  
ساعة واقفة على يوم ماجه ستاشر منه سبعة وستين..

(من البوابة يندفع خريوش داخلا...)

خريوش : (وهو يتجه مسرعاً إلى مدخل السلم) أنا يتعمل فى كده؟ أنا لا..  
دانتوا ماعندكوش فكرة.. دانا فى شرى بابقى بلوه مسيحه..  
مصيبة سودا.

زيننة : مالك يا سى عزت !..

خريوش : بعدين يا حاجة.. نازل لك.. (يخرج من مدخل السلم)  
(من باب شقتها تدخل لولا..)

لولا : وبعدين يا أبله زيزى والبنتين ما بيردوش

زيننة : انهى بنتين دول يا مهروشه

لولا : هالة ومريت.. موبايالاتهم ما يتردش.. وأنا قلقانة قوى

زيننة : (تفتح نافذة شقة بثينة) وأنا حاعمل لك ايه يابيت؟ تلاقيهم فى

البحر وسايبين تلفوناتهم مع هدومهم

بثينة : الحقينى يا حاجة زينه.. عزت ماسك لى سكينه (ثم يخرج)

(من الدخل تبدو داليا)

داليا : فى ح حاجة غلط حصلت

نجوان : (التي نزلت فى أثرها).. أنتِ أتلطشتى فى نافوذك يابيت ؟

داليا : يا بابا.. يا طارق.. حد فيهم حصلت له حاجة وحشه

نجوان : ورايحة فين ومجريانى وراكى

داليا : حاشوفهم وارجع مش حا غيب

زيننة : مالها بنتك يا ست نجوان ؟

نجـوان : جالها الدور يا حاجة .. تبقى عادية وكويسة .. تنام فجأة .. تحلم ..  
تقوم بالشكل ده .

(بثينة تدخل فى هلع بملابس البيت وراء عزت)

بثينة : الحقيقى يا حاجة حوشيه عنى  
(تتجه بجوار زينة على الكنبه ...)

خريوش : ماحدش حايجوش عنك .. لما يكون مين بالذى .. حادبعك يعنى  
حادبعك

زينة : ياراجل فوق لنفسك .. تدبح مين ؟ هى فرخة ؟

خريوش : من فضلك يا حاجة .. دى أمور عائلية بينى وبين الست بتاعتى ..

زينة : والست بتاعتك وقعت فى عرضى .. يعنى بقيت فيها غصب  
عنك ..

خريوش : يعنى ايه ؟

زينة : يعنى تهدى كده وتقول ايه اللى حصل ؟

خريوش : انسى عليه فيها خاتم سولتير فى العربية وشعبان يطلعه

بالفلاط .. تقوم الهانم تفتحه تأخذ الخاتم وتحط مكانة زلطة ؟

زينة : وهو الخاتم بتاع مين ؟

بثينة : أيوه اسأليه يا حاجة ..

خريوش : ماحدش له حاجة عندى .. أم .. إن شاء الله أكون متجوز عشرة ..

أنا حر

بثينة : متجوز ؟ .. يا مصيبتى .. يا خرابى

لـولا : يالهوى متجوز

(تنهار وهى تلطم خديها)

(من المقدمة يدخل سنجابى .. حاملا مجموعة ملابس الأولاد)

السنجابى : انتوا عرفتوا ؟ مين قال لكم ؟

خريشوش : مين قال لنا ايه؟ وانت تطلع مين؟ .. وايه الهدوم دى  
نجوان : (تجرى نحوه) دا التيشيرت بتاع طارق اللى لسة باباه جاييهوله  
زيننة : (تنهض وتسرع نحو) الله؟ .. وده مش الشورت بتاع ميمى؟ فى  
ايه يا سنجابى ؟  
سنجابى : ربنا يصبركم .. كلهم فى ساعة واحدة .. الستة غرقوا .

## المشهد الثانى

المنظر : مكتب النوبتجى فى قسم البوليس حول مكتب الضابط  
النوبتجى تجمع كل من خريوش وصاصة والأحمدى  
النوبتجى : وسع منك له .. يا جماعة مش معقول كده .. كده مش ح ينفع ..  
وسع منك له أنا عايز هدوء .  
مظهر : مكانك يا مواطن منك له  
النوبتجى : يا جماعة بالراحة علشان نفهم بعض كويس ..  
الرقيب : تمام يافندم .. احنا أخذنا أقوال العيال بتوع الانترنت .. وقفلنا  
محاضرهم  
النوبتجى : خلاص .. خلاص  
الرقيب : قوم يا واد منك له  
النوبتجى : يامظهر خد الصيع دول ارميهم فى الحجز .  
مظهر : يالا يا حبيبي انت وهو  
النوبتجى : احنا لغاية دلوقت بالنسبة لنا مفيش حد غرق .. حراس الشاطئ  
وعمال الإنقاذ ما بلغوش عن أى حادثة غرق و...  
الأحمدى : (يقاطعه) واحد قال انه شافهم على البلاج وشافهم وهم نازلين  
المية ..  
صاصة : وماشافهمش وهم خارجين .. يبقى ايه ؟

النوبتجى : أنا مش فاضى للرغى ده  
خريوش : يا اخوانا حضرة الطابط عنده حق.. ماهو الغطاس ده مش  
قاعدهم مخصوص.. وجايز شافهم وهم نازلين وانشغل فى أى  
حاجة..

النوبتجى بالضبط.. والأهم من ده كله إن البحر مارماش جشث..  
مظهر : تمام يافندم.. احنا قبضنا على الصايح ده  
النوبتجى : ارميه فى الحجز.  
مظهر : قدامى ياولا  
صاصة : ماحنا مانعرفش التيار سحبها لحد فين..  
النوبتجى : ماجلناش بلاغ بظهور أى جثة بطول الشط.. جالك بلاغ يا بنى  
أمين شرطة : لا يافندم  
النوبتجى : شفت

صاصة : بس إحنا عندنا شاهد شاف كل حاجة.. السنجاى.. ببيع الحلوة  
اللى جاب هدومهم.

النوبتجى : إحنا حجزناه واتحفظنا على الهدوم بشكل مؤقت.. ودلوقت لو  
سمحتم.. إحنا عملنا محاضر غياب.. ومنتظرين لغاية بكرة على  
الأقل.. يعنى تفضلوا تروحوا ولما تظهر أى حاجة حانبلفكم .

الأحمدى : يانهار اسود ونروح نقول ايه لحريمننا؟.. دى حالتهم صعب  
خالص.. نجوان جالها صدمة عصبية مابتكلمش

صاصة : وأختى راقدة فى السرير واخده منوم.  
خريوش : أنا مراتى أول ما سمعت الخبر وقعت ونقلناها المستشفى  
النوبتجى : ما عايا يامظهر.. ماهو ده أدعى تقعدوا جنبهم وتراعوهم.. لغاية  
الأمر ما تبان.. ياللا كله بيتك... بيتك

صاصة : ايه بيتك بيتك دى..؟ احنا فراخ ؟  
النوبتجى : أنا غلطان.. انى عاملتكم معاملة حسنة.. يا رقيب ذكى  
خريوش : حضرة الطابط عنده حق يا جماعة.. إحنا فعلا لازم نكون فى

بيوتنا مع حريمنا فى اللحظات العصبية دى .. (ينظره فى  
ساعته) .. ومانسبهمش الوقت دا كله .. (يتحرك الآخرون  
لينخرطوا)

النوبتجى : عين العقل ياللا بالسلامة .. يا شاويش مظهر .

مظهر : فى الحجز يا فتندم

النوبتجى : وبعدين .. مفيش تهمة نحجزه عليها ؟

الرقيب : نحجزه .. يافتندم

النوبتجى : فكر معايا .. فكروا معايا

مظهر : بدون علام ساعاتك .. محضر تحرى .. ويبات .. ويمشى الصبح لو  
ما ظهرش ضده حاجة ..

الرقيب : خلاص يا زفت .. بدون علام ساعاتك .. محضر تحرى .. ويبات ..  
ويمشى الصبح لو ما ظهرش ضده حاجة ..

النوبتجى : طيب ما أنا عارف انت ح تعمل شغله ولا إيه .. هاته ...

الرقيب : هاته .. يا زفت

مظهر : تمام سعادتك .. (يخرج بعد أن يحيى)

النوبتجى : (موجها الكلام لشرطى برتبة رقيب أول «الباشجاويش» منهمك  
فى الكتابة) . ايه رأيك فى الحدودة دى يا ذكى؟

الرقيب الأول : ستة يفرقوا مرة واحدة؟ صعبه سعادتك .. (جرس تليفون)

النوبتجى : (وهو يتجه للتليفون) تمانية يا ذكى .. مش ستة .. فيه اتنين

بعدهم .. (يرفع السماعة) آلو .. أيو .. نعم ؟ اختشى بلاش هزار

(يغلق الخط بعصبية) قال ثلاثة غرقوا فى المنجرة .. معقوله دى ..

الرقيب الأول : تلاقيه واحد صايع بيعاكس

النوبتجى : دى حتى ما تخشش هنا (يدق على جيبهته) ما تنفدش

(يدخل مظهر وهو يدفع أمامه السنجاى)

مظهر : السنجاى سعادتك

النوبتجى : سيبه وروح انت .. (يخرج مظهر) قرب يا سنجاى

السنجابى : أنا كويس كده.. البعد عنكم غنيمه !  
النويتجى : وأنا ماسمعتش.. قوللى بقى ايه الحكاية.. بالظبط ؟  
السنجابى : مانا حكيتها من شوية رميتونى فى التخشيبه.. احكيها تانى  
علشان تودونى فىن؟ الحضره ؟  
النويتجى : باقول لك ايه؟.. أنا البلاغات دى فكت صواميل أعصابى..  
حاستسهل.. حاشتغل لك فى الأزرق.. يعنى أحسن لك تقصر  
يومى وتخليه يعدى  
السنجابى : ربك يقصر أيامك كلها.. عموما آنى تحت أمر الحكومة.. بس  
هاتولى صندوق الحلاوة بتاعى !  
النويتجى : هو فىن الصندوق ده ؟  
السنجابى : العسكرية رزق أخده منى وقاللى مش حاشوفه تانى !  
النويتجى : سيبك من رزق وأنا ضامن لك الصندوق يرجع لك...  
السنجابى : قالوا الغراب ضمن حداية..  
النويتجى : (يقفز واقفا فى غضب) بتقول آيه يا جربوع انت  
السنجابى : باحكى لك اللى حصل؟ مش تسمعنى؟ كانوا الستة واخدين  
شمسيتين وقبل ما يقلعوا هدومهم.. ويفضلوا بالميايوهات ندهوا  
على.. قالوا انهم مافطروش وأخدوا منى حلاوة.. وانى بنرص لهم  
الحلاوة كانوا بيتخانقوا.. جماعة عايزين يأجروا لنش ويدخلوا  
بيه جوه الميه..  
والباقين مستكترين أجرة اللنش بس  
النويتجى : بس إيه؟ رسيوا على ايه فى الآخر ؟  
السنجابى : آنى ادبتهم الحلاوة وأخذت فلوسى ومشيت وهم لسة بيتناقشوا..  
النويتجى : وشفتهم تانى أمتى ؟  
السنجابى : لفيت لفتى وبعدين رجعت.. لقيت الناس ملمومة على الشط..  
وبيصرخوا.. غريق.. غريق.. لقيت اللى اسمه طارق عند البرميل  
بيشب ويغطس.. يقب ويغطس.. وسألت الناس قالوا أنه آخر



واحد نزل.. شوية وما بانش.. جريت على المرسى اللى بيأجروا  
فيها اللنشات قالوا لى ما حدش أجر.. رجعت على جوز  
الغطاسين.. قالوا انهم لفوا الميه فى البلاج كله مالقيوش حد..  
طفل صغير قاللى إن خمسة نزلوا ودخلوا لجوه قوى.. والسادس  
صرخ وقال يانهار اسود العيال غرقوا..

النوبتجى : قمت واخذ هدومهم وراجع لأهاليهم !

السنجابى : بالظبط يا باشا

النوبتجى : أنت تعرفهم ؟

السنجابى : أعرف انهم وأهاليهم مأجرين مصيف عند الحاجة زيزى !

النوبتجى : وما جتلناش تبلى الأول ليه ؟

السنجابى : سبحان الله.. مش يمكن يكونوا رجعوا البيت !

النوبتجى : ويسيبوا هدومهم عالبلال ؟

السنجابى : أهو بقى.. اللى جه فى دماغى عملته ..

النوبتجى : طب إزاي يا سنجابى الناس اتلموا وقعدوا يصرخوا عالغرقانين..

ولما رحنا نعين مالقيناش حد شاف حاجة.. حتى الطفل الصغير

اللى انت بتقول عليه ؟

السنجابى : ما اعرفش .. آنى بنقول اللى شفته ..

النوبتجى : وعمال الإنقاذ كمان أنكروا روايتك وقالوا مفيش حد غرق !

السنجابى : ربنا طمس على عنيهم ! .. ماشافوش..

النوبتجى : ماشافوش ازى يا سنجابى؟.. دا الوقت فى عز الظهر.. انت

حكايتك مش ماسكه بعضها.. وممكن جدا تكون فيها جريمة..

وتكون انت عملت فى الأولاد حاجة.. شاويش مظهر خده على

الحجز !

(جرس تليفون يدخل الجاويش)

سنجابى : طب أنا راضى ذمتك انت يا حضرة.. دا كلام معقول ؟

النوبتجى : آلو؟ نعم؟ مين؟ (جرس تليفون آخر) رد يا مظهر

الجاويش : (يرفع سماعة أخرى) آلو .. إيه بتقول إيه ؟  
 النوبتجى : (جرس ثالث) رد يا ذكى .  
 الرقيب أول : (ينهض وهو يرفع سماعة التليفون) آلو .. مين ..  
 الصوت ١ : آيه البلاغات دى كلها يا نقيب لطفى ؟  
 مظهر : يا لا يا مواطن (يخرج الأحمدي وخربوش وصاصه)  
 النوبتجى : اوف دانتوا مرهقين قوى .. تعبتونى  
 الرقيب : تمام سعادتك  
 النوبتجى : إيه تانى  
 الرقيب : المحاضر دى تمضى عليها .  
 النوبتجى : .. (جرس تليفون)  
 رد يا مظهر .. يا مظهر .. يا زفت  
 (يدخل شرطى برتبة جاويش .. يؤدى التحية)  
 مظهر : تمام سعادتك ..  
 النوبتجى : رد عالتليفون  
 مظهر : (يسرع إلى التليفون ويرفع السماعة) آلو .. مين بيتكلم؟ نقطة  
 الشط .. شط إيه؟ (للنوبتجى) بلاغ عن اتنين غرقوا فى ميامى  
 يا فندم !  
 النوبتجى : بتقول إيه ..؟  
 مظهر : اتنين غرقوا فى ميامى يا فندم  
 النوبتجى : اتنين غرقوا فى ميامى طيب وأنا مالى ..  
 مظهر : وأنا كمان مالى هو أنا كنت اللى غرقتهم  
 النوبتجى : مش فى نقطة للشاطئ .. اقل يا مظهر .. مش ناقصين  
 مظهر : تمام جنابك (يفلق التليفون)  
 النوبتجى : اتنين كمان وفيه ستة قبلهم .. أوكازيون غرق النهاردة؟ قوللى  
 يا مظهر  
 مظهر : تمام يا فندم

النوبتجى : الجدع اللى اسمه سنجابى ده .. حاطيته فين ؟

الصوت ٢: كل الناس بتفرق عندكم ولا إيه ؟

الصوت ٣ : آيه اللى بيحصل فى نهاركم الأغبر ده ؟

الصوت ٤: الصحافة حاتشرحنا يا عجر !

الصوت ١: عايز تجيب قرار البلوه دى فى ظرف ساعة

النوبتجى : (وهو يدور حول نفسه) حاضر يا فندم .. حاضر سعادتك ..

مظهر .. سليمان .. عطية .. كل يجمع هنا حالاً

(تدخل مجموعة جنود الشرطة)

لجاويش : انتباه

(يستمر الجرس من أكثر من تليفون ثم ينزل من شبكة السوفيته

حيال مربوطة بسماعات تليفون)

النوبتجى : سامعين .. شايفين؟ .. حانروح فى داهية بإذن الله .. كل اللى

اختفوا .. كل اللى هربوا .. كل اللى طفشوا .. كل اللى ضاعوا ..

كلهم غرقوا .. وفيهم ولاد ناس تقال .. اقلبوا الدنيا .. انزلوا

البحر .. طيروا فى الجو .. اركبوا الهوا .. اتشعبطوا فى الشمس

قبل المغرب تدونى تمام .. لازم نعرف الحقيقة !

(ستار BLACKOUT)

نهاية، الفصل الأول

**صاصة :** د أنا اللى عايىز اعرفا. يا ريتهم يجوا ويقولوا كانوا شايفينا واحنا كده ولا كانوا مخدوعين فينا.

**لولا :** كان نفسها تهرب.. سمعتها ليلة بتحلم.. رجعت بدرى.. حودت اتطمئن عليها فى سريرها وميلت عليها أبوسها.. لقيتها بتحلم.. ويتقول إن المركب مستتياها ولازم توضب شنطتها بسرعة.. وإنها لو المركب فانتها حا تضيع.. وتبقى كده.. زى لولا.. (تصرخ) كله منها.. أختك.. الحاجة.. اللى مريانى ومرياك. واللى خلقتا كده

**صاصة :** خلاص يالولا.. آهى اتحطمت هى كمان ...

**لولا :** بعد ما حطمتنا؟.. ما عادوش فيه حاجة تصلح اللى اتكسر يا جابر.

**صاصة :** إلا اللى انكسر زيه.. عهد على أول مايبان لهم أثر. ألم كسرى على كسرك ونبقى واحد صحيح (متحولاً نحو داليا) وانت كمان يا آنسة داليا.. ولأنك لسة ما نكسرتيش لكن باباكى... ومامتك..

كسروا طارق أخوكى..

**داليا :** (غاضبة) مالكش دعوة بى ولا باخويا

**لولا :** لا.. مش كل يوم.. ساعات كنت بارىح يوم ولا يومين.. مانا بنى آدمه برضه د من حقى آخذ أجازة.. بس هى يا حبيبتي كانت فاهمانى.. عمرها ما سألتنى أى سؤال ماحبش أجاب عليه ولا عمرها لمحت بكلمة كده ولا كده.. بس أنا كنت مفهامها انى باشتغل فى أوتيل وردية ليل. وكانت مصدقانى.. مرة واحدة بس قالت جملة غريبة قوى..

**صاصة :** قالت ايه ؟

**لولا :** كنت بالبس واتمكيح علشان انزل.. لقيتها دخلت على وقعدت تبص لى قوى.. ضحكت وقلت لها جرى ايه يابت؟ بتبحلق لى كده ليه؟.. مالك يا حبيبتي؟ فىن وفين اتفكت عقدة لسانها...

(تتكس راسها خجلاً وحزناً)

**صاصة :** سكتى ليه يا لولا ؟.. ما تكملى .. عايز اعرف الجملة الغريبة اللى قالتها لك

**لـولا :** (منقضة) وعايز تعرف ليه وانت عارف . واختك عارفة .. مش مهم الكلام لأنه ماكانش حروف لها معنى .. دا كان صريخ .. انت مش كده يا أبلة لولا .. فهمت حاجة .. انت مش كده ايه أبلة ؟. كده ايه ؟ ومين اللى خلاه كده .. تقدر تقوللى انت يا جابر ..

**داليا :** امال ايه حكاية العصفير دى كمان ؟

**صاصة :** (متجاهلا سؤالها) لما تاخدى بالك بتسمعى ؟ ولا لما تسمعى بتاخذى بالك ؟ .. أكيد الأولانية .. بدليل أن مظاهره العصفير دى بتتعمل كل ليلة ساعة الغروب وما بنسمعهاش مش واخدين بالناس (ينهض وتحرك نحوها) يعنى ايه تاخدى بالك ؟ يعنى تهتمى ..

**داليا :** (تشيخ عنه) ماخناش فايقين للتخاريف !

**صاصة :** لك حق ! مانت استحالة تفهمينى (يقترب من لولا) لكن لولا حاتفهمنى .. (يجلس بجوار راسها على حافة النافورة) .. كنت شايفه هاله يا لولا ؟ .. عمرك سمعتها هى ولام ميرت ؟ .. طيب ميرت ضيفة .. قريبة من بعيد جت تزوركهم وتصيف لها يومين .. لكن هالة .. عايشه معاكى ..

**لـولا :** وماليش غيرها .. دى مش اختى .. دى بنتى .. ازاي ابقى عايشه معاها ومش شايفها ولا سامعاها ؟ .. يا مياخذتها فى حضنى ونامت على غنوة ياغنيها لها أو حكاية باجكيها لها ..

**صاصة :** امتى يا لولا وانت كل يوم ما بترجعيش إلا وش الصبح وبترجعى هلكانة يا دوب توصلى للسريير وتنامى للمغرب ؟



## الفصل الثانى

### المشهد الأول

المنظر: ساحة بيت الحاجة «زينة»

الوقت : غسق (بعد الغروب) ثم ليل تدريجى..

(Full Light) .. عند النافورة فى المقدمة تجلس لولا على الأرض

وقد أراحت رأسها إلى حافة النافورة .. حزنها واضح لدرجة

الدمار .. صاصة .. على درج الشرفة أما شقة .. داليا على الدرج

المقابل والثلاثة فى حالة صمت واجم حزين .. وصوت أسراب

العصافير التى تأوى إلى أوكارها من الأشجار يملأ الأسماع ..)

صاصة : (بصوت هامس / لنفسه ) العصافير مروحة! .. اشمعنى النهاردة

سمعتها؟ .. ما هى كل يوم بتروح ايوه .. أكيد كل يوم بتروح. وبتعمل

نفس الأصوات .. (بصوت أعلى) سامعين العصافير

داليا : هو ميمى مش يبقى ابن أختك :

صاصة : أيوه طبعاً

داليا : مانتش زعلان علشانه .. ولا قلقان عليه ؟

صاصة : ايش عرفك؟ بتفتشى على مشاعر الناس ؟

مارحتيش معاهم النهارده ليه ؟

داليا : كنت تعبانه ... وبعدين انت مالك ؟

صاصة : انت مش طايقانى! .. كل كلمة باقولها لك .. بتردى عليها بطوية!

داليا : لأنك بتقول حاجات غريبة مالهش أى صلة باللى إحنا فيه ...

صاصة : اللي إحنا فيه!.. تقصدي حكايات الأولاد اللي غرقوا؟..  
داليا : (بحدة) ماغرقوش! ماتقولش!.. وماتقولش حكايات. إحنا مش  
بنحكى حدوده..

لـولا : (تتحدث فى الموبايل.. وهى تقفز) حبيبتي.... آهه.. هالة بترد  
على.. آلو (بينما يتجهه صاصة وداليا زاهلين) هلول.. حبيبتي..  
انت كويسة ياروحى؟ انت فين بتتكلّمى منين؟

داليا : (تصيح) ماما.. بابا.. ماغرقوش.. كلهم عايشين (تجرى خارجة  
فى اتجاه السلم).. اتكلموا يا ماما.. اتكلموا يا بابا.. (تفتح  
شباك شقة الأحمدي.. ويطل منها..)

الأحمدي : بتقولى ايه يا داليا..

صاصة : طالع لكم.. (شعبان وهندام يدخلان الساحة من المقدمة)

لـولا : اتكلمت .. هالة اتكلمت

صاصة : أختها كلمتها فى الموبايل..

الأحمدي : أنا نازل..

(من شقتها تتقدم زينة)

لـولا : أيوه يا حبيبتي.. أنا معاكى.. ماقلتليش انتوا فين.. ايه؟ آلو..  
آلو.. هالة..

(فى إحباط).. الخط اتقفل..

صاصة : (يسرع نحوها) ناولينى التليفون يا لولا..

(تعطيه التليفون بطريقة آلية.. تبقى مكانها وقد عراها خوف

مباغت)

زينة : صحيح يا صاصة اللي أنا سمعته؟.. الأولاد ماغرقوش ؟

صاصة : هالة كلمت أختها.. (وهو يطلب على الموبايل)

زينة : بت يا هندام هاتى لى الموبايل بتاعى من جوه.. تلاقيه محطوط

عالكومودينو جنب السرير.

هندام : وهى تتحرك إلى باب الشقة حاضر.. يارب يكون بصحيح.



صاصة : ماحدش بيرد  
شعبان : (يتقدم نحوهم) .. طيب هي قالت ايه لست لولا ؟  
زيننة : أيوه صحيح .. قالت لك ايه يالولا ؟  
لـولـا : (وكانها تحلم) قالت لى ازيك يا أبله انت واحشاني ..  
صاصة : ماحدش بيرد يا لولا ..  
الأحمدى : (وقد دخل من جهة السلم) هيه .. الست اللى اتكلمت قالت ايه... ؟  
لـولـا : قالت إحنا كويسين قوى يا أختى . وموجودين فى مكان جميل خالص .. تصوروا سمعت بودنى زقزقة العصافير .. حتى جابر سمعها .. مش كده يا جابر  
صاصة : آه نهارك فل .. وليلتك بيضا .. (هو يعطيها التليفون) يا خوانا ماحدش اتكلم دى بيتيها لها  
(يدخل عرفه)  
عرفه : قلت لكم .. وحذرتكم .. ماحدش سمعنى .. وجبت الحارس .. شعبان .. مش انت الحارس يا شعبان ؟ عارف يعنى ايه حارس ؟ .. الحارس مش بواب سمسار عايش على جيوب الناس .. الحارس خفير .. ودورت عليك من النجمة يا خفير . ولما عترت فيك قلت لك .. بلغ الكل .. قول لهم يحوشوا الولاد عن البحر .. ماتحركتش .. ما بلغتش  
زيننة : ما تحطش همك فى شعبان .. ما جيتش لى أنا ليه وقلت لى ؟  
شعبان : والله يا ست الحاجة ما قاللى اللا بعد ما خرجوا .. وكمان كنت فاكرك بيلكلم نفسه وسرحان فى الملكوت زى عادته ..  
عرفه : اديكم فضلتوا نايمين على ودانكم لغاية ما ضيعتوهم ! (هو ينسحب خارجا) ضيعتوهم لأنكم طرش .. عمى .. وأنا .. كنت شاهد زور .. مافكش عقدة لسانه إلا بعد مالطه ما خربت .. وجه ينقى زى الغراب .. بعد ايه يا صوت الخراب . بعد ايه ..

(يخرج.. يسود الوجوم.. من شباك الدور الثاني تطل داليا)

داليا : بابا يا بابا ماما كمان كلمت أخويا طارق.. وقال لها إنه جاى فى الطريق

الأحمدى : الحمد لله.. وهى.. بقت كويسه ؟

داليا : الفرحة قومتها من السرير وبتغير هدومها

صاصة : يا آنسة داليا.. مين اللى طلب؟ طارق اللى طلبكم ولا مامتك اللى طلبته

داليا : هى اللى طلبته ورد عليها.. وقالها انه جاى وبعدين الخط اقطع.. تختفى) أيوه يا ماما

(تدخل هندام مسرعة بالموبايل)

هندام : الموبايل اهه يا ست الحاجة...

صاصة : اطلبى ميمى انتِ كمان يا زيزى..

زينه : (تطلب) بيرن... (يصمت الجميع فى انتظار)

آلو .. (بفرحة طاغية) ردّ بيقول آلو.. أيوه يا ميمى.. انتِ فين يا حبيبى جاين فى الطريق؟.. انتو.. آلو.. آلو.. الخط انقطع..

صاصة : كده بقت مفهومة

هندام : (تزغرد)... المهم اننا اتطمئنا...

لولا : الحمد لله.. زمانهم جاين

زينه : الحمد لله تجلس على الدكة

ياما انت كريم يا رب

شعبان : طب هما ما طلبوش ليه ؟

صاصة : سؤال وجيه يا شعب

الأحمدى : مافيش داعى للتشكيك.. كل شىء تمام والأولاد بخير وراجعين.

يام.. أنا دمي نشف ولما داليا كلمتنى رجعت على ملا وشى.. كنت لسه يا دوب واصل مصر.. (ينظر فى ساعة) لسه عندي فرصة ألحق مواعيدي

صااصة : مش حاتستنى أما الأولاد يرجعوا وتتطمئن على ابنك يا أستاذ  
أحمدى ؟

الأحمدى : الوقت يا أستاذ .. معلش .. أنا لى قعده معاه الخلبوص ده أول  
ما يرجع . (يتحرك خرجا)

دالسيا : (وقد دخلت مع نجون التى غيرت ملابسها وتأنقت) بابا رايح فين؟  
الأحمدى : (مكملا طريقه) مش حا تأخر يا حبيبتى .. بكره قبل الليل  
حاكون عندكم أنا سايب لكم فلوس كفاية .. وحاجيب لكم معايا  
تانى

نجوان : احمدى .. احمدى !.. إحنا استكفينا فلوس .. استنى عاوزه اتكلم  
معاك .

الأحمدى : بالراحة على طارق لما يرجع  
باقولك عايزاك  
(يخرج وهو يلوح لها بيده)

صااصة : ماتتعبيش نفسك يا هانم .. السلك مقطوع .  
نجوان : شفتكم ؟ .. شاهدين ؟ .. ابنه راجع م الموت ومش قادر يستنى يتطمئن  
عليه ماعندهوش وقت بيعجرى ورا الدقيقة والثانية بقى له عشر  
سنين ماوقفش لحظة واحده علشان يشوف داليا بقى شكلها ايه  
ولا طارق بقى عمره كام .. عشر سنين .. كانوا المفروض يبقوا أيام  
عزنا .. وعز شبابنا .. ضيعهم فى الجرى .. ورا الفلوس .. وقعد  
يدور فى الساقية ويحدف بدل المية دولارات .. استرلينى ..  
وريات .. ودينارات . وكل ماتكتر يعطش .. اكتر .. زى اللى ييشرب  
م البحر .. عمره ما يرتوى ولا يشبع ..

دالسيا : (تتقدم نحوها عابسة) انتى اللى خلتيه كده . انت اللى زميته على  
مية البحر .. أنا فاكره .. وأنا عمرى مايزيدش عن عشر سنين أما  
كنت تمسكيه كل يوم وهو راجع من شغله .. وتدى له كلام زى

السكاكين يشرّح في جسمه . وشوف لك حل يا أحمدى ..  
حاتفضل نايم لأمتى؟ بقينا عره فى وسط الناس يا أحمدى  
اتحرك زى بقية الناس .. إعمل حاجة .. إحنا مش حانفرح بيبك  
وانت كل يوم داخل علينا ايد ورا وايد قدام .. وكل الكلام اللى  
اتحفر فى دماغى وقطع فى لحمه هو ...

**نجوان :** (وسط ذهولها وذهول الجميع) . بتقوللى أنا الكلام ده يا داليا؟ ..  
وقدام الناس؟ جت لك الجرأة تقفى تردحى لى ، وتفكرينى باللى  
حصل من عشر سنين .. واللى كان عشانك وعلشان أخوكى ..  
ودافنه كله جواكى وساكته ... وماقلتيهوش قبل كده ليه ؟

**داليا :** (تشيح عنها) قلت كتير ماكنتيش بتسمعيني .. (ثم تتقدم  
للأفانسين) . وهو كمان مابقاش عنده وقت يسمعنى ولا يسمع  
طارق .. انتوا الاثنين بتشوفونا قدامكم صور رايحه جاية ..  
حيوانات أليفة بتاكل وتشرب .. تضحكوا لها وتمسحوا على  
شعرها .. لكن ما تعرفوش لغتها .. ومش ناقص إلا تحطوها فى  
أقفاص وتعلقوها فى البلكونات .

**صاصة :** انتى بتتكلمى عن أخوكى يا أنسة ولا عن الباقين كلهم .. عن  
ميمى .. ووليد .. وحسام .

**زينه :** ماله ميمى يا جابر

**صاصة :** فروته ناعمة زى الحرير .. ومش ناقصه غير طوق فى رقبته  
ورخصة .. بس عيبه إنه عنده مخ وجهاز عصبى مركزى وكل  
مشتملات البشر زى ربنا ما خلقهم .. بيفكروا غصب عننا وعن  
محاولتنا لكبتهم وتحويلهم لمخلوقات داجنه معلبة ...

**زينه :** انت اللى مخك .. اتهرش من زمان وما تخلينيش افتق لك ..

**صاصة :** لا .. فتقى لى .. ياريت .. (للجميع) ايه رأيكم نفتق لبعض  
كلنا ... (يتقدم من داليا ونجوان) ... انتوا فتقتوا لبعض خلاص ..  
ولا لسة عندك كلام يا داليا ؟

دالـيـا : (تدير ظهرها له) أنا مفيش بينى وبينك صحوية ولا معرفة  
تخليك ترفع التكليف وتتادينى باسمى حاف.. وبالتأكيد لو عايزه  
أقول حاجة مش حاقولها لك.

نـجـوان : بعد إيه؟ مانت قلتي لكل.. ونشرتي الغسيل قدام عنيهم.. كملى  
لو لسه جواكى حاجة .

صاـصـة لا ياهانم.. داليا.. أقصد مدموازيل داليا غضبانه منى أنا  
بالذات.. يمكن أكثر من غضبها عليكى وعلى والدها. والحقيقة  
أنا محتار ومش عارف ليه..

دالـيـا : بسيطة ومفهومة.. لأنك صاصة مش ده اسم الدلع اللي بيدلعوك  
بيه؟ مناسب لك فعلاً وباعتبارك صاصة تبقى حتة م العالم اللي  
خانقنى/ عالم البيت ده.. والناس اللي فيه.. والناس اللي براه  
لكنهم شبهه.

زىـنـة : نعم؟ ماله البيت وماله الناس اللي فيه يانن عين مامتك ؟

دالـيـا : انت البيت ذات نفسه وأدرى باللى فيه.. وفيكى

زىـنـة : نعم يا شطورة؟ دى ايه النصيحة دى كلها ؟

صاـصـة : لحظة يا زيزى... أنا ..

زىـنـة : (بلهجة أمرة صارمة) انت تسكت وما تقاطعنيش .. (ملتفة

لداليا).. ايه اللي جوه البيت وجوايا يا بنت الناس الطيبين؟

بتلمحى لإيه؟ انت وهم.. وهم.. بتبصوا لى كده ليه ؟ هه..

(تزيح الاشارب من على رأسها).. رأسى آهى يا حبيبتي..

نضيفه.. سليمة.. ما فيها بطحة.. تعالى.. مدى ايدكى

وحسسى.. مش حاتلاقى غير شعر حرير.. متحنى آه.. محطوط

له زيوت وكريمات يمكن.. لكن ما فيهوش دم ناشف ولا قشرة

جوح قديم.. كله طاب وراح وما سبش أثر.. مفيش حاجة ما

بيداويهاش الزمن.. الزمن نساى.. والناس زيه.. والإنسان من

النسيان.. ودى قدرة ربنا.. ومن نعمته على نسانى ونسى

الناس.. فضيت راسى من كل اللى كان فيها.. وماعدتش بافتكر  
إلا اللى يفرحنى بس.. وماحدث يقدر يفكرنى ولا يقلب على  
اللى فات.. ماحدث.. وبالذات انتى (تتقدم عن داليا التى  
تتراجع أمامها) عايزه منى إيه؟ حاوية الكآبة ولوية البوز من أول  
ما رجلك خطت بيتى.. البيت اللى مش عاجبك وبتلسنى عليه..  
انت تعرفى البيت كان أصله إيه.. ومين اللى عاشوا فيه سنين عمره ؟  
**داليا :** ماعرفش ومايهمنيش اعرف.. بس كارهاه.. قرفانه منه.. مش  
باحبه

**زيـنه :** ليه.. نهار اسود.. عمل لك إيه البيت ؟  
**صاصة :** من فضلك يا زيزى أنا فاهم الأنسة بتتكلم عن إيه (يستدير  
لداليا).. العالم اللى خانقك وخانقنا إحنا كمان يا مدموازيل..  
لأنه عالم محروق.. كل الأحلام اللى اداها لنا حرقها قبل ما  
نوصل لها.. دخان حريقها بقى هو اللى واصل لكم وكاتم على  
أنفاسكم. لكن انتم لسه عندكم فرصة تهربوا منه.. اجرؤا منه  
بالمشوار ماتبصوش وراكم.. كل اللى وراكم جثث اتخنقت وما  
قدرتش تهرب م الحريق.. اهربوا منها وماتقروش عليها حتى  
الفاحة.

**داليا :** انت بتكلمنى أنا ؟  
**صاصة :** أنت وهم.. واخواتك وأصحابك..  
**داليا :** اللى غرقوا النهاردة ؟  
**لسولا :** (تندفع فى شبه هيستريا) ما غرقوش.. ماتقولش عليهم  
غرقوا.. زمانهم فى السكة راجعين.  
**صاصة :** اهدى يا لولا..  
**لسولا :** اهدأ ازاي يا جابر؟.. هالة.. كبرت فى حضنى والحمدلله قدرت  
أربيها وأعلمها لما بقت عروسة  
**صاصة :** عروسة لين يال لولا؟ إياكى منمرة على سياح تقيل من زباينك!

جنسيته إيه بقى؟ ما تكشريش قوى كده.. ماهى الجنسية مهمة لأنها بتحدد العملة.. دولار.. يورو.. ريال.. دينار.. على حسب.

**سـولا :** حرام عليك ييا جابر.. بلاش انت.. سيب المعايرة والمقيطه للى مش عارف وخليك فى نفسك.. دارى البطحة اللى على راسك قبل ما تمسك حجرة وتبطح غيرك وما تنساش إن زينة لمتك معايا من نفس الشارع.. وان أنا وانت أكلنا من ايدها. وأديك لايد فى حجرها مخبى وشك عن الدنيا اللى بره زى ما تكون عامل عمله وخايف.. أنا على الأقل باشتغل وباربى أختى.

**صااصة :** بتشتغلى آيه با لولا؟ سياحة برضه زى مايتقولى للناس ؟

**سـولا :** سياحة ولا صياغة ولا أى هباب.. المهم انى باشتغل فى اللى باملكه.. مابجوررش على ملك غيرى ولا بارمى بلايا على حد الدور والباقى عليك ولا عندك حاجة تشتغل فيها ومقضى أياماك متمرط بتاكل فى قته محلولة من فلوس العار اللى بتقيطنى عليه

**زيننة :** (متدخله) كفاية يابت.. ولا كلمة واحدة زيادة...

**صااصة :** سيببها تقول كل اللى عندها.. ليلى ما غلطتش.. (ملتفتا للآخرين) أصل اسمها الأصلي قبل ما تتدلع لزوم الشغل طيبة وغلبانه رغم اللى قالتة فى دلوقت.. (مستديراً لزينه).

**زيننة :** (منسحبه.. بلهجة تهديد) أنا داخلة استنى ميمى جوه وأطبخله لقمة زمانه يا كبدى هبيان من الجوع.. ما تدخله شققكم انتوا كمان اعملوا ذى.. حصلنى يا جابر عشان عايزاك (بعد خروجها.. يلوح صااصة بزراعيه فى استسلام).

**صااصة :** أمر والأمر فى الحالة دى لازم يكون مشمول بالنفاذ.. شروط العقد غير المكتوب.. بينها وبينى واللى أنا أجبن من مخالفتها.. عن أذنكم

(يخرج.. إظلام جزئى. شبح صااصة يعبر حائط إلى ديكور صالة زينة)

## المشهد الثانى

المنظر: حجرة النوم بشقة زينة

إضاءة لجزء الديكور الذى يمثل حجرة زينة (قد نفكر فى جعل الجدران مفرغة فتكون الحجرة أشبه بالقفص.. ويكون فى الحالة وجود الشخصيات المجتمع فى ساحة البيت حاضرين فى المشهد.. زينة مستقلة على فراشها الذى تتدلى من قوائمه بسرير نحاس من طراز قديم) الزينات التى تعلق عادة فى الكباريهات.. وصور عارية أو شبه عارية لفتيات.. صاصة . يدخل وقد أمسك بآلة ساكسفون.. يعزف عليها (نصفه فى نقطة مظلمة).. بعد فاصل ساكسفون قصير)

زينة : الله ! .. حلو قوى يا حبيبى..

صاصة : يعنى حاسبينى اللعب ساكس ؟

زينة : وأنا حاحوشك ليه ؟

صاصة : طول عمرك بتحوشينى..

زينة : (تهب جالسة) ميمى؟ .. انت رجعت ؟

صاصة : (يتحرك ليصبح كاملا فى منطقة ظل).. فى وقت مش مناسب مش كده ؟

زينة : كنت فىن يا حبيبى؟ .. أنا قلبى اتخلع م القلق عليك..

صاصة : يا ريتة صحيح ينخلع وتكسر قضبانه .. علشان أقدر أهرب...



(بقعة ضوء يدخلها صاصة بينما باقى الحجرة مظلمة.. ويتقدم صاصة بالبقعة المضيئة إلى المقدمة) ايه اللي خلانى أرجع بعد ماهربت فعلاً؟.. ايه اللي غوانى بحلاوة النوم غمّس لى لقمتى بالعسل المسموم؟.. كنت صايح صحيح.. أجوع.. وأنا م عالرصيف.. واعاشر الأوباش.. واتسطل.. واسكر... واتاخذ تحرى.. واترمى فى التخشيبة لغاية ما فوق واندّه للمحامى اللي شايلى بطاقتى معاه عشان ماتضيعش.. كنت كده وازفت من كده لكن كنت حر.. كنت حر لأنى ما عتمدتش على حد يصرف على.. (دبيب أقدام عرفة على المسرح)

عـرفـه : (قبل أن يدخل فى بقعة الضوء) مشكلتك ماكانتش الفلوس يا جابر؟ وماهيش الفلوس دلوقت.

صـاصـة : انت يا عرفة اللي بتتكلم عن الخسارة والتسليم؟ انت يا بتاع خمسة منه سنة سبعة وستين؟

عـرفـه : أنا مش بعايرك.. لأن الهم طايلى وطايلىك.. احنا الاثنين لما خسرنا اتدارينا فى بيت زيزى

أنا جريت هريان من مديحة الحرب الخسرانه وقلت سعد هو اللي حاياخذ بايدى.. أتاى سعد لحق نفسه بدرى وهرب هو كمان منها...

صـاصـة : من الحرب؟ سعد ماتجندش ولا دخلش أصلاً !

عـرفـه : وأنا ما قلتش انه هرب من الحرب .. أنا قلت انه هرب منها

صـاصـة : تقصد مين؟ زيزى دا كان بيعشقها

عـرفـه : وهو ميمى بيكرها ؟

صـاصـة : ميمى مخنوق ...

عـرفـه : وسعد كان مخنوق.. وأنا كمان .. مخنوق ..

صـاصـة : يعنى سعد وابنه اشجع منى ومنك !

عـرفـه : طبعاً.. إحنا الاثنين خرعين يا جابر.. أنا استسلمت لخوفى

وإحساسى بالعار والذنب وما حاولت أن أعمل أى حاجة واتكبيت  
كمشان فى ضل زيزى.. وانت ركمت مع أول باب اتقف فى وشك  
وفشلت فى انك تشتغل فى الجامعة والا وزارة الخارجية..

صااصة : (يقاطعه) أنا ما فشتلش.. هم اللي اغتالوا الحلم اللي... نمت عليه  
وصحيت بيه.. فى الجامعة.. كانوا عايزين عشر معيين على مستوى  
الثلاث جامعات الكبرى.. وكان ترتيبى الثالث.. خدوا الاثنين اللي  
قبلى والسبعة اللي بعدى وتامن بتقدير أقل وفى الخارجية نجحت  
فى كل الامتحانات وكنت الأول.. وانتظرت جواب التعيين..

عـرفه : صحيح مش عارف ؟

صااصة : اسكت !

عـرفه : أنا ممكن اسكت.. بس انت حاتسى ؟

صااصة : مستحيل !

عـرفه : (يقرب على كتفه.. يكاد يهمس) آمال عايش فى حضنها ازاي ؟

صااصة : لازم ابقى حته منها علشان ما قتلهاش

عـرفه : هو كمان يا جابر.. لأنه حته منها ما قدرش يقتلها.. وما قدرش

يبقى حر...

صااصة : ميمى ؟

(تضاء الغرفة وينسحب عرفة)

زينـة : مارجعش.. أنت اللي بتقلده يا صااصة.. (تتحرك مقترية) كنت

بتهلوس وما قدرتش أصدق هلوستك.. الأول افكرت انى باحلم..

لكن اتأكدت بعدها انك انت اللي نايم.

صااصة : أنا؟ أنا ما كنتش نايم.. انت اللي ريحتى عالسرير وخذتى تعسيلة

وحلمتى إن ميمى.. رجع.. وكنت بتهلوسى وتكلمينى على إنى هو...

زينـة : والراجل المجنون كان بيعمل ايه هنا...

صااصة : هو كمان سمع ان ميمى رجع.. جه يتظمن

**زيننة :** (كالحالة) والساكس؟ انت كمان بتلعب عليه حلو قوى.. وأول ما يرجع حاسم له يعزف عليه زى ماهو عاوز.. وحاشترى له واحد جديد من أغلى نوع.. بس يرجع (بعد لحظة) يارب يرجع...

**صاصة :** (مهاجماً) عايزاه يرجع ليه سيبه... يهج يفتح باب القفص ويطير... ويتنفس هوا نضيف مافيهورش ريحة بيوتك المكممة.. سيبه يبعد عن حضنك اللى خنقه وخلاه ميمى.. ميمى ابن أمه.. اللى ماشافش أبوه ولا يعرفهوش.. ولازم ياخذ شبه مامته... ولازم يطبع بصمتها على جبينه.. ومايتكلمش إلا بلسانها.. ومايسمعش غير كلامها.. افرجى عنه يا زيننه.... اطلقى سراحه... حرريه....

**زيننة :** والله بركة اللى فقت ولقيت لسانك وبتترافع زى المحامين... ونسيت إنك آخر واحد يحق له الكلام عن غيره... ويتهم الناس اللى مدوا له أيديهم وأنقذوه من التراب اللى إتمرمغ فيه... ولكن العادة كده... إتق شر من أحسنت إليه.

**صاصة :** أنا مابتكلمش عن نفسى لأنها ماعادتش تهمنى ومش حاناقاش حكاية إحسانك من عدمه.. ومش حاقول لك إن التراب اللى إتمرمغت فيه كان بسببك وأنتك لما مديتلى إيديكى واخدتينى منه كنت فى الحقيقة بتكلمى على وبترمينى فى زنزانك لآخر عمرى.. أنا باتكلم عن ميمى.. اللى كان طريقه مفتوح ومستنيه يخطى خطوة خطوة واحده بعيد عن نفس الزنزانة وياقول لك ساعديه.. ولو ربنا نجاه م اللى حصل النهارده حبيه بجد وابعديه عنك.

**زيننة :** ميمى ابنى.. وعمرك ما حاتحبه قدى ولا حتعرف مصلحته أكثر منى.. علشان كده ابعد انت عنه ومالكش دعوة بيه.. ولعلمك أنا مراقبه كويس محاولاتك معاه وخططك اللى بترسمها علشان تملا دماغه بتخاريفك وأفكارك القديمة اللى ضيعتك زمان (....)

إوعى تكون فاكرنى نايمه ولا مسطوله ومش حاسه باللى بيحصل  
حواليه... ومش واخده بالى من سجائر الحشيش والبانجو اللى  
بتديها له.

**صاصة :** وساكته ليه؟ سايبانى أْخَرَبْ فى ابنك وأدمره وقاعده تتفرجى؟  
ماأظنش.. كان زمانك طبقتى فى زمارة حلقى وخنقتينى..  
والتهمه دى انت عارفه إنها مش صحيحة.... وعارفه إن السجائر  
دى إبنك جاييها من بره.

**زيننه :** كداب .. إالى أعرفه ان جواك كره وحقد مالوش آخر.. وضدى  
أنا بالذات وعاييز تنتقم منى وتثبت لى إن ابنى مش حا يفلح وحا  
يخيب خيبتك وأنه حايفشل زى ما فشلت.

**صاصة :** أنا ما فشلتش يا زيننه .. أنا انضريت ضربه جابتنى الأرض....  
وانت اللى ضربتيني أوعى تكونى مش عارفه صحيح السبب اللى  
قضى على أحلامى ومستقبلى وخلانى أبقى كده.. إنسان مخوخ  
من جواه.. صاصة أيوه أنا بقيت صاصة بالفعل مش علشان  
المصاصة والغنوة اللى بتغنيها لى لأ علشان بقيت نموذج لنوع  
جديد من البشر.. الإنسان الصايص اللى مالوش قوام وملوش  
وزن.

**زيننه :** استنى عندك .. ماتقولش أى كلام وترميه على جنب وتمسك فى  
غيره.. وقوللى إزاي ضربتك وجبتك الأرض.. وإيه هو السبب  
اللى قضى على أحلامك ومستقبلك ؟

**صاصة :** فى الجامعة.. ووزارة الخارجية.. فى المرتين يا أختى العزيزة..  
أنام على حرير وأحس إن فرصتى جت لى خلاص وقرار التعيين  
حايتمضى.. وفى آخر لحظة باب الأمل يتزرع فى وشى..  
والفرصة تضيع.. أسأل.. يقولوا لى.. أسفين.. التحريات بتقول  
إن أختك حوالها شبهات ولها ملف فى الآداب..

**زينة:** (تتسمر فى مكانها .... مؤثر موسيقى تتحرك معه قاطعة منطقة الظل إلى الأفانسين) الكابوس... وراكى يازينه والوحش اللى غرز أنيابه وضوافره فى لحمك وشرب من دمك وقطع جلدك .. وفضل ملازمك زى ضلك واتسحب لغاية مادخل جواكى وبقى نصك وشاركك فى لقمته وأنفاسك ودقات قلبك .. مهنالكش على فرحه .. ولا سابك تكملى حدوته .. حب... واستخسر فيكى لحظة أمان وحرمان من راحة بال تكنى فيها يومين جنب الحيط. ودى قصة حياتك.. وحش يفترس عرضك وانت بنت ستاشر جعانة عريانة وحدانية.. وكابوس يعيش فى نهاية طريقك ويكتفك بلعنه ماتنتهيش لعنة تأخذ منك الراجل الوحيد اللى حبيته وتحذفه على سكة الضامعين.. سكة اللى يروح مايرجعش. ويتحطم 'خوكى تحت رحاية من حجر صوان تطلعه مسحوق بنى آدم مافيهوش روح وضل بيتحرك حواليكى وشبح بيتحنجل قدامك كل لحظة علشان يفكرك ويحاسبك ويقول لك مفيش غفران والذنوب للأبد.. واللعة باقية مستتية اللى بيخطى لسه أول عتبه (إظلام).

**صاصة:** (صارخاً فى بقعة ضوء) ميمى.. اللى بيقلولوا له يابن زينه.. اللى راح النهارده يدور على خلاصه فى موج البحر.. (بقعة الضوء تتبع صاصة الذى يمك بالساكس ويقترب من المقدمة يبدأ النفخ فى الساكس.. الصوت خافت تختلط بنحيب زينه)

إظلام كامل BLACK OUT

(إضاءة كاملة فى المساحة مع إخلاء ديكور الغرفة)

(داليا جالسة على حافة النافورة.. نجوان بجوار سور البوابة)

**نجوان:** وبعدين يا داليا.. هتبقي انتى وابوكى.. بتجربى وراكى ليه

**داليا :** يا ماما أنا مقلتكيش تجرى ورايا  
**نجوان :** طيب وانت سبتنى لوحدى ونزلتى ليه  
**داليا :** لغاية ما اتأكد م اللى حصل لطارق  
**نجوان :** محصولش حاجه  
**داليا :** ياريت يا ماما أنا حاولت اضرب له خمس مرات... مفيش  
 فايده... الظاهر كان بيتهيا لنا  
**نجوان :** (بحده) ماتقوليش كده... وماتقوليش على أخوكى....  
**داليا :** ماتصرخيش يا أمى... وهدى أعصابك... أنا باحب طارق.  
 وحاطيرم الفرحة ساعة ما حاشوفه داخل من البوابه دى...  
 وحافير معاملتى معاه خالص.. حاقرب منه. واعمل المستحيل  
 علشان أكسب ثقته وأخليه يتطمئن لى ويحس بالأمان معايا وأبقى  
 مستودع أسرارہ ...  
**نجوان :** ياريت... يمكن لو عملتى كده تتغيرى إنت كمان وتبصى للعنبر  
 بعين حلوه وتشيلى التكشيرة اللى واكله وشك وملامحك...  
 وتدخلى على سنة الليسانس اللى فاضله ونفسيك أحسن..  
**داليا :** ما سألتيش نفسك مرة إيه اللى خلانى كده؟ وليه كل ما أكبر  
 المسافة اللى بينى وبينك بتكبر؟  
**نجوان :** ياريت تقوليلى...  
**داليا :** إبقى إسألنى طارق لما يرجع.  
**نجوان :** وطارق حيعرف منين؟ طارق يا حبيبى فاهمنى أكثر من أى حد  
 فى الدنيا... وفاهمنى صح من غير عقد... ومافيش بينى وبينه  
 أى وساوس أو ظنون...  
**داليا :** متها لك  
**نجوان :** (تستدير لها بحده) حاتحسى بمشاعر طارق أكثر منى ؟  
**داليا :** لأ طبعاً.. وأنا ما عنديش أى شك فى مشاعر طارق ناحيتك..  
 بالعكس.. دا حبه ليكى هو أكثر شىء معذبه...

نجـوان : معذبه؟ طارق بيتعذب؟ وحبه ليا هو اللي معذبه

داليا : مش ممكن تكونى ملاحظتيش

نجـوان : طبعا ملاحظتش لأن اللي بتقوليه ده تخاريفك وتهيؤاتك ! وطارق

سعيد جداً وماعندوش أى مشاكل... وجاب مجموع فى الثانوية

السنة اللي فاتت ودخله الطب مستريح...

داليا : ياه... وتلاقيه كان بيتنططم السعادة كل ما يشوفك رالكبه مع

الأستاذ رفعت ابن عم حضرتك ركه عربية بابا الجديدة اللي

جابها عالزيرو السنة اللي فاتت ورايحين جايين بيها كل يوم

تقريباً لغاية بابا مايرجع فى الأجازة... ويختفى أونكل ما يبانش

(تتجمد نجوان مكانها.. وقد بوغتت.. بينما تواجهها داليا فى

تحدى وقد عقدت زراعها حول صدرها)

نجـوان : (بصوت متحشرج) طارق .. قال لك إنه شافنى رايحه جايه مع

أونكل رفعت؟

داليا : ماكانتش معلومة جديدة بالنسبة لى لأنى شفتها قبله... بس

بالنسبة له هو .. كانت صدمه.. ممكن تموته... أو تخليه مثلاً...

يفكر يرمى نفسه فى البحر..

نجـوان : عارفه إن أونكل رفعت عامل شركه هو وباباكي وإن باراعى

مصالح الأحمدي طوال ما هو...

داليا : ما هو إيه؟ بعيد؟ آه هى دى المشكلة.. بعدتيه وبعدين بتلوميه

على بعده مش بس كده.. ده انت بتعاقبيه كمان... ويا ترى اتفقتى

مع أونكل رفعت على إيه ؟

نجـوان : (مدافعه فى حده) حاتفق على إيه يا مجنونة؟ دى علاقة قرابة...

وشغل... وبس....

داليا : (وكانها لم تسمعها) يمكن تستنوا لغاية ما يبقى الأحمدي إكسبايرد

ويرجع من بلد الفلوس بآخر شوال مليون.. تاخدوه وتقولوا له

طلاق.. إذا ماطلقش يتخلع أو يتوزع فى كام كيس بلاستيك.

نجـوان : (تفاجئ داليا بصفعه على وجهها وهى تصرخ) كفاياكى بقى..

انت مش بنتى.. انتى واحدة شاذة.. مجنونة... مجنونة

داليا : مش أول مرة تضربينى.. بس بالتأكيد آخر مرة.. ومش هسمحلك

تعملها تانى (يدخل الأحمدي).

الأحمدي : داليا..

داليا : بابا انت ماسفرتش

الأحمدي : الحمد لله افكرت فى آخر لحظة. داليا لو سمحتى هاتيلى شنط

اليد الصغيرة هتلاقىها عالكومودينو.. بس بسرعة يا حبيبتى

داليا : حاضر يا بابا (تخرج داليا)

نجـوان : تعالى هنا بعيد عن الكل واسمع الكلمتين دول منى إحنا استكفينا

يا أحمدي من خلاص ما بقناش عايزين فلوس

الأحمدي : من امتى.. وبعد إيه يانجوان؟.. كان أحسن لك تسببيني

وما تجبرينيش على الكلام

نجـوان : والله؟.. عندك كلام عايز تقوله؟

الأحمدي : أنا مش عايز.. علشان الشعرة بتاعة معاوية تفضل.. لكن لو انت

مصره تسمعى ما عنديش مانع. بس تكونى مستعدة تتحملى النتائج.

نجـوان : ايه لهجة الإنذار دى يا أحمدي ؟

الأحمدي : بافطنك يانجوان.. ما تستعجلش وفكرى .. مصره تسمعى؟

نجـوان : وأكثر من أى لحظة فاتت

الأحمدي : وهو كذلك.. (بيتعد خطوات) أنا يا زوجتى العزيزة باجرى ورا

الفلوس ومش عايز اقف واخذ نفسى مش عشان أرضيكم.. لا.

علشان لو وقفت حافكر. ولو فكرت حاقف قدام نفسى وأشوفها

على حقيقتها..

نجـوان : كل المقدمات دى علشان ايه؟ ماتكلم دوغرى !

الأحمدي : دوغرى؟.. حاضر.. عندى سؤال دوغرى.. تعرفى ايه عن داليا

كوم؟



نجوان : (تفاجأ نجوان..تتراجع خطوة) داليا كوم ؟  
الأحمدى : ايه؟.. مش فاكركه اسم مكتب الكمبيوتر وأجهزة الاتصالات اللى  
شاركتى فيه الأستاذ رفعت ابن عمك بفلوسى.. وفلوس ولادى؟  
مشروع المستقبل اللى بتوضبوه سوا.. المستقبل اللى مافيهوش  
الأحمدى.. التور اللى غميتوا عنيه ودورتوه فى ساقية مابيبطلش  
لف؟ مستتية ايه علشان تطلبى الطلاق يا نجوان هانم؟.. لما يتم  
تجهيز المكتب؟

نجوان : انت غلطان ومش فاهم.. المشروع ده بتاعك وبتاع ولادك و...  
الأحمدى : (مقاطعا فى خشونة) بلاش كذب لو دى نيتك.. كان العقد اكتب  
باسمى واسمك واسم ولادك. صدقيني يا نجوان.. أنا مش حزين  
عليكى.. ووقت ماتطلبى ورقتك حا رميها لك لأنى خلاص أنا  
كمان رتبت حياتى هناك.. وبقي لى بيت حقيقى وزوجه بجد عن  
إذنك !

ولا لسه عايزه تتكلمى معايا؟ (تدخل داليا)

داليا : الشنطة اهه.. يا بابا

مرسى.. يا حبيبتى.. سلميلى على طارق

نجوان : احمدى .. يا أحمدى

(يخرج الأحمدى.. بينما تدخل لولا قادمة من شقتها)

لولا : (مادة يدها بالموبايل) ماتشوفيهولى ماله يامدموزايل...

داليا : (تستدير لها).. الموبايل؟ (دموعها تتساقط بلا بكاء)

لولا : لا بيحيب ولا بيودى.. عماله أطلب هاله مابتدش... وماتطلبتيش

داليا : تناولها الموبايل التليفون عادى خالص يامدام.. مشحون وفيه شبكه

لولا : أمال إيه اللى حصل ؟

داليا : (تناولها الموبايل) ماحدش عرف يتصل بيهم ولا هم عرفوا

يتصلوا بجد. كل السلوك مقطوعه.

مقطوعه.

(هندام تدخل كالوس المقدمة).

لـولا : يعنى كان بيتيهيا لنا؟.. بس إزاي؟ دانا سامعاها بودنى. هى هاله.  
مفيش شك والشاشه عليها نمره الموبايل بتاعها..  
هنندام : مش هى يا ست لولا....

لـولا : (تتحول نحوها بلهفة غاضبة) إيش عرفك؟ حاتحفظى نمره  
أختى أكثر منى؟  
هنندام : العفو يا مدام... أنى حفضاها صحيح... بس إنتِ طبعاً...

لـولا : آمال إزاي بتقولى مش هى؟  
هنندام : أصلى طلبتها م الموبايل. اللى فارش بيه عدوى السقا على القمة  
خمس مرات ويطلع صوت الست اللى بتقول الجهاز مغلق ولا  
خارج مش عارفه إيه..

لـولا : (تتهالك جالسة بجوار داليا التى جلست على حافة النافورة)  
يادى المصيبة اللى وقعت على دماغك يا لولا... آمال اللى سمعناه  
ده إيه...؟

صااصه : (قادمًا من شقة زينه) دا اللى عايزين نسمعه يا لولا...  
لـولا : مش فاهمه يعنى إيه.  
صااصه : متهيألى الأستاذة داليا فاهمانى...

داليا : (تشيح بوجهها) ماحناش فايقين لسخافاتك !  
صااصه : بغض النظر إحنا لازم نسلم بأن الأولاد يحتمل باقول سحتمل  
يكونوا مش

زيـننه : مش إيه؟ ما تسبب كل خبر بييجى فى وقته..  
صااصه : فقتى من الكابوس.. ماتقلقيش أنا بس باحاول أمهد.... علشان  
الصدمة ما تبقاش مرة واحدة..

زيـننة : الصدمة خدناها كلنا ساعة ما دخل علينا سنجابى ورمى خبر  
الشوم.

صااصه : واحنا صدقناه فى ساعتها... كأننا بنتلكك. مع إننا لو فكرنا شوية حنلاقيها مش معقولة... إزاي سته ينزلوا البحر قدام ناس مالىين البلاج وفى عز الظهر... ويفرقوا واحد وارا التانى وماحدث ياخذ باله.. ولا حد يسمع استغاثتهم..  
(ينفجروا لولا وداليا وزينه وهندام فى البكاء بصورة أقرب للنهضة المنغمة.. يدرون فى شبه حلقة بأداء تعبيري بسيط..  
يتقدم صااصه ليخترق الحلقة...)

صااصه : (مستطرداً) والهدوم مش دليل على حاجة.. السنجابى لقاهم.. دور على أصحابهم مالقاهم مش وسنجابى ده مش موثوق قوى فى إترانه أو قدراته العقلية.. ولية سوابق.. والنهاردة ساعة يقول ركبوا لنش وأصحاب اللنش لقيوه فاضى.. وساعة يقول إنهم نزلوا الميه واحد وار التانى.. (بينما يتقدم شعبان الذى ينصت إلى ما يقول صاحبه . حلقة النساء الباقيات مستمرة وأصواتهن تورق فى الخلفية...)

شعبان : فيه حاجة كمان بعد إذنك يا باشا... الموبايلات !

صااصه : مالها الموبايلات

شعبان : سنجابى عدم المؤخدة لقى هدومهم ورجعها وبعدين البوليس اتحفظ عليها... فین بقى الموبايلات اللى كانت معاها؟.. ولا كانوا حاينزلوا الميه بيها ؟

صااصه : (مفكراً) أيوه أيوه صحيح.. بس... مش جايز ماخدوهاش معاها؟

شعبان : لا يا أستاذ.. دول خرجوا قدام عينيا وكلهم معاها موبايلاتهم.. يمكن بس المزمازيل قريبة الست لولا اللى مااعهاش... وبعدين طول الأيام اللى فاتت كان لهم نظام لما ينزلوا البحر.... واحد منهم يفضل تحت الشمسية حارس على الهدوم والشنط والموبايلات.. ويبدل مع واحد تانى بعد شوية... واللى وراه يبديل يعنى ورديات عدم المؤاخدة...

صااصة : وده معناه إيه يا شعب ؟  
شعبان : متهيألى باينه يا باشا .. (يتحرك إلى هندام) بينا إحنا يابت...  
ورانا شغل (ينصرف معها)  
صااصة : أيوه.. باينه من زمان بس إحنا اللي مش شايفين.  
(من البوابة تتقدم بثينة يسندها خريوش)  
خريوش : ياللا.. وصلنا خلاص.. متستموتيش فيها بقى... انت كويسة  
والدكاترة قالوا مش لازمك غير الراحة والنوم.... حاطللك  
أودتك وأديكى القرص وتنامى  
بثينة : آه... وتسيبنى وتروح لها..  
خريوش : سبحان الله.. انت فى إيه ولا فى إيه؟ فكرى طيب فى ولادك  
الاثنين وأقرى لهم قرآن وإدعى ربنا يكشف لنا مصيرهم  
(حلقة البكاء تتوقف بمجرد دخول بثينة إلى الساحة...)

بثينة : عايزهم صحيح يا عزت  
خريوش : لا إله إلا الله.. فيه أب مش عايز ولاده ؟  
بثينة : عايزهم زينة الحياة الدنيا.. مش كده؟ لكن تعرفهم ؟  
خريوش : أطف بينا يا كريم !  
بثينة : بتدعى لى ولا بتدعى لنفسك ؟  
خريوش : لنا احنا الاثنين.. لا.. لكل الناس دول..  
بثينة : آه.. بس مش كل الناس عُمى زينا يا عزت.. فيهم كتير برضه  
عرفوا ولادهم وشافوهم كويس.. لكن اللي زيك.. وزى.. ربوا  
أولادهم غيّة.. هواية.. زى اللي بيروى ققط سيامى ولا  
عصافير.. ولا كلاب لولو وكانيش.. مزاج ومتعه.. بس  
صااصة : الله يا بثينة هانم.. الله..  
خريوش : يا سلام؟.. تكونش أم كلثوم بتغنى ؟  
صااصة : شش.. ماتشوشرش عليها.. قولى يا أبله بثينة كملى.

بثينة : (تتحولى إليه لحظة.. ثم تدبر راسها بين الجميع).. ماشفناهمش  
وهم كانوا شايفينا.. وإحنا فاكرين انهم مش شايفينا.. ودى  
المصيبة... نعمل اللى بنعمله من وراهم.. أو متهياً لنا إنه من  
وراهم.. وهو قدام عنيهم.. باين.. زى عين الشمس.. يطاطوا  
روسهم قهر وكسوف.. كان فى نفسهم يتباهوا بينا.. ويقلدونا..  
ونبقى بالنسبة لهم شموع تنور لهم سكتهم لكن يا خسارة ما  
لقيوش مننا إلا الخيانة والعمى والأنانية.

خريوش : يا نهار نيله.. هم أدوكى آية فى المستشفى يام وليد ؟  
صاصة : يا عم انت ماتقاطعهاش..

خريوش : اما انك حشرى وبارد صحيح.. دى مادمتى يا فقري.. ايه اللى  
دخلك بينى وبينها؟

صاصة : مدامتك بتكلمنا إحنا يا حاج...

بثينة : سينا يا عزت وروح لحالك ؟؟

خريوش : ايه؟ أسيبكم وأروح لحالى يعنى آيه يا بثينة؟

بثينة : يعنى خلاص.. كنت برو عتب وسد خانة قوام قوام وترد جرى  
على البت اللى اتجوزتها من ست اشهر..

خريوش : أنا؟ أنا؟

بثينة : ايو انت.. مكسوف؟ ولا خايف؟

خريوش : (يزوم مهدداً) مش قدام الناس..

بثينة : ليه؟.. ماهم الناس شايفينك وعارفينك.. وعلى يدهم.. واخذ  
للعروسة فيللا بالشىء الفلانى فى زهراء العجمى... ورامينى  
أنا والولدين هنا.. أكثر من مرة يقضوا ويقولوا لى يا ماما  
واجهيه انصحيه وفوقيه وقولى له إن ريحته فاحت وملت  
الدنيا.

خريوش : ريحتى؟.. مالها ريحتى... زى الفل.... باستحمى كل يوم ويادلق  
على جتنى بارفانات فرنساوى أقل قزازة بالشىء الفلانى....

**بثينة :** ريحة فعلك وعمايك.. والسكة اللي انت فاتحها مع حماك  
 الجديد على التهريب والرشوة والنصب وال...  
**خريوش :** (يسرع بوضع يده على فمها) يخرب بيتك.. اخرسى وفوتى  
 قدامى.. (يدفعها).  
**صاصة :** عندك يا سيد.. هى إيه..  
**خريوش :** (يقاطعه بغلظه مهدداً) لحد هنا وخلص الهزار.. وقسمًا برب العزة لو  
 هوبت ناحيتى ولا ناحية بيتى لارميك فى المالح ورا الستة اللى غرقوا...  
 (وزوجها يدفعها فى طريقهما للخروج نحو مدخل السلم)  
**بثينة :** أسألو الحاجة زينة وهى تكمل  
 لكم الحكاية.. (الموجودون يتحركون ليشكلوا شبه قوس يواجه  
 الحاجة التترقعهم فى توجس)  
 ايه؟ مالكم؟ اوعا تكونوا صدقتوها! أنا ما عرفش حاجة عنها لا  
**زينة :** عن جوزها.. دول سكان زيكم؟ جابهم لى شعبان.. وبعدين إحنا  
 فى إيه ولا فى إيه؟ خالونا فى المصيبة اللى احنا فيها..  
 بس انت كنت عارفة عزت خريوش من زمان يا أبلتى....  
**سول :** (فى غضب جامح) قلت لك ميت مره أبلتى دى ماتجيش على لسانك...  
**زينة :** ماتغيروش الموضوع... خليكوا فى أهم حاجة قالتها الست بثينة...  
**صاصة :** كنا بنشوفكم إزاي... ميمى كان بيشفوك إزاي يا زينه هانم؟  
**داليا :** زى أنا ماشفتها.... بس أنا هريت وراها.. هو هرب قدامها...  
**صاصة :** أتارياها يا حبيبتي!... مرة كانوا عاملين حفلة لأولياء الأمور فى  
**سول :** المدرسة.. ماقالتلش.. وعرفت بعدها صدفة إنها أجرت ولى  
 أمر بالفلوس وراح معاها الحفلة.. كانت بتستمر منى..! طب ليه؟  
 (تتجه إلى صاصة) ليه ياسى جابر؟ دانا فنانة...  
**صاصة :** (ساخراً) طبعا.. وفنانة قوية جداً... بس المشكلة هى إزاي هالة  
 أختك الصغيرة اللى إنت مربياها شايفاكى.. مش إزاي إنت  
 شايفه نفسك.

**داليا :** على فكرة انت ماتحطش نفسك معانا .. لأنك معاهم ...  
**صاحه :** إزاي؟ أنا ماعنديش ولد ولا بنت .. أنا ماتجوزتش أصلاً .. يمكن  
 ماكونش قدكم فى السن ... بس مانيش أكبر كثير .. أنا برضه من  
 اللى شافوا ومااتشافوش (.. زى .. زى ميمى ابن أختى .. على فكرة  
 يا حاجة مين اللى سماه ميمى؟  
**زينه :** دا اسم دلح ... ندهنا له بيه وهو صغير .. وفضل معاه لما كبر ...  
**صاحه :** ندهتوا له بيه؟ مين انتوا بالضبط ؟  
**زينه :** (تشيح عنه) مش فاكدة ...  
**سولا :** بس أنا فاكدة ... اللى سماه جوزك التانى .. اللى اتجوزتیه بعد عم  
 سعد على طول ... وقبل المعلم حزين بتاع دمنهور ..  
**زينه :** يامجنونة يا بنت المجانين !  
**سولا :** العرفى نمرة اتين يا أبله ! ... لسه برضه مش فاكدة ؟  
**زينه :** لى هدومك وامشى يا ليلى ...  
**سولا :** ياخواتى أنا عملت إيه؟ دانا بافكرها .. الولية كبرت والذاكرة  
 بتاعتها بقت فى الطراوة  
 (يدخل عرفه ممسكاً ببروجى ... وقد وضع فى قدميه حذاء بياده  
 ميرى)  
**عرفه :** (يدق الأرض بقدميه) إنتباه .. (يعزف على البروجى ما يشبه  
 نوبة رجوع)  
 (يتسمر الجميع مكانهم .. ومن نافذة تظهر نجوان ... ومن عند  
 البوابة .. من كالوس المقدمة .. يدخل طابور المفقودين ... الجميع  
 بمايوهات عليها بشاكير وفوط .. ورعوسهم جميعاً مبللة .. والمياه  
 تقطر منهم .. على وجوههم جميعاً أقنعة تمثل شكلاً واحداً ...)  
 ولادكم رجعوا .. أهم قدامكم ...  
 طارق الأحمدى زاهر ...  
 (طارق يرفع قناعه ... يبدأ فى الحركة الطبيعية ..)

داليا : أخويا ..

طارق : السندباد هنا ولا فى مصر ؟

داليا : جه بيت بالليل ومشى الصبح... لكن إنت كنت فىين ؟

طارق : (يحيط كتفها بذراعه...) تعالى...

نجوان : (من الفتحة) طارق حبيبى.

طارق : أكل ... جماع

(يخرج هو وداليا)

عمره : محمد سعد الأشقر

(يرفع ميمى قناعه)

زينه : فى حضنى يا حبيبى (تفتح ذراعها .. وكله يستدير إلى صاصة)

ميمى : استنى يا زيزى شوية ما حصلتناش ليه ياخالى زى ما وعدتنى

امبارح؟

صاصة : راحت على نومة يا محمد .

ميمى : طيب تعالى بقى أسمعك آخر شريط ساكس نزل السوق تحفه

(يتحركان خارجين..)

عمره : حسام عزت خريوش ووليد عزت خريوش

(الأخوين يرفعان قناعيهما .. فى لحظة اندفاع خريوش للساحة

من مدخل السلم)

خريوش : كنت فىين يا صايح منك له ؟

وليد : ماما فوق يا عزت ؟

خريوش : لا سافرت نيويورك.. عندها ميعاد مع كوفى عنان !...

حسام : آه... دانت معمر المخروبة.. ولسه حاتخر درر

وليد : أجرى بقى عالمجمى وروش روحك.. ماسبتلناش حتة نضرب بيها

سجارتين؟

حسام : (يتأبطان كل زراع الآخر خارجين إلى السلم) ابقى سلم عالعروسة !

(يخرجان وهما يترنمان إحدى أغاني الفترة)



عرفه : وأخيراً

(هالة وميريت يرتديان قناعيهما وتتغنيان معا فى شبه شنائى

نفس الأغنية التى بدأها وليد وحسام).

لـولـا : بنت يا هلول.. بت يا مريت.. ملهم دول ياعم عرفه ؟

عرفه : راجعين م البلاج حلوين ومفرشين .. سبيهم

لـولـا : أنا مش فاهمة حاجة.. هما كانوا فين؟

عرفه : مش مهم كانوا فين.. المهم راجعين إزاي ؟

(تكفان عن الغناء)

هـالـة : إحنا واقمين من الجوع

مـرـيت : طابخه لنا إيه يا لولا؟

(تهرع إليها.. تحاول احتضانها يلتفتان منها)

لـولـا : الحمد لله.. أنا قلبى وقع فى رجلى

هـالـة : حاسبى إحنا مبلولين..

مـرـيت : ياللا ناخذ شاور الأول وبعدين ناكل

(تجريان فتخرجان فى اتجاه شقة لولا تتبعهما)

لـولـا : (خارجة).. الحمد لله برضه !

(يبقى عرفه مع زينة)

زـيـنة : كنت مخبيهم فين يا عرفه ؟

عرفه : أنا ماخبيتش حد يا زينة !

زـيـنة : ماتستهبلش على.. أنا عارفة إن مخك هرسه الترام من زمان

بس اللعبة المرة دى رزله وكان ممكن تجيب مصايب ! (صوت

سرية بولسى بعيدة)

عرفه : لعبة ايه يا أم محمد؟ اللعب خلص من زمان... والجذ خلصان من

قبله.

(يدخل شعبان ومعه هندام)

شـعـبـان : كله ألسطة يا عم عرفه ؟

**عـرفه** : كله رجع للعش يا شعبان  
**هـندام** : بس العشوش ماعدتش أمان  
**عـرفه** : ومين يعوز الأمان لما يبقى موت يابنتي ؟  
**زينـة** : وانتوا كنتم معاها ؟ لعب فى دماغهم وهاودتوه ؟.. طيب لموا هدومكم  
ووروني عرض كتافكم انتوا الثلاثة ..  
( يندفع ص. البوليس داخلا )  
**زينـة** : دول هم يا عرفه ؟  
**عـرفه** : ( يتناول الصورة ) سلامة عنيكى يا زينة مش هم ..  
**زينـة** : هم !  
**عـرفه** : لا .. مش هم ..  
**زينـة** : هم ولا مش هم يا ناس حاجنن .. لا .. دا الكابوس .. الكابوس  
مش عايز يسيبنى ها يفضل ورايا لغاية ما يقتلنى .. صاصة  
الحقنى يا صاصة  
( من الشرفة .. صاصة يتقدم )  
**صاصة** : ومين يلحقنى أنا يا زينة ؟  
**زينـة** : ( تهرع إليه بالصور ) قوللى ياخويا .. هم ولا مش هم ؟  
**صاصة** : ممكن يكونوا هم .. وممكن ما يكونش هم .. على حسب ما تتوى ..  
وكل واحد فينا ينوى .. حانفرج عنهم ولا لا ؟ .. حانحاول نشوفهم  
ونبطل نسجن عنيانا فى مرياتنا ولا حانفضل ضاريين عنيانا فى  
شمس الظهر من غير مانشوف ؟  
**زينـة** : احنا شفناهم دلوقت قدام عنيانا راجعين .. ( نتقدم الافانسين )  
بس زى ما يكونوا مش عارفينا  
**صاصة** : ( يتقدم خلفها ) أو مش عايزين يعرفونا .  
**عـرفه** : سيبوهم هم يقرروا .. وابعدوا عن طريقهم .. انتوا بالنسبة لهم  
ماضى مش عايزين يعيشوه  
**الضابط** : مش ده بيت الستة اللي غرقوا ؟

زينة : رجعوا خلاص يا حضرة الضابط.. متشكرين  
(ينسحب عرقه فى هدوء ومعه شعبان وهندام)

الضابط : هما مين اللي رجعوا ؟  
زينة : الأولاد الستة.. ماغرقوش ولا حاجة راحوا بلاج تانى بعيد شوية  
واتأخروا .. وبعدين جم.  
الضابط : آه.. أكيد الصدمة أثرت عليكى.. مش ابنك اللي اسمه محمد  
سعد الأشقر.. كان واحد منهم.

زينة : ايو.. ورجع معاهم  
الضابط : معلش ربنا يصبرك.. أنا جيت أبلغكم ان التيار رمى جثث الستة  
على شط الدخيلة.. وادى الصورة الفورية اللي اتاخذت لهم.. لكن  
دا مش كافى لازم أهاليهم يجوا يتعرفوا عليهم.. البقية فى حياتكم..  
(يخرج مسرعا وقد ترك الصورة فى يد زينة .. المزهلة...)  
عرقه : مالك يا زينة ؟

تانى بدالكم .. مش عايزين يكرروكم..  
صاصة : دا رأى.. فرصتهم الوحيدة انهم ينكرونا ينسوننا.. ولازم  
نساعدهم على ده لازم احنا اللي نختفى..  
زينة : لو ده حا يطهرنا ويكفر ذنوبنا.. أنا موافقة.. (منادية)  
الأحمدى... خربوش .. بثينة.. نجوان.. لولا.. ياللا..  
(يظهر المنادى عليهم داخلين من الكواليس)

زينة : عايزين ولادكم يعيشوا ويبعدوا عن الخطر وما يغرقوش تعالوا..  
تعالوا نمشى ونخلى لهم الطريق ما نبقاش إحنا قدامهم والبحر  
وراهم.. لو اختاروا مش حا يختارونا.. لأننا حجارة مرصوة على  
صدورهم تاريخنا لعنة مسطورة على جبينهم.. مش حا يختارونا  
لأننا امبارح اللي مافيهوش ذكرى تفرح.. ولا تنور طريق.. حا  
يختاروا البحر.. لأن احن عليهم مننا علشان كده لازم يبقى فيه

مصير غير مش حاشوفوه طول ماحنا قدامهم.. يلا.. ابعدوا  
خلوهم يشوفوا.. ماتضلموش عليهم نهارهم واتخلوهم يعيشوا  
الليل فى عز الضهر.

ستار

## الفهرس

مسرحية	
الناس اللى فى التالت	٥
مسرحية	
أولاد اللذين	١٢١
(مسرحية فى فصلين)	
مسرحية	
ليلة ١٤	١٨٣
مسرحية	
فى عز الظهر	٢١١

## مناذبيع

### الهيئة المصرية العامة للكتاب

#### مكتبة المعرض الدائم

١١٩٤ كورنيش النيل - رملة بولاق  
مبنى الهيئة المصرية العامة للكتاب  
القاهرة - ت : ٢٥٧٧٥٣٦٧

#### مكتبة ساقية

عبد المنعم الصاوي  
الزمالك - نهاية ش ٢٦ يوليو  
من أبو الفدا - القاهرة

#### مكتبة مركز الكتاب الدولي

٣٠ ش ٢٦ يوليو - القاهرة  
ت : ٢٥٧٨٧٥٤٨

#### مكتبة المبتديان

١٣ ش المبتديان - السيدة زينب  
امام دار الهلال - القاهرة

#### مكتبة ٢٦ يوليو

١٩ ش ٢٦ يوليو - القاهرة  
ت : ٢٥٧٨٨٤٣١

#### مكتبة ١٥ مايو

مدينة ١٥ مايو - حلوان خلف مبنى الجهاز  
ت : ٢٥٥٠٦٨٨٨

#### مكتبة شريف

٣٦ ش شريف - القاهرة  
ت : ٢٣٩٣٩٦١٢

#### مكتبة الجيزة

١ ش مراد - ميدان الجيزة - الجيزة  
ت : ٣٥٧٢١٣١١

#### مكتبة عرابي

٥ ميدان عرابي - التوفيقية - القاهرة  
ت : ٢٥٧٤٠٠٧٥

#### مكتبة جامعة القاهرة

بجوار كلية الإعلام - بالحرم الجامعي -  
الجيزة

#### مكتبة الحسين

مدخل ٢ الباب الأخضر - الحسين - القاهرة  
ت : ٢٥٩١٣٤٤٧

#### مكتبة رادوييس

ش الهرم - محطة المساحة - الجيزة  
مبنى سينما رادوييس

### مكتبة أكاديمية الفنون

ش جمال الدين الأفغانى من شارع

محطة المساحة - الهرم

مبنى أكاديمية الفنون - الجيزة

ت : ٣٥٨٥٠٢٩١

### مكتبة أسيوط

٦٠ ش الجمهورية - أسيوط

ت : ٠٨٨/٢٣٢٢٠٣٢

### مكتبة المنيا

١٦ ش بن خصيب - المنيا

ت : ٠٨٦/٢٣٦٤٤٥٤

### مكتبة الإسكندرية

٤٩ ش سعد زغلول - الإسكندرية

ت : ٠٣/٤٨٦٢٢٩٢٥

### مكتبة المنيا (فرع الجامعة)

مبنى كلية الآداب - جامعة المنيا - المنيا

### مكتبة الإسماعيلية

التمليك - المرحلة الخامسة - عمارة ٦

مدخل ( ١ ) - الإسماعيلية

ت : ٠٦٤/٣٢١٤٠٧٨

### مكتبة طنطا

ميدان الساعة - عمارة سينما أمير - طنطا

ت : ٠٤٠/٢٣٣٢٥٩٤

### مكتبة المحلة الكبرى

ميدان محطة السكة الحديد

عمارة الضرائب سابقاً

### مكتبة جامعة قناة السويس

مبنى الملحق الإدارى - بكلية الزراعة -

الجامعة الجديدة - الإسماعيلية

ت : ٠٦٤/٣٣٨٢٠٧٨

### مكتبة دمنهور

ش عبدالسلام الشاذلى - دمنهور

### مكتبة بورفؤاد

بجوار مدخل الجامعة

ناصرية ش ١٤، ١١ - بورسعيد

### مكتبة المنصورة

٥ ش الثورة - المنصورة

ت : ٠٥٠/٢٢٤٦٧١٩

### مكتبة منوف

مبنى كلية الهندسة الإلكترونية

جامعة منوف

### مكتبة أسوان

السوق السياحي - أسوان

ت : ٠٩٧/٢٣٠٢٩٣٠

مطابع الهيئة المصرية العامة للكتاب  
ص. ب : ٢٣٥ الرقم البريدي : ١١٧٩٢ - رمسيس  
[www.egyptianbook.org.eg](http://www.egyptianbook.org.eg)  
1 - mail - info@egyptian.org.eg